


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 25 Nov 2022 from source files dated 29 Jan 2022
5317ca58-7555-5e4c-a420-e1e9210e2df2

Contents

MATEO	1
MARCOS	54
LUCAS	87
JUAN	144
HECHOS	185
ROMANOS	236
1 CORINTIOS	259
2 CORINTIOS	282
GALATAS	297
EFESIOS	306
FILIPENSES	314
COLOSENSES	320
1 TESALONICENSES	325
2 TESALONICENSES	330
1 TIMOTEO	333
2 TIMOTEO	340
TITO	345
FILEMON	348
HEBREOS	350
SANTIAGO	367
1 PEDRO	373
2 PEDRO	380
1 JUAN	384
2 JUAN	390
3 JUAN	391
JUDAS	392
APOCALIPSIS	394

XTIIDZ NDZON DIOS MINE PQUIAA MATEW

¹ Jesús meñ ne pxeel Dios ga, lo xtii Abraham, lo xtii David, ga brieequia me. Lëë grë xmengoldoo me nu:

² Abraham goc pxoz Isaac, Isaac goc pxoz Jacob, Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsieel Judá),

Far goc pxoz Srom, Srom goc pxoz Aram.

⁴ Aram goc pxoz Minadab, Minadab goc pxoz Naasón, Naasón goc pxoz Salmon.

⁵ Salmóngoc pxoz Booz (Rahab brieelë tsieel Salmon),

Booz goc pxoz Obed (Rut brieelë tsieel Booz),

Obed goc pxoz Isai.

⁶ Isai goc pxoz rey David, David goc pxoz Salomón (lëë Salomón ga gop tsieel Urí wnaa ne bionie David).

⁷ Salomón goc pxoz Roboam, Roboam goc pxoz Abí,

Abí goc pxoz Asá,

⁸ Asá goc pxoz Josafat, Josafat goc pxoz Joram, Joram goc pxoz Uzí.

⁹ Uzí goc pxoz Jotam, Jotam goc pxoz Acaz, Acaz goc pxoz Ezequí.

¹⁰ Ezequí goc pxoz Manasés, Manasés goc pxoz Amón, Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel, Salatiel goc pxoz Zorobabel.

¹³ Zorobabel goc pxoz Abiud,

Abiud goc pxoz Liaquim, Liaquim goc pxoz Azor.

¹⁴ Azor goc pxoz Sadoc, Sadoc goc pxoz Aquim, Aquim goc pxoz Liud.

¹⁵ Liud goc pxoz Leazar, Leazar goc pxoz Matán,

Matán goc pxoz Jacob.

¹⁶ Jacob co nagon goc pxoz José, meñ ne ptsieelnia Marí.

Marí goc xniala Jesús. Meñ ne nacle diidz ga cxeel Dios guiaad lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdziñ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José len dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espiritu Sant pqualo tib mëed zdoo me. ¹⁹ Zeene bien Joséw, mine been me gocladz me mazd nsaan me Marí; sac sca rnabey ley ni zienalpaa me mine rnabey ley; per laa me gocladz zhlianse nzozit me, sacne racladzd me nriee xquielto Marí. ²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsieel luu; sac gon mëdyeen ne zoney me ga, Espiritu Sant bnabey pqualo win zdoo me. ²¹ Zeene gal dze ne laa win gal, JESUS cueelë luu win, sca grieele win sac win csilaa grë menladz win lo dol.

²² Ga brieequia mine bnee Dios padzeela, zeene bzeet zha ne biadnee xtiidz mew, rëb zho:

²³ Bii zan to ganle zeene laa tib meëdbgui yquiaalo zdoos tib wnaayeen ne gard gnee nguilo.

Zeene laa win gal, Emanuel grieele win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me pt-sieelnia Marí. ²⁵ Laa me wban tipse grop me per ib bgaald me Marí, haxta bded dze ne laa mëdyeen co gol. Bdzin dzew, laa win gol, dzigo bleelë José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse len dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ng-bidz bdzin Jerusalén, ² bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griin gol ga? Bdzion no tib mel nëz ne no no, mel co blu lo no laa win gol-le, min co ne ziaad no nu ziaaddzian no win.

³⁻⁴ Grë menquiedz Jerusalén, zeene bin zhow bzee zdoos zho. Laa Herod, riendraa me zha gun me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga.

⁵ Dzigo rëbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén, niicle ne winraaw lo grë guiedz ne ngab Judé, per nroob nona; sac gon ga grieequia tib men ne gnabey,

men ne so yquiaanap grë men Israel, ne nac zho zha ne ngab lo naa.

⁷ Nacne zhliianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga goltsie goltsieguib mëed co. Zigne gdziel to win, goltëniegash diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdzin ma ngali guic yu ne no mëdyeen co, gataa laa ma blëz.

¹⁰⁻¹¹ Zeene gon zho laa mel co blëz ga, per nli rley zho. Bzëëb zho len yu co, gon zho laa mëdyeen co no ga grop xniaa win, dzigo pquitsgzhib zho lo win, bnee zho tib xtiidz zho lo win. Blozh ga blee zho ncuaane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³ Laa gza zha rac co zey, zeene güeylulo tib xanjl Dios lo José lëetse nixgues me, rëb anjl co lo me:

—José, na zeena guche i pcaanie mëdyeen qui nëz grop xniaa win, golsë nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴ Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; ¹⁵ ga blëz me haxta bdzin dze ne laa Herod gut. Ga brieequia mine bnee zha ne biadteed xtiidz Dios padzeela, zeene znu bnee zho:

“Nëz Egipt no xpëed naa, zeene bredz naa me.”

Nbabej Herod gut grë mëëdlas

¹⁶ Laa zeene gon Herod wbire-draa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëëdbgui yeen ne no grë guiedz co, desde win ne golnëz, haxta win ne rap chop iz. Tibaque nan me sca ngaa mëdeyen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. ¹⁷ Guielnëdox ne bio grë miech co, ga brieequia mine bzeet Jeremí men ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb len guiedz Ramá.

Grë wnaa Judá, zha ne ziaad lo xtii Raquel,

mbanse rac zho, roon zho no zho xquielnë xpëed zho;

zha rna zha ne cchoobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanj me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdeyen qui nëz grop xniaa win, golbire nëz Israel stib; laa zha ne quiana win ga gutle.

²¹ Dzigo brieenie José mëdeyen co ga grop xniaa win, bio me nëz laa me wbire zeynie win nëz Israel. ²² Per zeene bin José lëëque tib xpëed Herod men ne lë Arquelá, men co biaan xlugar Herod zobnabej xtan Judé, bdzieb José ndziinne me mëdeyen co nëz co. Dzigo bneequie Dios lo me lo mcaal tsie me nëz Galilé.

²³ Gol zho Galilé, bdziñaque zho guiedz Nazaret, ga wbannie zho mëdeyen co. Ga brieequia mine bzeet grë zha ne biadteed xtiidz Dios padzeela, zeene rëb zho: men Nazaret guiab miech nac Jesús.

3

Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

¹ Len dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—iGolsaan xquielntseeb to, golnab lo Dios gon me to perdon grëtaa dol ne ziyun to; sac gon laa dze bdziñle laa me csilo gnabej!

³ Lëë Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Golzhixcuuaa nëz ne ted men ne rnabey,

golsaan grë guielntseeb ne run to.”

⁴ Niapse guits lad camell niaa xab Juan, guid nac ncuuaane ndxie len me, ni niapse nguzhanch ni dzin dan row me.

⁵ Nzian grë menguedz Jerusalén, grë men Judé, grë men ne no gax ro guiubee Jordán, rree zho riequiaadiag zho zhiwseed me. ⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—iMiech ngoopdol, masaque nac to zig nac mee! Nan to na lëë, loxaque chobnis to laa to laale lo grë guielnëdox ne ziaadyob. ⁸ Led scada gon, none zaacse gban to zeena glu nli dib zdoo to psaan to grë xquielntseeb to. ⁹ Ni gacniatsde to guiab to loxaque por nace to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabej me tsaalow miech ne gac zha xtii Abraham. ¹⁰ Nanle to ganle, grë yag nex, zeene rquiad nex low led rruqa, rlozh ga rliaala lo gui, ga reca. Scadaa nagon gdzieelo

miech ne gband zigne racladz Dios, sac rriequia laa me nzhenle xqui-ibiyag me cchug me yag ne sca nac.

¹¹ 'Nli tib wrobnisse nu rnedz naa lo to, nacsew zig tib señ, sac lëë gdib rluw laa to psaan xquiełntseeb to, laa to bzëëb xnëz Dios. Sangué meñ ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib meñ non nac me, tel naa peet nond naa, per ni par tib ngundziin ne glit lab me raguiald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgetsow zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdziind dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brieé Jesús nëz Galilé zie me nëz ro guiubee Jordán, laa me zie par cchoobnis Juan me. Bdziñ me ¹⁴ nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne miñe rnabey Dios.

Dzigoraa pchoobnis Juan me.

¹⁶ Laa me zieriee lo nis zeene laa zhan gbaa bzhial, gonpaa me zig rlu tib palom rlu Espiritu Sant laa me ziad-zëëb bdziñ me guic me, ¹⁷ ni blu zëëb tib tsi meñ co nëz gbaa rnee me:

—Xpëëd naa gon nac meñ qui, rleynie naa me, meñ nziuu nac me lo naa.

4

Gocladz mendox niungüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espiritu Sant me tib

dan zit, zaatne guiend miech; ga gocladz mendox niungüet ma me niun me miñe racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz ³ hor co bdziñ mendox zaatne no me ga, rëb ma:

—Telne nli Xpëëd Dios nac luu, bnabey tsaalo grë quie rii ncuaane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guiełwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Telne nli Xpëëd Dios nac luu, bringaa nu, beñque led znu zhobnee lo Xtiidz Dios: “Znabey Dios grë xanjł me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac meñ ne rnabey luu, nodne quitnie luu me gnab luu lo me ncuaane nod gon me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co, ⁹ rëb ma lo me:

—Bui ganle, grëse ncuaan qui gon gnedz naa lo luu telne squiits-gzhib luu lo naa niina, gunnon luu naa.

¹⁰ Horco pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac meñ ne rnabey, mese none gunnon luu, lo me rieguial yquiits-gzhib luu; ni miñe rnabey me miñ co none gon luu.”

¹¹ Dzigoraa biche ma lo me, dzigo bdziñ bla anjł bdeed zho ncuaane dow me.

Psilo Jesús pseed me miech nēz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brieē me ga güey me nēz Galilé, guiedz ne lē Nazaret.

¹³ Zhisaque goca, brieēque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabolón ni zha xtii Neftalí. ¹⁴ Ga brieēquia miñe bzeet Isá (meñ ne pxeel Dios padzeela biadnee xtiidz me), zeene psiaab Dios guic Isá rēb Isá:

¹⁵ Grēse meñzit ne ndxie xtan Galilé,
nēz dan ro guiubee Jordán, gax ro Nisdoo Galilé, zaatne gocchen Zabolón ni Neftalí;

¹⁶ miech ne no lo ncow nac zho, per niina tib biini nroob biab lo zho.

Ladzniale guielgut no zho, per laa biini co biab lo zho par grieē zho ga.

¹⁷ Ga psilo Jesús pseed me miech, rnee me lo zho csaan zho xquieñtseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmeļ

(Mr. 1:16-20; Lc. 5:1-11)

¹⁸ Leñ dze co, tib dze zieded Jesús gax ro Nisdoo Galilé goñ me chop ngoozmeļ, tib zho lē Simón Pedr, stib zho lē Ndrés; grop bets zho lēētse laa zho noroñ guieñ ne rgaa meļ lo nis. ¹⁹ Dzigo bredz me zho, rēb me lo zho:

—iGoltē goltēnaļ zhits naa! ¡Laa naa cxeļ to tsie to stib gooz, tsietop to grē miech ne sēēb xnēz Dios!

²⁰ Horcogazh psañ zho guieñ ne rgaa meļ ga, laa zho zienaļ zhits me.

²¹ Zhisaque bzē me ro nis co, goñ me laa Jacob ni Juan (lēē grop xingan meñ ne lē Zebedē ga) no tib leñ barcw gza pxoz zho, noquiaabdie zho guieñ ne rgaa meļ; dzigo bredz me zho. ²² Zigne bredz me zho

biaañnieque pxoz zho barcw ga, laa zho zienaļ zhits me.

Zēēb diidz grētaa milagr ne run Jesús

²³ Dipse xtan zha Galilé, guiedz ne rdzintaa Jesús rie me grē yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grē meñ rzacnē, teļ pe guielguidztaa rzac zho.

²⁴ Teļ pa lotaaw zēēb diidz scataa run me grē milagr, haxta nēz Siria bin miecha. Nzian grē meñ co brieē ga bdziñnie zho grē zhimguidz zho lo me: no grē meñ rzacnē co noguitnie meñdox, no zho rlan guielguidz gutye, no zho gutoo dipse xcuerp, no zho rlan grē pe stib guielguidz, nogaa zho rlan grē pe yoob; grēse zho beñguiac me zho. ²⁵ Zaatne zieetaa me, miech guizhiu ne naļ zhits me, grē zha Galilé, grē zha Decápolis, grē zha Jerusalén, grē zha Judé, haxta grē zha ne no stib nēz ro guiubee Jordán.

5

Cho nac zha ne wen zie

(Lc. 6:20-23)

¹ Tib dzew, goñ Jesús laa grē miech guizhiu co bdziñ lo me, dzigo bzoquia me glaa tib guic gui win. Ga zob me, bdziñ grē xpēēdsuel me lo me, ² dzigo psilo me pseed me zho, rēb me:

³ —iWen zie zha ne rien ib none gbig zho lo Dios, sac ib zdziñ zho zaatne rnabey me!

⁴ ¡Wen zie zha ne mban rac roon niina, sac schoobladz Dios zdoo zho!

⁵ ¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ ¡Wen zie zha ne racladz guñ grē miñe rnabey Dios, rzac zhow zigne rzac zha ne rcaabedz, zha ne

rnabgaa zhis, sac ible zacnie Dios zho parne grieelelo gun zhow!

⁷ 'iWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ 'iWen zie zha ne mbele zdoo, zha ne biaanmbele lo xto, sac zanlo zho Dios!

⁹ 'iWen zie zha ne noxco zaacse gban miech, tild zho, sac masaque meed gac zho lo Dios!

¹⁰ 'iWen zie zha ne loxaque porne quiayun zho mine rnabey Dios, rquiana miech zho, sac ible zdzin zho zaatne rnabey me!

¹¹ 'Zig nac to, zeene csilo gre miech yquiaago zho to, ctsidil zho to, yquiadiidzguizh zho to loxaque ne rliladz to naa, iwen zie to ga! ¹² iNley golco zdoo to, nguieel golgac, sac gon tib guieInzaac nroob ne gneedz Dios lo to! Golsoladz ganle, scaque been zho gre zha ne pxeel me padzeela biadne xtiidz me.

*Nac to zig nac zed, zig nac biini
(Mr. 9:50; Lc. 14:34-35)*

¹³ 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, zpa dien rquiina? iLeed gdiB rliaala lo guizh, zaatne rded rzē miech rzēni zhow!

¹⁴ 'Nac to zig tib biini ne noziini lo guidzliu. Grieelelo tsongueets to, sac tib guiedz ne ndxie glaa tib guic gui, grieelelo tsongueetsa. ¹⁵ Golguie ganle nacd biini parne tsolana, sinque parne gziiniw lo gre miech ne no len yu. ¹⁶ Zaacse sca golgac, mine rquiin min co golgun, masaque leew gac zig tib biini; zeena zeene gan miech biini co zien zho ganle pa lotaa men nroob nac Pxoz to men ne no gbaa.

¹⁷ 'Guiabde to togo bod laa naa zial zialtichee naa ley ne psan Moisés, o greгаа mine bnee zha ne biadteed xtiidz Dios padzeela; sac led mincod zial naa, sinque

laa naa zial gun naaw zigne no gaca. ¹⁸ Gneli naa lo to ganle: Laga niaa guidzliu rii, laga niaa gbaa, ib none gac mine zhonee lo ley, mine bneegaa zha ne biadteed xtiidz Dios, ni tib le paat gdzeeda.

¹⁹ Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo gre zha ne yгаа zaatne rnabey Dios. Sanguе zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo gre zha ne gdzin zaatne rnabey Dios.

²⁰ 'Rso naa diidz lo to sca, zaacse golgac gunde to zigne run gre maistr ley, gre zha farise; sac telne tsoxcod to gban to zigne racladz Dios, grieelelo gdzin to zaatne rnabey me.

*Nodne gut miech
(Lc. 12:57-59)*

²¹ 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co. ²² Sca rnee ley co, per zig nac zha ne gon ne rac zdoo ran samiech, rrieequia beetle zho ga, ye zho riegual quizh falt co. Zig nac zha ne gnee pe tib diidznē lo samiech, none gacredz zho lo wx-tis zeena gunquizh zho zho dol co; zha ne quiegaa samiech, leēque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgazh perdon lo zha ne rleē to lo ga, gbireraa to dzigo gdeed to gon co.

²⁵ Zha ne sca rleēnie to, goltsocxo pront golguiaan wen; zeena tsiezod zho to lo wx-tis, sac tel laa zho tsiezo to lo wx-tis ib znabey wx-tis tso to ladzguiib. ²⁶ Gneli naa lo to ganle grieede to ga, haxtaque lozh quizh to gre dimi ne gnab wx-tis lo to.

Nodne tsonie miech zha ne led tseield zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tseiel, zigtaa mguiw zigtaa wnaaw, nodne tsonie zho zha ne led tseield zho." ²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib leque xcuerp to, ledle dib nacsew tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, ledle nitlo to len gabil dib nase xcuerp to.

Nodne csëbtsieel miech
(Mt. 19:9; Mr. 10:11-12; Lc. 16:18)

³¹ 'No stib ley znu rnee: "Mgui ne racladz csaan tseiel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa." ³² Per gni naa lo to ganle: telne quiangobd tseiel zho stib mgui, ni rsëbtsieel zho, lëëque zha rguib ga yquianie tseiel zho stib mgui. Mgui ne ctsieelnia wnaa co, dol ga gun zho, sac gon nole tseiel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet le Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow."

³⁴ Per gni naa lo to ganle: nodne sca gzeet to le Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶ guiaabgaa to gzeet to guic to. Gunscade to, sac gon zig nac guic to, per ni tib guitsguic to grielod csañ

nquits to, grielodgaa csañ ngas tow. ³⁷ Gacxe waa ncuaane rgobey to zrieelo gun to, golguiab: "zun naaw", togo riengaa to grieloda, golguiab: "grieloda"; tsode to dieen cho gzeet to, sac gon led Diosdraa rnabey min co.

Nodne ctsire miech guieInë
(Lc. 6:27-36)

³⁸ 'No stib ley znu rnee: "Tel cuee zho tib bziaalo luu, guiaand luu scase bleeque stib bziaalo zho, tel cueegaa zho tib lay luu, scaque been blee stib lay zho." ³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹ Zeene grieequia zha ne gnabey to güey to xyo zho tib grol hor, golgüeya, haxta tib hor goltsie güey tow. ⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuaane ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleynie zho, scagaa zha ne rlëe lo luu, blëënie zho." ⁴⁴ Per led scada gon, jnone zaacse gac to lo zha ne rlëe lo to! jZha ne rgodee to, golnab lo Dios gunlay me zho! ⁴⁵ Zeena sca glu nli xpëed men ne zob gbaa nac to. Golgan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsi-aaba rquiin zho grëse zho, rbed me dien cho ngable lo me, chogaa ngabd lo me. ⁴⁶ jGase nasca golwi! Tel loxaque zha ne ndzieeldiudz to zha cose rleynie to, jniacxe zgaa to guieInzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nase menlidz to, lo zha cose zaacse rnee

to, ¿pe lëë guielwen ga na rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleyne PxoZ to (men ne zob gbaa) grëse miech, scaque none gun to.

6

Zha ne run xyudar samiech

¹ Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed PxoZ to men ne zob gbaa.

² Gacxe waa, zeene gun to xyudar zha ne guiend pe yquii, gooldide tow zigne run grë zha ne rquiaalo rquia zdoo samiech; sac zha co tel pe ncuaañe rgad zho, rzo zho len yadoo, rzo zho ro nëz rlozhd yquiaabdzie zhow par gacnanpaa miecha, zeena zha ne gona guiab zho: ¡Zha wentaa zha qui! ¡Gneli naa lo to ganle ne sca rianzuiu zho lo miech, lëële gdib guielnzaac ne ygaa zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnana. ⁴ Dzigo scagaa PxoZ to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëële guielnzaac ne ygaa zho ga. ⁶ Golguien zeene gzodiidznie to me, golsëeb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me

lo to, sac niicle ncuaañe mazdraa ngueets zhliana, ran mew.

⁷ Ni zeene nozodiidznie to me, gunde to ncuaañe nonee to lëew rlozh, lëew rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gunscade to, sac me ne nac me PxoZ to gardle gnee to xliaadz to lo me laa me nanle pe nac ncuaañe rquii to. ⁹ Gacxe waa zeene gzodiidznie to me, znu golnee:

Dios, luu ne nac luu PxoZ no, zob luu gbaa;

luuse nac men ne mazdraa ndzon.

¹⁰ Luu nac men ne gnabey no, mine gnabeytaa luu zigne raca gbaa,

scaque none gaca lo guidzliu nu.

¹¹ Been guielnzaac bneedz ncuaañe dioow no nadze.

¹² Bzhiguiel been no perdon grëse dol ne ziodziuuñ no lo luu, zigne rdziuuñ no samiech no perdon grë falt ne run zho lo no.

¹³ Gdeete luu diidz yquii mendox no,

been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Mine rnab no nu, ndionpaa no zun luuw.

¹⁴ Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque PxoZ to men ne zob gbaa, zun me zho perdon. ¹⁵ Zha ne gund samiech zho perdon, niicle megaa gund me perdon xtol zho.

¹⁶ Stiba, zeene nocuan to nozodiidznie to me, gunbande to lo to. Sac grë zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lëële guielnzaac ne ygaa zho ga. ¹⁷⁻¹⁸ Gunscade to, nguieel

golgac ine golzëë biegw guic to, golquiib lo to, zeena ni tib choot guienḏ laa to nocuan, loxaque Pxoḏ to gacnaḏa, sac grëse ncuaaḏe rac nguets ran mew. Grëse ncuaaḏe rac, me rana, me nac men ne gneedz tib guielḏnaac nroob lo to.

¹⁹ 'Tsienalḏe to loxaque dien zha gapchen to lo guidzliu rii, sac nac ncuaan lo guidzliu rii rban ngbaana, rnitlo mxila, haxta noxtseeb guioochena. ²⁰ Mazd golḏsoxco ygaa to guielḏnaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹ Golgona ganle, guielḏnaac ne gon gunlo to, ga glu pa gdziḏ xalm to, sac zaatne gunlo to guielḏnaac co ga nac zaatne gdziḏ xalm to.

²² 'Rrieequia nac bziaalo to zig nac tib biini. Telne niapse lo grë ncuaaḏe ndzinli rwi to, dzigo gdipse xcuerp to no lo guielḏbiini. ²³ Laa telne loxaque lo grë ncuaaḏe nonguield rwi to, dzigo gdipse xcuerp to no lo guielḏcow ga. iZha rnazhe lo guielḏcow co, tel lëëque biini noyac guielḏcow!

²⁴ 'Golgona ganle, grieelod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ 'Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to, pe guie to, pe gacwxabga to. Stiba, iZniacxe mazdraa non guielḏwagw lo xquielḏmban to? Xabga tow, iZniacxe mazdraa nona lo xcuerp to? ²⁶ Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoḏ to men ne zob gbaa, men co rdeed ncuaaḏe row ma. iTel to gon, mazdraa non to lo grë mguin co! ²⁷ Ni lalnu paat rquiinda tant tso to zhgab. Telne guiab to tso to zhgab

dien zha gacnool xtse to spalal yeense, iZniacxe zrieelo to gunnool tow?

²⁸ 'Zig nac lar, iZpe nacle tant tso to zhgab dien pe gacwxab to? Pe rwide to lo grë guiee ne ganle zëeb dan, zha rrooba, led yeda rio zhgab dien zha gacwxaba, per niow rnaw; ²⁹ gni naa lo to ganle, per ni rey Salomón con grë xab niazh me, blud me scataa niow.

³⁰ 'Gase na ganle golwi, niicxe grë guiee dan co na, zna dze zob nguiaḏ, gzhe widz laaw bidzle, laaw tsecle, ni scataa niow rgacwxab Diosa, iZpe lel to dzigo ygacwxabd me, niicle ne squi gard guien to dib zdoḏ to gnalo to me?

³¹ 'Tsode to zhgab sca guiab to: "iZBay pa griee pe dioow ne, pa griee pe dio ne, pa griee pe dziaacwxab ne?" ³² Grë miech ne runbeyd Dios, tibaque zhgab co rio zho. Sangue to golḏsoladz ganle, Pxoḏ to men ne zob gbaa, nanle me pe nac grë xli-aadz to, ³³ me nac men ne gneedz ncuaaḏe yquiin to, per ib none glo tsoxco to gban to zigne rnabey me. ³⁴ Golguien sca tsode to zhgab dien zha ted to gzhe widz, sac gzhe widz co zhaalacque xco ne ziaad. Tib tib dze zhaase zhaase zhgab ne ziaad-niew.

7

Nodne gzee zdoḏ ne cho zha rac (Lc. 6:37-38, 41-42)

¹ Blozh ga rëbcha me lo zho:

—Golguien, ib gunde to në gac zdoḏ to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to. ² Sac gon tel zha rzac to samiech to, scasaque sac Dios to.

³ 'iLëda ga gon tso to lozhd gzee zdoḏ to dien cho pe run, ni nenda mazdraa mine run to! ⁴ iZpe ro to glisqui to mine run stib zho, ni tel mazdraa nac mine run to? ⁵ iZgolguien sca glude to ncuaaḏe

nacde to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëñiew, sac gon rriequia lo mëcw ga gdeed tow, ib zun zho mine run mëcw zacntseeb zhō lo to. Naca zig nac quie perl, gdeete tow lo zha ne rleynieda, sac gon rriequia lo nguts ga gdeed tow, tel ngutsa niicle ncuaañe mazdraa non glaał zho lo ma, loxaque gzeëni maw.

Ncuaañe gnabtaa ne zгаа new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuaañe rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to. ⁸ Sac grëse zha ne rbig lo me rnab zho ncuaañe rquiin zho, rdeed mew. Zha ne rguib ncuaañe racladz, racnie me zho rdziel zhow. Zha ne rbedzle me, rcaania me zho.

⁹ 'Golwi ganle, zig nac to zeene rnab xpëed to quiet gow win, žniacxe ziazh to co to tib quie nia win? ¹⁰ Zeene rnabgaa win mel, žniacxe zdeed to tib meel lo win? ¹¹ Led rioxco to lëe niapse ncuaañe wen rdeed to lo xpëed to, niicle ne miech ntseeb nac to. Telne sca rioxco to xpëed to, peleł Pxož to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuaañe rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zгаа miech

guielmban ndzon ne rdeed Dios. Sac gon zha ne mban zigne notaa guic zho, rriequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

¹⁵ 'Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiil yeen, per zha ntseeba, masaque nac zho zig grë coyot blë. ¹⁶ Zigne runbey miech tib yag por nex ne rquia low, scaque wen wen golwi zha nac ncuaañe run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuaañe, nex ncuaañe rquia low. ¹⁸ Grieelod yquia nex ncuaañe tib lo yag ne rquia nex wen, ni grieelodgaa yquia nex wen tib lo yag ncuaañe. ¹⁹ Gacxe waa grë yag ne rquia nex ncuaañe, paat rquiinda, lëe gdib rruga, rlozh ga rzëeg zhow. ²⁰ Min co nagon rne naa lo to, zha ne sca guiaad, por ncuaañe run zho ga gunbey to cho nac zho.

²¹ 'Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdziñd zho zaatne rnabey Pxož naa. Sac zha ne nlipaa run mine rnabey me, zha cose gdziñ ga. ²² Gal dze co, nzian zha ne griequia gnë lo naa: "Conque rdziunbey no luu, blactaa name bio no bionee no Xtiidz luu lo miech, nzian milagr ne bdziun no, haxta men dox bdziunxoon no zeene bzeet no lë luu." ²³ Niicle sca gnë zho, ib ycaaniad naa zho, sonëz naa zho; sac ni lalnu beend zho ncuaañe ndzinli.

²⁴ 'Zha ne rquiaadiag mine rne naa, ni rioxco zho rban zhow zigne naca, rriequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guiedox per peet racd lidz

zho, niicle rree medox, nis naal ne rac rded zaatne zoba ga, per rbixcheda.

²⁶ 'Laa grë zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. ²⁷ Znuse bñitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me, ²⁹ sac rlu men rñabey nac me, led yed me rseed miech zig rseed grë maistr ley.

8

*Biac tib mgui ne rlan lepr
(Mr. 1:40-45; Lc. 5:12-16)*

¹ Laa Jesús ziad-zëeb cho gui win co, miech guizhiu ne nal zhits me, ² tibaque brieëquia tib mgui ne rlan guiedzdox ne lë lepr, wbig me pquitsgzhìb me lo Jesús, rëb me:

—Tebaa siguiel luu gunguiac luu naa.

³ Dzigo pxobnia Jesús guic mgui, rëb Jesús:

—Zunguiac naa luu. iNiinagazh laa luu guiaanmbe!

Horcogazha laa grë guiedz co bñitlo. ⁴ Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyson gon ne rieguañ gdeed luu zigne rñabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menguiib

(Lc. 7:1-10)

⁵ Loxaque bdzin Jesús guiedz Capernaum, laa tib men ne rñabey lo xmenGUIIB zha Roma bdzinle lo me, rñab men co gunguiac Jesús tib zha ne quia xtsiin me, rëb me:

⁶ —Been tib guielnzaac beenguiac tib zha ne rquia xtsin naa, laa zho

nix lidz naa ib gacd griañ zho, mban rac zho yoobdox ne rquia zho.

⁷ Dzigo rëbchaa Jesús:

—Peet nacda, na së naa guio ne gunguiac naa zho.

⁸ —Coo —rëb menguiib co—, rieguañd csodziin naa luu sëe luu haxta lidz naa. Nanpaa naa zrieelo luu nugazh gnabey luu guiac zho. ⁹ Sac zig nac naa no zha ne rñabey lo naa, ni ron naa mine rñabey zho; scagaa tel guiep naa tib lo zhaguiib ne rñabey naa: “Güey nu”, rie zho; rnegaa naa: “Dë nu”, riaad zho; zha ne runгаа dziin lo naaw, mine rñabeytaa naa zho, run zhow. Scaque luu nagon nanpaa naa zrieelo sca gnabey luu guiac xmoz naa.

¹⁰ Zeene gon Jesús sca rnee men co, rley me, rëb me lo grë zha ne zienañ zhits me ga:

—Lo grë zha Israel, gard gon gan naa tib zha ne squitaa dib zdoo rnalo Dios. ¹¹ Ni goñquiaadiaga ganle, zdzin dze grële zha zit ne squi gnalo Dios, zha co yгаа sobnie Abraham, sobnie Isaac ni Jacob zaatne rñabey Dios. ¹² Laa grë zha Israel, niicle nac zho zha ne nac diidz gdzin ga, lel lo ncow nëz ley guiaan zho, ga tso zho goonnë zho, haxta gow lay zho lo guielnedox co.

¹³ Blozh ga rëbchaa me lo menguiib co:

—Bzë nasca, gocnan ganle zigne bliladzse luu guiac xmoz luu, sca gaca.

Horcogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴ Laa zeene bdzin Jesús lidz Pedr, gon me laa xniadzoop Pedr nix rlan xlëe. ¹⁵ Dzigo bded me zaatne nix zhuz co, zigne bzhen me nia zhuz laa xlëe co blëz. Horcogazh guche zhuz beenlo zhuz ncuaañe dow zho.

¹⁶ Ziedzele dzew, laa ngbidz rzëëblew, zeene bdzin grë miech

co, nzian grë zha ne nosacsi mendox bdziñnie zho lo me. Grëse zho beenguiac me, goctox me lo grë mendox ne nosacsi zho ga, bencxoon me ma; ni zha ne rlangaa pe stib guielguidz, grëse zho beenguiac me. ¹⁷ Ga brieequia miñe bzeet Isá, men ne biadteed xtiidz Dios lo miech padzeela, zeene rëb me: “Grëse xquielñe ne, grëse guielguidz ne rziaac ne, me biw.”

Zha ne racladz sëeb xnëz Jesús
(Mr. 4:35-41; Lc. 8:22-25; 9:57-62)

¹⁸ Zeene gon Jesús scataa ndal miech ne goclo lo me ga, dzigo bnabey me xpëedscuel me gzhixcuaa zho, sac laa zho no tedquia stib nëz ro nisdoo co. ¹⁹ Dzigo wbig tib men ne nac maistr ley lo me, rëb maistr co:

—Zaatne tsetaa luu gon, sënäl naa zhits luu.

²⁰ Dzigo rëbchaa me:

—Gocnaña ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzënalë zhits me, rëb zho:

—Ye naa gon sënäl naa zhits luu, per bzhiguiel bneedz diidzbey cuëz naa gangazh naa tsoliu pxoz naa.

²² Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho samengut zho.

²³ Dzigo laa me bzëëbnie xpëedscuel me tib len barcw, laa zho zie. ²⁴⁻²⁵ Laa zho zie lo nis co, tibaque zeene psilo brieet tib medox, masaque rlis me lo nis co, laaw psilo rzëeb len barcw. Dzigo lëëlëd güey zho güeycuaan zho me, sac lëëtaque nixguies me.

—Ligier ganle —rëb zho—, blee mcaal lo luu. jBui ganle laa ne nitlo lo nis rii, csaand luu guet ne nu!

²⁶ Dzigo rëbchaa me lo zho:

—¿Pe nacne squitaa rdzieb to? jGardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze. ²⁷ Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

Men Gadar ne nosacsi mendox
(Mr. 5:1-20; Lc. 8:26-39)

²⁸ Laa zho bdzindze stib nëz ro nisdoo co, zaatne nac xtan zha Gadar, zeene brieequia chop mgui ne nosacsi mendox, bdziñ lo Jesús ga. Zha ntseeba, rdzieb miech zho, choot rdete nëz co. Len baa brieet grop mgui co bdziñ zho ga, ²⁹ nguiedz roptsie zho rnee zho:

—jPeet guñd luu no Jesús, psaan no! Rdziuunbey no luu, Xpëed Dios nac luu. Ne nligaa been guielnzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziñ no.

³² —Niinaga sca gołtsie —rëb me.

Zigne psaan mendox co grop mgui co, güey ma bdziñ ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

³³ Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga.

³⁴ Grëse miech co, brieet zho zieso zho. Zeene bdziñ zho gon zho laa Jesús zo ga, dzigo bnab zho lo me siguiel me gbi me xtan zho.

9

Biac tib men ne gutoo
(Mr. 2:1-12; Lc. 5:17-26)

¹ Dzigo wbiireque bzëeb zho len barcw, bdziñ zho guiedz Capernaum stib, sac ga nac zaatne rbëz Jesús len dze co. ² Zhisaque goc bdziñ me, laa zho bdziñniele tib men rzacnë lo me, dipse men co gutoo, ib gacd së me. Lo yag zhoob me bdziñnie zho me ga.

Zeene gon Jesús dib zdoos grë zha co rnalo zho ne me gunguiac men rzacnë co, rëbchaa me lo men rzacnë co:

—jNley bloo zdoos luu xin! jLaa naa benle perdon grëse xtol luu!

³ Ga zob blalaa maistr ley, zeene gon zho sca bnee me, bza zdoos zho rëb zho: “jQuiaguitnie men qui Dios gon squi rzë xtiidz me!”

⁴ Bienga Jesús sca rza zdoos zho, dzigo rëbchaa me:

—Lëda i gon squi rza zdoos to. ⁵ Nli nganda guiab ne lo miech: “Laa naa benle perdon grëse xtol luu”; per grieelod lega guiab ne laa ne gunguiac zho. ⁶ Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacnë co:

—jNiinagazh guche i, bi yag ne bzhoob luu i, zeen bzë!

⁷ Zigne sca bnee me, laa mgui co bzoli, laa me zey. ⁸ Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brieeg ga. Ro nëz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰ Bded ga güeynie me Jesús tib wagw lidz me. Grë zha ne rcaania

dimi ne razh lo zha Roma, grë zha ne zëeb diidz nac zha ntseeb, tipse brenie Jesús zho grë xpëëdsuel me.

¹¹ Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdsuel me:

—jMod scataa na rownie xmaistr to grë zha ngoopdol, grë zha beed ne nac recaudador!

¹² Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacnë ga rquiin zho, çniacxe squiin zho zaatne no zha ne ndip ndaan?

¹³ Golsoladz ganle znu rnee Dios: “Laa naa racladz gacndooladz miech, yquia zdoos zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

çPe nacne rcuand xpëëdsuel Jesús?

(Mr. 2:18-22; Lc. 5:33-39)

¹⁴ Bdziñaque xpëëdsuel Juan Bautist, bnabdiidz zho lo Jesús, rëb zho:

—çPe nac waa ib rcuand xpëëdsuel luu? Ni no grë no zha farisé, zhiga zhiga laa no rcuanle.

¹⁵ Pquiab me rëb me lo zho:

—Zaatne nadien noyac tib guieltsieel, çpe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per dzin dze zeene laa mgui co gbiche, ni zeene laa dze co gdziñ, dzigosi nagon riegual tso zho guielnë, riegual ycuan zho.

¹⁶ Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ¹⁷ Scaque tsod zha ne cotsow vin cub tib

leṅ guid ne padzeela noquīn, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, teḷ nziu cuba none leṅ guid cubaque tsotsowa.

Brieeban tib mēdwanaa yeeṅ

(Mr. 5:21-43; Lc. 8:40-56)

¹⁸ Lēētaaque sca quianee Jesús lo xpēēdsuel Juan Bautist, zeēne bdziṅ tib mgui ne nac zha non yadoo. Zigne bdziṅ me pquiits-gzhib me lo Jesús, rēb me:

—Been tib guieḷnzaac sē luu guio ne lidz naa. Laa tib xpēdwanaa naa blozh niina, per nanpaa naa telne cxobnia luu guic win, zbeeban luu win.

¹⁹ Dzigo bio Jesús nēz zienal me zhits men co, gza xpēēdsuel me. ²⁰ Lad grē miech ne zienal ga, lad co no tib men wnaa, gocle tsiip-chop iz rlan me tib guieḷguidz, rzac me zigne rzac grē men wnaa gzob mēē, tibaque rlan mew ib rbēzda.

Ga zie me, zeēne wbig me nēz zhits Jesús, bzheṅ me ro lar ne mbix Jesús, ²¹ sac tibaque güeynie guic me, ziac me totsaque ygaa xab Jesús nia me. ²² Dzigo wbiere lo Jesús, dze bui Jesús lo me.

—Xin —rēb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guieḷguidz co.

²³ Laa zeēne bdziṅ Jesús lidz men rnabey co, laa zha ne rool ndxie, noquiaa zho grē di ne rac lo ngutoo, grēraa zha ne ndxie ga, nguiedz zēēb tsi zho roon zho, tib ruid ne rac. ²⁴ Dzigo rēbchaa me lo zho:

—Golriee nēz ley, sac goṅ gute mēēd qui, nixguiesse win.

Zha ne rlēē, zha ne rzhidzniegaa me, laa zho briee ley. ²⁵ Dzigo laa me bzēēb leṅ yu zaatne nix mēēd co, bzheṅ me nia win. ¡Horcogazha laa win guche!

²⁶ Grēse guiedz ne ndxie dib gax ga, gocnaṅ miech scataa milagr

nroob ne been me, bleeban me mēēd co.

Biac chop zha ne roḷd lo ni tib zha ngop

²⁷ Zeēne laa Jesús wbi ga, nēz zie me brieeṅ chop zha ne roḷd lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdziṅ Jesús yu ne rbēz me, laa zho wbig lo me. Dzigo rēbchaa me lo zho:

—¿Dib zdoo to dzigo lēē rliladz to zrieelo guṅguiac naa to?

—Dib zdoo now —rēb zho.

²⁹ Dzigo pquiaania me zhits bzi-aalo zho, ni rēb me:

—Mīne bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidz zho zha biac zho, ³¹ ni zigne briee zho ga, laa zho bzodidzlew. Blozh ga, grēse guiedz ne ndxie dib gax ga, gocnaṅ miech scataa nac milagr ne ruṅ me.

³² Loxaque wbi grop zha ne biac lo ga, laa bla zho bdziṅlaque, bdziṅnie zho tib men ne nosacsi menḍox, psanṅop ma men co.

³³ Dzigo benḍox Jesús menḍox co, zeēne laa ma bzhoon laa men co psilo bnee. Grē miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa guṅ grē milagr qui!

³⁴ Laa grē zha farisé rnee:

—Ma ne rnabey lo menḍox nacie men qui, gane rrieelo ruṅcxoon me menḍox.

³⁵ Grēse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziṅtaa me, rie me xyadoo zho rnee me lo zho zha racladz Dios gban zho, ni ruṅguiac me zho teḷ pe nactaa guieḷguidz ne rzac zho.

³⁶ Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacnie zho, rac zho zig grë mëcwxiil yeen ne guiend xbaxtor.

³⁷⁻³⁸ Tib vuelt haxta rëb me lo xpëëdsuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëëdsuel me ga, bzo me zho tsienee zho Xtiidz Dios lo miech, bdeed me poder lo zho gunxoon zho mendox zaatne nosacsi ma miech, ni gunguiac zho grë men rzacnë.

²⁻⁴ Znu lë gza tsiipchop zha co: Simón (zha ne rneeque zho Pedr), Ndrés (bets Simón), Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz griee zha Roma Israel),

ni Judas Iscariot (zha ne güeyto Jesús).

Pxeel Jesús zha ne tsienee xtiidz me

(Mr. 6:7-13; Lc. 9:1-6)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne nò grë zha ne nacd zha Israel, niicle sëëbde to grë guiedz ne ndxie xtan zha Samar. ⁶ Zaatne no

grë zha Israel, gase goltsie; lëë grë mëcwxiil ne nonziaab ga.

⁷ Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golgunxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ Peet güeyde to, xab tow, lab tow, mine nacwse to, mine quiae ni to, mincose goltsienie. Güeyde to dimi, per ni tib guiet güeyde to; sac zaatne tsiegun to dziin rii, ib ga none gneedz zho ncuaañe gow to.

¹¹ Guiedz ne gdziñtaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co.

¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho, togo guncasdga zho to, dzigo toque gunlay me. ¹⁴ Zha ne sca siguield ycaania to, golrieegazh lidz zho; guiedz ne siguield zho yquiaadiag zho mine nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo.

¹⁵ Gneli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne ygaa grë miech ne bio guiedz Sodom, guiedz Gomorr, lëdle guielnë ro ne ygaa grë miech ne sca siguield ycaania to.

¹⁶ Nsin golso, golguien ganle rrieequia tib mëcwxiil yeense nac to, ni laa naa rxel to zaatne no grë coyot dox. Ndooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel.

¹⁷ Nligaa nsin golso, sac gon ib ziezo miech to lo wxtis, ni lëëque

leṅ yadoo ga quṅ zho to, ¹⁸ haxta ziezo zho to lo grēraa zha nroob ne rnabey. Laa zho guṅa, loxaque ne nac to zha ne no xnēz naa, ni gagaa nagon gdeeda diidz gnee to xtidz naa lo grē zha co, ni lo grēragaa miech ne nacd zha Israel.

¹⁹ 'Zeeṅe sca tsiezo zho to lo grē zha rnabey co, tsode to zhgab diēṅ pe gnee to, diēṅ zhagaa gnee tow; sac zeene sca tsiegala, Dios gneedz diidz ne gnee to. ²⁰ Led tod gnee, sinque, ¡zhiEspíritu Pxoṅ to meṅ ne zob gbaa, meṅ co gnee ga!

²¹ 'Zlēēniedox miech zha ne no xnēz naa. Zio zha ne lēēque bets zho, zha ne lēēque pxoz zho, zha ne lēēque xpēēd zho ctsidiḷ zho, tsielo zho zho ladznia zha ne gut zho.

²² Teḷ to, guiets yag gaṅ miech to, per teḷne dziits so to teḷ pe nactaa lo guiēḷnē ne ted to, ib zгаа to tib guiēḷmban ndzon ne gdziṅdraa dze lozh. ²³ Guiedz ne no to, zeene laa miech csilo yquiaanaḷ to, golṛiee ga, golṫsie stib guiedz. Gneli naa lo to gaṅle, niicle stib guiedz stib guiedz tsie to, gardaque lozh tsieted to grē guiedz ne ndxie Israel zeene gaḷ dze ne laa Mgui ne pxeel Dios guiaad stib.

²⁴ 'Golwi gaṅle zha ne nac mēēdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Teḷ zha guṅ miech maistr, scaque guṅ zho mēēdscuel; teḷ pe cteed zho bizhuan dziin, miṅcoque cteed zho zha ne quia dziin. Gacxe waa peet tsienied guic to, teḷ pe nactaa ncuaaṅe gnee miech to, sac goṅ niicxe naa name ne nac naa Dad, mēṅdox rnee zho nac naa.

²⁶ 'Gdziebde to, zdziṅ dze ne glu gaṅle cho zianaḷ miṅe nac diidzli, chogaa zianaḷ guiēḷntseeb, gaḷ dze co grēsew xoobneṅ.

²⁷ 'Grēse miṅe rne naa lo to zeene nese rzidiidza, golṅeew lo miech, haxta glaa guic yu golso, nguiedz

golṅeew. ²⁸ Gdziebde to miech, golguiēṅ gaṅle no tib meṅ nroobraa, lēē meṅ co nac Dios. Teḷ miecha, loxaque cuerpse zrieelo zho csacsi zho, saṅgue Dios, zrieelo me gnitlo me miech dib xcuerp zho, dib xalm zho leṅ gabiḷ.

²⁹ 'Nligaa gdziebde to, csaand Dios lega pe gac to. Golwi gaṅle, zig nac grē mguṅ niicle ne rzac miech peet nond ma, haxta chop ma rdeed zho por tib gaay centav; per Pxoṅ to goṅ meṅ ne zob gbaa rsaanladzd me ma, ni tib ma guete teḷne gdeete me diidz. ³⁰ Peleḷ to dzigo csaan me, haxta guits guic tow, grēsew ngaba lo me. ³¹ Gdziebde to sca, golguiēṅ gaṅle nonraa to lo tib dzoon mguṅ.

³² 'Gneli naa lo to gaṅle, zha ne glu lo miech nacieṅ zho naa, scaque naa zeṅ gaḷ dze co zlu naa lo Pxoṅ naa meṅ ne zob gbaa, nacieṅ naa zho. ³³ Saṅgue zha ne ctoladznie naa lo miech, scaque naa ziep naa lo me runbeyd naa zho.

³⁴ '¡Guiabde to togo laa naa ziaḷ loxaque par cuiṅ wense miech! Lēda goṅ, ye ziaḷ naa zialguṅctiḷ naa zho. ³⁵ Sac zha ne sēēb xnēz naa, zlēēnie xpēēd zho zho, teḷ mēēdgaaw, zlēēnie pxoz zho zho; scaque meṅ wnaaw, zlēēnie xinzhiṅ zho zho, zha ne nacгаа nguzhiṅ zho, zlēēnie xniaa tsiel zho zho. ³⁶ ¡Lēēque meṅlidz miech gac zha ne glēē gaṅ zho!

³⁷ 'Zha ne mazdraa rquia zdoo glēēnie pxoz zho zho, glēēnie xniaa zho zho, glēēniegaa xpēēd zho zho, porne guṅ zho miṅe rnabey naa, peet xtsiṅd zha co par ygab zho xnēz naa. ³⁸ Scaque zha ne yquia zdoo cueeladz zho zho guiaadnaḷ zho zhits naa, grieelod ygab zho lo naa. ³⁹ Sac grēse zha ne rquia zdoo guiēḷmban ne rap zho lo guidzliu riṅ, ygaad zho guiēḷmban ndzon ne gneedz Dios; saṅgue zha ne cueeladz xquiēḷmban, niicle teḷ csacsi

miech zho loxaque ne no zho xnèz naa, ib zгаа zho guielmban ndzon co.

⁴⁰ Niina gon ne squi tsie to, grèse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. ⁴¹ Zha ne cuèzlo tib men ne noteed xtiidz Dios lo miech, guielnzaac ne gdeed Dios lo men co, ye zho yгаа guielnzaac co. Zha ne cuèzlo tib miech ndzinli, guielnzaac ne gdeed Dios lo zha co, ye zho yгаа. ⁴² Ni zha ne gneedz maase tib zhigaque nis yag lo cho tib zha win ne nac to ne nac to xpèèdscuel naa, ib tedsod zdeed Dios guielnzaac ne tsiguial zho.

11

Zha ne pxeel Juan Bautist (Lc. 7:18-35)

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieeque, güey me grè guiedz ne ndxie gax ga, güeyseed me grè miech co.

²⁻³ Len dze co no Juan Bautist ladzguiib, ga no Juan bin Juan zha nactaa grè milagr ne run Jesús, dzigo pxeel Juan bla xpèèdscuel Juan güeynabdiidz zho lo me, dien pe lèele Men ne zèeble diidz cx-eel Dios lo guidzliu ga nac me, te dzigoraа gdziñ men co ye. ⁴ Dzigo rëbchaa me lo zho:

—Grè ncuaane bin to rne naa, grëгаа ncuaane gon to run naa, goltsie golzodiidza lo Juan. ⁵ Ran to ganle grè zha ne rold lo, grè zha ne gacd sè, grè zha ne rlan guiedz lepr; grè zha ne rcuaat, laa zho riac; haxta grè zha ne gutle, laa zho rrieeban. Xtiidz Diosa, laaw quiagaaz lo grèse zha ne rquiina. Grësew, golzodiidza. ⁶ Ni golguiab lo me, dichos zha ne racchopd guic, sinque tiblque rac zho riladz zho cho nac naa.

⁷⁻⁸ Zeene laa xpèèdscuel Juan zey, dzigo psilo me bzeet me Juan lo

miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nèzrii nèzrec rey me, te rëb to ye masaque grè lar niazh ne racw zha non nacw me? Per nanle to ganle zha ne scataa racwxab riод zho dan. ⁹ Nligaa cho dien güeynie guic to nac me, ¿te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grè zha ne ziyun dziin co. ¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu, zha co gzhixcuaa nèz ne ted luu.

¹¹ Ne nligaa lo grèse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraа zaatne rñ-abey Dios, nonraа zha co lo me.

¹² 'Desde psilo Juan noseed me miech zhapaа racladz Dios gban zho, ni rchoobnis me zho, hor co psiloque brieequia zha ne rlèenie zhiwseed Dios, gacxe waa zha ne nlipaa rdziebd, zha cose rcaaniaw, rzèeb zho xnèz me. ¹³ Mazd glo tibaque raquiet ne laa men ne cx-eel Dios ga guiaad, zigtaa lo leya, zigtagaa grè zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴ Juan gon biaad niina zig no diidz guiaad Lí; golgacnan sca ganle cho nac me. ¹⁵ Zha ne racladz guien zho zha nac grè mine none naa nu, ¡yquiaadiag zhow!

¹⁶⁻¹⁷ 'Nac grè miech rii, rienд zho pe racladz zho. ¿Cho ganle run zig run zho? Lèe zho run mine run mèédlas ne rio wguít ro nèz, ni-icle rool xcompañer win di nguieel rieved win, niicle roolгаа zho di ngan, roond win. ¹⁸ Sac gon bi-aad Juan, ran zho rowd me tel pe ncuaane row zho, ried me ncuaane rie zho, dzigo laa zho rnee mendox

nacnie me. ¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsieelsa me, haxta grë zha ngoop-dol, haxta grë zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Miech ne bzhiguield ncaania xti-idz Jesús

(Lc. 10:13-15, 21-22)

²⁰ Blozhse ga, dzigo psilo Jesús bzeet me miñe yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaaand zho xquielntseeb zho, rëb me:

²¹ —jProbsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaaand zho xquielntseeb zho. Tel niaca miñe nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guielnë, zëeb nsaan zho xquielntseeb zho, mbig zho lo Dios. ²² Gacnan zha Corazín, gacnan zha Betsaid sca ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa miñe yгаа zho. ²³ Scaque zha Capernaum, masaque rzac zho niina zha nziuuraa lo Dios, per gacnan zho ganle haxta guiet lo ncowdoo ne guey mendox ga guey zho; sac gon tel niaca miñe nian zha Sodom grë milagr ne ran zho noyun naa, ible nsaan zha co xquielntseeb zho, nitlod zho. ²⁴ jGacnan zha Capernaum ganle gal dze ne gun Dios guielwxtis, lëëtaa caxtigw ne yгаа zha Sodom, mazdraa miñe yгаа zho!

²⁵ Dzigo bzodiidznie Jesús Dios, rëb me:

—Dios luu ne nac luu Pxož naa, luu rnabey gbaa luu rnabey guidzliu, rnedz naa xquizh lo luu sac grë miñe noyun luu nu niina bdeete luu diidz niacnan grë zha raca, sinque laaw blu luu lo grë zha ne nac zig grë mëëdlas. ²⁶ Sca quiayun luu, sac ib scale racladz luu gaca.

²⁷ Blozh ga rëb me lo grë miech ne ndxie ga:

—Grëse ncuaañe ran to quiayun naa, Dios men ne nac Pxož naa, me bneedz poder rii lo naa; sac ib laa me bzo naa, naa guna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ Grëse to ne nac to zha ne në noded, rdib rdzag to quiaguib to dien zha guiaanwen zdo to, goltë lo naa, naa gneedz tib wdziiladz ndzon lo to. ²⁹ Nligaa golbig lo naa, goltënal zhiwseed naa, golgac tib miech tibililadz, tib miech ndooladz zigne nac naa; zeena gap to descans co. ³⁰ Nacda ncuaañe ngan, nacda ncuaañe guiab to glëbde to gun tow.

12

Dze ne rdziiladz zha Israel lo dziin

(Mr. 2:23-28; Lc. 6:1-5)

¹ Len dze coquew, tib dze lëëtaque dze ne rdziiladz zha Israel lo dziina, bded Jesús zaatne zëeb zhobxtil grë xpëedscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Gon bla zha farisew, dzigo rëb zho:

—jLëda i gon noyun to, noguiits to ley i! Golguien ganle dze nda nac dze rii.

³ Pquiabchaa me rëb me lo zho:

—jPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow

zho? ⁴ Rneew, bzëëb me len yadoo güey nab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co, çpe led bdiitsd me ley ga? ⁵ Lo xley Moisés name zhobnee ganle zha haxta dze ne rdziladz to lo dziin run grë pxoz dziin len yadoo, ni rneeda dol ga sca run zho. ⁶ Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

⁷ 'Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol. ⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia
(Mr. 3:1-6; Lc. 6:6-11)*

⁹ Bded ga, gol stib dze ne rdziladz zho lo dziina, güey Jesús len yadoo win ne zob lad guiedz co. ¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguac me miech dze ne rdziladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiiil to tib len blë nroob, çled zëëb lëë rie to riebee to ma? ¹² Tel sca rquia zdoo to mëcwxiiil, jgolguien ganle mazdraa gon non miech lo tib mëcwxiiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—jBzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴ Grë zha farisé co, zigne briece zho ga laa zho psilo bnediidz dien zha gdeeda diidz gut zho Jesús.

¹⁵ Bien Jesús sca no guic zho, dzigo mazd briece me ga. Miech guizhiu ne zienal zhits me, grëse men rzacnë ne zienal ga, beenguac me zho; ¹⁶ per pso me diidz lo zho, choot lo gzodiidz zhow.

¹⁷ Ga briequia mine pquiaa Isá, tib men ne biadteed xtiidz Dios padzeela, zeene rëb me:

¹⁸ Lëë men rii bzooblo naa gun xtsin naa, rleynie naa me, rzac zdoo naa grë ncuane run me.

Zded naa zhiEspiritu naa gacnie me, me nac men ne cxobnen xtidz naa lo grëse miech.

¹⁹ Tilnied me miech, sedzd yan me lo zho, sod me ro nëz goptsie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyidiele, csaand me zdoo zho; zha ne mban rac lo xliaadz zho, csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

²¹ Haxta zeene gan me ye grë zha ne nacdraa zha Israel, laa zho gnalo me.

Rëb zho mendox nacie Jesús

(Mr. 3:20-30; Lc. 6:43-45; 11:14-23; 12:10)

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguac me mgui, gagazh psilo gon mgui, psilo bnee mgui.

²³ Grë miech ne ndxie lo me ga, per nli bzee zdoo zho, rnee zho:

—jBay pe lëë men qui naye nac Men ne zëëble diidz ga cxeel Dios!

²⁴ Zeene gon zha farisé sca rnee grë miech co, rzachaa zdoo zho

rnee zho: “Pe Dios nazho cxeel me, ma ne rnabey lo mēdox ma co nacie me, gane rrieelo runcxoon me mēdox.”

²⁵ Bien Jesús sca rza guic zho, dzigo rēbchaa me lo zho:

—¡Ncuane gacđ gon rnee to! Tel tib wxtis nadien lēēque zha ne nacie zho csilo tilnie zho, ¿niacxe zac gnabey zho? Tib guiedza, tel lēēque zha guiedz co tilnie menladz zho, led znuse lozh guiedz co; tib diigaa miecha, tel lēēque zha tilnie menlidz zho, ¿niacxe nitlod dii co? ²⁶ Scaque mēdox nagon, telne lēēque lēē ma guncxoon samēdox ma, ¡pe nale na bnitlo ma! ²⁷ Nana ne squi rnee to Beelzebú nacie naa gane rrieelo runcxoon naa mēdox, ¿zha ne nacgrē to dzigo, cho nacie zho ne ye zho runcxoon ma? Gase naganle rlu dōdox i quiaayun to, squi rnee to. ²⁸ Sangue tel naa zhiEspíritu Dios nacie naa gane runcxoon naa mēdox, ni ga rlu ganle laa Dios psilo quianabeyle nu.

²⁹ ¡Masaque nac mēdox zig tib zha ne no xfuers, zha ne gacladz cuee grē ncuane no lidz zha co, none cxidoogazh zho zho! ³⁰ Tel mēdoxa rlēēnie ma naa, ni nanle to ganle zha ne rlēē lo ne, gacnied zho ne.

³¹⁻³² ‘Gacnan to ganle, grēse dol ne run miech, grē tel zha rguie zho, rdzibdee zho, niicle tel haxta gneenē zho naa, bii zun Dios zho perdon min co; sangue zha ne gneenē zhiEspíritu me, ib gundraa me zho perdon.

³³ ‘Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuangaaw, nex ncuanaque rquia low. ³⁴ ¡Scaque to nagon zhin mēdox! ¿Zha nan to nadien gac to miech wen, tel desde zdoo to ntseeb? Miech ntseeb to gane squi rzē xtiidz to, sac gon, ¡grēse diidz ne rrieer to miech, zdoo zho rzaw! ³⁵ Gacxe

waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznē rrieche ro zho. ³⁶ Ni gal dze ne gon gon Dios guielwxtis, ib tedsod zunquizh me miech tib tib diidz ntseeb, tib tib diidznē ne sca rrieer ro zho. ³⁷ Sac gon zigne rzē xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rēb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rēb me lo zho:

—Nazdpaa ntseeb to, squitaa gocndip zdoo to nēz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lēē min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grēse zho psaan xquielntseeb zho wbig zho nēz lo Dios, laa to nēde to gon to diidz niicle ne lo to nu zo tib men ne mazdraa non lo Jonás. ⁴² Scaque rein ne bzob nēz Sabá, steedquie me to gal dze co, sac tel rein co golwi ganle pa lo guidzliu ne brieer me biaadgan me rey Salomón, biadquiaadiag me grē xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ ‘Telne csaande to xquielntseeb to i gon, low lozh to. Sac to zig bzhaac tib zha ne psacsi mēdox. Zeene brieer ma zdoo zho, güey ma güeyquianzē ma grē dan zit güeyguib

ma dien pa cuëz ma. Gonse ma rmdziel zaatne cuëz ma, ⁴⁴ rëb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. ¡Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëëb zho haxta len yu, sac scataa miech guizhiu ne ndxie lo me ga. ⁴⁷ Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

⁴⁸ Pquiab me rëb me:

—¿Xnia naa ye, bets naa ye?

⁴⁹ Blis nia me, blu me grë xpëëdscuel me, dzigo rëbcha me:

—Zha ne gon nac zig zha rii, lëë xnia naa ga, lëë bets naa ga. ⁵⁰ ¡Sac grëse zha ne run mine rnabey Pxoz naa men ne zob gbaa, grëse zha co nac bets naa, nac bzian naa, nac xnia naa!

13

Nac Xtiidz Dios zig zhoxtil

(Mr. 4:1-20; Lc. 8:4-15)

¹ Blozh ga brieë Jesús güey me ro nisdoo. Ga zob me, ² zeene gon me nzian miech ne nocaals lo me ga, nacne biepe me güeysob me tib len barcw zo gax ro nis co, psilo me pseed me zho.

³⁻⁴ Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhoxtil. Zeene laa zho quialaal zho co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga,

güey grë mguin znuse dow maw. ⁵ Mine bliaal zaatne nac lad quie, znuse znuse blana, ⁶ per zeene laa lo ngbidz brieë, znusaque bgoola, bidzgaw; sac guiend nroob low. ⁷ Mine bliaal zaatne nac len yag guiets co, zeene laa yag guiets pxii, bnitlogaw. ⁸ Sangue mine bliaal zaatne nac lo liu naal, blana, brooba ni goca; lo tib tib zhob co no zhimziona brieë galptsii zhob, now brieë tsongala, nogaaw brieë haxta tib gayoow.

⁹ Blozh ga, rëbcha me:

—Zha ne racladz guien mine rne naa nu, yquiaadiag zhow.

¹⁰ Zeene laa grë miech co zey, dzigo wbig xpëëdscuel me bnabdiidz zho lo me dien pe nac ne sca niapse con cuent rseed me grë miech. ¹¹ Pquiab me rëb me:

—Teñ to, Dioszhal rlu lo to zha rnabey me, niicle ncuane mazdraa ngeetsa; laa grëraa miech ne gard gbig lo me, grieelod guien zhow. ¹² Sac zha ne noxcole dien zha rnabey me, zdeedraa me guielbiini lo zho guien zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguic zho zha rnabey Dios, per nac zho niicle nzhial lo zho rwi zho, per peet rand zho; niicle nzhial diag zho per peet rond zho; ib peet riend zho. ¹⁴ Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet rand zho.

¹⁵ Ne nlipaa miech nad, miech ndip zdoo nac zho,

rriequia ntse zho diag zho, ntse zho lo zho;

parne peet gond zho, peet gand zho.

Ib riend zho zha gbig zho lo naa, ygab zho xnëz naa, parne csilaa naa zho.

¹⁶ Sangue to —rëb Jesús lo zho—. ¡Dichos to porne rien to pe ran to, ni riengaa to mine ron to! ¹⁷ Blactaa

zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuane ran to niina, per bgaad zho nian zhow; bzoobladz zho nquiaadiag zho grë ncuane noquiaadiag to, per bgaad zho nion zhow.

¹⁸ Golquiaadiag sca ganle zha nac xcuent zha ne güey gon ga. ¹⁹ Ro nëz ne sca bliaal zhub co, sca nac palal miech ne riepa zha ne rie-nee Xtiidz Dios lo zho, per rioguicd zhow, rlozh ga rdzinaque mendox, rietiche ma tel palalse mine rien zho. ²⁰ Lad quie ne bliaal spalal zhub co, sca nac grë zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëe lo zho, laa miech rtsidil zho porne riladz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuane no lo guidzliu rii mazdraa rionie guic zho, rquidie grë dimi zho. Grë ncuane co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rriequia grë ncuane run zho, no zho nac zig mzion ne brieec galptsii zhub ga, no zho nac zig mine brieec tsonkala, nogaa zho nac zig mine brieec tib gayoow ga.

Zha nac xquielrnabey Dios

(Mr. 4:30-34; Lc. 13:18-21)

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhubxtil. Niapse zhub wen, zhub nal gon me, ²⁵ per no tib zha ne rlëe lo me, gol tib pcow liu, horne grëse miech nixguies,

güey zho güeylaal zho xmidz guizh ncuane zaatne gon me.

²⁶ Zeene laa zhubxtil co psilo blan mzion, hor coraa blu laa guizh ncuane co no lada. ²⁷ Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëeb guizh ncuane, zdieen pa brieew gocniw ga?” ²⁸ Dzigo rëb me: “Rien naa no cho tib zha ne rlëe lo naa, zha co been dziin co.”

’Gocladz zho, hor cogazh nielaadz zhow per bzhiguield me, ²⁹ rëb me lo zho: “Tsielaadzde tow, sac tel glaadz tow niina ye zhubxtil gliaadzniew. ³⁰ Golsaan sca zëeba ga, na zeene laa wlaap gac, hor co gnabey naa zha ne quits zhub, ctopgazh zhow gdziin zhow tib lad tseca; lozhraa ga quits zho zhub, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³² ni tel gacniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdzin grë nguin rzhixcuuaa ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa guietxtil. Niipaque ncobi riots tson lmud rin, ni dib nacse ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho. ³⁵ Ga briequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëta ncuane gard gacnan miech wlal ne bre guidzliu.”

Zha nac xcuent guizh ncuane co

³⁶ Blozhse bnee Jesús lo grë miech co guey zho, yeque me laa

me zey gza xpëedscuel me. Bdziñ zho ro yu, ga bñab zho lo me siguiel me gnee me lo zho dien zha nac xcuent guizh ncuuan ne bzeet me ga. ³⁷ Dzigo rëbchaa me lo zho:

—Golgona sca, znu gon nac cuent co. Rriequia gon naa ga nac men ne gon zhob co. ³⁸ Liu ne bñi-aaw ga, nac lo guidzliu, zhobx-til co nac grë miech ne nole xnëz Dios, laa guizh ncuuan co nac grë zha ne no ladzni mendox. ³⁹ Zha ne güeygan guizh ncuuan co, lëe mendox ga. Dze lo wlaap co, gac dze ne gon Dios xquielwxtis me, zha ne tsie wlaap ga, lëe anjl ga. ⁴⁰ Ni zigne sca cuee zho guizh ncuuan co lad zhobxtil, gzëeg zhow, scapaa nagon gal dze ne gac xquielwxtis Dios, ⁴¹ sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴² ¡Grëse zha ntseeb co, hor co laa zho guey lo guidox ne rieguiäl zho! Ga tso zho goonnë zho, haxta gow lay zho lo guielnëdox co. ⁴³ Laa grë zha ne güeynal minë nac diidzli, zha co gdziñ zaatne rnabey Pxoza naa, masaque zig xbiini ngbidz glu zho ga. ¡Zha ne racladz guienä yquiaadiag zhow!

⁴⁴ 'Ziaad gac xquielrnabey Dios zig tib ncuuan non ne noliu tib lo xcuaa miech. Zha ne gdziel tib ncuuaane sca non, ib tedsod zie zho sto zho grëse ncuuaane rap zho grieedimi si zho liu co, parne guñchen zho ncuuan non co.

⁴⁵ 'Zha ne rzëeb lo xquielrnabey Dios ziaad gac zho zig tib zha ne rzi quie perl minë mazdraa niazh. ⁴⁶ Zeene ron zho pa no tib perl co, rto zho grëse ncuuaane rap zho, rie zho rzi zhow.

⁴⁷ 'Nacaque xquielrnabey Dios, zig tib guix nroob ne rgaa mel niina, zeene rsëeb ngooz mela lo nis grë lose mel rto. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho

grë mel co; ma ne rquiin laa tib chicuid zole rio ma, laa ma ne rquiin rsëeb zho. ⁴⁹ Scapaa nagon gac miech gal dze ne gon Dios xquielwxtis me, ziaad grë xanj me cuee zho grë zha ntseeb lo zha ne no xnëz me, ⁵⁰ tsieron zho zho lo guidox ne rieguiäl zho. Ga tso zho goonnë zho, haxta gow lay zho lo guielnëdox co.

⁵¹ Blozhse ga, rëb me lo zho:

—¿Pe bien to na zha nac grë minë blozh bne naa lo to nu?

Grëse zho pquiab rëb zho:

—Bien now.

⁵² Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios minë zialnie naa niina, masaque nac zho zig tib zha gol ne quianie chop lo ncuuan non lidz zho, quianie zho grë min gol-le ni quaniequegaa zho min cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me briece ga zie me nëz ladz me.

⁵⁴ Bdziñ me ga güey me yadoo, psilo me pseed me grë miech co. Per nli rzee zdoo zho ron zho grë minë rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? ⁵⁵ Tib zhinse ngurëyag name nac me. Led lëe xingan Marí i, bets me name nac Jacob, nac José, nac Simón ni Judas; ⁵⁶ grë bzian mew, nu no zho grë zho. ¿Pa dzigo güey me wseed qui?

⁵⁷ Ib beencasd zho me, haxta rlëe zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd guñbey zho.

⁵⁸ Beenḁ me nzian milagr ga, sac sca ndip zdoos grē miech co ib nēd zho nlladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Leḁ dze co bin rey Herod (meḁ ne rnabey Galilé) grē ncuaaḁe ruḁ Jesús, sac tel pa lotaaw zēēb xtiidz me; ² dzigo rēb Herod lo grē zha ne ruḁ dziin lo me:

—Rieḁ naa lēē Juan Bautist ga quiayun grē miḁ co, segur brieecban me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguib, ⁴ loxaque ne rnee Juan lo me nonguiēda ga lēēque Herodí ptsieelnia me, sac tsieelpaa bets me Lip nac Herodí. ⁵ Gocladz Herod niut me Juan, per bdzieb me meḁguiēdz, sac rleynie zho Juan, rieḁ zho xtiidz Dios ziadteed Juan lo miech.

⁶ Laa tibtaa dzew, lēētaque noyac zihni Herod dze ne bloozh me stib iz, bdeed tib xindzoop Herodí squi ndxie grē zha ne zobnie me psilo ndzoop biee ndzoop. Bdziladz me gon me zha biee ndzoop, ⁷ haxta brieec ro me rēb me: “Ncuaaḁe gacladztaa luu gnab luu, znedz naaw.” ⁸ Per glole pquiil Herodí ndzoop, nacne rēb ndzoop lo me: “Miḁe racladz naa, xoob guic Juan tib leḁ bandej gneedz luuw lo naa niinagazh.”

⁹⁻¹⁰ Zeene bin Herod sca rēb ndzoop, mbanse rac me; per rdeetraaw diidz niab me grieeloda, sac grēse zha ne zobnie me ga, bin zho rēb me zdeed me ncuaaḁe gnabtaa ndzoop. Dzigo racse me pxeeḁ me zha ne güeychug guic Juan leḁ ladzguib. ¹¹ Zeene wbiere zho, zhoobse guic Juan tib leḁ bandej bdeed zhow lo ndzoop, dzigo güey ndzoop güeydeed ndzoopa lo xniaa ndzoop.

¹² Zeene gocnaḁ xpēēdscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaaḁ Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieec me ga bzēēb me barcw zie me tib zaatne guiēḁ miech. Per znuse bien diidza, nzian grē guiedz co zha ne gocnaḁa, tib ro nis güey zho, glole zho bdziḁ zaatne no gdziḁ me ga.

¹⁴ Laa me noyet leḁ barcw, zeene blis lo me gon me laa grē miech guizhiu co ndxieḁ ga; pquia zdoos me zho, beḁguiac me grē mguidz ne zienie zho.

¹⁵ Laa dze ziedzelew, wbig xpēēdscuel me rēb zho lo me:

—Mazd gudz lo grē miech qui guey zho na, zeena guiob tsie zho grē guiedz win ne ndxie gax i tsiesi zho ncuaaḁe gow zho; sac gon laa dze bdzele.

¹⁶ Pquiab me rēb me lo zho:

—¿Pe nacne guey zho squise? To none gdeed ncuaaḁe gow zho.

¹⁷ Rēbchaa zho:

—¿Per pe dieḁ yguiaaḁ no zho? Pe rnase gaay quietxtil ni chop meḁ ne ziaadnie no nu, lo grētaa miech qui.

¹⁸ Dzigo bnabey me zho güeynie zho quietxtil co, güeynie zho meḁ co lo me, ¹⁹ ni bnabey me grē miech co bzob zho lo grē guizh nguia ne zēēb ga. Horco bzheḁ me gza quietxtil co ni grop meḁ co, blis lo me nēz bgaa, bdeed me xquizh lo Dios. Blozhse bdeed me xquizh, beḁgrol me gza quietxtil co, meḁ co ne, zigse rdeed mew lo xpēēdscuel me scase scase bdiiz zhow lo grē miech co. ²⁰⁻²¹ Grēse zho dow zho haxta zaatne bieltaa zdoos zho. Miech tafa, zha bguise rgaazig gaay mil, nandragaa grē meḁ wnaa, grē mēēdlaas; ni zeene blozh dow

zho, scase ncuaaṇe nroob biaan, biodzë tsiipchop chicuid bio grë guietxtil co, bio grë meḷ co.

Rzë Jesús lo nisdo

(Mr. 6:45-56; Jn. 6:16-21)

²² Zeēṇe blozh ga, bnabey Jesús xpëēdsuel me bzëēb zho len̄ barcw, zeēṇa zienerga zho tedquia zho stib nēz ro nis co; laa me bii blēz ga, nozonēz me grë miech co. ²³ Blozhse bzonēz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴ Horco laa barcw ne zie xpëēdsuel me ga no lo nis co, ib gacd csëēniob zhow, sac rriee me rtsire mew, nēzrii nēzrec raca lo nis. ²⁵ Merle guini liuw, tibaque zeēṇe laa me bdziṇ zaatne zie zho ga, tib lo nis co ziezë me.

²⁶ Zeēṇe goṇ zho laa meṇ co sca ziaad-zë lo nis co, bdzieb zho, broptsie zho rnee zho:

—jTib ndziin i goṇ ziaad i!

²⁷ Dzigo bnee me lo zho rëb me:

—jGdziebde to, naa ziaḷ nu!

²⁸⁻²⁹ Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—jDë sca! —rëb me.

Lëëléd biet Pedr len̄ barcw, laa Pedr ziezële lo nis co ³⁰ zeēṇe goṇ Pedr scataa rlis me low, bdzieb Pedr. Tibaque zeēṇe biēṇ Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen̄ me nia Pedr, bzoli me Pedr lo nis co.

—jAque luu goṇ Pedr! —rëb me—. ¿Pe nacne gocchop guic luu? ¿Gard goṇ gliladz wen luu cho nac naa?

³² Zeēṇe laa me biepnie Pedr len̄ barcw, laa me co blēz. ³³ Grëraa zha ne no len̄ barcw ga, rleynie zho me, rzee zdoo zho rnee zho:

—jNasi nagoṇ ndion̄ no nli Xpëēd Dios nac luu!

³⁴ Zeēṇe bdziṇ zho stib nēz ro nis co, zaatne rnee zho Genesaret, ga

biet zho barcw. ³⁵ Grë miech co zeēṇe gocnaṇ zho laa me bdziṇ ga, znuse znuse pxoon̄ zho diidz grëraa guiedz ne ndxie gax ga. Dzigo brieē grë miech co, güeynie zho grë meṇ rzacnë lo me, ³⁶ rnab zho lo me siguiel me maase ni xabse me xen̄ grë meṇ rzacnë co. Grëse zha ne bzhen̄ ni xab me, biac zho.

15

Ncuaaṇe runctal xtoḷ miech

(Mr. 7:1-23)

¹ Tib dze, bdziṇ bla zha farisé ni zla maistr ley ne ziaad nēz Jerusalén, lo Jesús; rëb zho lo me:

² —¿Pe nacne dien̄ zienald xpëēdsuel luu miṇe blu xmengol ne, pe nacne zeēṇe laa zho row, ib rguiibd zho nia zho zigne nopaa tsara?

³ Pquiab me rëb me lo zho:

—¿To waa, pe nacne quiaguiits to xley Dios? Golguiēṇ ganle laa ne goṇ to miṇe rnabey Dios zigne naca, leḷ ncuaaṇe blu xmengol to, miṇ co zienald to. ⁴ Led znu goṇ rnee lo xley Dios: “Goṇ pxoz luu, goṇ xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” ⁵ Laa to goṇ rnee to: “Peet nacda gund zho xyudar xmengol zho niicle no me liaadz, totsaque gdeed zho goṇ.” ⁶ Tib lad rsaṇ to xley Dios, miṇe blu xmengol to miṇ co noxcora a to. ⁷ jLoxaque guielwquidie qui no to! Rquiaalo to miech wen nac to, per lëēpaa miṇe ruṇ to i ga bzeet Isá zeēṇe rëb me:

⁸ Grë miech rii, rquiaalose zho ruṇnon zho naa, rond zho diidz goṇ zho miṇe rnabey naa.

⁹ Zhlēse nac grë ncuaaṇe ruṇ zho, rnee zho laa zho riaadgan naa;

sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquaaadiag miñe gni naa lo to nu, ni goltsoxco guien to zha naca. ¹¹ Golgacnaan ganle, grë ncuaañe rdziñ zdoos miech, led miñcod runctal xtol zho; sinque grë ncuaañ ntseeb ne rza guic zho, diidz ntseeb ne rrie ro zho, miñ co runctal xtol zho.

¹² Horco wbig xpëëdsuel me, rëb zho:

—¿Pe bien luu ganle blëë zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxoos naa meñ ne zob gbaa, ib none laaw gliadz zolo zolow. ¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne ran, zaatne nac tib len blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel bnë lo no dien zha nac diidz ne në luu ga, ne rnee luu led ncuaañe rowd miech runctal xtol zho.

¹⁶ Pquiab me rëb me:

—¿Pe niicle to riendaquew dzigo lëë? ¹⁷ ¿Pe riende to grë ncuaañe row miech, led miñcod runctal xtol zho? Sac grë ncuaañe row zho rdziñda len zdoomban zho, zhaa zaatne rdziñ; tib rietedsew xcuerp zho, rlozh ga rrieegaw. ¹⁸ Sangue grë diidznë ne rrie ro zho, zdoomban zho ga rzaw, ni lëë miñ co nac miñe runctal xtol zho. ¹⁹ Zdoomban zho nac zaatne rza grë ncuaañ ntseeb ne run zho, zig nac:

zeñe rio zho grë zhgab yozh,
zeñe rut zho samiech zho,
zeñe rionie zho zha ne nole tsiel,
zeñe rionie zho zha ne nacd tsiel
zho,

zeñe run zho guielgbaan,
zeñe lega rnexuu zho samiech
zho,

zeñe rneenë zho samiech zho.

²⁰ Grë ncuaañ ntseeb co nagon nac miñe runctal xtol miech, gunctald

zho xtol zho niicle tsard nia zho zigne nacpaa grë zhiwseed mengol.

Biac xpëëd tib wnaa zit

(Mr: 7:24-30)

²¹ Ga briees Jesús, güey me haxta nëz Tiro ni nëz Sidón.

²² Nëz co no me güey tib wnaa ne ziaad lo xtii zha Canaán lo me, nguiedz zëeb tsi wnaa co rnab me lo Jesús siguiel Jesús tsiegunguiac tib xpëdwanaa me nosaci mendox. ²³ Per ib pquiabd Jesús lo xtiidz wnaa co, dzigo wbig xpëëdsuel me, rëb zho:

—Mazd bzhiguiel pquiadaadiag miñe rnee wnaa qui, bui ganle zha ncuëtaa zëeb tsi me nal me zhits ne.

²⁴ Pquiab Jesús rëb me:

—Ziald naa par gun naa xyudar zha zit, sinque laa Pxoos naa pxeel naa par gun naa xyudar grë zha Israel ne rzac zig grë mëcwxiiil ne zonziaab lo xbaxtor.

²⁵ Scaque nonee me laa wnaa co wbig pquiitgzhib lo me.

—Bzhiguiel —rëb me—, been tib guielnzaac been xyudar naa.

²⁶ Rëbchaa Jesús lo me:

—Nonguielda gon, cob ne guiet ne no nia mëed gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma miñe rrieengaa nia mëed.

²⁸ Horco pquiab Jesús rëb me:

—¿Squiw nagon! ¡Rlu nli dib zdoos luu rnalo luu naa! Gaçxe waa miñe rnab luu i gun naa, niinagazh laaw gac.

Horcogazh biac xpëëd wnaa co.

Nzian miech ne beenguiac Jesús

(Mr: 8:1-10)

²⁹ Nëz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga. ³⁰ Ga zob me rdziñ grë miech co rdziñnie zho grë zhimguidz zho lo me, no zho

zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguaiac me. ³¹ iNcuaañe gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuaañe ran zho. Grëse miech ne ndxie ga, rzee zdoo zho, rley zho roolnie zho Dios.

³² Dzigo bredz me xpëedscuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—iPer pe yguiaan ne zho? iPa guioxi ne guielwagw ne yquii grëtaa miech qui dan rii, naca zaatne guiend miech?

³⁴ Dzigo bnabdiidz me lo zho, rëb me:

—iBla guietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzhen me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigue rungröl me guietxtil co scase scase rdeed mew lo xpëedscuel me rguizh zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nanndragaa grë meñ wnaa, grë mëedlas; ni zeene blozh ga bii biodzë gadz chicuid bio grë miñe biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëeb len barcw zie ne nëz xtan zha Magdal.

16

Gocladz zha farisé niungüet zho Jesús

(Mr. 8:11-21; Lc. 12:54-56)

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuaañe nonguieldgaa niun me. Rquiaalo zho rnab zho lo me gun me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—iPe nlijaa rnee to rienle to zha nac grë ncuaañe noyac len dze rii! Zha zëeb dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co. ⁴ Nazdpaa ntseeb to, squitaa gocndip zdoo to nëz lo Dios, i zha rnaraa milagr ne racladz to gan to? Stibaque milagr gon gan to, tib miñe gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene brie zho ga, zoladzd xpëedscuel me ney zho guietxtil ne niow zho. ⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnie ne guietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—iGardaque lëe guien to cho nac naa! iPe nacne tso to zhizhgab guietxtil? ⁹ iNi lalnu lëe peet

riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan? ¹⁰ Scaque zeene gadzaque guietxtil ni bgaaw dow tap mil miech, ¿pe niicle miñ co rsoladzdraa to? ¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

*Bnee Pedr cho nac Jesús
(Mr. 8:27-30; Lc. 9:18-21)*

¹³ Bdziñ Jesús nëz xtan zha Cesaarea de Filipino grë xpëëdscuel me, nëz co no me bnabdiidz me lo zho rëb me:

—¿Cho dieñ ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremiw, meñ ne biadteed xtiidz Dios padzeela; nogaa zho rnee no cho stib meñ ne ziadteed xtiidz Diosa zig biaad zha ne biaad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—¡Luu nac Meñ ne zëëble diidz ga cxeel Dios! ¡Xpëëd Dios nac luu!

¹⁷ Dzigo rëbchaa me:

—Dichos luu Simón (xingan Jonás) brieë diidz qui ro luu, sac gon Pxoz naa meñ ne no gbaa, meñ co bneedz guielbiini qui lo luu, nacda ncuaane cho miech nëw lo luu. ¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda. ¹⁹ Laa naa rzo luu, luu gnee Xtidz naa lo miech zeena gacnañ zho zha grieelo ygaa zho zaatne rnabey Dios; luu gac zig

tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Meñ ne zëëble diidz ga cxeel Dios.

*Bzeet Jesús zha gun miech me
(Mr. 8:31-9:1; Lc. 9:22-27)*

²¹ Len dze co psilo Jesús bzeet me lo xpëëdscuel me zha csacsi miech me. Rëb me nroob ncuaane cteed zho me, zeene laa me tsie Jerusalén; grë zha non lo menguedz, grë pxoz ne rnabey, grë maistr ley, ible stidiñ zho me ni haxta zut zho me; per zeene gac tson ngbidz gut me, laa me grieëban.

²² Gon Pedr zha rnee me, dzigo bredzaque Pedr me blisqui Pedr lo me dieñ pe nacne rnee me laa me guet. ²³ Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gungüet luu naa! Zienied guic luu miñe rnabey Dios, sinque miñe rleynie miech, miñ co zienie guic luu.

²⁴ Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho miñe rnabey naa, niicle tel miñ co yquiaaqui csacsi miech zho. Nodne yquia zdoo zho xquielmban zho, ²⁵ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh. ²⁶ Zha ne zienie guic loxaque gapchen, ¿pa dieñ yquiina lo zho, tel lëëw yquiaaqui guey zho gabil? ¿Ni-acxe zrieelo gdziib zho dimi, laa zho len gabil? ²⁷ Naa ne nac naa Mgui ne pxeel Dios, dzidiñ dze ne gbiire guial naa stib, guialnie naa grë xanjl naa, glu naa ganle pa lotaa meñ nroob nac Pxoz naa; dze co gded naa miñe tsieguial tib tib miech, tel zha wban zho. ²⁸ Ib tedsod lo grë zha ne ndxie nu niina,

bii no zha ne gan ganle, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque bi-inidoo rree lo me, pale lo ngbidz; xab mew, per nli rquiabniw, masaque biini ne rrona. ³ Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. ⁴ Rdzieb zho, lo dzeb co brie ro Pedr rëb Pedr:

—Maestro, jtebaa zha grieelo guiaan ne nu! Tejne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëë xpëed naa i gon, rleynie naa me, rzac zdoo naa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëëled pquits-gzhib zho haxta bdzin lo zho lo liu. ⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gondraa zho schop men co.

⁹ Blozhse ga, laa zho wbi ga. Cho gui co ziad-zëëbnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guidseed miech gon zho xtiidz Dios. ¹² Ni gacnan to ganle laa me biaadle, per beenbeyd miech me, lelp sacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëed ne nosacsi mendox
(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brie tib mgui, wbig me lo Jesús, pquits-gzhib me lo Jesús, rëb me:

¹⁵ —Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶ Blansonie naa win lo xpëedscuel luu nu, per rrieelod zho gunguiac zho win.

¹⁷ Dzigo rëbchaa Jesús lo xpëedscuel me:

—jPe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? jNcuane cxecwdraa naa lo to squi nac to! jGoltënie mëed qui nu!

¹⁸ Dzigo goctox Jesús lo mendox ne nosacsi mëed co, benxoon me ma, hor cogazh laa mëed co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niunxoon zho mendox ne nosacsi mëed co. ²⁰⁻²¹ Dzigo rëbchaa me:

—Brieelode to niunxoon to ma, sacne rnalode to Dios. Tej niaca mine rnalole to Dios siquier palal yeen, gzoob ne siquier lal tib midz moxtaz, niicxe ncuane mazdraa ngan gnab to lo me, zun mew; tsod ncuane grieelod gun to.

Bzeet Jesús laa miech csacsi me
(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa, ²³ haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielnē, mbanse rac zho.

²⁴ Bdzin me guiedz Capernaum, loxaque bzēeb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rēb Pedr lo zho:

²⁵ —Rguizh mew, ¿pe nacne quizhd mew?

Zeene bdzin zho len yu ne rbēz me, gardle guiab Pedra lo me, glome me bnabdiidz rēb me lo Pedr:

—Zig nac dimi ne razh lo men ne nac rey dien, ¿pe ye xpēed me rguizha, te loxaque zha zit rguizha ye?

²⁶ Pquiab Pedr rēb Pedr:

—Zha zitse rguizha.

—Nligaa sca naca —rēb Jesús—. Zha ne nac mēed nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Meļ ne glopaa yгаа low, bzhen ma pxal ro ma, ga gdziel luu dimi; dimi co güeynie bdiizh mine no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bnabdiidz xpēedscuel Jesús lo me, dien cho tib zho gac zha ne mazdraa gacnon lo grē zha ne no xnēz Dios.

² Dzigo bredz me tib mēēdbgwi win, bzo me win glowtaa lo zho, ³ rēb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mēēdwin rii, per ni xnēz Dios grieelod sēeb to. ⁴ Zha ne racladz gac zho zha non, none gac zho tib miech ndooladz, none gac zho zig tib mēēdlas. ⁵ Miech ne gacnie zha

ne sca nac, zha ne rleynie naa, rrieequia naale ga racnie zho.

⁶ Per miech ne yquuil zho gunctal zho xtol zho, jprobsaxe zha co! Mazd zhi guielnēw lo zho ygadoo tib quie molin zhobxtil yan zho tsieron zho zho nisdoo. ⁷ ¡Nac lo guidzliu rii, runfalte guielntseeb low! Runfalte ncuaaņe gunctal xtol miech, jper probsaxe zha ne yquuil zha ne nole xnēz naa, gunctal zho xtol zho!

⁸ Golguien telne tib nia to, tib nigaa to rquiaqui runctal to xtol to, gołtichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdziņd dze lozh, lēdle zob gropa ni laa to guey gabil, lo beldox ne gdziņd dze guiuu. ⁹ Scaque bziaalo to, mine rquiaqui runctal to xtol to, gołtichegazha, peet nacd maase tibaque lo to zob totsaque yгаа to guielmban ndzon ne gdziņd dze lozh, lēdle zob gropa ni laa to guey lo beldox ne nac gabil.

¹⁰ 'Ib gunde to csaņwin to grēraa zha ne no xnēz naa, zha ne nac zha mban, sac goņ non zho lo Dios, anj ne quianap zho, tibaque zo me lo Pxoż naa men ne zob gbaa.

¹¹ 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grē zha ne zonziaab lo me.

¹² 'Rzac Dios miech zig tib men ne rquianē zdoō xpēcwxiił. Telne quianie zho tib gayoo ma, ni gzi-aab tib ma, led zēeb lēē rsaņ zho stapgal tsiimtap ma ne zo lo zho, rbire zho rieguib zho ma ne bziaab ga. ¹³ Zeene rdziel ma lo zho, rlozhd gleynie zho ma, lēē ma rac guielbley que grēraa xcompañer ma. ¹⁴ Scadaa nagon rzac Pxoż naa miech, grē zha ne nole xnēz me, ib racladzd me gziaab zho.

¹⁵ 'Golguien sca, tib tib to zeene cho tib zha ne nacgrē to gun pe tib falt lo to, gołtsie gołtsienee lo zho; gropse to gołzodiidz pe nac

mine pxin zho. Telne siguiel zho guiaan to mpas, laa to beenle gan ga gneewen to stib. ¹⁶ Laa telne ned zho, dzigo golguib tib zha ne se, chopгаа zha ne se gan ganle zha rac zho. ¹⁷ Tel niicle scaw nedaque zho guiaan to mpas, dzigo mazd golguiab lo grese zha ne nacgre to gnee zho lo zho. Telne niicle xtiidz zha co ned zho gon zho, dzigotaa mazd golsaan zho, sacdraa to bets to ga, golcuee zho lad to, golsac zho zig rzac miech gre zha ne ziana guielntseeb.

¹⁸ Gneli naa lo to ganle, grese zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ Ni racladz naa gacnan to ganle, gre zha ne no xnnez naa, niicle tib nezaque zho, per telne tipse rac zho, ncuane gnabtaa zho lo Pxoz naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr reb Pedr lo me:

—Zha ne sca dzigo gun falt lo naa, blataa vult no gun naa zho perdon? Gadztaaw lee?

²² Pquiab me reb me:

—Leda gon Pedr, led loxaque gadzde vuela. Tel blataa vult gun zho falt lo luu, none gun luu zho perdon.

Zha ne beend perdon

²³ Gre zha ne no xnnez Dios, ib none gun zho perdon samiech zho.

Tib rey name, tib dzew bredz me gre zha ne rquia dziin lo me, par dien zha quiayun zho dziin.

²⁴ Loxaque psilo me, zeene laa xcuent tib zha co blozh briece, nroob briecequia zho lo me; ²⁵ par quizh zhow, peet nzhend zho. Dzigo bnabey me to zho grop tsieel zho, xpeed zho ne, ni grese ncuane rap zho, parne grieelo gazh xquielqui zho. ²⁶ Zeene gon

zho sca reb me, pquitsgzhib zho lo me, reb zho: “iBeen guielnzaac, gop tib paciens, na dien zha gun naa quizh naa xquielqui naa lo luu!” ²⁷ Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

²⁸ Loxaque briece zho ga, bdzieel zho tib zha ne nzeeb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinéz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguiib, haxta bdiizh zho dimi ne zeeb zho ga. ³¹ Greeraa zha ne rquia dziin lo rey co, zeen gocnan zhow, bdeedne zho, guey zho gueyzodiidz zhow lo me. ³² Zeene bin mew, bnabey me gocredz zho, goctox me lo zho reb me: “iPe clas miech nac luu! Pe rsoladzd luu zha rac luu bnab luu pquia zdoo naa luu, haxta beenquizhd naa luu guielquidox ne zeeb luu ga. ³³ iPe nacne pquiad zdoo luu zha co, zigne pquia zdoo naa luu?” ³⁴ Bleee me gon me sca been zho, bnabey me bio zho ladzguiib, haxta blozh bdiizh zho grese xquielqui zho.

³⁵ Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

19

Zha ne rsébtsieel
(Mr. 10:1-12; Lc. 16:18)

¹ Blozhse sca bnee Jesus lo zho, brieenie me zho ga gueyted zho gre guiedz ne ndxie xtan zha Judé, gre mine riaan nez dan ro guubee Jordán, nez ne rlan ngbidz. ² Miech guizhiu ne rriece gre guiedz co, rdziin lo me; gre men rzacne ne rdziinie zho, beenguiac me zho.

³ Ga no me, bdziñ bla zha farisé gocladz zho niungüet zho me, par dien pe nxiñd me tib diidz; bnabdiidz zho lo me rëb zho:

—Pe gnë luu dien, ðpe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhubnee lo Xtiidz Dios? Lo co zhubnee ganle zeñe psan me miech, tib nëz zho psan me, tib mgui ni tib wnaa. ⁵ Ni rneew, ib none grieexhaa mgui lo pxoz zho, lo xniaa zho par gbannie zho wnaa ne nac tsieel zho, gac zho tibaque miech grop zho. ⁶ Nligaa nacdraa zho chop miech, sinque laa zho rac tibaque. Dios nac men ne psan ycatsieel miech, cho dzigo nac miech par quiits zho mine rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmenjol to, gane bdeed Moisés diidz csëbtsieel zho; sangue Dios psan me diidz csëbtsieel miech. ⁹ Gacnan to ganle, zha ne csëeb wnaa ne nac tsieel zho, ni tel peet guielyozh beend wnaa co, dol ga gun zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga gun zho sac gon no tsieel wnaa co.

¹⁰ Dzigo rëbchaa xpëedscuel me:

—Tel scataa nac xcuent guieltsieel, mazd lëeqew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho. ¹² No zho desde rac zho mëed, nacd zho zha ne grieelo tsonie wnaa; no zho ib miech sca rsan zho. Nogaa zha

ne ib zha rbeeladz zho ctsieelniad zho, parne grieelo tsoxcoraa zho gun zho xtsiñ Dios. Zha ne sca rquiabladz ctsieelniad, maase ctsieelniad zho.

Beenlay Jesús mëedlas

(Mr. 10:13-16; Lc. 18:15-17)

¹³ Ga no Jesús, ndal zha ne bdzin bdzinnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodziñnie zho grë mëedlas co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, golsaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

¹⁵ Dzigo psilo me pxobnia me guic grë mëedlas yeen co, beenlay me win. Blozhse ga, laa me brieega.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zieriee ga, zeene bdzin tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ðpe nac mine gun naa parne grieelo ygaa naa guielmban ndzon ne gdziñd dze lozh?

¹⁷ Pquiab Jesús rëb me:

—Rnee luu lëe tib men wen nac naa. ¡Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu mine rnabey Dios.

¹⁸ Pquiab zho rëb zho lo me:

—¿Pa min waa?

Rëbchaa me:

—Mine rnee:

Gute luu samiech luu, telne nole tsieel luu, tsonied luu zha ne led tsieeld luu, cuand luu samiech luu, yquiadiidzguizhd luu samiech luu,

19 gon pxoz luu, gon xniaa luu, cued luu xquielto me.

Bleynie samiech luu, zigne rleynie luu luu.

20 Dzigo rëbchaa zho:

—Ni tib mine rnee luu i gard quits naa, grësew zana naaw zigne naca. Racladz naa gacna naa, dien peraa no gun naa.

21 Horco rëb me lo zho:

—Tel racladz luu gac luu tib zha ne gban grëse mine ncabay Dios, güey sca güeyto grëse ncuaane rap luu, dzigo güeytiiz dimi co lo grë zha ne guënd pe yquiin. Lozh ga, dë dënal zhits naa. Min co nagon gun luu, dzigo zгаа luu guielmban ndzon co; ni scagaa nroob guielnzaac ne yгаа luu nëz lo Dios.

22 Zeene bin zho sca rëb me, mbanse rac zho laa zho zey, sac nroob ncuaane quianie zho.

23 Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen rzacxuu zho par sëeb zho xnëz Dios gnabey me zho.

24 Ne nligaa nga rzac zhow! Mazd ngandse rded tib camell guieer guzh lëdle sëeb tib zha ne squi rapchen xnëz Dios.

25 Zeene bin zho sca rëb me, rzee zdo zho, rnee zho:

—Bay, çchösezhe dzigo waa nac zha ne zrieelo sëeb xnëz Dios?

26 Dze bui me lo zho, dzigo rëbchaa me:

—Nligaa par miech zootle tsod zha ne grieelo sëeb xnëz me; sangue me nan me no zho. Sac tel me, tsod ncuaane grielod gun me.

27 Horco pquiab Pedr rëb Pedr lo me:

—No dzigo waa, çpe nac mine yгаа no? Nanle luu ganle, tel no grëse ncuaane rdziaap no, laa no psana, ziaadnal no zhits luu.

28 Pquiab me rëb me:

—Golgona ganle, dze ne gacncub grëse ncuaane no, zeene laa Mgui ne pxeel Dios zob lo xcan ne zo

zaatne nac lo guielndzon ne no me, dze co lo gza to ne nac to zha ne bi-aadnal zhits naa, sob to lo gza tsiipchop xcan ne rieguialto. To gac zha ne gun guielwxtis lo gza tsiipchop dii ne nac zha Israel. 29 Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zгаа zho tib guielmban ndzon ne gdzindraa dze lozh.

30 Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

1 Grë zha ne no xnëz Dios, zac zho lo me zig bzhaac grë zha ne güey xtsiin tib men co.

Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. 2 Bziel me palal zho, biaan zho diidz palal quizh me zho dze, laa zho bzëeb lo dziin. 3 Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. 4 Dzigo bree me zho, rëb me: “Goltsie xtsin naa, na quizh naa to mine non xtse to.”

5 Rwe ngbidza, biire me güey me güeyguib me spalal zho. Maase las treza güeyaque me stib.

6 Zhile sëeb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “Çpe nacne squise noded dze to?” 7 Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸ 'Zeene laa dze blozh bdze, bnee me lo zha ne zo lo xtsiin me, rëb me: "Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb." ⁹ Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. ¹⁰ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ 'Zeene gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho: ¹² "Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyenaque been zho dziin?" ¹³ Pquiab me rëb me: "Bets, nosacsid naa to, biaanle ne diidz name palal quizh naa xtse to. ¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵ ¿Stiba, xtimi naaw, zrielo gundziin naaw zigne racladz naa! ¿Te në rac zdoo to ye, ran to rquia zdoo naa miech?"

¹⁶ 'Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

Bzeet Jesús stib laa miech csacsi me

(Mr. 10:32-45; Lc. 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëëdsuel me, ¹⁸ bzeet me lo zho zha gon miech me zeene laa zho gdziin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹ Zha co naa ladznia zha zit, parne gunnguzee zha co naa, parne quin zho naa, ni haxta

squiaa zho naa lo cruz. Per zeene gac tson ngbidza, zriebaanaa.

²⁰ Tibaque zeene wbig tsiel Zebedé wbignie me grop xingan me Jacob ni Juan, pquitsgzhib me lo Jesús rnab me gon Jesús tib favor ne racladz me. ²¹ Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdziin dze ne laa luu zob zobnabey luu; tib zho nëz derech, stib zho nëz revës.

²² Pquiab Jesús rëb me lo wnaa co:

—¿Ni luu gon riend pe rnab luu! ¿Niacxe zlëb zho gan zho grë guielnë ne gan naa, tedgaa zho grë mine teed naa?

Pquiab zho rëb zho:

—Zlëëb no.

²³ Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gnedz naa diidz sob to cue naa nëz derech, nëz revësgaa, led naad raguial min co; sac laa luga co biaanle par zha ne tsieguaiala, ni Pxoz naa men ne zob gbaa men cose nan dien chow.

²⁴ Grëraa xpëëdsuel me, zeene bin zho pe nac mine rnab Jacob grop Juan, blëë zho lo zho. ²⁵ Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladzttaa zho. ²⁶ Sangue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho gon zho mine gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin

lo zho, ni gded naa xquieḷmban naa zeena laa zho lo grētaa ncuuaḅe ngadoo zho. Ni nanpaa naa miech guizhiu ne laa.

Biac chop zha ne roḷd lo

(Mr. 10:46-52; Lc. 18:35-43)

²⁹ Miech guizhiu naḷ zhits Jesús, laa me zieriee guiedz Jericó. ³⁰ Ro nēz co zob chop zha ne roḷd lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, meḅ xtií rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per leḷ hor cole nguiedzraa rbedz zho me. ³² Nacne zeene bdziḅ me zaatne zob zho, blēz me, bnabdiidz me lo zho rēb me:

—¿Pe nadien guḅ to naa?

³³ Pquiab zho rēb zho:

—¡Racladz no guiac lo no!

³⁴ Pquia zdoo me zho goḅ me sca rac zho, dzigo pquiaania me zhits guidlo zho. Horcogazh laa lo zho biac, laa zho zienaḷ zhits me.

21

Bdziḅ Jesús Jerusalén

(Mr. 11:1-11; Lc. 19:28-40;
Jn. 12:12-19)

¹ Sca no Jesús nēz grē xpēēdsuel me, laa me bdziḅ guiedz Betfagé. Gaxle ga riaan Jerusalén, nēz danse squi riaan Gui Oliv. Dzigo pxeel me chop xpēēdsuel me, rēb me lo zho:

² —Goḷtsie guiedz win ne ndxie danse lo ne i. Ga gdziḅ to zaatne quiadoo tib burr gus grop xpēēd, dzigo goḷxadz ma goḷtēnie ma nu. ³ Teḷ cho gnabdiidz pe nacne noxadz to ma, goḷguiab lo zho: Meḅ ne rnabey ne, meḅ co rquiin ma, na zigne lozh xtsiḅ ma guiaadsaḅ no ma.

⁴ Ga brieequia miḅe bnee tib meḅ ne biadteed xtiidz Dios lo miech padzeela, zeene rēb me:

⁵ Goḷguiab lo meḅ Jerusalén:

“Goḷwi ganḷe, laa meḅ ne nac zhirey to ziaad i.

Tib meḅ ligase rlu me, zob me lad tib burr win,

tib ladse ma ne rey yo zob me.”

⁶ Laa zho zie, zigne bnabeyse me zho ga, scase beḅ zho. ⁷ Zeene wbire zho, laa zho bdziḅ burr co grop xpēēd ma. Pxob zho lar ne rbix zho lad xpēēd ma, laa me bzob ma. ⁸ Zigse zie me, no grē miech guizhiu co, rta zho lar ne rbix zho ro nēz rded burr ne zob me ga; nogaa zha ne rchoo nia grē yag nguia, rdziḅ zhow ro nēz rded me. ⁹ Grēse zho, zigtaa zha ne nera, zigtaa zha ne naḷa, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleynie ne me! ¡Zha ndzontaa Dios, pxeel me meḅ nroob qui lo ne!

¹⁰ Zeene bdziḅ me Jerusalén, rlozhd gzee zdoo grē miech ne ndxie ga, rnabdiidzlsa zho rnee zho:

—¿Bay cho nac meḅ qui?

¹¹ Rquiab grē zha ne naḷ zhits me ga, rnee zho:

—¡Lēē Jesús i! ¡Lēē meḅ Galilé qui, noteed xtiidz Dios lo miech!

Blee Jesús miech len yadoo

(Mr. 11:15-19; Lc. 19:45-48;
Jn. 2:13-22)

¹² Biini liu co, zeene bdziḅ Jesús Jerusalén stib, güey me yadoo nroob ne zob lad guiedz co. Bdziḅ me goḅ me nzian miech ne ndxie ga, masaque tib lgui quiaayun zho, zha ne no wto, zha ne no wzi. Nacne güey me ptiixche me xmezha zha ne no wto, ptiixche me xmezha zha ne no wto palom; blee me zho ga grēse zho, ¹³ rēb me lo zho:

—Led znu goḅ zhoḅnee lo Xtiidz Dios: “Zaatne nac lidz naa nu, nu none guiaad grēse miech sodiidznie zho naa.” Laa to goḅ, quiaayun to lugar rií zig tib zhibliee ngbaan.

¹⁴ Ga no me bdziñ bla zha ne rold lo, zla zha ne nē ni, wbig zho lo me. Gzase zho beñguiac me. ¹⁵ Nzian mēēdlas yeñ ne ndxie leñ yadoo ga, psilo win nguiedz rnee win: “i zha ndzontaa xingan rey David!”

Grē zha ne nac pxoz ne rnabey, ni grē maistr ley, zeñe goñ zho milagr ne beñ me ga, ni goñ zho zha rnee grē mēēdlas co, rlēē zho, ¹⁶ rēb zho lo me:

—i Pe ib rond luu ganle pe nonee grē mēēdlas qui?

Pquiab me rēb me:

—Ron naaw. i To waa, pe ranle to ganle zha zho bnee lo Xtiidz Dios, zaatne raquiet miñe noyac nu? Led rneew lēē:

Haxta grē mēēdlas ne bii radz, ye win rley win roolnie win me.

¹⁷ Blozhse sca rēb me, zoque zho ga, laa me bio nēz zie me nēz Bertain. Ga blēz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeñe no me nēz gdziñ me Jerusalén, pcaabedz me. ¹⁹ Goñ me zob tib yag guigw gax ro nēz, dzigo güey me güeyso me low dien pe ndziel tib nex low niow me. Bdziñ me goñ me loxaque zhi-blagsew zēēb, nacne rēb me low:

—i Lēē blozh xtse luu nu goñ! i Gdziñdraa dze ne yquia nex lo luu!

²⁰ Biini liu, zeñe laa zho zie Jerusalén stib, goñ xpēēdscuel me, laa yag guigw co bidzle. Bzee zdoo zho, bnabdiidz zho lo me rēb zho:

—i Bui ganle, bay zha nacne squi znuse wbidz yag guigw qui?

²¹ Pquiab me rēb me:

—Gneli naa lo to ganle, telne dib zdoo to rnalo to Dios, niicle ncuane mazdraa ngan gnab to lo me, zun mew. Lēēraasi none dib zdoo to gliladz to zaca, ni palal gacchopd guic to. ²² Grēse ncuane gnab to zeñe rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me leñ yadoo. Ga noseed me miech, zeñe bdziñ bla zha ne nac pxoz ne rnabey ni zla zha ne nac men non lo menquiedz, bnabdiidz zho lo me rēb zho:

—i Cho dzigo nac luu ne squitaa ziaadnabey luu leñ yadoo? i Cho rnabey luu?

²⁴ Pquiab me rēb me lo zho:

—Ye naa laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grē ncuane noyun naa. ²⁵ Golnē dien, i cho pxeel Juan Bautist biaad me pchoobnis me miech? i Pe Dios pxeel me, te miechsew ye?

Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “i Pex nac dzigo waa bliladzde to miñe bnee me?” ²⁶ Tel na dzieets-gaa ne, miechse pxeel Juan, griequiadaque ne.

Rdzieb zho niab zho miechse pxeel Juan, sac nan menquiedz nli Dios pxeel Juan biadteed Juan xtiidz me lo miech.

²⁷ Dzigo mazd miñe beñ zho rēb zho lo me:

—Ndiond no dien cho pxeel Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grē miñ rii.

Zha nac zha ne rond diidz

²⁸ Golquiaadiaga ganle. Tib mgui, quianie me chop mēēdbgui. Tib dzew, bredz me tib zho rēb me lo zho: “Xin, none goñ tsie luu nadze, tsietop luu uv xcuua ne.” ²⁹ Pquiab zho rēb zho: “i Gad naa!” Wdzee-laaw, biñ zho nonguiēda ga sca gun zho, dzigo bio zho nēz güey zho. ³⁰ Laa stib zho, zeñe bredz me zho rnabey me zho tsie zho lo dziin, rēb zho: “Peet nacda, na maase ga naa.” Blozh ga pasē zho nie.

31 'Golnë dien, lo grop mēēd co, ħcho nac zha ne bin xtiidz pxoz?

Pquiab zho rēb zho:

—Zha glo cow.

Dzigo rēbchaa me:

—Gneli naa lo to ganle, miñcodaa quiayac nu niina: Grē zha ne rzac to mazdraa ngoopdol, zig nac grē zha ne rtop dimi ne razh lo zha Roma, zig nac grē wnaa ro nēz, mazd glole zha co nozēēb xnēz Dios, lēdle to. 32 Biaadpaa Juan Bautist name biadseed me miech csaan zho xquiełntseeb zho, gban zho zigne racladz Dios, ni pe liaadz to nion to miñe rnee me. Mazd grē wnaa ro nēz, grē zha ne rtop dimi ne razh lo zha Roma, znuse psaan zho xquiełntseeb zho. Laa to, niicle ran to nosaan grē zha co xquiełntseeb zho, per ib rsaande to miñe nac to.

Xcuent zha ne pquianap liu

(Mr. 12:1-12; Lc. 20:9-19)

33 Dzigo bzodiidz me stib cuent lo zho rēb me:

—Tib men name, nroob lbē uv beenbni me lo liun me. Psilo me ptse me igose liu co, bzaa me zaatne gzhii grē uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieē, laa me zey zit.

34 'Zeene gol mēē ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me. 35 Per lej bnaaz zho zho, zha ne blooquie zho, zha ne bdeedgolp zho, haxta beet zho tib zho. 36 Wbiire pxeel me zla zho, hor cole nzianraa zho pxeel me, per niapse sca psacsi zha co zho.

37 'Tibaque zeene pxeelaque me xpēēd me, bza guic me rēb me: “Ganse zho xpēēd naaw, zon zho miñe gnee me.”

38 'Pex nion zho diidz, zeene gon zho xpēēd me, rēbchaa zho:

“ĭLēē zha qui nagon guiaannie liu rii! ĭGolgotsaa dziuut ne zho, zeena guiaana lo ne!” 39 Dzigo bnaaz zho xpēēd me, güeynie zho me zaatne nac tib lad lo liu co, ga güeygut zho me.

40 'ĭZha sca dien rzac to gun bizhuan liu co gza zha co, zeene laa me gbire?

41 Pquiab grē zha ne nac pxoz ne rnabey, ni zha ne nac zha non lo menguedz ga, rēb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

42 Dzigo rēbchaa me lo zho:

—Haxta lo Xtiidz Dios no tib zaatne znu rnee, ĭpe gard ganle glab tow? Rneew: Quie ne psēēb zha ne nozaa yu, ni nand zho lēēpaa quie co nac miñe rnazdziits yu.

ĭNcuane gzee zdoo new! Sac Dios bnabey sca goca.

43 'Gacnan to ganle, scadaa nagon grieē to lad grē zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to. 44 Zha ne tsietsobe lo quie ne raquiet ga, zac zho zig tib ncuane rac tson tap lē; laa tel lēēgaaw tsoe lad zho, zac zho zig tib ncuane die die rac.

45 Grē zha ne nac pxoz rnabey ga, ni grē zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. 46 Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne nēd sēēb xnēz Dios

1 Bzodiidz Jesús stib cuent lo zho, rēb me:

2 —Grē zha ne rbedz Dios ygab zho xnēz me, none tsoxco zho gon zho miñe rnee me; sac nenda

gdzieelo zho zig bdzieelo zha ne bredz tib rey co nie zho lo zhilni xpëed me.

³Tib rey name, ziaadyob ctsieel-nia xpëed me, nzian zha ne bredz me tsie lo lni. Zeene laa dze co bdziñ, pxeel me zha ne quia dziin lo me zietsedz grë zha ne bredz me lo lni ga, per nëd zho nienal zho.

⁴Wbiire me pxeel me zla zho rëb me: “Goltsietsedz zho, golguiab, laa guielwagw ne yquiin goclole, siguiel zho na guiaad zho.” ⁵Per ib beencasd zho zha ne pxeel me ga, no zho brieë zie lo xcuaa, no zho brieë zie zhiwto, ⁶nogaa zho lel bnaaz zho zha co, psacsi zho zho, beet zho zho. ⁷Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co. ⁸⁻⁹Blozh ga biire pxeel me zla zho, rëb me: “Laa guielwagw rii goclole, mine naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguald zho guiaad zho nu.”

¹⁰Dzigo brieë zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdziñnie zho zho lo lni. Gol hor wagw, biodzëse len yu ndxie miech. ¹¹Zeene laa rey bzëëb zienee me lo zho, gon me lad co no tib zha co nacwxabd zho zigne riegual gacwxab zha ne sca rie tib lo guieltsieel. ¹²Dzigo rëbchaa me lo zho: “Bets, ¿pe nacne squise luu bzëëb luu nu, bui ganle nacwd luu lar ne bneedz zho niacw luu?”

’Dzese zob zho, rdziel zho pe guiab zho lo me. Gonse me sca rac zho, ¹³bnabey me zha ne nodziib lo mezh rëb me: “Golzobdoo zha rii, golxidoo grop nia zho, grop ni zho, golcuee zho nu goltsieron zho lo ncow nëz ley. ¿Ga nac zaatne riegual zho, ga gan zho guielnëdox

ne no ted zho, goonnë zho, haxta gow lay zho!”

¹⁴Min codaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

Pe nonguiel quizh miech contribucion

(Mr. 12:13-17; Lc. 20:20-26)

¹⁵Blalaa zha farisé ne ndxie ga güey zho bnediidz zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis. ¹⁶Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguieldaye.

¹⁸⁻¹⁹Bienga me racladz zho gungüet zho me, dzigo rëbchaa me lo zho:

—¿Pe nan to na riend naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. ²⁰Blozh ga, rëbchaa me lo zho:

—¿Cho nu, cho lë nu quia lo pes rii?

²¹Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine riegual sca ycaa rey, goldeeda lo rey; scaquegaa mine riegual ycaa Dios, lo Dios goldeeda.

²²Zeene gon zho sca ptsire me lo xtiidz zho, bzee zdoo zho, mazd mine been zho laa zho wbichese ga, laa zho zey.

¿Pe nli zrieeban miech?

(Mr. 12:18-27; Lc. 20:27-40)

²³Dze coquew, güey bla zha saducé lo Jesús. Nac zha saducé riladzd zho zdziñ dze grieeban

miech. Dzigo bdziṅ zho, ²⁴ rëb zho lo me:

—Maestro, znu psan Moisés didz: Telne glo mguì guet lo wnaa ne nac tsiel mguì, ni gopd wnaa mëéd, dzigo none betsaque zho ctsieelnia wnaa co stib, zeena gap wnaa mëéd ne guiaan xlugar xpëéd zha ne gut ga.

²⁵ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaan xpëéd zho. Dzigo ptsieelnia stib bets zho wnaa co. ²⁶ Blozh ga gutaque zha co, pa sê zho nsaṅ mëéd. Ptsieelniaque me stib zho, goc zho tson, niicle zha co psandaque mëéd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut. ²⁸ Miṅe racladz no gacndion no, ÷chopaa dzigo gac tsiel wnaa co zeene laa zho grieeban? Sac gza gadzse zho ptsieelnia me.

²⁹ Pquiab Jesús rëb me lo zho:

—I nagon laa to rxin, miṅe naca riende to zha nac Xtiidz Dios, niicle riladzde to zrieelo me guṅ me ncuanaṅ ro ne gard gaṅ miech. ³⁰ Sac gon zeene gaḷ dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anj ne no gbaa. ³¹ Stiba, ib nli zrieeban mengut. Mod ranḁe to zha zhobnee zaatne raquiet zeene rëb Dios: ³² “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, ÷nacḁ me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

*Xley Dios miṅe mazdraa non
(Mr. 12:28-34)*

³⁴ Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, ÷pa miṅ nac miṅe mazdraa non?

Sca rëb zho, sac gocladz zho niungüet zho me. ³⁷⁻³⁸ Pquiab me rëb me lo zho:

—Lëe miṅe mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, men nroob ne rnabey luu.” Lëew nac miṅe mazdraa non, ni lëew glopaa raquiet lo grëse ley. ³⁹ No stib miṅe rnee: “Bleynie samiech luu zigne rleynie luu luu.” Ye miṅ rii nona, meraque lala con miṅ glo. ⁴⁰ Zha ne gban zigne rnabey grop ley rii, lëele grë ley ne psan Moisés ga, lëele grë zhiwseḁ zha ne biadteed xtiidz Dios ga, zianaḷ zho.

÷Cho xpëéd nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—÷Zha dien rzac to guiaad Men ne zëëble diidz ga cxeel Dios? ÷Cho lo xtii grieequia me?

Pquiab zho rëb zho:

—Lo xtii David grieequia me.

⁴³ Dzigo rëbchaa me lo zho:

—÷Pe scaw sca? Zha nac waa zeene bdeed Espiritu Sant guielbiini lo David bzeet David men co, rëb David me nac men ne rnabey David. Golgaṅ ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëe lo luu, csaṅ naa zho ladznia luu.”

⁴⁵ Gase nagon telne nli zha xtii David gac Men ne cxeel Dios ga,

¿zha nac dzigo rnee David men co rnabey David?

⁴⁶ Ni tib zho ib bdzielz zho zha ntsire zho lo xtiidz me; desde dze co ni stib zho biazhdraa pe nabdidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedscuel me, ² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés.

³ Golguien golgon xtiidz zho, iper nsin golso, ib gunde to mine run zho! Nac zho, ni lalnu runz zho mine rseed zho miech. ⁴ Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵ ¡Grë ncuane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶ ¡Zeene rbedz miech zho tib wagw nroob, rdziladz zho zhapaa rzob groļ mezh, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Saņgue to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rrieequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëë pxoz zho

ga, sac tibaque men ne nac Pxoż to, lëë men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole didz ga cxeel me, men cose zrieelo gunctsin zho lo me. ¹¹⁻¹² Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³ ¡Probsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. ¹⁴ [¡Probsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuane rapse grë wnaa viud; ib tedsod gon guielnëdox ne yгаа to.] ¹⁵ ¡Probsaxe to, rzac to na lëew ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, lel nëz len gabil zienie to zho. ¹⁶ ¡Probsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho.” ¹⁷ ¡Nadzpaā n xen to, nadzpaā ncow nac guic to! ¿Niace mazdraa non or lo yadoo? Golguien ganle por yadoo, naclay grë or co. ¹⁸ Rneequē to: “Zha ne gzeet lo pcoog, led dol da telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho.” ¹⁹ ¡Pe nlipaa rnee to peet riende to! ¿Niace mazdraa dzigo non gon que lo pcoog? ¿Pe rande to por lo pcoog co raclay gon? ²⁰ Golguien ganle, zha ne rzeet lo pcoog, yele grë ncuane ndziib low ga quiazeet zho; ²¹ zha ne gzeetgaa yadoo, haxta Diosle ga gon rzeet zho, sac

ga rbèz me. ²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ 'iProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grè guizh bitxtil, guizh nizh, guizh comin run to tsii lal, rdeed to tib lala miñe rieguial tsiesan to yadoo, laa ley ne mazdraa non zienied guic to gun to miñe rnabeya. Nli rieguiala gdeed to grè gon co, per none scaque tsoxco to gun to miñe nac diidzli, none yquia zdoo to samiech to, none dib zdoo to gnalo to Dios. Miñ rii nac miñe mazdraa non.

²⁴ 'iNe nlipaa ib riende to pe quiayun to! Rzac to na noxco to gunctalde to xtol to, masaque ni tib ngurudz rsaande to tso lo ncuaane row to, ni riende to rrieequia haxta tib camell rab to. ²⁵ 'iProbsaxe to, masaque nac to zig tib plat, zig tib tas ne nèz zhitssew mbe rna, laa nèz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Golguien none glo csaan to xquieIntseeb to, none gac to zig tib plat zig tib tas ne zigtaa mbe nèz zhitsa, scagaa mbe nèz lena. ²⁷ 'iProbsaxe to, nac to gon zig grè baa ne dieen paraa nquitsbie rna! Niow rlu nèz zhitsa, laa nèz lena loxaque grè ncuaan biodz, loxaque grè dzit ngutoo nodzè. ²⁸ Sca gon nac to, ne rac to zootxe luu waa nli miech ndzinli nac to, per nèz len zdoo to loxaque zhgab ne dieñ zha yquidie to miech, zha csacsi to miech no to.

²⁹ 'iProbsaxe to maistr ley, probsaxe to farisé! Ni lalnu guieIto guieñd lo to, rio to rzhixcuaa to ro xpa a grè zha ne biadteed xtiidz Dios, ni lèèpaa grè pxozgol to beet zho. Dieen peraa run to rquiaalo to rsoladz to zho. ³⁰ Rnee to: "Telne niaca miñe nole ne len dze co, ndeete ne diidz nsacsi xmençol

ne grè men rii." ³¹ 'iLèèque to gon nobeero ga, zha nactaa lo dii ntseeb ne ziaad to! ³² 'iScaque nasca golgun! 'iGoltsienal grè miñe been pxozgol to ga! ³³ 'iMiech ngoopdol! 'iZhin mendox! Telne csaande to xquieIntseeb to i, ib tedsod gon gabil guey to.

³⁴ 'Grè zha ne cxel naa, zig nac zha ne guiadteed xtidz naa, zha ne nacie Espiritu Sant, zha ne yгаа guieIbiini yquiaa zho miñe gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lèèque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. ³⁵ Blactaa grè miech ne sca peet xtol d ziyut to grè xmençol to, psilow desde Abel haxta Zacari xingan Berequí, men ne beet xmençol to zaatne nac gax lo pcoog len yadoo. Ni ye to gon zèèb xchen grèse zha co. ³⁶ 'iGneli naa lo to ganle, grè miech ne gon mban len dze rii, grè to zho yгаа guieInèdox ne tsieguial to por grètaa guieIntseeb co!

³⁷ 'iAque tow men Jerusalén! 'iPe nacne squitaa nac to, rut to zha ne ziadteed xtiidz Dios lo to, rgoquie to grè zha ne rxeeI me lo to? Blactaa gocladz naa, niacnie naa to, nquianaap naa to, zig run nguid rgueedz ma xpèed ma, per bzhiguielde to. ³⁸ Gacnañ to sca ganle, nadzetaa gon laa lidz to nu guiaañ ngan, ³⁹ sac gandraa to naa, haxta gal dze ne guiab to: "iZha ndzontaa men qui pxeel Dios lo ne!"

24

iNsin golso!
(Mr. 13:1-23; Lc. 17:22-24;
21:5-24)

¹ Laa Jesús zieriee len yadoo grè xpèèdsuel me, zeene pcuèèzdze zho me, rèb zho:

—Gotsaa gwi ne ganle zha niataa yadoo rii.

² Blozhse bui zho low, rëbcha me lo zho:

—Niicle squitaa nagon niaaw, per zdziñ dze ne nitlow dib nac-sew. Ni stib quie qui guiaandraa zigne squi zho bxcuaaw i.

³ Brie me leñ yadoo ga grë me zho, laa zho zie nëz Gui Oliv. Bdziñ zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiel bnë lo no dien, ðpa hor dzigo gac mine bzeet luu ga? ðZha glu zeene laa luu ziaadyoble guiaad? Zeene nitlogaa guidzliu, ðzha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to. ⁵ Sac nzian zha ne greequia guiab zho zha nac Meñ ne zëëble diidz cxeel Dios; ni nzian miech ne yquidie zho. ⁶ Zeene gon to nëzrii nëzrec noxtseeb csilo dil, guiabde to togo lëële dze ne guial naa ga bdziñ; sac niicle noyacle dila, noxtseebraa pa csilo gaca, led lëdle ne nitlo guidzliu ga. ⁷ Garaa csilo grë dil dox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. ⁸ Ni lega loxaque mine rsilosew ga, sac nroobraa guielne ne gan miech lozh ga.

⁹ Zeene laa grë ncuuan rii noyac, ðnsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. ¹⁰ Nzian zha ne nole xnëz naa, leñ dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho ladznia zha ne gut zho. ¹¹ Leñ dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. ¹² Grë zha ne nole xnëz naa, zeene gan

zho grëtaa guielntseeb, grëtaa dol ne quiyun miech leñ dze co, ndal zho gleyniedraa zho Dios dib zdoos zho. ¹³ Per zha ne tiblique gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴ Niicle scataa noyac grë ncuuan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵ Zeene gan to zaatne nac Lugar Nda leñ yadoo, zo tib ncuuane rieguald so ga, tib ncuuane ziaad gnitlo, zigne bzeet Daniel meñ ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶ Zha ne no grëraa guiedz ne ngab Judé, none xoon zho tsie zho dan, ga tsietsolan zho. ¹⁷ Zha ne lëëtaque hor co no glaa guic lidz, none lëëled xoon zho, ib guiabd zho sëëb zho leñ yu tsiebee zho ncuuane rap zho. ¹⁸ Zha ne quiagaa lo dziin dan, ib gund zho tsie zho lad guiedz tsixi zho xab zho. ¹⁹ ðProb grë meñ wnaa ne lëëtse leñ dze co zoney xpëed, meñ ne quianiegaa mëdyeen ne bii radz! ²⁰ Golnab lo Dios gande to guielne co leñ mëë ne rac nal, dze ne rdziiladzga to lo dziin. ²¹ Ne nligaa guielnedoxa. Wlal ne binaan guidzliu haxta lo nadze, gard gan miech tib guielnedox sca, ni gandragaa zhow ted ga. ²² Telne csaan Dios nroob dze gac guielne co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²³ Zigne rne naa ga, leñ dze ne scataa gan miech grë dil co, zha ne gnë lo to: “Goltë nu ganle, lëë Men ne nole cxeel Dios ga blanso nu”, gnëga zho: “Golt sie nec ganle, laa me bdziñ ga”, gliladzde tow. ²⁴ Sac zrieequia zha ne yquidie guiab zho zha nac meñ co, zrieequia zha ne guiab xtiidz Dios ziadteed zho lo

miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. ²⁵ ¡Nsin sca golso! Benque laa naa nilew lo to. ²⁶ Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: “Goltsie ganle laa me no ga”, gnëgaa zho pa tib len yu ne no me, ni tib xtiidz zho gliladzde to. ²⁷ Sac zeen gal dze ne guiaad me stib, gacda ncuuan ngeets zhli-aan, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëeb ngbidz, ¿niacxe gand grëse miecha? ²⁸ Zlupaa zeene laa me guiaad; nanle to ganle za-atne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ Zeene lozhse gan miech grë guielnëdox co, laa lo ngbidz ycow, gziinidraa mëe. Grë mel ne ndziib gbaa, laa ma gliaal; grëraa ncuuaane no gbaa, masaque nëzrii nëzrec gaca. ³⁰ Horco zlu ganle zeene laa Mgui ne pxeel Dios ga, ziad-zëeb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹ Grë xanjl Dios, hor co laa Dios cxeel zho tsiecuedz zho zhitompot zho parne ycaalsa grëse zha ne ngab xnëz me, tel pa lotaa lo guidzliu no zho.

³² Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëe nëëg ziaadgaxle. ³³ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴ Gnelli naa lo to ganle, nzian miech ne mban niina bii zan zho zeene laa grë ncuuan co csilo

gac; sac ible ncuuaane gaca. ³⁵ Zdzin dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶ Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxzose naa nana.

³⁷⁻³⁹ Nanle to ganle zha bzhaac miech len dze ne wban Noé, ib bliladz d zho xtiidz me. Guxt no zho lo zhilni zho, zha ne notsieelna, zha ne nobediingaa xpëed, laa dze bdzin laa Noé bzëeb len barcw; tibaque zeene biao zho biini laa guiedox co nonitlole zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiayot chop wnaa, tib zho tsienal zhits me, stib zho guiaan.

⁴² ¡Nsin sca golso, sac gon nande to dien pa horpaa guiaad me, benque laa vis racle lo to! ⁴³ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; ¿niacxe zaaguies zho? Led sobna zho lëe, nsin nsin so zho. ⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ Golgan ganle, masaque laa to gac nagon zig tib ngundziin ne ri-aannie ro lidz men ne rquia zho xtsiin.

Ngundziin ne ndzinli, zeene laa men ne quia zho xtsiin ga griee, ine niowse guiaan zho guiaan nie zho grëraa zha ne no lidz me. ⁴⁶ Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, zianzuiu zho lo me ⁴⁷ haxta so me zho, zha yquiaanap grëse ncuuaane rap me!

⁴⁸ Tel ngundziin yozhgaaw, mine tsienie guic zho guiab zho gbire-niobd men ne quia zho xtsiin ga,

49 csilo zho csacsi zho grëraa zha ne nac ngundziin, csilo zho ctsieelsa zho grë ngonziin tso zho loxaque gzudz zho, loxaque gowcho zho, 50 tibaque zeene gan zho laa me bdziñle. 51 Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guieñëdox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guieñtsieel.

“Tsii wnaa nguieg name, briece zho ziexinëz zho mgui ne ctsieel- nia, tib tib zho bise zho psin win ne rec nceit ne rziini. 2-4 Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzheñse zho psin co scase bi zhow, bid zho nceit ne niodzëraaw.

⁵ ‘Goc pa hora rio zhimcaalo zho, ni rdziñdaque mgui ne ziexinëz zho ga, tibaque zeen laa zho pquia mcaal. ⁶ Gol grol guieela, zeen laa vis rac, laa mgui co ziaadle, zha ne ziexinëz me ga, zac griece zho tsiedzieel zho me. ⁷ Lëëlëd briece mcaallo gza wnaa nguieg co, psilo zho nozhixcuaa zho zhipsin zho. ⁸ Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule. ⁹ Pquiab zho rëb zho: “Grieeloda, sac miñe yquiinse zhipsin no ziaadnie no. Mazd goltsie zaatne rto zhow, ga goltsiexiw.” ¹⁰ Per lo lal ne ziexi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb len yu. ¹¹ Dzigo psilo

zho, rcaan nia zho ro yu, rbedz zho mgui co cxal me ro yu sëëb zho. ¹² Per bdeete me diidz nzëëb zho, rëb me: “Runbeyd naa to gon, nand naa dien cho nac to.”

¹³ ‘jNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaannie dimi

¹⁴ ‘Mgui ne pxeel Dios ga, ziaad gac me zig tib men ne no griece tsie tib viaj zit.

“Tib men name no griece me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guieñd me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me miñe rgobey me grieelo zho gundziin zho, dzigo laa me briece laa me zie.

¹⁶ ‘Zha ne biaannie gaay mil pes plat co, güey zho bloonon zhow, beena gan zgaay mila. ¹⁷ Zha ne biaannie chop mila, ye zho güey zho bloonon zho dimi co, scaque beena gan schop mila. ¹⁸ Laa zha ne pcaania tib mila ga, leñ güey zho güeyteen zho tib guieer güeyloliu zhow.

¹⁹ ‘Goc bla iza laa men co bdziñ, dzigo bredz me zho tib tib zho, tsie zho gzodiidz zho dien yo dimi ne biaannie zho ga.

²⁰ ‘Bdziñ zha ne pcaania gaay mil pes plat co, bdziñnie zho xtimi me, rëb zho: “Laa xtimi luu nu gon, lëë gaay mil pes ne psan luu lo naa nu, laa zgaay mil miñ rii nac miñe bdziniaw.” ²¹ Rley me rëb me lo zho: “jZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaace bendziin luuw. Nana gon, nroobraa miñe gnedz naa gundziin luu. jNa

bded, zeena yгаа luu grē guielbley ne quiayac nu!”

²² Blozh ga, bdzinaque zha ne biaannie chop mila ga, ye zho laa zho bdziñnie xtimi me, rēb zho: “Laa xtimi luu nu gon, lēē chop mil pes ne psan luu lo naa nu, laa chop mil miñ rii nac miñe bdzini-aaw.” ²³ Pquiab me rēb me: “¡Squiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miñe gnedz naa gundziin luu. ¡Na bded, zeena yгаа luu grē guielbley ne quiayac nu!”

²⁴ Zeene bdziintaa zha ne biaannie tib mila ga, rēb zho lo me: “Nli bendziind naa xtimi luu, sac nanle naa zha nac luu, niicle paraa niundziin naaw, grēse miñe niuñagan lo luu niaana; ²⁵ gane mazd bialoliu naaw. Tib mil naa bneedz luuw, ledaaw nu.” ²⁶ Blēē guic me, rēb me lo zho: “¡Biche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ ¿pex nac dzigo waa bioxcod luu maase mbediñ luu dimi qui, ndziniaaw palal ncaania naaw niina?” ²⁸ Dzigo rēbchaа me lo zha ne ndxie ga: “Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuaañe rcaania zho, zacnroobraa ncuaañe yquianie zho. Laa zha ne squi nac, haxta miñe pcaaniale zho, zdioba lo zho. ³⁰ Golxen zha yozh qui, goltsiesan zho lo ncow nēz ley. Ga gan zho guielñēdox ne tsieguial zho, ga goon zho haxta gow lay zho.”

Zha gun Jesús guielwxtis

³¹ Blozhse bzodiidz Jesús cuent co lo zho, rēbchaа me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grē xanj l naa, zlu grētaa guielndzon ne rap naa, laa

naa sob lo xcan ne raguial naa soob naa. ³² Grēse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpēcwxiil zho. ³³ Zha ne no xnēz naa, zha co gdziñ naa cue naa nēz derech, laa zha ne nod xnēz naa, cue nēz revés.

³⁴ Lozhse ga, naa ne nac naa men ne rnabey, hor co laa naa cuedz zha ne no xnēz naa, guiep naa lo zho: “Golte grēse to, to ne nac to zha ne nziuu lo Pxoz naa. Golted zeena ycaania to zaatne cuēz to, ible par to bzaa mew desde zeene bzaa me guidzliu. ³⁵ Sac zeene pcaabedz naa, bneedz to ncuaañe dow naa; zeene bñab zhis naa, bneedz to ncuaañe go naa; zeene bial naa ladz to, bneedz to lidz to blēz naa; ³⁶ zeene gon to guieñd xab naa, bgacwxab to naa; zeene bzhacñe naa, zeene bio naa ladzguib, biaad to biaadgan to naa.” ³⁷⁻³⁹ See zdoo zho gnē zho: “¿Per pa hor bneedz no ncuaañe doow luu, ncuaañe go luu, pa hor bneedz no zaatne blēz luu, pa horgaa bneedz no lar ne gotxab luu, ib bdziñd no nzhaacñe luu, bdziñd no niogaa luu ladzguib?”

⁴⁰ Dzigo guiep naa lo zho: “Gzobtaa hor ne gon been to xyudar zha ne nacgrē to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to.”

⁴¹ Laa zha ne ndxie nēz revés, hor co laa naa gzonēz zho, guiep naa lo zho: “¡Golbiche lo naa nu, miech ndziibdee! ¡Golsē lo guidox ne rieguial to, zaatne no guey menox grē xanj ma! ⁴² Sac gon, bio dze pcaabedz naa ni bneedzde to ncuaañe niow naa; bñab zhis naa, ni bneedzde to pe nie naa. ⁴³ Bial naa ladz to, ni bneedzde to zaatne mbēz naa; gon to guieñd xab naa, ni ni tib lē lar bneedzde to niacw naa. Bio naa ladzguib,

bzhacnë naa, ni pe liaadz to ni-aadgan to naa.”

⁴⁴ 'Squiab zho gnë zho lo naa: “Per pa hor bdzion no luu rcaabedz luu, rnabгаа zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixгаа luu rzacnë luu.”

⁴⁵ 'Dzigo guiep naa lo zho: “Grëse vuilt ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rriequia naa ga sca been to.”

⁴⁶ 'Horco grëse zha co laa zho guey lo guidox ne gdzindraa dze griece zho; laa zha ne bioxco wban zigne rnabey naa, grëse zho laa zho ygaa tib guielmban ndzon ne gdzindraa dze lozh.

26

Bnediidz zho dien zha gnaaz zho Jesús

(*Mr. 14:1-2; Lc. 22:1-2; Jn. 11:45-53*) lo to.

¹ Zeene blozh sca bnee Jesús lo grë miech co, dzigo rëbchaa me lo xpëedscuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob.

⁴ Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. ⁵ Rnee zho: “Lëëraasi choot gnabeyd ygaa me merpaa dze lni, zeena gacntseebd menguiedz.”

Pchoob tib wnaa nceit nex guic Jesús

(*Mr. 14:3-9; Jn. 12:1-8*)

⁶ Betain ga no tib men ne biac lo guiedz lepr; lë Simón. Lëëtaaque no Jesús lidz men co, ⁷ zeene bdzin tib wnaa bdzinne tiblo nceit nex, nosew tib len ncuaan win niaa niapse quie rbebni, tiblo nceit ni-azha. Squi zob Jesús lo mezh, güey wnaa co güeychoob me nceit co guic Jesús. ⁸ Zeene gon xpëedscuel Jesús sca been wnaa co, blëe zho, rnee zho:

—iPa rieguiala squi pxin zhlë wnaa qui nceit qui! ⁹ Tel niaca mine ndow, pe zhidaa dimi ne nguizh zhow, nquiinpaa dimi co ngaaza lo grë zha ne guiend pe yquiin.

¹⁰ Gon Jesús sca rac zho, dzigo rëbchaa me lo zho:

—iPe nacne rlëe to lo wnaa qui? Golsaan me. Par naa nroob non mine been me i. ¹¹ Tel nli lëe racladz to gun to xyudar zha ne guiend pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹² Led pxin zhlëd wnaa rii zhinceit me, sac gon rriequia laa me bzhixcuaale xcuerp naa nu gal dze ne ygueetsa. ¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(*Mr. 14:10-11; Lc. 22:3-6*)

¹⁴ Lo gza tsiipchop zha ne nac xpëedscuel Jesús ga, briece zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵ rëb Judas lo zho:

—iPalal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. ¹⁶ Nacne psilo Judas noguib Judas dien zha gdeeda diidz csan Judas me ladz-
nia zho.

Dowxtseenie Jesús xpëedscuel me

(*Mr. 14:12-25; Lc. 22:7-23; Jn. 13:21-30; 1Co. 11:23-26*)

17 Mer dze ne rsilo lni Pascwa, len dze ne sca row zho guietxtil ne riotsd ncobi ga, bñabdiidz xpëëdsuel Jesús lo me dien pa lo racladz me tsiegunlo zho ncuuañe gowxtseenie me zho wdze co. 18 Dzigo rëbchaa me lo zho:

—Nanle to ganle cho lidz zrieelo gdziñ ne. Gołtsie Jerusalén golguiab lo zho: “Znu nê xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

19 Dzigo laa zho zie. Güey zho zaatne pxeel me zho ga, ga beenlo zho xtsee co.

20-21 Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

22 Zeene bin zho sca rëb me, mbanse rac zho, dzigo psilo zho tibga tibga zho rñabdiidz lo me, rnee zho:

—Bnê dien, ¿cho gun min co? ¿Pe naaw?

23 Pquiab me rëb me lo zho:

—Zha ne gan to csëëb xcuun len xquien naa, lëë zho ga. 24 Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¡prob-saxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

25 Yeze Judas rñabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luw gon Judas, luu güeyto naa.

26 Laa zho noyow, zeene bzhen Jesús tib guietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

27 Ni bzhen me tib cop nroob vin, bdeed me xquizh lo Dios, blozhse

bdeed me xquizh, dzigo pteed me cop co lo zho grëse zho, rëb me:

—Golguie vin qui, 28 sac lëë xchen naa i, miñe no gzhiee par guiaanmbe grë miech lo xtol zho sëëb zho xnëz Pxoze naa, sac lëë stib mod cub nu psan me parne sëëb miech xnëz me. 29 Lëë lultm vult nu guie naa vin rii, sac zhaale stib vin cub ne guie naa gal dze ne guenie naa tow zaatne rñabey Pxoze naa.

Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34;

Jn. 13:36-38)

30 Blozhse biilnie zho Dios, laa me brie ga gza me zho, laa me zienie zho nêz Gui Oliv.

31 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nêzrii nêzrec gliaal mëcwxiiil.”

32 Miñcopaa nagon gun miech naa, per zeene laa naa grieëban glole naa ga Galilé, ga cuëz naa to.

33 Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

34 Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vult guiab luu runbeyd luu naa.

35 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdsuel me.

Bzodiidznie Jesús Pxoze me Getsemani

(Mr. 14:32-42; Lc. 22:39-46)

36 Zeene bdziñnie Jesús zho zaatne lë Getsemani, dzigo rëbchaa me lo zho:

—Nuse nagon gołsob, laa naa ga gazodiidznie naa Pxoze naa.

³⁷ Horco psilo mban rac zdoo me, riabguielñe me, dzigo bredz me Pedr, ni grop xingan Zebedé, bzënie me zho palal ³⁸ dzigo rëbchaa me lo zho:

—Mban rac zdoo naa, zootle zig zet naa lo guielñe rii. Nuse nagon golguiaan, per golsobna.

³⁹ Bzë me spalal, dzigo pquuits-gzhib me haxta bdziñ lo me lo liu; psilo me bñab me lo Dios, rëb me:

—Papá, laa naa rnab lo luu, telne zala zdoo luu, bzhiguiel psilaa naa lo grë guielñe rii. Miñ rii rnab naa lo luu, per telne grieloda, miñe gnëtaa luu, miñ co gac.

⁴⁰ Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to? ⁴¹ Golsobna, golnab lo Dios zeena yquiild menox to. Niicle ne squi lëbdraa xcuerp to sobna to, per golnab lo Dios, sac gon miñ co nac miñe racladz zhiespiritu to.

⁴² Dzigo güey me stib, güeyzodiidznie ⁵⁴ Per telne sca gun naa, ¿zha dzigo gac miñe zhonee lo Xtiidz Dios, zaatne raquiet miñe noyac nu?

⁴³ Zeene wbiire me bdziñ me lo zho, gon me laa zho nixguieslaque, sac lëbdraa zho mcaal. ⁴⁴ Wbiire güey me güeynab me lo Dios, scaque miñcoque bñab me. ⁴⁵ Zeene laa me wbiretaa bion vuelt co, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdziñ zeene laa grë miech ntseeb rii guiadnaaz naa. ⁴⁶ Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53;

Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëëdsuel me) bdziñ, bdziñnie Judas tib dzoon zha ne pxeel grë pxoz ne rnabey, ni grë zha ne nac

zha non lo men guiedz Israel. No zho nzhen spad, nogaa zho nzhen yag. ⁴⁸ Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. ⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëëlëd wbig be grë zha co, bzhen zho me. ⁵¹ Horco biet tib zha ne rzënie me ga, bdob zho zhispad zho psilaa zho tib niaw, bliengaa zho diag tib zha ne rquia xtsiñ men ne nac pxoz nroob. ⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdiñ con spad, noxtseeb ne low guet zho. ⁵³ ¿Niace nañ to na grielod gnab naa lo Pxoz naa niina cxeel me tsiipchop partid xanjñ me guiaadla ne nu?

⁵⁴ Per telne sca gun naa, ¿zha dzigo gac miñe zhonee lo Xtiidz Dios, zaatne raquiet miñe noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niace naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuañ rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëëdsuel me laa zho bzhoon, tipse me psañ zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdziñnie zho me lidz Caifás, men ne nac

pxoz nroob. Grë zha ne rnabey lo menguedz Israel, laa zho ndxiele ga. ⁵⁸ Ye Pedr maase zit zit na Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxienap, quiambëz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo menguedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuaa maase diidzguizh ycaadz zho Jesús, parne gdeeda diidz gnab zho guet me. ⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacre rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiab-
daque Jesús, rëbcha me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶⁵ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios. ⁶⁶ Nana waa, ¿pe gnë to zha dziuun ne me?

Pquiab be zho rëb zho:

—jlb rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha

ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62;
Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzoop ne quia dziin lidz men rnabey co; rëb ndzoop lo Pedr:

—¿Ye luu lëe rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzoop ne rquia dziin ga Pedr, rëb ndzoop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me. ⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. jRlupaa name zig rnee zha nëz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led didzlid nu rne naa, maase cuibdee naa.

Loxaque blozh sca brie ro Pedr zeene laa tib gall pcuedz. ⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuelt rëb luu runbeyd luu naa.” Dzigo mbanse rac Pedr. Brie Pedr ga, psilo Pedr biin Pedr guieñe co.

27

¹ Ziadyiinile liuw, wbiire pcaalsa grë pxoz rnabey, grë zha non lo menguedz, bnediizd zho dien zha gnabey zho guet Jesús. ² Blozhse

bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëléd güey Judas lo grë pxoz rnabey co, lo grë zha non lo menquiedz ga, zietsire Judas dimi ne bdiizh zho Judas ga. Mban rac Judas, ⁴ bdzin Judas rëb Judas lo zho:

—Naraa rien naa lëda nu ben naa. iTib dol nrooble nu, znu bialto naa tib men ne peet xtold!

Pquiab zho rëb zho:

—iMinçotaa gon ndiond no! iXcuentzhe luu ga!

⁵ Horco pchel Judas dimi co len yadoo. Lo guielnë co brieed Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, rien zho dien zha gun zhow.

—iZha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigo bzodiidz zho dien zha gaca, nacne mazd pquiin zhow bzhii zho tib lë liu, zaatne rdieen yu ne riasa grë ncuuan psin ne rquiin; parne lo liu co ygueets grë zha zit ne guet Jerusalén. ⁸ Nacne brieelë liu co “Liu ren”, ni sca runbey zhow len dze rii. ⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rëb zho: “Galpsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne riasa grë ncuuan psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinne zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ipe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menquiedz, rzadraa ncuane rquiaqui zho me; per ni tib diidz rtsired me lo zho. ¹³ Dzigo rëbchaa Pilat lo me:

—iPe nacne rquiabd luu? iPe ib rond luu grëtaa ncuane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat rlaa tib zha ne no ladzguiib, zha ne gnabtaa menquiedz laa. ¹⁶ Len dze co no tib zha ntseeb ladzguiib lë Barrabás, zëeb xtiidz zho. ¹⁷ Nacne rëb Pilat lo grë zha ne ndxie ga:

—iCho racladz to csilaa naa? iPe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat lox- aque porne ndal miech nobig lo Jesús min co ne rlëenie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tsiel luu: bzhiguiel me peet gun luu men qui, rlu peet xtold me; sac nieewdze me nroob ptseb mcaal tsiel luu.

²⁰ Grë zha rnabey co, bio zho pquiil zho menquiedz gnab zho csilaa Pilat Barrabás, ni gnab zho guet Jesús. ²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—iBarrabás psilaa!

²² Dzigo rëbchaa Pilat:

—Men ne waa nac diidz pxeel Dios lo to nu, i zha gun naa me?

Pquiab zho rëb zho:

—iBnabey yquia me lo cruz!

23 —¿Per pe nacne yquia meñ rii lo cruz? —rëb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz. 24 Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen meñ rii gzhiee, sac nanpaa naa peet falt rapd me!

25 Pquiaab be zho rëb zho:

—¡Peet nacd ga! ¡Zhits no grë xpëed no cuib dol co, na no guio-tizha!

26 Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psañ Jesús ladznia menquiib ne tsiequiaa me lo cruz.

27 Biire grë menquiib co bzëebnie zho me nëz len yulow, ga pcaalsa grëraa menquiib ne nacgrë zho, briñ zho igose me. 28 Blee zho xab me, bgacw zho me tib lar nizhnie nlaan, zig rna lar ne racw grë rey, 29 bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquiitsgzhib zho lo me, rnee zho:

—¡Golwi ganle zha ractaa zhirey zha Israel!

30 No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

31 Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. 32 Nëz zienie zho me bdzieel zho tib meñ Ciren lë Simón, bnabey zho meñ co bi me zhicruz me.

33 Zeene bdziñ zho zaatne nac “Gui Beerguic Ngutoo” (Gólgota), 34 ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

35-36 Blozhse pquiaa zho me lo cruz, bzhen zho tib xab me pchug zhow biaannie zho tib lëgaw, laa stiba bio zho rif; dzigo laa zho bzob ga, bzobnap zho. 37 Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. 38 Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. 39 Grëse miech ne rdedtaa ran zho laa me quia ga, rzhidznie zho me, haxta rdzi zho guic zho 40 rnee zho lo me:

—Led rëb luu lëe laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guieet luu i? Telne nli Xpëed Dios nac luu, biet lo qui.

41 Scaque grë pxoz rnabey, grë maistr ley, grë zha farisé ni grë zha ne nac zha non lo menguiedz, rzhidznie zho me, rnee zho:

42 —Stib miech scataa beenguiac me, stib miech scataa bla me, ¿pe nac dzigo rrieelod me gla me me? ¡Goon me name nac zhirey ne, guiet me i sca zho; zeena dziuunbey ne meñ rnabey nac me! 43 ¡Conque tant rnalo me Dios, haxta rnee me Xpëed Dios nac me, guiaadsilaa Dios me i nazho!

44 Ye ngbaan ne quiagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

45 Zig grol dzew, tibaque zeen goc tib ncow dipse lo guidzliu, haxta las tres biao biini stib. 46 Horco nguiedz zëeb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me. ⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, groltaa goca; psilo bni tib zhodox, grë quie masaque wbila, ⁵² nzian ro baan grë zha ne bnalo Dios mazd padzeela bzhial. ⁵³ Zeen goł dze ne brieegan me, ye zho laa zho brieegan, brieegan zho len baa, bzëeb zho lad guiedz; nzian miech ne gon zho.

⁵⁴ Grë menquib ne quianap me ga, ni zha ne rnabey lo zho, zeene gon zho bni zho co, ni gon zho grë ncuanea goc ga, per nli bdzieb zho.

—iNe nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé. ⁵⁶ Lad co no Marí Magdal, Marí tsiel Zebedé, ni Marí ne nac xniaa Jacob grop José.

Bgueets Jesús

(Mr. 15:42-47; Jn. 19:38-42)

Lc. 23:50-56;

⁵⁷⁻⁵⁸ Zhile sëeb ngbidza, zeene bdziñ tib mgui lë José lo Pilat, bnab me diidzbey tsielit me xcuerp Jesús lo cruz; tib zha ricwa, men guiedz Arimaté nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co, ⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³ rëb zho:

—Gū luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca baaadquidie miech ga, rëb me, zeene gac tson ngbidz guet me laa me grieegan. ⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieegan. Nanle luu ganle, tel gac min co, cho gnë peraa gzhixcuuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib par-tid menquib ndxie i. Gołtsienie zho, gołguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menquib co. Bdziñ zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menquib co yquiaanapa.

28

BRIEEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhamal, silgaw zie Marí Magdal grop me stib Marí co zieso zho ro baan Jesús.

² Lëetaaque hor co bni tib zhodox, lo zho co biet tib xanj Dios gbaa bdoob me quie nroob ne nioog ro baa co, bdiix mew tib lad, bzobga

me lada. ³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴ Grë men̄guiib ne quianap ro baa ga, zeene gon̄ zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu. ⁵ Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men̄ ne pquiaa zho lo cruz ga, men̄ co ziaadguib to. ⁶ Per guiendle me nu, jlaa me brieebanle zigne bneelee me ga! Golwi ganle nu nac zaatne pxob zho me. ⁷ Niinagazh goltsie goltsienie diidz lo xpëëdsuel me, golguiab lo zho laa me brieebanle. Galilé me cuëz me zho, ga gan̄ zho me. Laa to nanlew nasca.

⁸ Lëëlëd brieegrop wnaa co ga, rias zho laa zho zienie diidz lo xpëëdsuel me; lala rdzieb zho, ni lala rley zho. ⁹ Laa zho zie, tibaque zeene gon̄ zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me. ¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan̄ zho naa.

¹¹ Horcoraa laa bla zhaguiib ne pquianap ro baan̄ Jesús ga bdziñ lad guiedz. Güey zho lo grë pxoz rnabey, bzodiidz zho zha gon̄ zho bzhial ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo men̄guiedz, dien̄ zha gun̄ zho. Nacne biaan̄ zho diidz, mazd gdeed zho dimi lo grë men̄guiib co, parne gneelid zho, sinque guiab zho, segur xpëëdsuelaque me güeybee me len̄ baa, per biend̄ zhow sac nixguies zho. Nroob dimi bdeed zho lo grë men̄guiib co, ¹⁴ rëb zho:

—Peet tsienied guic to, niicle telne gon̄ gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon̄ diidz co zigne rëbse grë zha co lo zho. Grë zha Israel ne bina len̄ dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdzieelo Jesús xpëëdsuel me nëz Galilé, brieegza tsiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdzieelo me zho. ¹⁷ Zeene gon̄ zho me pquitsgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic. ¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuaañe no gbaaw, nogaa guidzliuw, ladznia naa psan̄ Pxoz naaw. ¹⁹ Niina nagon̄, laa naa rsan̄ diidz lo to: goltsie dipse lo guidzliu, goltsieseed miech gac zho zha ne sëeb xnëz naa, golchoobnis zho, golguiab lo zho lëe min̄ co rnabey Pxoz naa, rnabey naa ne nac Xpëed me, ni rnabeygaa Espiritu Sant. ²⁰ Golseed zho gban zho, grëse min̄e bnabey naa to gun̄ to. Min̄ co rsan̄ naa diidz lo to gun̄ to; ni gacnan̄ to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MINE PQUIAA MARCW

¹ Nu ganle laa naa csilo gzodi-
idz naa, mine been Jesús, Men ne
bneele Dios cxeel me lo guidzliu.

² Lo guits ne pquiaa Isá, tib men
ne biadteed xtiidz Dios padzeela,
lo co zhobnee ganle ible laa Dios
no cxeel me. Rneew, glo cxeel me
tib zha ne tedner, guiaadnie diidz.
Znu zhobnee lo guits co:
Sxel naa tib zha ne tedner lo luu,
zeena zha co gzhixcuaa nēz ne ted
luu.

³ Dan tso zho,
zon miech zeene laa tsi zho zēeb
gnee zho:

“Golzhixcuaa nēz ne ted men ne rn-
abey,
golsaan grē guieIntseeb ne run to.”

⁴ Ni nligaa scase goca, zeene
laa Juan Bautist biaad, dan bio
me rchoobnis me miech; rnee me
lo zho csaan zho xquieIntseeb zho
gbig zho lo Dios, ni chobnis zho,
zeena csilaa Dios zho lo grētaa
xtol zho. ⁵ Dzigo rree miech grē
guiedz ne ngab Judé, dib lad guiedz
Jerusalén, riequiaadiag zho zhi-
wseed me; ni rxobdol zho grē xtol
zho, dzigo rchoobnis me zho len
guiubee Jordán.

⁶ Guits lad camell niaa xab me,
ncuaane rzhidoo len me guid ni-
aaw ni niapse nguzhanch ni dzin
dan row me. ⁷ Zeene rseed me grē
miech co, rnee me lo zho:

—Iraa ziaad men ne mazdraa
non lo naa. Tel naa peet nond naa,
tib guieInzaac nroob ga ygaa naa
telne niaca mine grieelo maase lab
me glit naa; per na ni min co rdziñd
naa. ⁸ Laa naa rchoobnis to ni-
ina con nis; sangue me con Espíritu
Sant cchoobnis me to.

Brobnis Jesús

(Mt. 3:13-17; 4:1-17; Lc. 3:21-22;
4:1-15)

⁹ Len ngbidz coquew, laa Jesús
briee guiedz Nazaret xtan zha
Galilé, güey me pchoobnis Juan
me len guiubee Jordán. ¹⁰ Laa me
norieedze lo nis, zeene gon me
laa zhan gbaa bzhial, laa men ne
nac Espíritu Sant biet gbaa zig tib
palom laa me ziad-zēeb guic me.
¹¹ Ni lēetaque zēeb tib tsi men co
gbaa, rnee me:

—Xin, rleynie naa luu gon, nziuu
luu lo naa.

¹² Zeene blozh brobnis me, dzigo
güeynie Espíritu Sant me tib dan
ngan, zaatne no grē ma ntseeb;
¹³ bio me ga choo ngbidz. Ga
no me güey Satanás (ma ne rn-
abey lo grēse mendox), gocladz ma
niungüet ma me.

Bdedse ga, güey grē xanjl Dios
güeygan zho me.

¹⁴ Len ngbidz co bnabey Herod
bio Juan ladzguiib. Ladzguiible
no Juan zeene briee Jesús güeyted
me grē guiedz ne ngab Galilé
güeyseed me miech Xtiidz Ndzon
Dios, ¹⁵ rnee me lo zho:

—Laa dze ne gnabey Dios
ziaadgaxle, laaw bdziñ dzele.
¡Golsaan grē xquieIntseeb to, golnab
perdon lo Dios; dib zdoo to golliladz
Xtiidz me!

Tap zha ne quia gooz mel

(Mt. 4:18-22; Lc. 5:1-11)

¹⁶ Tib dze zieded Jesús ro Nisdoo
ne lē Galilé, gon me laa Simón grop
Ndrés quia gooz mel lo nis co; sac
ible dziin co nac xtsiin zho. Grop
bets zho laa zho noron guix ne
rgaa mel lo nis. ¹⁷ Dzigo bredz me
zho, rēb me lo zho:

—¡Goltē, goltēnal zhits naa! ¡Laa
naa cxel to tsie to stib gooz, tsietop
to grē miech ne sēeb xnēz Dios!

¹⁸ Horcogazh psan zho guix ne
rnaaz zho mel ga, laa zho zienal
zhits me.

¹⁹ Zhisaque bzē Jesús ro nis co,
gon me laa Jacob ni Juan no tib
len barcw noquiaabdie zho guix
ne rnaaz zho mel, lēē grop xingan

Zebedé ga; ²⁰ dzigo bredz me zho. Zigne bredz me zho, zoque Zebedé lo barcw ga grē xmoz Zebedé, laa zho zienal zhits me.

Tib mgui ne nosacsi menḁox.
(Lc. 4:31-37)

²¹ Laa zho bđziḁ guiedz ne lē Capernaum. Zeene goḁ dze ne rdziḁladz zho lo dziin nēz Israel, güey Jesús yadoo win ne zob lad guiedz co güeyseed me miech. ²² Grē miech ne ndxie leḁ yadoo ga, rzee zdoo zho raḁ zho zha rnee me, sac rlu meḁ rnabey nac me; led yed me rseed zigne rseed grē zha ne nac maistr ley.

²³ Lad grē miech co no tib mgui ne nosacsi menḁox, tibaque zeene nguiedz pcooptsie ma mgui, ²⁴ rnee ma:

—¿Pe guḁ luu no Jesús Nazaren? ¿Ziaad luu lēē par gnitlo luu no? Ruḁbey naa luu, tib meḁ peet xtold nac luu ni Dios pxeel luu.

²⁵ Dzigo goctox Jesús lo ma, rēb me:

—¡Psoog ro luu! ¡Na zeena psaan meḁ qui!

²⁶ Horco masaque beencxidz ma mgui co, ni rquiaadan ma redz laa ma psaan mgui. ²⁷ Grēse miech ne ndxie ga, bzee zdoo zho rnabdiidzla zho rnee zho:

—¿Bay cho nac meḁ qui? ¡Wseed cub i goḁ ziaadnie me! ¡Rlu zha rnabey nac me, zha haxta menḁox rdzieb zeene ractox me lo ma!

²⁸ Znuse briets bliiaal diidz zha beenguiac Jesús mgui co; grēse guiedz ne ngab Galilé gocnaḁ miecha.

Biac xniadzoop Simón Pedr
(Mt. 8:14-17; Lc. 4:38-41)

²⁹ Ga brieē Jesús güey me lidz Simón grop Ndrés gza me Jacob ni Juan. ³⁰ Bđziḁ zho, lēētaque laa xniadzoop Simón nix rlan xlēē, nacne rēb zhow lo me. ³¹ Dzigo bded me zaatne nix zhuz co, bzheḁ me nia me, blische me me. Horcogazh laa

zhixlēē me blēz, guche me ga psilo me beenlo ncuaaḁ dow zho.

³² Ziedzele dzew, laa ngbidz rzēēblew, zeene psilo grē miech co zo zo rdziḁnie zho grē meḁ rzacnē, grē zha ne nosacsi menḁox ne; bioogse ro yu co ndxie miech. ³³ Zootle zig grēse miech ne no lad guiedz co pcaalsa ga.

³⁴ Ndal grē meḁ rzacnē co zhaase zhaase guielguidz ne rzac zho, per beenguiac Jesús zho; zha ne nosacsi menḁox, beḁcxooḁ me grē menḁox ne nosacsi zho. Goctox me lo ma, ib bdeete me diidz nee ma cho nac me, sac ruḁbey ma me.

Pseed Jesús miech Galilé
(Lc. 4:42-44)

³⁵ Silgaw, scase bii ncow rñaw guche Jesús brieē me lad guiedz co, güey me zaatne guieḁdraa miech, güeyzodiidznie me Dios. ³⁶ Zeene rñit me choot guieḁ; dzigo brieē Simón ni zla zha ne nacgza Simón güeyguib zho me. ³⁷ Zeene bđziel me, rēbchaa zho lo me laa grē miech co quiaguible me.

³⁸ Dzigo pquiab me rēb me lo zho:

—¡Sca ye! Per ib laa ne none goḁ guio grēraa guiedz ne ndxie dib gax nu, zeena ye grē guiedz qui gnee naa Xtiidz Dios lo miech; sac ible miḁ co pxeel me naa zial naa lo guidzliu.

³⁹ Dzigo güey zho grēse guiedz ne ngab Galilé. Zaatne rdziḁtaa zho, rie me grēse yadoo win ne zob lad guiedz rseed me grē miech co Xtiidz Dios, ni ruḁcxooḁ me grē menḁox ne nosacsi miech.

Biac tib mgui ne rlan lepr
(Mt. 8:1-4; Lc. 5:12-16)

⁴⁰ Tib vult, wbig tib mgui ne rlan guiedzdox ne lē lepr lo Jesús (masaque riaal dipse guid lad mgui), pquiitsgzhib mgui lo me, rēb mgui:

—Tebaa siguieel luu guḁnguiac luu naa.

⁴¹ Pquia zdoo Jesús mgui, pxobnia me guic mgui rēb me:

—Zunguiac naa luu. ¡Niinagazh laa luu guiaanmbe!

⁴² Zigne sca bnee me laa mgui co biac, mbesa biaan xcuerp mgui. ⁴³ Blozh ga bzonëz me mgui, ni pso me diidz lo mgui ⁴⁴ rëb me:

—Bina ganle, choot lo gzodiidz luu gon zha biac luu. Bzë, güey lo pxoz, güey san gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne briece mgui ga, psilo mgui grë lo miech bzodiidz mgui zha biac mgui. Grëse miech gocnana, nacne brielodraa nenlo ndziñ Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rree grë guiedz co rdziñ lo me.

2

Biac tib men ne gutoo

(Mt. 9:1-8; Lc. 5:17-26)

¹ Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, ² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

³ Laa grë miech co ndxie ga, zeene bdziñ tap zha bgui ney zho stib men bgui, zhoobse me lo yag, ib gacd së me sac dipse me gutoo.

⁴ Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga. ⁵ Zeene gon Jesús ne nli dib zdoo zho rililadz zho me gunguiac men rzacnë co, dzigo rëbchaa me lo men co:

—Xin, niinagazh laa naa gun pardon grëse xtol luu.

⁶ Blalaa zha ne nac maistr ley zob ga, zeene bin zho sca rëb me lo men rzacnë co, bzachaa zdoo zho: ⁷ “¡Lëda i gon squi rnee men

qui! Quiaguitnie me Dios i squi rzë xtiidz me. ¡Tibaque men ne run pardon xtol miech, ni lëë men co nac Dios!”

⁸ Bienga Jesús sca rza zdoo zho, dzigo rëbchaa me:

—¿Pe nacne rlëë to ron to mine rne naa? ⁹ Parga nli, cholze zha ne zac guiab: “Laa naa gun pardon grëse xtol luu.” ¹⁰ Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech pardon.

Dzigo bnee me lo men rzacnë co, rëb me:

¹¹—¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me briece ga, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodzian ncuanea gard dzian ne!

Bredz Jesús Leví

(Mt. 9:9-13; Lc. 5:27-32)

¹³ Blozh ga, laa Jesús briece ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me gon me Leví, xingan Alfë, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, gon zho sca tipse noy-ownie Jesús grë zha co; bded ga, rëbchaa zho lo xpëëdsuel me:

—¡Mod sca na rownie xmaistr to grë zha ngoopdol, grë zha beed ne nac recaudador!

¹⁷ Dzigo rëbchaa Jesús lo zho:

—Nanle to ganle, men ne run rmed, zaatne no zha ne rzacnë, ga

rquiin zho, ¿niacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

¿Pe nacne rcuand xpëëdsuel Jesús?

(Mt. 9:14-17; Lc. 5:33-39)

¹⁸ Lëëtaaque dze co nocuan xpëëdsuel Juan Bautist, grë zho zha farisé. Dzigo bdziñ bla zha ne bnabdiidz lo Jesús, rëb zho:

—¿Pe nac waa ib rcuand xpëëdsuel luu? Zha grë xpëëdsuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielñe, ycuau zho ni ran zho laa mgui ne notsieelnia mban? ²⁰ Per dzdiziñ dze zeene laa mgui co gbiche; ni zeene laa dze co gdziñ, dzigosi nagon rieguañ tso zho guielñe, rieguañ ycuau zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ²² Scaque tsod zha ne cotsow vin cub tib len guid ne padzeelale noquiin, sac stsiez vin cuba; dzigo niicle guid cow, nicle vingaaw laaw nitlo ga. Gacxe, tel vin cuba none len guid cubaque tsotsowa.

Ptop xpëëdsuel Jesús mzion zhobxtil

(Mt. 12:1-8; Lc. 6:1-5)

²³ Tib dze ne rdziiladz zho lo dziin nëz Israel, bdednie Jesús xpëëdsuel me zaatne zëëb zhobxtil, dzigo zigse zieded zho pchoo zho palal mzion zhobxtil co. ²⁴ Gon zha farisew, dzigo rëbcha zho:

—¡Lëda i gon noyuu to! ¡Golguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho? ²⁶ Rneew, bzëëb me len yadoo güeynab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co. Len iz co nac men ne lë Abiatar pxoz nroob. ²⁷ Golgacnan sca ganle, biaand dze rii par csacsi miech xcuerp zho, sinque ne rleynie Dios miech gane psan mew. ²⁸ Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

3

Biac tib mgui ne mband tib nia

(Mt. 12:9-14; Lc. 6:6-11)

¹ Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia. ² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. ³ Dzigo bredz me mgui co, bnabey me bzo mgui groltaa lo grë zha ne ndxie ga; ⁴ blozh ga rëbcha me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. ⁵ Dze bui me lo zho grëse zho, wbiñladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grë zha farisé, ni grë zha ne nacie rey Herod, zigne brie zho

ga laa zho psilo bnediidz dien zha gdeeda diidz gut zho Jesús.

⁷ Leñ dze co, tib vueltd bdziñ Jesús ro nisdoos grè xpëëdsuel me. Miech guizhiu ne nal zhits zho, ga zie grè zha ne ziaad nëz Galilé, grè zha ne ziaad nëz Judé, ⁸ grè zha Jerusalén, grè zha ne ziaad nëz Idumé, grè zha no dib nëz dan ro guiubee Jordán, grè zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

⁹ Dzigo bnabey Jesús xpëëdsuel me, yguib zho tib leñ barcw zaatne gac so me zeena ctaagwd grè miech co me. ¹⁰ Zëëble diidz ndal miech ziyun guiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

¹¹ Grè mendox ne noguitnie miech, zeene ran ma me, runquitsgzhib ma zha ne noguitnie ma lo me ni rquiaadan ma redz rnee ma:

—iXpëëd Dios nac luu!

¹² Per ractox me lo ma, rsaand me gnee ma parne xoobneñd cho nac me.

BLE Jesús gza tsiipchop xpëëdsuel me

(Mt. 10:1-4; Lc. 6:12-16)

¹³ Blozh ga biepp me tib guic gui win zob ga, ga bredz me zha ne gocladzse me. Zeene pcaalsa zho grè zho, ¹⁴ dzigo lad co ble me tsiipchop zha ne sènie me, zha ne cxeel me tsieseed miech Xtuidz Dios. Lëë zha co bleelë me poxtl, ¹⁵ ni bdeed me poder lo zho guñcxoon zho mendox.

¹⁶⁻¹⁹ Znu lë gza tsiipchop zha ne ble me ga:

Simón (lëë Simón co bleelë me Pedr),

Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrè zha ne racladz cuee zha Roma xtan zho)

ni Judas Iscariot (zha ne güeyto me).

Rëb zho mendox nacnie Jesús

(Mt. 12:22-32, 46-50; Lc. 8:19-21; 11:14-23; 12:10)

²⁰ Wbire Jesús ga, laa me bdzin ro yu grè me zho. Scasaque ndal miech ne pcaalsa ga stib, ni rdeetew diidz gownie me zho. ²¹ Zeene bin menlidz mew, dzigo brieë zho ziexi zho me, sac rëb zho bod rzhinle guic me.

²² Haxta grè maistr ley, zha ne brieë nëz Jerusalén bdziñ ga, rnee zho:

—Beelzebú, ma ne rnabey lo mendox, ma co nacnie me gane rrieelo runcxoon me mendox.

²³ Dzigo bredz me zho bzodiidz me tib cuent lo zho, rëb me:

—iPa nan to na grielo lëëque mendox guñcxoon samendox ma?

²⁴ Tel tib guiedz nadien gac miech chop dii, csilo zho tillsa zho, iniacxe nitlod guiedz co? ²⁵ Tib digaa miecha, tel csilo zho lëëque zha tilnie menlidz zho, iniacxe nitlod zho? ²⁶ Scaquegaa mendox nagon, telne lëëque lëë ma tilnie samendox ma, ipe nale na bnitlo ma! ²⁷ Masaque nac mendox zig tib zha ne no xfuers, zha ne gacladz cuee grè ncuaañe no lidz zha co, none cxidoogazh zho zho.

²⁸ 'Gneli naa lo to ganle, grëse dol ne run miech, grè tel zha rguie zho, rdzibdee zho, bii zun Dios zho perdon miñ co; ²⁹ sangue zha ne gneenë Espiritu Sant, dol nroob ga run zho, gdziñd dze ne guñ Dios zho perdon.

³⁰ Sca rëb me lo zho, sac sca quiaanee zho rëb zho mendox nacnie me.

³¹ Horco laa xniaa me ni zha bets me bdziñ, per leyse blëz zho; dzigo pxeel zho zha ne zietsedz me.

³² Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

³³ Pquiab me rëb me:

—¿Xnia naa ye, bets naa ye?

³⁴ Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. ³⁵ Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

4

Xcuent zha ne güey gon

(Mt. 13:1-23; Lc. 8:4-15)

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacne güeysep me tib len barcw ne zo ro nis co, ga bzob me laa grë miech co bre tib ro nis. ² Ndal grë ncuane pseed me zho, per niapse con cuent rnee mew lo zho. Lëë tib cuent ne bzodidz me ga nu, rëb me:

³ —¡Golquiaadiaga ganle! Tib mgui name, brieë me güey me gon zhobxtil. ⁴ Zeene laa me quialaal zhub co, mine bliaal gax ro nëz; znuse güey grë mguin güeytow maw. ⁵ Laa mine bliaal zaatne nac lo quie, znuse znuse blana; ⁶ per zeene laa lo ngbidz brieë, znusaque bgoolä blozh ga bidzgaw; sac guiend nroob low. ⁷ Laa mine bliaal zaatne nac len yag guiets, zeene laa grë yag guiets co broob znuse bnitlo yag guietsa, pasëw niac. ⁸ Sangue grë mine bliaal zaatne nac lo liu naal, blana, brooba ni goca; lo tib tib zhub co no mzion co brieë galptsii zhub, now brieë tsongalä, nogaaw brieë haxta tib gayoow.

⁹ Blozh ga, rëbchaa me lo zho:

—Zha ne racladz guien mine rne naa, yquiaadiag zhow.

¹⁰ Zeene laa grë miech co zey, laa gza tsiipchop xpëëdsuel me, ni zla

zha ne rzënie me, laa zho bnabdidz lo me dien zha nac cuent co. ¹¹ Dzigo rëbchaa me lo zho:

—Tel to, Dioszhal rlu lo to zha rnabey me, niicle ncuane mazdraa ngeetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow. ¹² Per niicle scaw, nzhial diag zho ron zho, per peet riend zho; nzhial lo zho rwi zho, per peet rand zho; ib nëd zho gbig zho lo Dios, gnab zho gon me zho perdon.

¹³ 'Nana to, telne biende to zha nac cuent co, ¿zha guien to grëraa mine gne naa dzigo? Golquiaadiaga ganle, znu gon naca: ¹⁴ Mgui ne güeylaal zhub ga, rrieëquia lëë zha ne rieneë Xtiidz Dios lo miech ga, laa zhobxtil co nac Xtiidz Dios. ¹⁵ No miech nac zig nac ro nëz ne bliaal palal zhub co: rquiaadiag zho Xtiidz Dios, rlozh ga lëëlëd rdzin mendox rquuil ma zho, rsaanga zhow. ¹⁶ Nogaa zho nac zigne nac lo quie co: zeene rquiaadiag zho Xtiidz Dios, ine rley zho rcaania zhow, ¹⁷ per led dib zdood zho rcaania zhow; gane zeene laa miech rsilo rlëë lo zho, laa miech rtsidil zho porne riladz zhow, rsaanga zhow. ¹⁸ Zzhisgaa zho nac zigne nac len yag guiets co: nli rquiaadiag zho Xtiidz Dios, ¹⁹ per rsilo zho lel grë ncuane no lo guidzliu rii mazdraa rionie guic zho, rquidie grë dimi zho, rzoobladz zho yquianie zho grëse ncuane racladz zho. Grë ncuane co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. ²⁰ Laa nogaa zho nac zigne nac liu naal co: rquiaadiag zho Xtiidz Dios, dib zdo zho riladz zhow, ni rban zhow zigne naca. Grë zha co, no zho nac zig mzion ne brieë galptsii zhub ga, no zho nac zig mine brieë tsongalä, nogaa zho nac zig mine brieë tib gayoow ga.

Xcuent biini ni midz moxtaz
(Mt. 13:31-32, 34-35; Lc. 8:16-18;
13:18-19)

²¹ Blozh ga, biire pcaalsa miech lo me, dzigo rëb me lo zho:

—¿Pa dien rquiuin biini? ¿Pe rquiaguiv par tsolana tib len guin o soogaaw tib zhan lon? Led zeene rquiaguiv lëe, zaatne grieelo gzi-iniw ga rzoob zhow. ²² Scaque nagon grëse ncuaañe rac ngueetsa, grëse ncuaañe rnee miech zhli-aana, ib none xoobneña.

²³ 'Telne racladz to guien to miñe rne naa, goiquiaadiaga; ²⁴ ni zigne ron tow scagaa goitsoxco golguna. Telne tsoxco to gun tow, scagaa zioguicraa tow. ²⁵ Sac zha ne tsox-cow, zdedraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

²⁶ Ni rëb me lo zho:

—Znu gon nac zha ne ngab lo Dios; nac zho zig bni ne ran miech. ²⁷ Zha ne rielaal bni co, liu rcow, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw rroob, per riend zho zha nacne laaw rroob.

²⁸ 'Zhal guidzliu rdeeda guielnzaac co, guizh nac zhob co zeene rlana, rac palal dzew laaw rlan mzion. ²⁹ Laa zeene laaw ral, dzigo laa zho rietiitsa, sac laa dze bdziñle ne laaw tsas.

³⁰ '¿Zha ganle gni naa lo to zeena guien to zha nac xquielrnabay Dios? —rëb Jesús—. ¿Pa tib cuent ganle gzodiidz naa lo to zeena guien to zha naca? ³¹ Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win, ³² ni tel gacbniv, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

³³ Nzian grë cuent rii pquiuin me par cseed me grë miech co, ni laa me bnee miñe rgobey me guien zho. ³⁴ Niapse sca rseed me zho,

laa zha ne nac xpëedscuel me, zeene zhasew rnee mew lo zho zigne naca.

Pcuëz Jesús tib medox
(Mt. 8:23-27; Lc. 8:22-25)

³⁵ Zeene bdze dze co, rguetsle liuw rëbchaa me lo xpëedscuel me:

—Golgotsoxaa dieedquia ne stib nëz lo nis rii.

³⁶ Blozhse bnee me lo grë miech co, laa zho biep len barcw ne zob me ga grë me zho, laa zho zie. Ye blalaa barcw ne zob lo nis co zienal.

³⁷ Laa zho zie, tibaque zeene laa tib medox psilo brieë, masaque rlis me lo nis co; zeene riasoli low riechoona len barcw, laa barcw psilo noyodzële nis. ³⁸ Dzigo güey zho güeycuuan zho Jesús, sac lëetaque laa me nixguies nëz zhan barcw ncoogse me tib lmad.

—¿Maestro! —rëb zho—. Bui ganle, ¿pe znuse csaan luu nitlo ne nu?

³⁹ Dzigo guche Jesús, bnee me lo me co, bnee me lo nis co, rëb me:

—¿Lëew ga na! ¡Golcuedze!

Zigne sca bnee me, laa me co blëz, niicle nis cow laaw bredze. ⁴⁰ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëe gliladz to cho nac naa!

⁴¹ Riendraa zho zha gun zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

5

Men Gadar ne nosacsi mendox
(Mt. 8:28-34; Lc. 8:26-39)

¹ Bdziñ Jesús nëz dan ro nisdoo co gza xpëedscuel me, ga nac xtan zha Gadar. ² Laa me biet-dze len barcw, zeene laa tib mgui ne nosacsi mendox bdziñ lo me. Len baa brieë mgui co bdziñ me ga, ³⁻⁴ sac len baa nac zaatne rbëz me. Miech ne lëbd zho low, nzian vuelt ziezooob zho caden nia me,

ni me ne, per znuse rchug mew, rzhooᅅga me. ¡Choot rlēbd lo me! ⁵ Dze, guieel quianzē me grē dan co, rietso me grē len baa. Ropt-siedan me, ni lēēque me rzheᅅ quie rchug me guidlad me. ⁶ Laa dze co, zitraa goᅅ me Jesús, rias me bdziᅅ me pquitsgzhib me lo Jesús. ⁷⁻⁸ Dzigo goctox Jesús lo menᅅox ne noguitnie me, rēb Jesús:

—¡Menᅅox, psaan meᅅ qui!

Horco pcooptsiedan menᅅox co mgui co, ni rnee ma lo Jesús:

—¿Pe guᅅ luu naa Jesús? Runbey naa luu, Xpēēd Dios ne no gbaa nac luu. ¡Ne nlipagaa beenᅅ guieᅅnzaac csacsid luu naa!

⁹ Dzigo bnabdiidz Jesús lo ma dieᅅ cho lē ma. Pquiab ma rēb ma:

—Legion lē no, sac nzian nac no.

¹⁰ Rnab grē menᅅox co lo Jesús, gzonēzd me ma zit. ¹¹ Gaxaque zhan gui co ndxie tib dzoon nguts noyow, ¹² dzigo bnab ma lo Jesús, rēb ma:

—Bzhiguieᅅ lose grē nguts qui bzonēz no.

¹³ Bdeed Jesús diidz. Dzigo laa grē menᅅox co psaan mgui co, laa ma zie bzēēb ma zdoo grē nguts ne ndxie ga; psilo grē nguts co rquiaa ma corr güeypix ma glaa tib ro yee ne quia ro nisdoo co, bliaaᅅ ma haxta lo nis. Ga bieᅅ ma nis, grēse ma gut. Rgaa ma zig chop mil.

¹⁴ Zha ne quianap grē nguts co, gzase zho bzhooᅅ güeyzodiidz zhow lad guiedz, ni grēraa yu ne zob gax ga. Brieē grē miech co, zieso zho.

¹⁵ Zeene bdziᅅ zho, per nli bdzieᅅ zho, sac goᅅ zho laa mgui ne sca bdziitnie menᅅox ga zobse lo Jesús, laa mgui nacwxable, rlu ndzinlile nac guic mgui. ¹⁶ Psilo grē zha ne goᅅ zha biac mgui co, ni zha goc grē nguts co, psilo zho rzodiidz zhow lo grē zha ne bdziᅅ ga. ¹⁷ Miᅅ co bin grē zha co, mazd bnab zho lo Jesús siguiᅅ me gbi me xtan zho.

¹⁸ Zeene laa Jesús zie sēēb me lenᅅ barcw, dzigo laa mgui co wbigaque

lo me, naᅅ mgui nziguieᅅ me nienalᅅ mgui zhits me. ¹⁹ Per bdeete me diidz, rēb me:

—Wbire, güey güeyzodiidz lo grē menlidz luu ganle pa lotaa pquia zdoo Dios luu, zha nactaa milagr nroob ne beenᅅ me beenguiaᅅ me luu.

²⁰ Dzigo wbire mgui. Güey mgui dib xtan zha Decápolis, güeyzodiidz mgui lo grē miech co zha beenguiaᅅ Jesús mgui. Grēse zha ne rona, rzee zdoo zho.

Brieēban xpēēdwnaa tib meᅅ lē Jair (Mt. 9:18-26; Lc. 8:40-56)

²¹ Zeene laa Jesús biire brieēquia stib nēz ro nisdoo co, miech guizhiu ne pcaalsa lo me ga. ²² Ga zo me zeene laa tib meᅅ ne nacgrē zha ne rnabey yadoo lē Jair bdziᅅ. Zigne bdziᅅ me lo Jesús pquitsgzhib me, ²³ rēb me:

—Beenᅅ tib guieᅅnzaac gotsaa guio ne guᅅguiaᅅ luu xpēēd naa. Laa win rlozhle; naᅅpaa naa telne cxobnia luu guic win, ziac win.

²⁴ Dzigo laa Jesús zie nēz lidz meᅅ co. Ndal miech ne zienalᅅ zhits me, haxta rtaagw zho me.

²⁵ Lad grē miech co zienalᅅ tib wnaa, gocle tsiipchop iz rlan me tib guieᅅguidz, rzac me zigne rzac meᅅ wnaa gzob mēē, tibaque rlan mew ib rbēzda. ²⁶ Nzianle lo meᅅ ne ruᅅ rmed ziye me, grēse ncuāaᅅ rap me bloozh me lo rmed; per

laa ne cuēz guieᅅguidz co, leᅅ znu rzhizhooraaw. ²⁷⁻²⁸ Ziyonle me grē milagr ne ruᅅ Jesús. Bza zdoo me rēb me: “Totsaque yгаа maase lad

lar ne mbix me xeeᅅ naa, ziacle naa.” Dzigo bded me lad grē miech co, wbig gax me nēz zhits Jesús, bzheᅅ me lad lar ne mbix Jesús.

²⁹ Nligaa hor cogazh laa guieᅅguidz co blēz, bienᅅ me laa me biac.

³⁰ Zeene bienᅅ Jesús ne laa me beenguiaᅅ wnaa co, dzigo ptsire lo me rwi me lo grē miech co, rēb me lo zho:

—¿Cho ga bzheᅅ lad xab naa?

³¹ Rëbchaa xpëëdsuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

³² Per laa me rwi lo grë miech co dien chow. ³³ Nanpaa wnaa co ne me ga, rdzieb me, rzhidz me laa me wbig pquitsgzhib me lo Jesús bneeli me zha nacne sca been me. ³⁴ Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guielguidz co bichele.

³⁵ Laa Jesús bii quianeeque, zeene laa bla zha ne ziaad nëz lidz Jair bdzin, rëb zho lo Jair:

—Csodziindraa luu lo men qui, laa xpëed luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsieniedz guic luu. Dib zdoo luu bliladz naa.

³⁷ Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸ Zeene bdzin zho lidz men co, tib ruid ne rac, nguiedz zëeb tsi zho roon zho no zho xquielnë mëed co.

³⁹ Dzigo bzëëb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzoop win rii, nixguies ndzoop.

⁴⁰ Leł rzhidznie grë miech co me, bin zho sca rëb me. Dzigo bnabey me brieë zho ley grëse zho, loxaque pxoz mëed co, xniaa win ni gza tson xpëëdsuel me zha ne nal zhits me ga bzëëbnie me len yu ne nix win. ⁴¹ Wbig me bzhen me nia win, rëb me lo win:

—¿Guche i na, ndzoop yeen! (Talita, cumi.)

⁴² Zigne sca bnee me laa mëed co guche, laa win bzë. Tib mëed tsiipchop iza. Grëse miech co per nli rzee zdoo zho. ⁴³ Dzigo pso me diidz lo zho choot lo gneed zhow;

blozh ga bnabey me bdeed zho ncuaane dow mëed co.

6

Güey Jesús ladz me

(Mt. 13:53-58; Lc. 4:16-30)

¹ Ga brieë Jesús grë xpëëdsuel me, laa me bdzin Nazaret zaatne nac ladz me.

² Laa zeene gol dze ne rdziladz zho lo dziin, laa me bdzin len yadoo, psilo me pseed me grë miech co. Per nli rzee zdoo zho ron zho grë miñe rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? ³ Tib ngurëyagse name nac me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beencasd zho me. ⁴ Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵ Brieelod niun me nzian milagr ga, blase zha rzacne pxobnia me guic, beenguic me. ⁶ Bzee zdoo me gon me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëëdsuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëëdsuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho mendox. ⁸ Pso me diidz lo zho güeyd zho pe yquiin zho nëz, lëë gdib tib lë yag ne gzoxca zho güey zho. Zig nac ncuaane gow zho, zig nac dimi, pe tib bziiudgaa, güeyd zhow. ⁹ Lab zho, miñe quiase ni

zho; xab zho, miñe nacwse zho mincose tsienie zho. ¹⁰ Ni rëb me lo zho:

—Guiedz ne gdziñ to, zha ne gneedz zaatne cuëz to, lidz zha co gołcuëz haxta gdziñ dze ne gbi to guiedz co. ¹¹ Laa zaatne ne ib gneedzd zho pa cuëz to, niicle nëdga zho yquiaadiag zho miñe gnee to, dzigo gollit grë yudie co ni to, gollriegazh ga, zeña guien zho ganle lëda ga been zho.

¹² Dzigo laa zho brieë, laa zho zie. Güey zho, güeynee zho lo grë miech csaan zho xquiełntseeb zho, gbig zho lo Dios. ¹³ Nzian zha ne nosacsi mendox, beñcxoon zho mendox co; grë zha ne rzacnë, bdëëb zho nceit guic zho, beenguiac zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieëban Juan Bautist lëë me ga nac Jesús, gane run me grëtaa milagr co; ¹⁵ nogaa zho rnee Líw, men ne biaad pteed Xtuidz Dios padzeela; zzhisgaa zho rnee, no cho stib men ne ziaad noteed Xtuidz Diosa, zig biaad grë zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieëban.

¹⁷⁻¹⁸ Sca rnee Herod sac rsoladz me zha been me Juan. Me bnabey bgaa Juan bio Juan ladzguiib, loxaque ne rnee Juan lo me nonguielda ga lëëque Herodí pt-sieelna me; sac tsieelpaa bets me Lip nac Herodí.

¹⁹ Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰ sac rdzieb Herod lega pe gun me Juan, rien me tib zha ne zienal miñe nac diidzli, tib zha ne peet xtold nac Juan; dzigo ib rdeete me diidz pe gun wnaa co Juan. Niicle ne

cadque zeene rnee Juan lo me, rio me zhgab rien me dien zha gun me, per rdziladz me rquiaadiag me grë miñe rnee Juan.

²¹ Laa tibtaa dze laa miñe no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo menguiib, ni grë zha non lo zha Galilé. ²²⁻²³ Laa zho no mezh noyow zho, zeene bzëëb xindzooop Herodí psilo ndzooop bieë ndzooop. Bdziladz Herod gon me zha bieë ndzooop, grë zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieë ro me rëb me:

—Ncuaane gacladzttaa luu gnab luu, niicle zig grol grë ncuaane rap naaw, znedz naaw.

²⁴ Rias ndzooop güeynabdiidz ndzooop lo xniaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵ Bdziñ ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶ Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzooop. ²⁷ Dzigo racse me pxeel me tib menguiib ne tsiechug guic Juan.

²⁸ Güey menguiib co len ladzguiib pchug zho guic Juan. Bdziñ zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

²⁹ Zeene bin xpëëdsuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpëedscuel Jesús bdziñ lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdziñ; haxta ni riobd gow me grë xpëedscuel me. Dzigo rëb me lo zho:

³¹ —Mazd golgotsaa guio ne tib zaatne zitlaa lo grë miech rii, zeena grielo gdziiladz to niip.

³² Dzigo bzëeb me tib len barcw grë me zho, laa zho zie. ³³ Nzian zha ne gon zie me, beenbey zho ne mew. Dzigo ndal miech ne no grë guiedz gax co brieë, rias zho zie zho glole zho bdziñ zaatne no gdziñ me. ³⁴ Zeene biet me len barcw, gon me laa grë miech guizhiu co ndxiele ga. Pquia zdoo me zho gon me scataa ndxie zho zootle grë mëcwxiiil yeen ne guiend xbaxtor, dzigo psilo me nzian grë ncuane pseed me zho.

³⁵⁻³⁶ Gol bdze dze co, wbig xpëedscuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuane gow zho; sac gon laa dze bdzele, ni choot miech guiend nu.

³⁷ Pquiab me rëb me lo zho:

—To goldeed ncuane gow zho.

Rëbchaa zho lo me:

—¿Pe zhizhe dimi ne yquiin gziuu quietxtil ne gow grëtaa miech qui?

³⁸ Dzigo bnabdiidz me lo zho, rëb me:

—¿Bla quietxtil ziaadnie to? ¡Golwi dien!

Zeene biire zho güeyso zho, rëbchaa zho lo me:

—Loxaque gaay quietxtil ziaad, ni ziaad chop mel.

³⁹ Dzigo bnabey me bzob grë miech co, wdzeepaaw bioogse lo guizh nguia ne zëeb ga ndxie zho. Tib dzoonga tib dzoonga zho bre,

⁴⁰ zaatne bre tib gayoo zho, zaatne breega groļ gayoo zho.

⁴¹ Dzigo bzhen me gza gaay quietxtil co, ni grop mel co, blis lo me bui me nëz gbaa, bdeed me xquizh lo Dios. Blozh ga, beengroļ me quietxtil co, zigse rdeed mew lo xpëedscuel me, scase scase noguiiz zhow lo grë miech co. Scaque been me grop mel co. ⁴² Grëse miech co, dow zho haxta zaatne bieltaa zdoo zho. ⁴³⁻⁴⁴ Miech tafa, zha bguise rgaa zig gaay mil; ni zeene blozh dow zho, scase ncuane nroob binaan, biodzë tsiipchop chicuid bio grë quietxtil co, bio grë mel co.

Rzë Jesús lo nisdo

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpëedscuel me bzëeb zho len barcw, zeena zienerga zho tedquia zho stib nëz ro nis co, gdziñ zho guiedz ne lë Betsaid; laa me bii blëz ga, nozonëz me grë miech co. ⁴⁶ Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëedscuel me ga no lo nis co. Laa me zo ga tipse me, ⁴⁸ ran me rlu ib gacd csëeniob zhow, sac rrieë me rtsire mew. Merle guimbe liuw, tibaque zeene gon zho laa me bdziñ zaatne zie zho ga; tib lo nis co ziezë me lo, rac me zig nac zeene tibted me zho.

⁴⁹ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon ziaad i!

⁵⁰ Sac grëse zho ranlo zho laa me sca ziezë lo nis co. Dzigo bnee me lo zho rëb me:

—¡Gdziebde to, naa zial nu!

⁵¹ Zeene laa me biep len barcw ne zie zho ga, laa me co blëz; dzigo mazdraa bzee zdoo zho. ⁵² ¡Per ib riend zho cho nac me, niicle ne gonle zho been me milagr nroob co bguiaan me miech guizhiu co!

⁵³ Zeene laa zho bdziñ stib nêz ro nis co, zaatne nac xtañ zha Genesaret, dzigo laa zho pxidoo xbarcw zho ro nis ga. ⁵⁴ Loxaque biet me leñ barcw laa grê miech co beenbeyle me. ⁵⁵ Rias zho güey zho grê guiedz co, güeynie zho diidz laa me bdziñ ga. Dzigo psilo grê miech co rxob zho zhimguidz zho lo yag, rdzinnie zho zho lo me zaatne rontaa zho no me. ⁵⁶ Zaatne gdziñtaa me, niicle guiedz nrooba, niicle guiedz lasa, rbee grê miech co zhimguidz zho rienie zho zho zaatne nac leñ guiedz; ga rnab zho lo me siguiel me maase ni lar ne mbixse me xen grê meñ rzacné co. Ni grêse zha ne rzhen xab me, riac zho.

7

Ncuaane runctal xtol miech (Mt. 15:1-20)

¹ Tib dze, bdziñ bla zha farisé, ni zla maistr ley ne ziaad nêz Jerusalén, lo Jesús. ² Dzigo gon zho blalaa zha ne nac xpëédscuel Jesús, zeene laa zho row rguiibd zho nia zho zigne nacpaa grê zhiwseed xmengol zho.

³ (Nac zha farisé, ni grêsegaa zha Israel telne tsard nia zho zigne nac xcostumbr xmengol zho, ible rowd zho; sac zianaldox zho miñe nac costumbr. ⁴ Zeene rbire zho lo lgui, ib no mod ne riar nia zho dzigoraa rzob zho row zho. Nzian grê wseed co psañ xmengol zho zianal zho, zig nac zha riar grê tas, grê cant, grê xtsiñ rotie zho miñe niaa guiib, ni grê lo bangw ne rzob zho row zho.)

⁵ Dzigo rëb zho lo Jesús:

—¿Pe nacne zianald xpëédscuel luu miñe blu xmengol ne? ¿Pe nacne squize nia beed zho i row zho?

⁶ Pquiab Jesús rëb me lo zho:

—Nlipaa miñe bnee Isá, meñ ne biaad pteed Xtiidz Dios, zeene znu pquiaa me:

Grê miech rii, rquiaalose zho runnon zho naa,
rond zho diidz gun zho miñe rnabey naa.

⁷ Paat rquiind riaad zho riaadgan zho naa;

sac niapse guicle zho riab grê wseed ne quialu zho lo miech.

⁸ Sac tel to gon, nosaan to grê miñe rnabey Dios, lel grê xcostumbr miech zianal to.

⁹ Xcostumbr to nac miñe mazdraa rioxco to, laa miñe rnabey Dios quiasañ to tib lad. ¹⁰ Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib miñe rnee: “Zha ne quie pxoz, quiegaa xniaa, ib none guet zho.” ¹¹ Laa to lel rnee to, zac gund miech xyudar xmengol zho, telne bloogonle zho pe nac ncuaane rieguial gdeed zho lo me. ¹² Tole rdeete diidz ga gun zho xyudar pxoz zho, xyudar xniaa zho. ¹³ Tib ladle gon rsañ to Xley Dios ga sca run to, lëepaaze grê costumbr ne biannie to, ni quiasangaa to lo zha ne ziaadquia, miñ co noxcoraa to. Ni nzianraa grê falt ne squi quiyun to.

¹⁴ Dzigo bnee me lo grêraa miech ne ndxie ga, rëb me lo zho:

—Golquiaadiag miñe gni naa lo to nu, ni goltsoxco guien to zha naca. ¹⁵⁻¹⁶ Golgacnañ ganle: Grê ncuaane rdziñ zdoo miech, led miñcod runctal xtol zho; sinque grê ncuaane ntseeb ne rza zdoo zho, miñ co nac miñe runctal xtol zho.

¹⁷ Laa zeene laa me bdziñ ro yu grê xpëédscuel me, dzigo bnabdiidz zho lo me dien zha nac diidz ne sca rëb me lo grê miech co. ¹⁸ Rëbchaa me lo zho:

—¿Pe niicle to riendaquew dzigo lëe? ¿Pe riende to, grê ncuaane row miech, led miñcod runctal xtol zho?
¹⁹ Sac grê ncuaane row zho rdziñda leñ zdoomban zho, zhaa zaatne rdziña. Grê guielwagw, leñ bziuid

zdoose zho, len zhitripse zho ri-
eteda, rlozh ga rrieegaw xcuerp
zho.

Ga blu me lo zho ganle, grëse
ncuaane nac guielwagw lëda runctal
xtol miech. ²⁰ Ni rëb me lo zho:

—Mïne rza zdoomban miech,
min co nac mïne runctal xtol zho.
²¹ Sac zdoomban zho rza grë
ncuaane ntseeb ne run zho, zig
nac:

zeene rio zho grë zhgab yozh,

zeene run zho grë guielyozh,

zeene rban zho,

zeene rut zho samiech zho,

²² zeene rionie zho zha ne nacd
tsieeld zho,

zeene rzoobladz zho ncuaane rap
stib miech,

zeene run zho grë guielntseeb,

zeene rquidie zho,

zeene rien zho run zho grë
ncuaane ndzinlid,

zeene në rac zdoo zho ran zho cho
zha ne stibnoded,

zeene rzhixcuaa zho diidzguizh,

zeene racniats zho,

zeene run zho grëraa ncuaane paat
rquiind.

²³ Grëse ncuaane ntseeb rii, zdoom-
ban miech rzaw, ni lëew nac mïne
runctal xtol zho.

Biac xpëed tib wnaa zit

(Mt. 15:21-28)

²⁴ Ga brieë Jesús, laa me zie nëz
Tiro. Zeene bdzin me nëz co ga
bdziel tib yu ne blëz me, gocladz
me choot niacnand ne laa me no ga;
per brieeloda, znuse bien diidza.

²⁵⁻²⁶ Zeene bin tib wnaa Sirofenis
laa Jesús bdzin ga, dzigo güey me,
sac noguitnie mendox tib xpëed me.
Zigne bdzin me pquitsgzhib me lo
Jesús, rnab me tsieguncxoon Jesús
mendox co. Tib wnaa zit nac wnaa
co; ²⁷ dzigo rëbchaa Jesús lo me:

—Blëz niip dien. None glo mëed
gow, nonguielda cuee ne guiet nia
mëed gdeed new lo mëcw.

²⁸ Pquiab wnaa co, rëb me:

—Nli scaw, zigne rnee luu i; per
niicle mëcwa led rio ma zhan mezh

rtop ma grë mïne rrieengaa nia
mëed.

²⁹ Dzigo rëbchaa Jesús:

—iSquiw nagon! Lëëgazha i rnee
luu. Peet tsieniedraa guic luu naa
sca; bzë, laa mendox ne nosacsi
xpëed luu bichele.

³⁰ Laa wnaa co zey. Zeene bdzin
me lidz me, gon me ine laa xpëed
me nixse lo lon, per laa mendox co
psaanle win.

Biac tib men ne rcuaat

³¹ Ga brieë Jesús, güeyted me nëz
Sidón. Sidón brieë me bdzin me ro
Nisdoo Galilé stib, zaatne nac xtan
zha Decápolis. ³² Ga bdzinie zho
tib mgui lo me, rcuaat mgui ni nca
rnee mgui; bnab zho lo me cxobnia
me guic mgui gunguiac me mgui.

³³ Dzigo bleë me mgui lad grë
miech ne ndxie ga. Zitlaa güeynie
me mgui, ga psëeb me mzhugnia
me gropse len diag mgui ni bdëeb
me zhindzuc me lo ludz mgui.

³⁴ Blozh ga, blis lo me bui me nëz
gbaa, bneeladz zdoo me, dzigo rëb
me:

—iBzhial! (iEfata!)

³⁵ Zigne sca bnee me, laa diag
mgui co bzhial, niicle ludz mguiv
laaw wban, laa mgui psilo bneenal.
³⁶ Dzigo pso Jesús diidz lo grë miech
co, choot lo gzodiidzd zho zha biac
mgui co.

Per laa ne rso me diidz lo zho,
dzigole nëzrii, nëzrec rzodiidz
zhow; ³⁷ sac rzeedox zdoo zho gon
zho mïne been me ga.

—iNcuaane gzee zdoo ne i been
men qui! —rnee zho—. Zha haxta
nguaat, haxta ngop, runguiac me.

8

Bguiaan Jesús tap mil miech

(Mt. 15:32-39)

¹ Len dze co, miech guizhiu
ne biire pcaalsa lo Jesús stib.
Zeene goc tson ngbidza, guien-
draa ncuaane gow zho. Dzigo bredz me
xpëedscuel me, rëb me lo zho:

² —Rquia zdoo naa grë miech rii, tsonle ngbidz ga rac blanso zho nu, ni na quianiedraa zho ncuaañe gow zho. ³ Telne squise zho gzonëz naa zho, glëbd zho, scow zho nëz, sac no zho zit brieë zho ziaad zho nu.

⁴ Pquiab zho rëb zho:

—¿Per pe yguiaan ne zho? ¿Pa guioxi ne guietxtil ne gow grëtaa miech qui dan rii, naca zaatne guieñd miech?

⁵ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew —rëb zho.

⁶ Dzigo bnabey me grëse miech co bzob zho liu. Blozh ga bzhen me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpëëdscuel me rguuiz zhow lo grë miech co. ⁷ Zienie zho zla mel las; bzhen me gza mel co bdeed me xquizh lo Dios, blozh ga bnabeyaque me zho bdiiz zho ma.

⁸⁻⁹ Grëse miech co, dow zho haxta zaatne bieltaa zho dzigo laa me bzonëz zho. Rгаа zho maase tap mil, ni zeene blozh dow zho bii bdop gadz chicuid miñe biaan.

¹⁰ Blozh ga, laa me bzëëb len barcw grë xpëëdscuel me, laa zho zie nëz xtan zha Dalmanut.

Racladz zha farisé gan zho milagr

(Mt. 16:1-12; Lc. 12:54-56)

¹¹ Blalaa zha farisé ne no nëz co, zeene bin zho laa me bdzin ladz zho, güey zho rzadraa ncuaañe rlisqui zho lo me. Rnab zho glu me cho nac me, rëb zho lo me:

—Racladz no dzianlo no gun luu tib milagr, telne nli gbaa ziaad luu.

¹² Zeene gon me sca rac zho, bio me guieñe; dzigo haxta bneeladz zdoo me, rëb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³ Blozhse sca rëb me lo zho, ndxieque zho ga laa me bzëëb len barcw laa me zie stib nëz ro nis co.

¹⁴ Zeene brieë zho ga, zoladzd xpëëdscuel me ney zho ncuaañe niow zho, lëë gdib tib guietxtil zienie zho len barcw. ¹⁵ Laa zho zie, tibaque zeene rëb me lo zho:

—Golguieñ gon, napaa noyacwet to lo zhincobi zha farisé, lo zhincobigaa rey Herod.

¹⁶ Zeene bin zho sca rëb me, bza zdoo zho rnee zho:

—Ne gon me nagon ziaadnie ne guietxtil gane squi rnee me.

¹⁷ Bien me sca rnee zho, dzigo rëbchaa me lo zho:

—¿Pe nacne rnee to ziaadnie to guietxtil? ¿Riende to lëë zha rne naa? Ndip nac zdoo to gane riende tow. ¹⁸ ¿Pa rquiin lo to, pa rquiin diag to ne laaw zob? ¹⁹ ¿Pe rso-ladzde to zeene gaayaque guietxtil ni bgaaw bguian naa gaay mil miech? ¿Bla chicuid biodzë miñe biaan hor co?

Pquiab zho rëb zho:

—Tsiipchopa.

²⁰ Dzigo rëbchaa me:

—Zeene waa gadzaque guietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹ Dzigo rëb me lo zho:

—¿Pe niicle nana riendaque to pe rne naa?

Biac tib meñ ne rcow lo

²² Bdzin Jesús guiedz ne lë Bet-said, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui.

²³ Dzigo bzhen me nia mgui güeynie me mgui zaatne nacle ro guiedz co. Ga bdëëb me zhinzuc me len bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

²⁴ Zeene laa mgui bui, rëbchaa mgui:

—Raṅle naa niina nagon laa miech ziezë; per masaque raṅ naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaaṅe raṅ mgui, niicle zi-traaw niini raṅ mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodidz lad gwiadz.

*Bnee Pedr cho nac Jesús
(Mt. 16:13-20; Lc. 9:18-21)*

²⁷ Blozhse ga, laa Jesús brieë ga grë xpëëdsuel me laa zho zie nëz Cesarea de Filipo, zieted zho grë gwiedz las ne ndxie nëz co. Laa zho no nëz, tibaque zeene bñabdiidz me rëb me lo zho:

—¿Cho dien ron to rnee miech naç naa?

²⁸ Pquiab zho, rëb zho:

—No zho rnee Juan Bautista, no zho rnee Líw, meṅ ne biadteed xti-idz Dios padzeela; nogaa zho rnee no cho stib meṅ ne ziadteed xtiidz Dios.

²⁹ Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—jLuu nac Meṅ ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

*Bzeet Jesús zha guṅ miech me
(Mt. 16:21-28; Lc. 9:22-27)*

³¹ Bded ga, psilo Jesús bzeet me lo grë xpëëdsuel me zha csacsi miech me. Rëb me nroob grë ncuaaṅe cteed zho me; grë zha non lo meṅgwiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tsoṅ ngbidz gut me laa me grieëban. ³² Grëse miṅe ted me, laaw nozodiidz me lo zho.

Goṅ Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet.

³³ Zeene goṅ me zha rzë xtiidz Pedr,

zoque Pedr ga biecw me bui me lo grëraa xpëëdsuel me, goctox me rëb me:

—jBiche lo naa nu mendox! Zie-nied guic luu miṅe rnabey Dios, sinque laa guic luu zienie miṅe racladz luu.

³⁴ Dzigo blunia me lo grë miech ne ndxie ga, yquiaadiag zho miṅe gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnaḷ zho miṅe rnabey naa, niicle tel miṅ co yquiaaqui csacsi miech zho. Nodne yquia zdoo zho xquielmban zho. ³⁵ Sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne rleyne zho naa, porne rleyne zho grë Diidz Ndzon rii, zha co ygaa tib guielmban ne mazdraa ndzon.

³⁶ Nana, tel zha ne guṅlo grëse ncuaaṅe no lo guidzliu rii. ¿Pa yquiin grë ncuaaṅ co lo zho, tel lëew yquiaaqui laa zho guey gabil?

³⁷ ¿Niacxe zrieelo gdziib zho dimi co laa zho leṅ gabil? ³⁸ Naa ne nac naa Meṅ ne pxeel Dios zial naa lo guidzliu, zha ne ctoladz guiab zho lo grë miech ngoopdoḷ rii laa zho no xnëz naa, o ctoladzniegaa zho xtidz naa, scaque naa stoladznie naa zho gaḷ dze ne laa naa guial stib. Dze ne guialnie naa grë anjl, ni glu naa grë guielndzon ne rap Dios.

9

¹ Ni rëb me lo grë miech co:

—Gneli naa lo to gaṅle, nzian grë zha ne ndxie nu niina ib ted-sod gardaque guet zho, bii zaṅ zho gaṅle zeene laa Dios glu ne nli meṅ rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdziṅ zho glaa guic gui co, tibaque zeene goṅ zho laa me

bdzëelo. ³ Masaque rquiabni xab me, nquitsbie nraw; ni tib miech grieelod scataa mbe quiiib lar. ⁴ Gonlo zho zeene laa Lí ni Moisés (grop zha ne biadteed xtiidz Dios glo) bdzinaque, laa zho nozodiidznie me. ⁵ Dzigo rëbchaa Pedr lo me:

—Maestro, jne nligaa wena guiaa ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niice riena daque Pedr pe rnee Pedr. ⁷ Tibaque znuse bdop tib xcow pquia ngali zaatne zo zho ga; dzigo bin zho zëeb tib tsi men co lo xcow co, rnee me:

—Lëë xpëed naa i gon, rleynie naa me. Golgon mi ne rnee me.

⁸ Lëëlëd biecw lo zho rwi zho, choot gon draa zho, Jesússe zo lo zho ga.

⁹ Blozhse ga, laa zho wbique ga. Laa zho ziezëeb dan noyet zho cho gui co, zeene rëb me lo zho:

—Mi ne gon to gon, choot lo gneede tow. Golcuëz haxta gal dze ne grieeban Men ne pxeel Dios.

¹⁰ Nacne choot lo bneed zhow, per psilo zho gza tson zho rnabdiidzlsa zho, zha mod grieeban tib zha ne gutle.

¹¹ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

¹²⁻¹³ Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandzed zho me.

*Biac tib niib ngop
(Mt. 17:14-21; Lc. 9:37-43)*

¹⁴ Zeene bdziñ Jesús zaatne biaan grëraa xpëedscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiidiidznie zho. ¹⁵ Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶ Dzigo bnabdiidz me rëb me:

—¿Pe nadien squitaa nodiidiidz to?

¹⁷ Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacd gnee win sac noguitnie mendox win. ¹⁸ Tel pataa zo win, zeene laa ma rzëeb zdo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win. Blansonie naa win nu, dzigo bnab naa lo xpëedscuel luu guncxoon zho mendox co, per brieelod zho.

¹⁹ Dzigo rëbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¿Ncuane cxecwdraa naa lo to squi nac to! ¿Goltënie mëedwin qui nu!

²⁰ Güey zho güeynie zho mëedwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiin ro win. ²¹ Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win. ²² Pe zhidaa vuel zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo gunguiac luu xpëed naa, jppquia zdo naa, been tib guielnzaac beenguiac win!

²³ Rëbchaa Jesús lo me:

—¿Zha rnee luu “telne zrieelow”? ¿Zha ne dib zdo rnal Dios, grëse ncuane racladz zho, zaca!

²⁴ Lëèlëd pquiab pxoz mëed co, rëb me:

—Rnalo naa Dios, per bzhiguiel been xyudar naa, idib zdoo naa gnalo naa me!

²⁵ Zeene gon Jesús laa grë miech co rbigberaa, dzigo goctox me lo mendox ne noguitnie mëed co, rëb me:

—Mendox, luu gon psan ngop mëed rii, luu psan nguaat win. iNinagazh psaan win, ib gbiiredraa luu ygaal luu win!

²⁶ Horco biire been cxidz ma mëed co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win. ²⁷ Laa zeene bzhen Jesús nia win, blis me win ga, laa win bzoli.

²⁸ Zeene bdziñ Jesús len yu ne rbëz me grë xpëedsuel me, bnabdiidz zho lo me rëb zho:

—¿Bay pe nacne brielod no ndziunxoon no mendox co?

²⁹ Dzigo rëbchaa me lo zho:

—Grë mendox ne sca nac, rquiin dib zdoo ne gnab ne lo Dios dzigo zrieelo gunxoon ne ma.

*Bzeet Jesús laa miech csacsi me
(Mt. 17:22-23; Lc. 9:43-45)*

³⁰⁻³¹ Brieë Jesús ga grë xpëedsuel me, laa zho wbire nëz xtan Galilé stib. Racladzd me cho gacnan pa lo no me; sac len dze co nzian grë ncuane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieëban.

³² Per ib rienñ zho pe nacne sca rnee me, niicle gnabdiidz gaa zho rdzieb zho gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³ Bdziñ zho guiedz ne lë Capernaum; grëse zho laa zho ndxie len yu ne blëz zho, tibaque bnabdiidz Jesús lo zho, rëb me:

—Golnë dien, ¿pe scataa nodildiidz to zeene ziaad ne nëz?

³⁴ Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

³⁵ Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶ Dzigo bzo me tib mëedbgui win glowtaa lo zho; blozh ga bdeedz me win ni rëb me lo zho:

³⁷ —Zha ne ngab xnëz naa, ni gleynie zho tib mëedwin zig mëedwin rii, gun naa cuent naa ga rleynie zho; ni zha ne sca rleynie naa, ye le men ne pxeel naa ga rleynie zho.

³⁸ Blozh ga, rëbchaa Juan lo me:

—Maestro, bdziñ no gon bzeet tib zha co lë luu zeene benxoon zho mendox; nacne nli blisqui now lo zho, sac gon, led yed zho nacgrë ne.

³⁹ Dzigo pquiab me rëb me lo zho:

—iGunscade to! Sac gon zha ne sca rzeet lë naa zeene run zho milagr, niacxe lëeque zha glëe lo naa. ⁴⁰ Zha ne nacnie ne, glëed zho lo ne.

⁴¹ 'Golgacnan sca ganle, grëse zha ne gdeed maase tib zhigaque nis guie zha ne ngab lo naa, ib ted-sod stsire Dios mine been zho ga.

⁴² Sangue zha ne yguib gunctal zho xtol zho ne nac zho zig tib mëedlas yeen; mazd lëetaa mine ted zha co sobdoo tib quie molin zhobxtil yquiw yan zho tsieron zho zho nisdo.

*Choot gdeete diidz guiab lo dol
(Mt. 18:6-9; Lc. 17:1-2)*

⁴³⁻⁴⁴ 'Zha ne rien nia zho nac mine rquiaqui runctal zho xtol zho, mazd cchuggazh zho nia co zho. Peet nacd maase tibaque nia zho zob totsaque yгаа zho guielmban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guuu. ⁴⁵⁻⁴⁶ Telne rien gaa zho

ni zho nac mine rquiaqui runctal zho xtol zho, mazd cchuggazh zho ni co zho. Peet nacd maase tibaque ni zho zob totsaque ygaa zho guielmban ndzon ne gdziñd dze lozh, lèdle zob gropa ni laa zho guey gabil, lo beldox ne gdziñd dze guuu. ⁴⁷ Tel tib logaa zho nac mine rquiaqui runctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque ygaa zho guielmban ndzon co, lèdle zob grop bziaalo zho ni laa zho guey gabil. ⁴⁸ Zaatne nac gabil, ib gdziñd dze ne guuu lo bel co; grè mziog ne ndxie ga, gdziñd dze ne nitlo ma. ⁴⁹ Grèse zha ne gdziñ ga, masaque cuib gui lad zho zig rbib zed lad bëël.

⁵⁰ Zig nac zed, rquiindoxa zeene nzhiw, per zeene nzhida, ¿pa dien yquiina? Scaquegaa to nagon golgac zig zed ne nzhi, zeena yquiin to lo guidzliu rii; niowse golbannie samiech to, glèëlsade to.

10

Zha ne rsëbtsieel
(Mt. 19:1-12; Lc. 16:18)

¹ Brie Jesú Capernaum güeyted me grè guiedz ne ndxie nëz xtan zha Judé, grè guiedz ne ndxie nëz dan ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

² Tib vuelt bdziñ bla zha farisé gocladz zho niungüet zho me, par dien pe nxind me tib diidz; nbnabdiidz zho rëb zho:

—Maestro, mgui ne racladz csëbtsieel, ¿pe gnë luu pe zrieelo csëbtsieel zho?

³ Pquiab me rëb me lo zho:

—¿Zha zho psan Moisés diidz lo to?

⁴ Pquiab zho rëb zho:

—Tel Moisésa, bdeed me diidz csëbtsieel zha ne racladz csëbtsieel, lëëraasi none yquia tib guits gdeed

zho lo wnaa zaatne raquiet ne laa zho psaan wnaa.

⁵ Dzigo rëbchaa me lo zho:

—Ne sqicxe waa miech nad nac to ib ronde to diidz, miñ co nacte biaan ley co. ⁶ Per ib nodne csëbtsieel miech; sac gon, zeene psan Dios grëtaa ncuaane no, tib nëz miech bzaa me: tib mgui ni tib wnaa. ⁷⁻⁸ Gacxe waa, mgui ne rtsieelnia ib none greezhaa zho lo pxoz zho, lo xniaa zho, par gban-nie zho wnaa ne nac tsieel zho; laa zho gactipse grop zho. Nac-draa zho chop miech, sinque laa zho rac tibaque. ⁹ Dios nac men ne psan ycatsieel miech, cho dzigo nac miech par quiits zho mine rn-abey me.

¹⁰ Laa zeene bdziñ me len yu ne rbëz zho, dzigo bnabdiidzaque xpëëdsuel me miñ co lo me stib.

¹¹ Dzigo rëbchaa me lo zho:

—Mgui ne rsëbtsieel ni rbannie zho stib wnaa, noguitnie zho wnaa ne gocpaa tsieel zho ga, ni dol ga run zho. ¹² Niicle wnaagaaw, wnaa ne rsëbtsieel ni rbannie zho stib mgui, lëëque dolaque ga run zho.

Beenlay Jesús mëëdlas
(Mt. 19:13-15; Lc. 18:15-17)

¹³ Tib vuelt nzian men ne bdziñ bdziñnie zho xpëëdlas zho lo Jesús, par cxobnia me guic win gunlay me win. Grè zha ne nac xpëëdsuel me, lel psilo zho ndox zho lo grè zha ne bdziñnie grè mëëdlas co.

¹⁴⁻¹⁵ Zeene gon me sca quiayun zho, wbinladz guic me, dzigo rëb me lo zho:

—Ctsirede to grè mëëdlas yeen qui, golsaan guiaad win lo naa. Sac gon grè mëëdlas yeen, ni zha ne nac zigne nac win, zha co nac zha ne sëëb ygab lo Dios.

¹⁶ Blozhse sca bnee me, dzigo psilo me bdeedz grè mëëdlas co, ni pxobnia me guic win beenlay me win.

*Bzodiidznie tib zha ricw Jesús**(Mt. 19:16-30; Lc. 18:18-30)*

¹⁷ Laa Jesús nole nêz tsie me stib guiedz, zeene rias tib niib nguieg bdziñ pquuitsgzhìb lo me, rëb niib lo me:

—Nan naa luu nac tib meñ ne noseed miech, ni tib meñ wen nac luu; ¿bnë dien pe nac miñe guñ naa zeena yгаа naa guiełmban ndzon ne gdziñdraa dze lozh?

¹⁸ Rëbchaa Jesús lo niib:

—Rnee luu lëë tib meñ wen nac naa. ¡Nligaaw, Diosse nac meñ wen!

¹⁹ Nanle luu ganle zha nac Xley Dios, rneew:

Gute luu samiech luu,

tełne nole tsieel luu, tsonied luu zha ne led tsieeld luu,

cuand luu samiech luu,

yquiadiidzguizhd luu samiech luu,

yquidieed luu samiech luu,

goñ pxoz luu, goñ xniaa luu; bin miñe rnabey me luu.

²⁰ Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

²¹ Dze rwi Jesús lo niib, rleynie me niib.

—Stibaque miñe rquiin guñ luu —rëb me—, güey, güeyto grëse ncuaañe quianie luu, dzigo bdiiz dimi co lo grë zha mban ne gdiizd pe yquiin; sca nroobraa guiełnzaac ne yгаа luu gbaa. Lozh ga, bleeladz xquiełmban luu dënał zhits naa.

²² Zeene bin niib co sca rëb Jesús, biab guiełnë niib, mbanse rac niib laa niib zey; sac ne nligaa nroob ncuaañe quianie niib.

²³ Dze rwi me goñ me laa zha nguieg co zey, dzigo rëb me lo xpëëdsuel me:

—¡Grë zha ne squi rapchen, rza-cxuu zho par sëëb zho xnëz Dios gnabey me zho!

²⁴ Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, ¡ne nligaa tib miech ne ndziib rap chen, rzacxuu zho sëëb zho xnëz Dios gnabey Dios zho!
²⁵ Mazd znuse rded tib camell guieer guzh, lëdle sëëb tib zha ricw xnëz Dios.

²⁶ Zeene bin zho sca rëb me, maz-draa bzee zdoo zho, rnabdiidzlsa zho rnee zho:

—Bay, ¿chose dzigo nac zha ne zrieelo sëëb xnëz Dios?

²⁷ Dze rwi me lo zho, dzigo rëbchaa me:

—Par miech zootle tsod zha ne grieelo sëëb xnëz me. Sangue me, nan me no zho; sac tsod ncuaañe grielod guñ me.

²⁸ Dzigo rëb Pedr lo me:

—Teł no, grëse ncuaañe rdziaap no laa no psana, laa no ziaadnał zhits luu.

²⁹ Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëëd zho, liun zho, porne riladz zho naa ni riladz zho Xtiidz Ndzon Dios; ³⁰ nli nroob guiełnë gan zho, per gneli naa lo to ganle: grëse ncuaañe sca psan zho ga, lo guiełmban riique laa zho gbi-ire gana stib tib gayoogaw tib tiba; ni ib tedsod zgaa zho tib guiełmban ndzon ne gdziñdraa dze lozh.

³¹ 'Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

*Biire bzeet Jesús laa miech csacsi me**(Mt. 20:17-28; Lc. 18:31-34)*

³² Brieë Jesús ga laa me zie Jerusalén. Nzian grë zha ne zienał zhits me, nerse me lo zho laa zho zie. Grë zha ne nac xpëëdsuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëëdsuel me ga, psilo me bzeet me grëse teł zha ziaadyob ted me, rëb me lo zho:

33 —Bii zaṅ to gaṅle, naa ne nac naa Meṅ ne pxeḷ Dios, niina ne laa ne gdziṅ Jerusalén ible zielo zho naa ladznia grē zha ne nac pxoz nroob ni grē zha ne rseed miech ley. Grē zha co gnab guet naa, ni saṅ zho naa ladznia grē zha ne nacdraa zha Israel. 34 Xidznie zho naa, stsuc zho lo naa, zguṅ zho naa, ni haxta zut zho naa; per dze ne gac tsonṅ ngbidz gut naa laa naa grieaban.

35 Dzigo wbig gax Jacob grop Juan (xingan Zebedé) lo me, rēb zho:

—Maestro, laa no gnab tib favor lo luu, per racladz no siguiḷ luu guṅ luuw.

36 Dzigo rēb me:

—¿Pe favor ne racladz to guṅ naa lo to?

37 Rēbchaa zho:

—Laa no racladz, siguiḷ luu zioob no cue luu gaḷ dze ne laa luu nac rey rnabey luu, tib no nēz derech stib no nēz revés.

38 Pquiab Jesús, rēb me lo zho:

—iNi to goṅ riend pe rnab to! ¿Pe zlēb to gaṅ to grē guielnē ne gaṅ naa, pe zlēb to ted to grē miṅe teed naa?

39 Rēbchaa zho:

—iZlēb no!

Dzigo rēbchaa me lo zho:

—Nli zaṅ to guielnē ne gaṅ naa, ni zded to miṅe teed naa; 40 per ne gnedz naa diidz sob to cue naa nēz derech o nēz revésgaa, led naad raguiaḷ miṅ co; laa lugar co biaanle par zha ne nole diidz ygaaw.

41 Grēraa zha ne nac xpēdscuel me, zha ne nacgza Jacob ga grop Juan, zeṅe bin zho zha rzē xtiidz Jacob grop Juan blēē zho lo zho.

42 Dzigo bredz Jesús zho grēse zho, rēb me lo zho:

—Raṅ to gaṅle zha ruṅ grē zha ne rnabey grē guiedz ne ndxie lo guidzliu, ni grē zha ne nac zha non, masaque rnabey zho samiech zho zigne racladztaa zho. 43 Saṅgue to goṅ, guṅscade to. Lo gza to, zha

ne racladz gac zho zha non lo to, laa ne glu zho zha non zho, none glo zho guiaanwin gac zho zig tib nguṅdziin lo to. 44 Scaquegaa, zha ne racladz gnabey lo to, none glo cseed zho guṅ zho miṅe gnabey to zho. 45 Golgaṅ gaṅle, niicle naa ne nac naa Meṅ ne pxeḷ Dios, ziaḷd naa par gnabey naa miech, sinque laa naa ziaḷ par gac naa tib nguṅdziin lo zho, ni gded naa xquielmban naa zeṅa laa zho lo grētaa ncuaaṅe ngadoo zho. Ni naṅpaa naa miech guizhiu ne laa.

*Biac tib meṅ lē Bartimé
(Mt. 20:29-34; Lc. 18:35-43)*

46 Sca no grē miech guizhiu co nēz, laa zho bdziṅ guiedz Jericó. Laa zeṅe laa grē miech taf co zieriee ro guiedz co, laa tib mgui ciegw lē Bartimé zob ga rtop gon (xingan tib meṅ lē Timew). 47 Zeṅe bin Bartimé ye Jesús (Nazaren) ziaad ga, psilo me nguiedz rbedz me, rnee me:

—iJesús, meṅ xtii rey David, pquia zdoo naa!

48 Nzian grē miech co ndox lo me naṅ zho guioog ro me, per dzigole mazdraa nguiedz roptsie me, rnee me:

—iJesús, pquia zdoo naa!

49 Dzigo pcuēēzni Jesús, bnabey Jesús güeytsedz zho me. Bdziṅ zho lo me, rēb zho:

—iLigier guso i! Dē gaṅle laa me rbedz luu.

50 Zeṅe bin mew, haxta squi bron me lar ne mbix me, guso me ga laa me bdziṅ lo Jesús. 51 Dzigo rēbchaa Jesús lo me:

—Bnē nadien, ¿pe racladz luu guṅ naa?

Pquiab me rēb me:

—Maestro, racladz naa guiac lo naa.

52 Dzigo rēbchaa Jesús:

—iNiinagazh laa lo luu gaṅ! Laa luu biac, sacne dib zdoo luu bnaloo luu naa. Ligier na bzē.

Horcogazha laa lo men co psilo bui, laa me zienal zhits Jesús.

11

Bdzin Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

¹ Zhile gdziñ zho Jerusalén, laa zho zie gax zaatne riaan guiedz Betfagé ni guiedz Betain, nêz dan squi riaan Gui Oliv, zeene bredz Jesús chop xpëédscuel me ² rëb me lo zho:

—Goltsie guiedz win ne ndxie danse lo ne i. Zigne sëeb to lad guiedz, laa tib burr quiadoo ga, ni tib miech gard sob lad ma; dzigo golxad ma, goltënie ma nu. ³ Tel cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

⁴ Laa zho zie, nligaaw laa zho güeydziel burr co quiadoo ma tib ro nêz, gax tib ro yu. ⁵ Blalaa zha ne zo ga, zeene gon zho laa zho noxadz ma, rëbcha zho:

—¿Pe gun to burr qui dzigo na, ne noxadz to ma?

⁶ Dzigo pquiab zho zigne rëbse Jesús lo zho ga, nacne bdeed men co diidz laa zho zienie ma.

⁷ Bdzin zho ma lo Jesús lëëque lar ne rbix zho pxob zho lad ma, bzobga me ma. ⁸ Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me. ⁹ Grëse zho, niicle zha ne ner lo mew, niicle zha ne nal zhits mew, rley zho nguedz roptsie zho, rnee zho:

—¿Zha ndzontaa men qui pxeel Dios lo ne! ¹⁰ ¿Zha wentaa ziaad me gac me zhirey ne! ¿Me gnabey zigne bnabey pxozgol ne rey David! ¿Zha ndzontaa Dios ne zob gbaa!

Sca nguedz roptsie zho rleyne zho me, laa me bdziñ Jerusalén.

¹¹ Bdzin me Jerusalén, güey me güeyso me len yadoo. Blozhse

bui me dipse len yadoo, laa me brieque ga laa me zie nêz Betain grë xpëédscuel me, sac bdzele dzew.

¹² Biini liu, loxaque zieriee zho Betain laa me psilo rcaabedz. ¹³ Zitlaa ziaad me gon me tib zhan yag guigw, nxii nac low zëeb zhiblaga; dzigo zie me zieso me dien pe gdzielid tib guigw low gow me. Bdzin me zaatne zoba, ni tib guigw guiend low loxaque zhiblagsew scataa zëeb, sac gardpaa gdziñ mëe ne rquia guigw. ¹⁴ Dzigo rëb me lo yag guigw co:

—¿Squitaa nagon guiaan luu! ¿Gdzindraa dze yquia nex lo luu gow miech!

Grëse xpëédscuel me, bin zho sca bnee me lo yag co.

Blee Jesús miech len yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵ Bdzin zho Jerusalén, bzëeb me len yadoo. Psilo me blee me grëse miech ne quiayun lgui ga, zigtaa zha ne no wtow, zigtaa zha ne no wziw. Grë zha ne no wto palom, grë zha ne notsëe dimi, ptiixche me xmezho. ¹⁶ Blozh ga, pso me diidz choot nodraa sëëbnie grë ncuaan co len yadoo, ¹⁷ rëb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon quiayun to lugar rii zig tib zhibliee ngbaan.

¹⁸ Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹ Zeene laa liu pcow, laa me wbiqee Jerusalén stib grë xpëédscuel me.

²⁰ Biini liu co, laa zho zieded za-atne zob yag guigw ne sca güeyguib me nex lo ga, gon zho laaw bidzle dib low. ²¹ Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

²² Pquiab me rëb me:

—Zha ne dib zdoo rnalo Dios, ²³ gneli naa lo to ganle: Niicle ncuane mazdraa ngan gnab zho lo me, zun mew; lëëraasi none dib zdoo zho gliladz zho zac mine rnee zho, ni palal gacchopd guic zho.

²⁴ Golgona sca ganle, grëse ncuane gnab to lo Dios, dib zdoo to golliladz ne zneedz mew, dzigo sca zac mine rnab to. ²⁵ Ni zeene gnab to lo Dios, golcsoladz dien pe no cho rlëënie to, dzigo golgun zho perdon; zeena scagaa, PxoZ to men ne zob gbaa zun me to perdon tel pe nactaa xtol to. ²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdziñaque Jerusalén stib. Lëëtaaque laa Jesús quiawi dib len yadoo, zeene bdziñ bla zha ne nac pxoz nroob, bla zha ne nac maistr ley ni zha ne nac men non lo menquiedz, ²⁸ rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹ Pquiab me rëb me lo zho:

—Laa naa gun tib w nabdiidz lo to. Telne stsiere to low, dzigo gni naa lo to ganle cho rnabey naa ne laa naa noyun grë ncuane noyun naa. ³⁰ Golnë dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa biladzde to mine bnee Juan?” ³² Tel na dzieetsgaa

ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse menquiedz nan ne nli Dios pxeel Juan biadteed Juan xtiidz Dios lo miech. ³³ Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë ncuane rii.

12

Xcuent zha ne pquianap liu

(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë ga, laa me zey zit.

² Zeene gol mëë ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me. ³ Per lel bnaaz zho moz co, bdiñ zho zho; blozh ga, scase bzonëz zho zho.

⁴ Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pquiaago zho zho, bdiñ zho zho, blë zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. ⁶ Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

⁷ Zeene gon zho laa xpëed me bdziñ, rëbchaa zho: “¡Lëë zha qui nagon guiaannie liu rii! ¡Golgotsaa dziuut ne zho zeene guiaana lo ne!” ⁸ Dzigo bnaaz zho men co, beet zho

me, güeyga zho güeyron zho me tib lad lo liu co.

⁹Sca nagon —rëb Jesús—, been zha ne quianap liu co. Golnëse nadien, ðpe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csan me liun me.

¹⁰Golsoladz ganle znu rnee lo Xti-idz Dios:

Quie ne psëeb zha ne nozaa yu, ni nand zho lëepaa quie co nac mine rnazdziits yu.

¹¹¡Ncuaane gzee zdoo new! Sac Dios bnabey sca goca.

¹²Zeene gon zho sca bnee me, gocladz zho naazgagh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

Pe nonguiel quizh miech contribucion

(Mt. 22:15-22; Lc. 20:20-26)

¹³Zhisaque goca, laa zho px-eelaque zla zha farisé, ni zla zha ne nacie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wxtis. ¹⁴Bdziñ zho lo me, rëb zho:

—Maestro, ndion no niapse didzli rnee luu, led lega gund luu mine rnee tib miech, sac tibeyse nac miech lo luu, ni laa luu zienal cseed zho mine nac diidzli zeena sëeb zho xnëz Dios. Min co nagon, nacne racladz no gnë luu lo no dien, ðpe nonguiela ga rdeed no dimi ne razh lo rey te nonguielda ye? ðPe dzizhraa no dimi co, te mazd dizhdraa now ye?

¹⁵Bienga Jesús racladz zho gungüet zho me, dzigo rëbcha me lo zho:

—ðPe nacne racladz to gungüet to naa? Golguiid tib xpes to nu ganle.

¹⁶Dzigo bdeed zho tib pes lo me. Blozh ga, rëbcha me lo zho:

—Golnë lo naa dien, ðcho nu quia lo pes rii? ðCho lë nu quia low?

Pquiab zho rëb zho:

—Lëe rey Roma i, lëe lë me i quia low.

¹⁷Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

ðPe nli zrieaban miech?

(Mt. 22:23-33; Lc. 20:27-40)

¹⁸Bdziñaque zla zha saducé, rëb zho lo me:

¹⁹—Maestro, znu pquiaa Moisés lo libr ley ne psan Moisés lo no: tel glo mguí guet lo wnaa ne nac tsieel mguí ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁰Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpëed zho. ²¹Dzigo ptsieelnia stib bets zho wnaa co, blozh ga gutaque zha co, pasë zho nsañ mëed. Ptsieelniaque me stib zho, goc zho tson, niicle zha co psandaque mëed. ²²Sca sca haxta bza gza gadzse zho ptsieelnia me, per ziese zho ni tib zho psand mëed; tibaque zeene yeque me, laa me gut. ²³Mine racladz no gacndion no, ðchopaa dzigo gac tsieel wnaa co gal dze ne laa zho grieeban; sac gza gadzse zho ptsieelnia me?

Sca bnabdiidz zho, sac nac zha saducé rliladz zho ne nli zdzin dze grieeban zha ne ret.

²⁴Dzigo pquiab Jesús rëb me lo zho:

—I nagon laa to rxin. Mine nacia riende to zha nac Xtiidz Dios, niicle rliladzde to zrieelo me gun me ncuaan ro ne gard gan miech.

²⁵Sac gon, zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anjl ne no gbaa.

26 Stiba, ible nli zrieeban men̄gut. ¿Pe gard gan̄le glab to lo guits ne p̄quiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” 27 Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel̄ Dios, nacd me xDios men̄gut sinque xDios zha mban nac me. Ise nagon rlu, peet riende to gane squi rnee to.

*Xley Dios mine mazdraa non
(Mt. 22:34-40)*

28 Zeene sca nozodiidznie Jesús zha saducé co, gon̄ tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel̄ bnë lo naa dien̄, lo grë xley Dios, ¿pa min̄ nac mine mazdraa non?

29 Pquiab Jesús rëb me:

—Min̄ rii nac mine mazdraa non, znu rneew: “Grëse to men̄ Israel, gol̄quiaadiaga gan̄le: men̄ ne nac Dios ne riladz ne, tibaque me ni me nac men̄ ne rnabey ne. 30 Dib zdoo to, dib xalm to, dib guiel̄biini ne no guic to, dipse xfuers to gol̄leynie me.” Lëë tiba nu, 31 laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

32 Dzigo rëbchaa maistr ley co lo Jesús:

—Diidzli rnee luu maestro, tibaque Dios no. 33 Ni none dib zdoo ne, dib guiel̄biini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Min̄ co nac mine mazdraa non, lëdle gzëëg ne pe cos cogon ne lo me o dien̄ peragaa gun̄ ne.

34 Zeene gon̄ Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

*¿Cho xpëëd nac Crist?
(Mt. 22:41-46; Lc. 20:41-44)*

35 Sca noseed Jesús miech len̄ yadoo ga, zeene bnabdiidz me lo zho, rëb me:

—¿Bay zha nacne rnee grë maistr ley, lo xtii rey David ga grieequia Men̄ ne nacle diidz ga cxeel̄ Dios? 36 Sac zeene bdeed Espiritu Sant guiel̄biini lo rey David, znu bnee David:

Bnee Dios lo men̄ ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

37 Gase nagon̄ tel̄ne nli zha xtii David gac Men̄ ne nole diidz cxeel̄ Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

*Zha run̄ grë maistr ley
(Mt. 23:1-36; Lc. 11:37-54;
20:45-47)*

38 Laa me noseed grë miech co, zeene pso me diidz lo zho rëb me:

—Ible tsienalde to mine run̄ maistr ley gon̄. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel̄ zho zho dib ro nëz. 39 Zig nac len̄ yadoo, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob grol̄ mezh zeene laa wagw gac. 40 Ni rlozh ga, rio zho rla zho tel̄ pe ncuaane rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool̄ zho.

'Sca gon nac zho, per ib ted-sod zeene laa grë miech ngoopdol quizh xfalt, zha nac zha ne maz-draa nroob caxtigw yгаа.

Gon ne bdeed tib wnaa viud
(Lc. 21:1-4)

⁴¹ Blozh ga, güey Jesús güey sob me gax zaatne zhoob grë alcancí. Dzese rwi me ran me zha riesan miech gon len grë alcancí co; ndal grë zha ricw rdziñ, nroob dimi rсан zho.

⁴² Tibaque zeene bdziñ tib wnaa viud, tib men prob nac me, ye me laa me psan chop gaay win len alcancí co.

⁴³ Dzigo bredz Jesús xpëedsuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴ Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

13

¡Nsin golso!

(Mt. 24:1-28; Lc. 17:22-24; 21:5-24)

¹ Laa Jesús zieriee len yadoo nroob co grë xpëedsuel me, zeene rëb tib zho lo me:

—Maestro, ¡bui ganle zha niaataa yadoo rii! ¡zha rnataa grë quie ngol ne niaaw!

² Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, zdziñ dze ne nitlow dib nacsew. Ni stib quie qui guiaanraa zigne squi zhobxcuaaw i.

³ Brie me ga, laa me zie gza me zho. Bdziñ zho cho Gui Oliv, ga bzob zho grë zho. Nienenpaa ro yadoo co zaatne zob zho ga; dzigo whig Pedr, Jacob, Juan ni Ndrés lo me, gza tap zho bnabdiidz lo me rëb zho:

⁴ —Bzhiguiel bnë lo no dien, ¿pa hor dzigo gac mine bzeet luu ga?

¿Zha nac señ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin golso zeena choot yquidiede to. ⁶ Sac nzian zha ne griequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷ Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. ⁸ Sac garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielne ne gan miech lozh ga.

⁹ Zeene laa grë ncuaan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, ¹⁰ sac ib none brieets bliaallew lo grëse miech zeene gal dze ne laa guidzliu nitlo. ¹¹ Zeene tsiezo zho to lo wxtis, tso de to zhgab dien pe guiab to lo wxtis; sac Espiritu Sant nac men ne gacniën to, ni mine csiaab me guic to min co gnee to.

¹² Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniala zho. ¹³ Ible gandzed miech to, grëse zho glëe lo to sacne riladz to naa; per scagaa, grëse zha ne dziits so haxta lozh grë guielne co, ible scaania Dios zho.

¹⁴ Zeene gan to laa ncuane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca),

hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsiet-solan zho. ¹⁵ Zha ne no glaa guic yu, none lëëled xoon zho, ib guiabd zho sëëb zho len yu tsiebee zho ncuane nacchen zho. ¹⁶ Zha ne zogaa dana, ib gund zho ne laa zho tsie ro lidz zho tsixi zho xab zho. ¹⁷ ¡Prob grë men wnaa ne lëëtaque len dze co zoney xpëed, men ne quaniegaa mëdyeen ne bii radz! ¹⁸ Golnab lo Dios gande to guielnë co len mëë ne rac nal, sac ne nligaa guielnë nrooba. ¹⁹ Wlal ne biaan guidzliu haxta lo nadze, gard gan miech tib guielnëdodox sca, ni gdzindragaa dze ne gan zhow stib. ²⁰ Telne csaan Dios nroob dze gac guielnë co, ni stib miech rii guiaanraa; per na por grë zha ne bzooblo me sëëb xnëz me, gdeete me diidz gaca nroob dze.

²¹ Len dze co, tel cho zha gnë lo to: “Golwi ganle, lëë men rii nac Men ne nole diidz ga cxeel Dios”, gnëgaa zho: “Golwi nec ganle, lëë me i”, gliladzde tow. ²² Sac ndal grë zha ne griequia guiaadquidie miech, no zho gnë zha nac men co, nogaa zho gnë zha ziadteed Xtidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. ²³ ¡Nsin sca golso! Ib cxende to, benque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴ Zeene lozhse gan miech grë guielnëdodox co, laa lo ngbidz ycow, gziinidraa mëë. ²⁵ Grë mel ne ndziib gbaa, laa ma gliaal; grëraa ncuane no gbaa, masaque nëzrii nëzrec gaca. ²⁶ Horco bii zan zho ganle, zeene laa Men ne pxeel Dios ziad-zëëb glaa lo xcow con grë guielndzon con grë poder ne rap me. ²⁷ Lozh ga laa me gnabey grë xanj me, tsie zho tsietop zho grëse zha ne ngab lo me, niicle zaatne

mazdraa zit lo guidzliuw, mazdra-gaa zit gbaaw.

²⁸ Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ²⁹ Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëë dze co ziaadyoble. ³⁰ Gneli naa lo to ganle, nzian miech ne mban niina bii zan zho zeene laa grë ncuane co csilo gac; sac ible ncuane gaca. ³¹ Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. ³² Lëëraasi choot nand dien pa dzew, dien pa hor-gaaw, per ni grë anjl ne no gbaa, per ni naa nanda; loxaque Pxzose naa nana. ³³ Gacxe waa, nsin golso, golnab lo Dios; sac gon nande to dien pa hora.

³⁴ Nac cuent rii zig nac tib zha ne rree zie tib guiedz zit. Zeene laa zho rree, rsanse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguesd zho. ³⁵ Scadaa to nagon nsin golso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu. ³⁶ Nsin golso, zeena ine zobna to zeene laa naa glanso. ³⁷ Mine rne naa lo to nu, laaw rne naa par grëse miech.

14

Bnediidz zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

¹ Schop ngbidz runfalt csilo lni Pascw, lni ne row zho guietxtil ne riotsd ncobi; grë pxoz nroob ni grë maistr ley, laa zho noguib dien zha ngeuetsse gnaaz zho Jesús gut zho me, ² rnee zho:

—Laa me no yгаа, per lëëraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

³ Len dze co, laa Jesús no guiedz Betain. Lëëtaaque laa me no mezh lidz Simón ne blan guiedz lepr; zeene bdziñ tib wnaa bdziñnie tiblo nceit nex, nosew tib len ncuiaan win niaa niapse quie rbebni, tiblo nceit niazha. Dzigo blë wnaa co ncuiaan win co, blozh ga pchoob me nceit co guic Jesús.

⁴ Blalaa zha ne zobgrë Jesús ga, zeene gon zho sca been wnaa co, blëë zho, rëb zho:

—¿Pa rieguiala squi pxin zhlë wnaa qui nceit qui? ⁵ Telne niaca mine ndow, nguizhpaa zhow tson gayoo pes plat, nquiinpaa dimi co ngaaza lo grë zha mban ne guiend pe yquiin.

Laa zho nolisquiw lo wnaa co, ⁶ dzigo rëbchaa Jesús lo zho:

—Golsaan me. ¿Pe nacne rlisqui tow lo me? Led lega pxind mew, tib guieInzac nroob i been me lo naa. ⁷ Telne nli rquia zdoo to zha ne guiend pe yquiin, zac ygad to lo zho stib dze, sac tibaque ran to zho; sangue naa zdziñ dze ne gbiche naa lo to, gandraa to naa. ⁸ Laa wnaa qui been mine brieelo lo me, laa me pchoob nceit nex rii guic naa zeena nzhixcuaale xcuerp naa gal dze ne laa naa ygueets. ⁹ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

¹⁰ Lo gza tsiipchop zha ne nac xpëëdsuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun me ntregar. ¹¹ Zeene bin zhow, per nli rley zho

ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

Dowxtseenie Jesús xpëëdsuel me
(Mt. 26:17-29; Lc. 22:7-23;
Jn. 13:21-30; 1 Co. 11:23-26)

¹² Mer dze ne rsilo lni Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnabdiidz xpëëdsuel Jesús dien pa lo racladz me tsiegunlo zho ncuiaan gowxtseenie me zho wdze co. ¹³ Dzigo pxeel me chop zho Jerusalén, rëb me lo zho:

—Goltsie Jerusalén. Ga gan to tib mgui nzobyan tib re nis, dzigo goltsienal zhits me. ¹⁴ Yu ne gan to sëëb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëëdsuel me wdze rii?”

¹⁵ Dzigo ga glu me tib len yu nroob ne riaan glaa, nzhixcuaale lena, grële ncuiaan yquiin no ga; dzigo ga golgunlo zhixtsee ne.

¹⁶ Laa grop zha co brieë, laa zho zie. Bdziñ zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

¹⁷ Bdze dzew, laa me bdziñ len yu co grë xpëëdsuel me.

¹⁸ Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne gon noyownie naa nu tsielo naa lадznia zha ne gut naa.

¹⁹ Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

²⁰ Pquiab me rëb me lo zho:

—Ladaque to no zho, zha ne nosëëb xcuan len xquien naa, lëë zho ga. ²¹ Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, iprobsaxe zha ne tsielo naa

ladznia zho! ¡Mazd wen nie zho, ib niacd zho miech lo guidzliu!

²² Laa zho noyow zeene bzhen Jesús tib quietxtil, bdeed me xquizh lo Dios, blozh ga beengrol mew dzigo bdiiz mew lo zho, ni rëb me:

—Golquiina, lëe xcuerp naa i gon.

²³ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co.

²⁴ Ni rëb me lo zho:

—Lëe xchen naa i, miñe gzhiee par grëse miech ne sëeb xnëz Dios, sac lëe stib mod cub nu psan Dios parne sëeb miech xnëz me. ²⁵ Lëe lultm vuelt nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxoza naa.

Dzigo psilo me biil me bla salm gza me zho.

Bzeet Jesús zha guñ Pedr

(Mt. 26:30-35; Lc. 22:31-34;

Jn. 13:36-38)

²⁶ Blozhse biilnie me Dios grë me zho, dzigo laa me brienie zho ga zienie me zho nëz Gui Oliv.

²⁷ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiil.”

²⁸ Sca guñ zho naa, per zeene laa naa grieegan gloule naa ga Galilé, ga cuëz naa to.

²⁹ Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁰ Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelt rëb luu runbeyd luu naa.

³¹ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoza me Getsemani

(Mt. 26:36-46; Lc. 22:39-46)

³² Bdziñ Jesús zaatne lë Getsemani gza me zho, dzigo rëbchaa me lo zho:

—Nuse nagon golsob, laa naa ga gazodiidznie naa Pxoza naa.

³³ Horco psilo mban rac zdoo me, riabguieinë me, dzigo bredz me Pedr, Jacob ni Juan, bzënie me zho palal ³⁴ dzigo rëbchaa me lo zho:

—Mban rac zdoo naa, zootle zig zet naa lo guieinë rii. Nuse nagon golguiaan, per golsobna.

³⁵ Bzë me spalal, dzigo pquiitsgzhie me haxta bdziñ lo me lo liu; psilo me bnaab me lo Dios ne telne zrieelow mazd tete me grë guieinë ne no gan me, ³⁶ rëbchaa me:

—¡Papá, par luu grëse cos zrieelo guñ luuw! ¡Bzhiguiel psilaa naa lo guieinë rii! Per telne grieeloda, miñe gnëtaa luu, sca gaca.

³⁷ Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëe? ¿Pe ni palal blëëbd luu nzobna luu?

³⁸ Golsobna, golnab lo Dios zeena yquiild mendox to. Niicle ne squi lëbdraa xcuerp to sobna to, per golnab lo Dios, sac gon miñ co nac miñe racladz zhiespiritu to.

³⁹ Dzigo biire güey me stib, güeyzodiidznie me Dios; scaque miñe bnaab me glo mincoque bnaab me stib. ⁴⁰ Zeene bdziñ me lo zho, gon me laa zho bii nixguies. Ni rdziel zho pe guiab zho lo me.

⁴¹ Laa zeene goc tson vuelt biire me güeynab me lo Dios, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa.

⁴² Goltiesio, zeena zio ne; sac gon

laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëedscuel me) bdziñ, bdziñnie Judas tib dzoon zha ne pxeel grë pxoz ne rnabey, grë maistr ley ni grë zha non lo menquiedz Israel. No zho nzhen spad, nogaa zho nzhen yag. ⁴⁴ Biaanniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

⁴⁵ Nligaaw, zigne bdziñ Judas bredz Judas Jesús; blozh ga dow Judas bzhid cuas me. ⁴⁶ Horco wbig grë zha ne zienal zhits Judas ga bzhen zho me. ⁴⁷ Lo grë zha ne nacgza Jesús ga, hor co biasaque tib zho bdob zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbcha zho Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa?

⁴⁹ Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuuan rii gon noyac zeena gac grë mine raquiet lo Xtiidz Dios.

⁵⁰ Grë zha ne nac xpëedscuel me ga, grëse zho bzhoon, tipse me psan zho ga. ⁵¹ Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; ⁵² per znuse brie mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdziñnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menquiedz, laa zho pcaalsa ga.

⁵⁴ Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëetaque laa zho quiadzëe lo gui.

⁵⁵ Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew.

⁵⁶ Nzian zha ne pquidie rëb zho znu znu nac ncuane noyun me, per rriequiad xtiidz zho; sac zhaase zhaase rnee zho. ⁵⁷ Tibaque zeene guso blalaa zho, bnexuu zho rëb zho:

⁵⁸ —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹ Niicle scaw, rzëdaque xtiidz zho tipse.

⁶⁰ Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¿Diidzli dzigo lëe nac grë mine rnee zho i!

⁶¹ Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

⁶² Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶³ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—, ⁶⁴ laa to binle ganle zha rzëtaa xtiidz me

noguitnie me Dios. ¿Pe gnè to na zha gac me?

Grèse zho pquiab rëb zho, ib rieguiala guet me.

⁶⁵ Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnè dien, ¿cho ga bdiñ luu?

Ye grè zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Laa Pedr bii zoque ley. Ga zo Pedr, zeene laa tib wnaa ne nac zhi-criad men rnabey co bdiñ; ⁶⁷ gon me laa Pedr zob gax lo gui nodzëë Pedr. Dze rwi me lo Pedr, tibaque zeene rëb me:

—¿Ye luu lëë rzënie Jesús, men Nazaret ne bdiñnie zho i?

⁶⁸ Per bnelid Pedr.

—Dieen pe rool luu —rëb Pedr—. Runbeyd naa men co.

Brieega Pedr zie Pedr nöz ro zawan, lëëtaque hor co pcuedz tib gall. ⁶⁹ Dzeque rwi wnaa co lo Pedr, dzigo rëbchaa me lo grè zha ne ndxie ga:

—¡Lëëw, zha ne rzënie me nac mgui qui!

⁷⁰ Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men co. ¡Zha Galilé name nac luu!

⁷¹ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¡Dios zobwi ganle, telne rned naa diidzli, maase cuibdee naa!

⁷² Lëëtaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biin Pedr guielnè co.

15

Güeynie zho Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

¹ Ziadyiinile liuw, scase bii nchool rnow, wbiire pcaalsa grè pxoz non grè zho zha ne rnabey lo maistr ley, grè zha non lo menguedz ni grè zha ne nac zhiwx-tis zho. Blozhse bnediidz zho, laa zho pxidoo Jesús güeyšan zho me lo Pilat men ne nac gobernador.

² Bdiñ me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

³ Tibaque quia grè zha ne nac pxoz non, rzadraa grè ncuaane rcaadz zho me. ⁴ Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grè ncuaane rcaadzdoł zho luu.

⁵ Bzee zdoo Pilat gon Pilat ible pquiabd me.

Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

⁶ Gzobse lni Pascw rsilaa Pilat tib zha ne no ladzguuib, tel cho zha ne gnabtaa menguedz laa. ⁷ Len dze co no tib mgui lë Barrabás ladzguuib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern. ⁸ Nacne psilo grè miech co, rnab zho lo Pilat csilaa Pilat tib zha ne no ladzguuib zigne runtaque Pilat grëraa iz.

⁹ Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëë grè pxoz non co ran zho Jesús gane rnabey zho bgaa me güeyšan zho me ga. ¹¹ Per lel psilo grè miech co rnab zho csilaa Pilat Barrabás; ni lëëque grè

pxoz co pquuil zho. ¹² Dzigo rëb Pilat lo zho:

—¿Zha dzigo racladz to gac men rnee zho zhirey to nu?

¹³ Pquiab be grë miech co, roptsie zho rnee zho:

—¡Bnabey yquia me lo cruz!

¹⁴ —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

¹⁵ Goñ Pilat zha rac zho ni racladzaque me guianñziuu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menguiib ne tsiequiaa me lo cruz.

¹⁶ Biire grë menguiib co bzëëbnie zho Jesús nëz len yulow, ga pcaalsa grëraa menguiib ne nacgrë zho.

¹⁷ Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸ Dzigo psilo zho nguiedz roptsie zho rnee zho:

—¡Golwi ganle zha ractaa zhirey zha Israel!

¹⁹ Bzhen zho tib goobgui, rdeed zhow guic me, rtsuc zho lo me, rquiaalo zho rquiitsgzhib zho lo me zig rquiitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43;

Jn. 19:17-27)

²⁰ Blozhse sca bdziitnie zho me, laa zho bleel lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

²¹ Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

²² Zeene bdziñnie zho Jesús zaatne lë Gólgota (nac diidz co zig nac

ne rnee ne “Gui Beerguic Ngutoo”); ²³ ga bdeed zho nziuu notsa guizh rmed ne lë mirr, nani zho nie mew, per god mew. ²⁴ Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaannie zho tib lëgaw tib tib zho, laa stiba bio zho rif. ²⁵ Zig hor wxeeren ga pquiaa zho me lo cruz.

²⁶ Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psaci zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.” ²⁷ Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ²⁸ [Ga brieequia mine raquiet lo Xtiidz Dios, zaatne rnee: “Bloo zho me lad zha ntseeb.”]

²⁹ Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

—¡Pe led rëb luu lëë, laa luu ntsil yadoo ni tsonaque ngbidz nzaalo luuw stib! ³⁰ Nana zho, ¡pe gacd lëëque luu bla luu lo caxtigw qui, biet lo cruz qui!

³¹ Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguiac me, stib miech scataa bla me, pe nac dzigo rriemelod me gla me me.

³² ¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49;

Jn. 19:28-30)

³³ Gol gro! dzew, tibaque zeene goc tib ncow dipse lo guidzliu, haxta las tres biala biini stib. ³⁴ Horco nguiedz zëëb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

³⁵ Grè zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me. ³⁶ Dzigo rias tib zho güeygadz tib lè zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca. ³⁹ Gax lo me ga zo men ne rnabey lo grè men GUIIB co, zeene gon men co zha gut me, rëbchaa me:

—¡Ne nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. ⁴¹ Nzianlaa nac zho, lëë grè wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdziñ me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdziñ dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo men GUIIB ne quianap Jesús; ⁴⁵ haxta bdziñraa men co rëb nliw, dzigoraa bdeed me diidz tsielit José Jesús lo cruz.

⁴⁶ Nacne güey José, güeyysi me tib lè lar nroob. Zeene blozh blit me Jesús lo cruz pcheñ me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bgueets me.

16

BRIEEBAN JESUS

(Mt. 28:1-10, 16-20; Lc. 24:1-53; Jn. 20:1-23)

¹ Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grè nceit nex ne tsietëb zho lad xcuerp Jesús. ² Laa zeene biini liu, dze ne rzobni zhal, silgaw loxaque ziaadlan ngbidza laa gza wnaa co brieë laa zho zie ro baan Jesús.

³ Nëz no zho, rnabdiidzlsa zho dien zha gdioob quie nroob ne nioog ro baa, cho siguiel coba. ⁴ Ni zeene bdziñ zho, gon zho laa quie co bdiiooble.

⁵ Laa zho bzëëb len baa, zeene gon zho nëz derech laa tib m GUII nguiieg zob ga, nacw me tib lar nool, dib nquitsbiese rna lar co. Bdzieb zho gon zho me; ⁶ dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguiib to? Guiëndle me nu, ¡laa me brieëbanle! Golwi ganle nu nac zaatne pxob zho me. ⁷ Goltsie, golguiab lo Pedr ni lo grëraa xpëëdscuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieë ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhal, ga, sil co brieëban Jesús, ni Marí Magdal nac zha ne glopaa gon me; lëë Marí co ga beënguic me zeene beëcxoon me gadz menox ne nosacsi Marí.

¹⁰ Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquielnë me.

¹¹ Niicle bin zho rëb Marí laa me brieabanle, gonlo Marí me; per bliladz d zhow.

¹² Bded ga, brieequia me lo schop xpëëdsuel me lëëtaaque no zho nëz zie zho dan. ¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz d zho.

¹⁴ Laa stibtaa vuelt, lëëtaaque ndziib zho lo mezh no zho wagw gza tsiiptib zho, tibaque zeene laa me brieequia; dzigo goctox me lo zho sac gon me ib bliladz d zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne ni brieaban me, ni bliladz d zhow.

¹⁵ Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios. ¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitlole ga. ¹⁷⁻¹⁸ Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë men rzacnë, zunguiac zho zho; grë mendox ne noguitnie miech, zeene gzeet zho lë naa zuncoon zho ma.

¹⁹ Blozhse sca bnee me lo zho, laa me zey gbaa bzob me cue Dios nëz derech.

²⁰ Dzigo grëse xpëëdsuel me laa zho brieë, brieets bliaal zho zieseed zho miech Xtiidz Dios. Ni me nac men ne noyacniën zho run zho grë milagr nroob, zeena glu ne ni Xtiidz me nac miñe noseed zho miech.]

XTIIDZ NDZON DIOS MINE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuaañe goc zeene bíaad Jesús men ne pxeel Dios ga. ² Ncuaañe nlipaa goca, grë ncuaañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

³ Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaañe co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luuw; ⁴ zeena lozh gacnañ luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tsiel mew, zha xtii pxoz Aarón ziaad wnaa co, lë me Lisabet.

⁶ Zigtaa Zacaríw, zigtaa Lisabeta, noxco me mine rnabey Dios, mban mew zigne naca, ni tib xley Dios rguiitsd me. ⁷ Men gol-le nac me grop me, per ni tib mëed quianied me, sac niaad Lisabet gapd me mëed.

⁸ Laa tib dzew bgaa grë zha ne nacgrë Zacarí gun zho dziin len yadoo. ⁹ Nac xcostumbr grë zha ne nac pxoz, rio zho tib rif dien chopaa ygaa tsielaadz goxyaal len yadoo, dzigo bgaa Zacarí. ¹⁰ Goxyaal co nolaadz me len yadoo, laa grë miech ne ndxie nëz ley nonabгаа lo Dios, ¹¹ tibaque zeene brieequia tib xanjl Dios bzo cue pcoog nëz derech, zaatne nozëg me yaal ga. ¹² Zeene gon me anjl co bdieb me, rdzieldraa

me zha gun me lo dzeb co. ¹³ Dzigo rëb anjl co lo me:

—¡Gdzieebd luu! Diidzse zialnie naa lo luu, gacnañ luu ganle mine bnab luu lo Dios ga, pquiaadiag mew; gane niina laa tsiel luu gap tib mëedbgui. Zeene gal win, Juan cueelë to win. ¹⁴ Tib guiebley nroob gac win lo to, niicle lo grëragaa miecha, ¹⁵ sac tib men nziuu gac win lo Dios. Zeene gac win zha broob, ni tib ro nziu guied win, per ni vin yquiaarod win; ansraa gal win, laa Espíritu Sant nacniele win. ¹⁶ Win gac men ne co guic nzian grë zha Israel, gbiire gbig zho lo Dios, men ne rnabey zho. ¹⁷ Zigne goc Lí, men ne bíaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha ne bleynie me; csaan zho grë xquientseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuaañe gacd i gon rnee luu! Zigtaa naaw, zigtaa tsiel naaw, mengol-le nac no.

¹⁹ Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. ²⁰ Per ne squi riladzd luuw, na laa luu guiaan ngop, haxta gal dze ne gac mine rne naa lo luu nu, dze co gan xtiidz luu stib.

²¹ Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zaatne ziezëg me yaal ga. ²² Zeene brieeme me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne been me dziin len yadoo, dzigo laa me zey lidz

me. ²⁴Goca bla ngbidz, laa mëed co pquialo zdoos tseel me.

Dipse len gaay mëe bio zhuz co ro yu, ib bried me, rley me rnee me:

²⁵—jZha wentaa Dios, bneedz me diidz bdziñ dze yquianie naa mëed rii, zeena gzhidzniedraa miech naa!

Güeynie tib anjl diidz laa Jesús gac mëed

²⁶Goc xoop mëe zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé. ²⁷Ga no tib ndzooop nguieg lë Marí, len dze co no xtiidz ndzooop co ctsieelna ndzooop tib zha xtii rey David, lë José. ²⁸Bdziñ anjl co zaatne no ndzooop, pquiaabdiuzh me ndzooop, rëb me:

—jDichos luu gon, sac tib zha nziiu nac luu lo Dios! Me quianap luu.

²⁹Zeene gon Marí anjl co, ni gon Marí zha rnee me, bzee zdoos Marí, riend Marí dien pe nac scataa rzë xtiidz me. ³⁰Dzigo rëbchaa me lo Marí:

—jGdzieebd luu! Laa Dios gon bzooblo luu yгаа luu tib guielnzaac nroob. ³¹Zdoo luu yquiaalo tib mëedbgui, zeene laa win gal, JESUS cueelë luu win. ³²Tib men nroob gac win, zien miech ganle Xpëed Dios ro ne no gbaa nac win; ni so me win gnabey win zig bnabey xmen gol win David. ³³Win gnabey lo grëse zha Israel, ni gdziñd dze ne lozh xquielnabey win.

³⁴Pquiab Marí rëb Marí lo anjl co:

—jMëed ye? jPer zha grieelo gap naa mëed, ni tib naa zo nu?

³⁵Rëbchaa anjl co:

—Niapse por poder ne rap Dios gac miñ co. Zeene laa Espiritu Sant guiaad gacnie luu, hor co laa poder co gacnie luu, laa mëed co yquiaalo zdoos luu; gacxe waa Xpëed Dios gunbey miech win, miñe rnabey Dios miñ co gon win. ³⁶Ye belyeen luu Lisabet, niina lo guielgol-le laa

tib mëed pquialo zdoos me; zëeb diidz ib grieelod gap me mëed, per na racle xoop mëe zoney me mëed, ³⁷sac par Dios tsod ncuaañe grieelod gac.

³⁸Dzigo rëb Marí:

—Tel scaw, miñe rnee luu i, maase gaca. Laa naa zo nu par gon naa miñe gnabeytaa Dios naa.

Blozhse ga, laa anjl co zey.

Güeygan Marí Lisabet

³⁹⁻⁴⁰Goc bla dzew, briede Marí ga zie me ziegan me Lisabet tib guiedz win ne ndxie gui glaa ne nac xtan zha Judé. ⁴¹Bdziñ me, wbig me pquiaabdiuzh me Lisabet. Bdiuzh co bnee me, zeene biasoli xpëed Lisabet zdoos Lisabet; dzigo hor co bdeed Espiritu Sant guielbiini lo Lisabet, ⁴²nguedz bnee Lisabet rëb me lo Marí:

—jDichos luu Marí bгаа luu guielnzaac qui! Sac gon, lo grëraa no nac no men wnaa, luu bzooblo Dios. Mëed ne zoney luu i, zha nziiu nac win lo me. ⁴³jib guiaanladzd naa dze rii, znu biaad luu nac luu xniaa men ne rnabey naa, biaadgan luu naa! ⁴⁴Haxta mëed ne zoney naa nu, rley win biasoli win zdoos naa, zeene pquiaabdiuzh luu naa. ⁴⁵jDichos luu, bin luu miñe në Dios, ni bliladz luu zun mew!

⁴⁶Dzigo hor co bnee Marí rëb me: jMen nroob nac Dios! jGdib zdoos naa roolnie naa me!

⁴⁷⁻⁴⁸Rleynie naa me nac me men ne psilaa naa,

sac gon niicle peet nond naa, tib ngundziin winse nac naa lo me,

per laa me bzooblo naa.

Grë miech, zigtaa len dze riiw, zigtaa len dze ne ziaadragaaw, ziab zho naa nac tib wnaa ne mazdraa dichos.

⁴⁹Ne nligaa zha nactaa guielnzaac rii bneedz me lo naa.

Men ro, men nroob nac me, jguien draa cho zig me!

50 Grëse miecha, zha ne rioxco rquiaadiag mine rnabey me, tibaque racnie me zho, ib rsaand me zho.

51 ¡Golwi ganle zha nactaa grë ncuaane run me!

Grë ncuaane no guic zha niats gun zho, bnitlo mew,

52 ptiche me grë zha ne zob rnabey. Laa grë zha ndooladz, zha ne rzac miech peet nond, beennon me zho.

53 Grë zha mban ne guiend pe yquuin, nroob guielnzaac ne bdeed me lo zho,

laa grë zha ne rapchen, scase bzonëz me zho.

54 ¡Pe zhidaa ziyacnie me grë zha ne nac xtii Israel, mengol ne goc zig tib ngundziin lo me ga! ¡Tibaque rlu me rleynie me zho!

55 Ib biaanladz me xtiidz me mine bnee me lo pxozgol ne Abraham,

zeene rëb me gdziind dze ne csaan me Abraham, ni grëraa zha ne grieequia lo xtii Abraham.

56 Maase tson mëë biaan Marí ga blëz me lo Lisabet, dzigoraa wbi me ga bdziñ me lidz me stib.

Gol xpëed Lisabet

57 Bdziñ dzew, laa xpëed Lisabet bza mëë, laa me gop win. 58 Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëed co lo me, rley zho güeygan zho me.

59 Dze ne goc mëëdbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëëdbgui zha Israel, parne glu lo Dios ngab win. Tibaque nan zho Zacarí nrieelë win, zigne lëque pxoz win, haxta scale nonee zho lo win, 60 per hor co rëb Lisabet, led scad gac lë win, Juan grieelë win.

61 Dzigo pquiab zho rëb zho:

—¿Pe nacne sca grieelë win? Ni tib menlidz to lëd Juan.

62 Bnabdiidzaque zho lo pxoz win, blu zho señ lo me dien zha racladz me gac lë win. 63 Dzigo bnab me bdeed zho tib lë lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieelë win.” 64 Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. 65 Grë zha ne zo ga, zha ne runbey me, zeene gon zhow, per nli zree zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnan miecha. 66 Zha ne rona, rza zdoo zho rnee zho: “¿Bay cho gac mëdyeen co?” Sac nligaa rlu nacnie Dios win.)

67 Horco bdeed Espíritu Sant guielbiini lo Zacarí, psilo me bnee me rëb me:

68 ¡Xquizh xquielnzaac men nroob ne rnabey, men ne nac xDios ne nac ne zha Israel!

Sac gon laa me ziaad, ziaadgan me ne, ziadbee me ne lo xquielnë ne.

69 Nasi laa me pxeel men nroob ne ziaadsilaa ne,

lëë men co ga no grieequia lo zha xtii David, men ne been xtsiin me ga.

70 Padzeelale bzeet me cxeel me men co,

grë zha ne biaad pteed xtiidz me, bzeet zhow.

71 Rëb zho, ib sxeel me men ne guiaadsilaa ne ladznia zha ne nosacsi ne, zha ne rlëë lo ne.

72 Sac ib gdziind dze csaan me grë zha xtii pxozgol ne, rquianëpaa zdoo me zho.

Ib guiaanladz me mine rëb me lo Abraham,

73 zeene rëb me laa me cxeel men ne csilaa ne,

74 zeena dziodzebdraa ne lo zha ne rlëë lo ne, lo zha ne rsacsi ne; sinque ine tibli gac ne dziiun ne mine rnabey me.

75 Gzataa dze ne gneedz me
guielmban lo ne,
ine mbe zdoo ne, dziuun ne mine
rleynie me.

76 Luu gon xin, bzooblo Dios ro ne
zob gbaa, cteed xtiidz me lo
miech,
luu tedner tsienee luu lo zho, laa
men co no guiaad.

77 Luu gnee lo grë zha Israel, guien
zho ganle zha gun Dios zho
perdon, parne ycaania me
zho.

78 Ne nligaa rleynie me ne, rquia
zdoo me ne,
gane laa me cxeel Xpëed me, men
co gac zig tib biini,

79 Biini co gziini lo grë zha ne mban
lo guielcow,
zeena biini co glu nëz lo ne, guio ne
nëz ne peet zhgab, peet dzeb
guiend.

80 Zigse zie dzew, scase scase
zieroob mëdyeen co, ni scaquegaa
dib zdoo win rleynie win Dios.
Zeene laa win broobpaa, dzigo
güey win bio win tib dan zit, haxta
bdziñ dze ne laa win psilo pseed
miech laa win blulo lo zho.

2

Gol Jesús

(Mt. 1:18-25)

¹ Lëëtaaque len dze co, laa August,
rey nroob ne zob Roma, bnabey
top lë grëse miech ne no dib dan
ne rnabey me, par gacnan me dien
palal zho. ² Lëë primer vuelt ga
ptop zho lë miech, lëë iz co zob men
ne lë Cirein zobnabey me guiedz
Siria.

³ Bnabey August grëse miech zha
ne no stib ladz ben, laa zho no tsie
zaatne nacpaa ladz zho tsiedeed
zho lë zho, parne ga ygab zho.

⁴ Min co nagon nacne briece José
guiedz Nazaret (xtan Galilé) grop
me Marí zie me Belén (xtan Judé).
Laa me zie ga, sac ga goc ladz

xmengol me rey David. ⁵ Gard ct-
sieelniapaa me Marí, per nole xti-
idz me grop me. Len dze co ziaady-
obpaa gal xpëed Marí.

⁶⁻⁷ Bdziñ me Belén, bgaadraa me
zaatne nrieelo mbëz me len yu,
lega nac ti len lidz ma bdeed zho
blëz me. Lëëtaaque bdziñ me ga, laa
mëed co gol. Racse Marí pchel me
win lar, bdiix me win tib len yag
ne row ma guizh; lëë mëedglo ga lo
me.

⁸ Guieel co, blalaa zha ne nac
baxtor, laa zho ndxie quianap zho
xpëcwxiiil zho dan, ⁹ tibaque zeene
brieequia tib xanjl Dios lo zho,
dipse zaatne ndxie zho ga biab tib
biini nroob. Zeene gon zho anjl
co, gon zho biini nroob co, per nli
bdzieb zho. ¹⁰ Dzigo bnee anjl co,
rëb me lo zho:

—iGdziebde to! iGolgon diidz
cub ne ganle zialnie naa lo to nu!
iTib guielbley nroob gac diidz rii
lo grëse miech! ¹¹ Men ne gon
quiambëz to ga guiaad csilaa to,
laa me blansole lo guidzliu. Me nac
Men ne zëëble diidz ga cxeel Dios,
me nac men ndzon ne rnabey.
Belén, zaatne goc ladz rey David,
ga gol me naguieel. ¹² Goltsie,
zaatne tsiedziel to tib mëedbgui
yeen, nrielse win lar zhoob win len
yag ne row ma guizh, lëë me ga.

¹³ Tibaque zeene gon zho laa stib
dzoon anjl brieequia gocgrë anjl ne
quianee lo zho ga, psilo grë anjl co
roolnie zho Dios, rnee zho:

¹⁴ iHaxta zaatne glaaraa gbaa,
nozhoobnen ganle pa lotaa
men nroob nac Dios!

iNasi, grëse miech zrieelo
guiaanwen zho lo me; zdoo
me rala laa me nobedz zho!

¹⁵ Zeene laa grë anjl co zey gbaa
stib, psilo grë baxtor co rnee zho:

—iNiinaga golgotsaa guio Belén!
iGotsaa guiowi ne dien, zeena dzian
ne mine biaadnie anjl co diidz lo ne
nu!

¹⁶ Lëëlëd bio zho nëz laa zho zie.
Bdziñ zho zaatne blëz José ga grop

Marí, nligaa laa mëdyeen co nix ga, nixse win tib len yag ne row ma guizh. ¹⁷ Dzigo bzodiidz zho grëse zha rëb anjl co lo zho, zeene güeynie me diidz laa win gol.

¹⁸⁻¹⁹ Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

²⁰ Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanj me güeynie diidz lo zho, rley zho sac brieelo gon zho mëdyeen co.

²¹ Dze ne goc xon ngbidz gol win, dze co bio win bey ne rio xpëëdbgui zha Israel, par glu xnëz Dios ngab zho; dze coqew bleelë zho win JESUS, zigne rëb xanj Dios zeene güeynie me diidz ne laa win gac mëed lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mëëdbgui, zeene rac zho tap zhmal, none tsienie zho chop ma cogon zho len yadoo; yase tsienie zho tib nëz coc, tib nëzga palom. Ni rnabeya: “Grëse mëëdbgui ne rac mëëdglo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeen co yadoo csañ me win ladznia Dios; lëë nëzle ga zienieque me gon ne no gdeed me ga.

²⁵ Lëëtaaque dze ne bdziinne zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espíritu Sant me. Quiambëz me gan me Men ne nole diidz ga cxeel Dios csilaa zha Israel, ²⁶ sac rëble Espíritu Sant lo me ible laa me no gan men co. ²⁷ Laa dze co, Espíritu Santaque psiaab guic me zie me yadoo. Nacne lëëtaaque no me len yadoo, laa zho bdziinne

mëdyeen co ga, ziesañ zho win ladznia Dios zigne rnabey ley. ²⁸ Dzigo me wbig bdeedz win, rdeed me xquizh lo Dios, rëb me:

²⁹ Xquizh xquielnzaac luu Dios, mine në luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

³⁰⁻³¹ ¡Men ne nacle diidz cxeel luu guiaadsilaa miech lo xtol zho, grop lo naa laa naa ran me niina!

³² ¡Grëse miech ne ndxie lo guidzliu, me nac biini ne gziini lo zho!

¡Me csanziiu zha Israel, ne nac zho zha ne ngab lo luu!

³³ Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdoo me. ³⁴ Dzigo bnab Simeón lo Dios gacnieñ Dios me gza me mëdyeen co. Blozh ga, rëbchaa Simeón lo xniaa win:

—Tib guiebley nroob ne gac mëed rii lo zha Israel, por win ndal zho gree lo guiecow ne no zho, laa zho gbig lo Dios. Ni scagaa zriequia zha ne glëenie win, per lëëque zha csacsi zho ga. Mban gac zdoo luu, nroob guieñe ne tso luu gan luu zha sac miech win. ³⁵ Ga glu ganle zha nac zdoo tib tib miech.

³⁶⁻³⁷ Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuane me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tsieel me. Lëë pxoz me ga brieelë Fanuel, lëë zhey co ga nac zha xtii Aser. Tib men ne rteed xtiidz Dios lo miech nac me, ³⁸ dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdyeen co ga nac men ne quiambëz zho ga guiaadsilaa zho.

³⁹ Blozhse been José mine rnabey xley Dios grop me Marí, dzigo laa me wbi ga. Bdedraa ga, beynie me mēed co Nazaret, zaatne nac ladz me. ⁴⁰ Ga broob win, zigse zieroob win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiip-chop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cota laa me güeynie win, sac nac zhiwseed zha Israel, mēēdbgui ne rap lalga iz, zrieelole tsie zho lo lni co.

⁴³ Zeene laa lni co bded, laa me bio nēz grop me laa me wbi ga. Ib biend me biaan win Jerusalén, ⁴⁴ tibaque güeynie guic me lad grēraa miech ne wbire lni, lad co zienal win. Laa me no nēz, zeene bdzetaa dzew, laa me psilo rguib win, bnabdiidz me lo grē zha lidz me, lo grē zha ne runbey me, ⁴⁵ per ni tib zho choot rdeete win diidz. Nacne wbiereque me nēz Jerusalén stib, zieguib me win.

⁴⁶ Dze ne racle tson ngbidz blozh lniw, dzigora a güeydzziel me win len yadoo, laa win zob lo grē zha ne nac maistr ley, noquiaadiag win grē zhiwseed zho ni nzian grē ncuane rnabdiidz win lo zho. ⁴⁷ Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. ⁴⁸ Zeene gon me laa win zob lad grē men co, bzee zdoo me; dzigo rēbchaa xniaa win lo win:

—Xin, ¿pe nacne squi been luu? Pteeseb luu no gon, quia no grop no pxoz luu noguib no luu.

⁴⁹ Pquiab win rēb win:

—Nguibde to naa. ¿Pe rande to ib none gun naa xtsiin Pxoz naa?

⁵⁰ Ib biend me pe nacne sca rēb win. ⁵¹ Dzigo laa win zienal zhits

me, laa me zeynie win Nazaret; nose grē min co zdoo xniaa win.

Tib mēed nguzobdiidz nac win, ron win xtiidz me. ⁵² Zigse zie dzew, laa win riabiiniraa, laa win noroobraa; rleynie Dios win, niclegaa miecha rleynie zho win.

3

Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

¹⁻² Bdziñ dzew, laa Juan psilo pseed miech. Lēē len iz co rac tsiin iz zob men ne lē Tiber nac me rey, rnabey me grē guiedz ne ngab lo zha Roma. Len dze co zob Pilat rnabey me grē guiedz ne ndxie nēz Judé, laa Herod zob rnabey grē guiedz ne ndxie nēz Galilé. Len dze coque zob bets Herod, men ne lē Lip rnabey me grē guiedz ne ndxie nēz Ituré ni nēz Traconit; laa Lisian rnabey grē guiedz ne ndxie nēz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpēed Zacari) dan ngan ne no Juan ga.

³ Nacne hor co psilo Juan güeyted me grē guiedz ne ndxie ro guiubee Jordán, rnee me lo grē miech co, csaan zho xquieIntseeb zho gbig zho lo Dios ni chobnis zho, zeena csilaa Dios zho lo grē xtol zho. ⁴ Ga briequia mine bnee Isá, men ne baaad pteed xtiidz Dios, zeene znu pquiaa me:

Bii zon miech ganle zeene laa tib tsi men zēeb tib dan ngan, rnee me:

“Golzhixcuaa nēz ne ted men ne rnabey,

golsaan grē guieIntseeb ne run to.

⁵ Zaatne nac len blē, golcodzēw, grē gui glaa, grē gui las, golšiaablow. Nēz ne niecw, nēz ne quiaya quiaguiet nac, golzhixcuaaw.

⁶ Grēse miech, laa zho gan men ne pxeel Dios ga ziaadsilaa zho.”

⁷ Zeene ran Juan laa miech rdzin lo me cchoobnis me zho, rnee me lo zho:

—¡Miech ngoopdol, masaque nac to zig nac meel! Nan to na lëe, loxaque chobnis to laa to laale lo grë guie!nëdox ne ziaadyob guiaad. ⁸ Led scada gon, none ndzinli gban to zeena glu nlipaa psaan to xquie!ntseeb to. Ni gacniatsde to guiab to, loxaque por nace to zha xtii Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtii Abraham. ⁹ Nanle to ganle, grë yag nex ne rquiad nex lo, zeene ran zho sca naca, rchug zhow, rzëeg zhow; scadaa nagon sac grë zha ne gband zigne racladz Dios, ib tedlaad zho lo gui; sac rrieequia laa me nzhenle xquibyag me, cchug me grë yag ne sca nac.

¹⁰ Dzigo rnabdiidz zho lo Juan, pe no gun zho parne ygaad zho grë guie!në co. ¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guie!nd xab; telne quianiegaa to ncuane gow to, none gdeed to palala yquiin zha ne quianieda.

¹² Wbigaque bla recaudador ne zie chobnis, rnabdiidz zho die!n pe gun zho. ¹³ Pquiab Juan, rëb Juan lo zho:

—Cuandraa to samiech to, mine riegua!se zho quizh zho, min co golnab lo zho.

¹⁴ Ye zla men!guuib wbig, rnabdiidz zho rëb zho:

—¿Telzhe no waa, pe nac mine dziuun no?

Rquiab Juan rnee Juan lo zho:

—Ndzinli golgac, ib ctsebdé to samiech to par die!n pe gla to lo zho; zha ne peet xtold, ib yquiaaquide to zho ncuane beend zho. None sac zdoo to dimi ne quiayazh to.

¹⁵ Nzian grë miech co quiambëznë zho gacnan zho die!n pe lëele Men ne bzooblo Dios ga

cxee! me nac Juan. ¹⁶ Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguiald naa gac naa. ¹⁷ Laa me guiaad zig tib zha ne rbeeguizh zhoxtil, sac zha co, rlozhse rbeeguizh zho zho! rgot-sow zhow, laa paj rlaal zho lo gui, ga reca. Per gui ne gzëeg grë paj ne guiadbee me ga, gdzind dze guiuuw.

¹⁸ Sca rnee me lo zho, par guien zho zha nac Xtii!dz Dios. ¹⁹ Tib vuelt haxta lo rey Herod goctox me, sac lëëque Herodí, wnaa ne nac tsiel!ets Herod nonie Herod; grë guie!ntseeb ne quia!yun Herod, blisqui mew. ²⁰ Per laa ne nion Herod diidz, lel been me stib guie!ntseeb, bnabey me bgaa Juan bio Juan ladzguuib.

Brobnis Jesús

(Mt. 3:13-17; Mr. 1:9-11)

²¹ Len dze ne nochoobnis Juan miech ga, tib dzew laa Jesús bdzin lo Juan ga, ye me bnab cchoobnis Juan me. Blozhse brobnis me, laa me quiazodiidznie Dios, tibaque zeene bzhial zhan gbaa, ²² laa men ne nac Espíritu Sant biet, rlu me zig rlu tib palom, laa me bdzin guic Jesús, hor co blu zëeb tib tsi men co nëz gbaa, rnee me:

—Xin, rleynie naa luu gon, nziuu luu lo naa.

Xmen!gol Jesús

(Mt. 1:1-17)

²³ Gal!ptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

²⁴ José co goc xpëed Elí, Elí goc xpëed Matat,

Matat goc xpëed Leví,
 Leví goc xpëed Melqui,
 Melqui goc xpëed Jan,
 Jan goc xpëed José,
²⁵ José goc xpëed Matatí,
 Matatí goc xpëed Amós,
 Amós goc xpëed Nahúm,
 Nahúm goc xpëed Esli,
 Esli goc xpëed Nagai,
²⁶ Nagai goc xpëed Maat,
 Maat goc xpëed Matatí,
 Matatí goc xpëed Semei,
 Semei goc xpëed José,
 José goc xpëed Judá,
²⁷ Judá goc xpëed Joan,
 Joan goc xpëed Resa,
 Resa goc xpëed Zorobabel
 Zorobabel goc xpëed Salatiel,
 Salatiel goc xpëed Neri,
²⁸ Neri goc xpëed Melqui,
 Melqui goc xpëed Adi,
 Adi goc xpëed Cosam,
 Cosam goc xpëed Lmodam,
 Lmodam goc xpëed Er,
²⁹ Er goc xpëed Josué,
 Josué goc xpëed Liezer,
 Liezer goc xpëed Jorim,
 Jorim goc xpëed Matat,
³⁰ Matat goc xpëed Leví,
 Leví goc xpëed Simeón,
 Simeón goc xpëed Judá,
 Judá goc xpëed José,
 José goc xpëed Jonán,
 Jonán goc xpëed Liaquim,
³¹ Liaquim goc xpëed Melé,
 Melé goc xpëed Mainán,
 Mainán goc xpëed Matata,
 Matata goc xpëed Natán,
³² Natán goc xpëed David,
 David goc xpëed Isaí,
 Isaí goc xpëed Obed,
 Obed goc xpëed Booz,
 Booz goc xpëed Salmon,
 Salmóngoc xpëed Naasón,
³³ Naasón goc xpëed Minadab,
 Minadab goc xpëed Aram,
 Aram goc xpëed Srom,
 Srom goc xpëed Far,
 Far goc xpëed Judá
³⁴ Judá goc xpëed Jacob,

Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,
 Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,
 Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,
 Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

Gocladz mēndox niuṅüet ma Jesús

(Mt. 4:1-17; Mr. 1:12-15)

¹ Zeṅe blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiēd. ² Ga bio Jesús, ni tib lē peet dowd me; gzase dze pquianaḷ mēndox niuṅüet ma me niuṅ me miṅe racladz ma. Zeṅe goc choo dze no me ga, goṅ ma lēbdraa me rcaabedz me, ³ dzigo rēbchaa ma lo me:

—Telne nli Xpëed Dios nac luu, bnabey tsaalo grē quie rii ncuaaṅe gow luu.

⁴ Dzigo pquiab me rēb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grēse guiedz ne ndxie dib lo guidzliu lo me, ⁶ rēb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladzataa naa. Grësew, dib guielndaan ne no low, znedz naaw lo luu ⁷ telne squiitsgzhib luu lo naa, gunnon luu naa.

⁸ —jBiche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquiiitsgzhib luu; ni mine rnabey me min co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu, ¹⁰ benque led znu rnee lo Xtiidz me: “Znabey Dios grë xanj me yquiaanap luu, ¹¹ zgueedz zho luu, zeena ni tib quie ycaand ni luu.”

¹² Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuanea nod gun me.”

¹³ Gonse ma rdziel zha gungüet ma Jesús, dzigo biche ma lo me palad dze.

¹⁴ Blozhse ga, dzigo laa Jesús wbi ga bdziñ me nëz Galilé, scaque nacie Espíritu Sant me. Znuse beenbey miech me por grëtaa ncuaan ro ne run me, grëse guiedz ne ndxie nëz co, rzeet zho me. ¹⁵ Zaatne rdziñta me, rie me xyadoo zho, rseed me zho Xtiidz Dios, rleynie zho me, rley zho ron zho grë mine rnee me.

Güey Jesús Nazaret

(Mt. 13:53-58; Mr. 6:1-6)

¹⁶ Tib dzew, laa me bdziñ Nazaret, zaatne broob me. Gol dze ne rdziiladz zha Israel lo dziin, güey me xyadoo zho zig runaque me grëraa zaatne ziye me. Zeene gol horne rlab zho Xtiidz Dios, dzigo

bded me, ¹⁷ bdeed zho mine pquiaa Isá glab me. Pخال me low, lëetse zaatne znu rnee blab me:

¹⁸ ZhiEspíritu Dios nacie naa, ible Dios bzooblo naa, gnee naa Didz Ndzon ne nac xtiidz me lo grëse zha ne rquinnëw.

Laa me pxeel naa gne naa lo grë zha ne ngadoo lo ncuanea nosacsi zho,

zeena guien zho zha griece zho lo grë ncuaan co.

Laa me pxeel naa gziini naa lo grë zha ne no lo guielcow,

grë zha ne rzac guien draa zha griece zho lo zhizhgab zho, laa me pxeel naa, naa cuee zho lo zhgab co.

¹⁹ Laa naa zialnie diidz lo miech, gacnan zho pa lotaa noxco Dios gunlay me grëse zha ne gbig lo me.

²⁰ Blozhse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no len yadoo ga, dze rwi zho lo me, ²¹ dzigo bnee me lo zho, rëb me:

—Grë diidz ne blozh blab naa lo to nu, len dze rii gon laaw noyac cumplir.

²² Grëse zho rleynie zho me, rlozhd gzee zdoo zho ron zho grëtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¡Led lëë xingan José!

²³ Dzigo rëb me lo zho:

—No tib diidz ne rnee: “Zha ne racie stib miech, none guien zho glo menladz zho gacnie zho.” Rienpaa naa gon, min co racladz to gnë to lo naa; quiambëz to gan to grë milagr ne ziyon to ben naa guiedz Capernaum.

²⁴ 'Gneli naa lo to ganle: Zha ne riaad rted xtiidz Dios, ible znu randzed menladz zho zho; gane rrieelod pe gun zho. ²⁵⁻²⁶ Golsoladz ganle zeene biaad Lí, bio tib tiemp ne biabd guie tson iz grol, tib gbindow ne gon miech Israel nu.

Ndal wnaa viud ne nac menladz me mban bded zho, guiend pe nquuin zho, per brieelod niun me xyudar zho; leḷ xyudar tib wnaa Sarept pxeel Dios me güeygun me, guiedz ne ndxie gax Sidón. ²⁷ Scaque zeene biaad Liséw, ndal zha Israel rlan guiezdodox ne nac lepr; per ni tib zho beenguiacd me; leḷ tib zha Siria lé Naamán, men co beenguiac me.

²⁸ Zeene gon zho sca rnee me, blée zho. ²⁹ Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, ³⁰ zeene znuse bded me lad zho, ziega me.

*Biac tib mgui ne nosacsi mendox
(Mr. 1:21-28)*

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho. ³² Rzee zdoo zho ron zho grë zhiwseed me, grëse miñe rnee me, rlu zha rnabey nac me.

³³ Tib vult, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

³⁴ —jPsaan no! ¿Pe gun luu no Jesús Nazaren? ¿Ziaad luu lée par gnitlo luu no? jRunbey naa luu, luu nac men ndzon ne pxeel Dios!

³⁵ Dzigo goctox me lo ma, rëb me: —jPsoog ro luu! jNa zeena psaan men qui!

Horco, squi ndxie grë miech co bron ma mgui co liu, miñcose been ma, laa ma brieelaa ma zie. ³⁶ Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men qui, zha nacne haxta mendox rdzieb ma me, rzhoon ma zeene laa me ractox lo ma?

³⁷ Grëse guiedz ne ndxie gax ga, zigue zie dze rzhoon diidz scataa milagr ne run me.

Biac xniadzoop Pedr

(Mt. 8:14-17; Mr. 1:29-39)

³⁸ Brieel Jesús len yadoo, zie me nëz lidz Simón. Bdziñ me lëetaque laa xniadzoop Simón nix rlan xlée, nzho rac me; dzigo whig zha ne been vis laa zhuz co rzacne, bnab zho lo me gunguiac me me. ³⁹ Nacne bded me zaatne nix zhuz co, goctox me lo xlée co. Horcogazha laaw bléz, guche zhuz co ga, beenlo me ncuane dow zho.

⁴⁰ Laa ngbidz rzëëblew, zeene bdziñ grë miech co lo Jesús, bdziñnie zho grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac. ⁴¹ Nzian zho benxoon me mendox ne nosacsi zho, zeene laa ma rree, nguiezd roptsie ma rnee ma lo me:

—jRdziuunbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Men ne nacle diidz ga cxeel Dios.

⁴² Biini liu co, silgaw brieel Jesús lad guiedz co güey me tib zaatne choot miech guiend. Zeene bñit me lo grë miech co, brieel zho güeyguib zho me haxta bdziel me lo zho; rnab zho lo me Capernaumse ga cuéz me, paat tsiedraa me. ⁴³ Dzigo rëbchaa me lo zho:

—Grieeeloda, ib none ga naa grëraa guiedz, gaseed naa miech gacnan zho zha rascladz Dios gban zho; sac ible miñ co pxeel me naa zial naa.

⁴⁴ Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

5

Nroobdox mel bгаа

(Mt. 4:18-22; Mr. 1:16-20)

1 Tib vuelt miech guizhiu ne pcaalsa lo Jesús ro Nisdoo Gene-saret, haxta rtaagw zho me; grëse zho racladz yquiaadiag zho Xtiidz Dios. 2 Gax ga zo chop barcw, blalaa ngooz mel̄ biet lena, laa zho no lo nis ga noguiib zho guiex ne rnaaz zho mel̄. 3 Nacne güey me biep me tib len̄ barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leen̄ co bzob me pseed me grë miech co.

4 Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne quietlaa nis, zeena gron̄ to guiex ne rgaa mel̄ i gnaaz to palal ma.

5 Pquiab Simón rëb Simón:

—Dib guieel-le bdzio no lo nis rii, per ni tib mel̄ bnaazd no; per lega ne luu rneew, na dien̄ laa no grona stib.

6 Bron̄ zho guiex co lo nis, zeene laa zho cueew, ya zig zrieza, biodzëse lena no mel̄. 7 Horco blunia zho lo grëraa zha ne nacgrë zho no stib len̄ barcw co, parne tsie zho gun̄ zho xyudar zho. Bdziñ zha co gocgza zho, gropse len̄ barcw co pcodzëë zho grë mel̄ co; ya zig zdedquiew lo nis.

8 Zeene gon̄ Simón scataa mel̄ taf ne bgaa, pquiitgzhib me lo Jesús, rëb me:

—Bzhiguieł mazd psaan naa, tib miech ngoopdol̄ nac naa, rdzieeld so luu lo naa nu.

9 Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon̄ zho ga. 10 Scasaque rac Jacob ni Juan (xingan tib men̄ lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon̄ rioxco luu riaad luu gooz mel̄ niina, desde nadze laa luu tsoxco gun̄ luu stib gooz; laa naa cxeł̄ luu tsietop luu grë miech ne sëëb xnëz Dios.

11 Zigne bdziñnie zho barcw co ro nis, bzo zhow ga, laa zho zienal̄ zhits me.

Biac tib zha ne rlan guiedz lepr (Mt. 8:1-4; Mr. 1:40-45)

12 Laa Jesús no tib guiedz co, tib dzew, bdziñ tib mgui ne rlan guiedzdox ne lë lepr lo me, pquiits-gzhib mgui haxta bdziñ lo mgui liu, rëb mgui lo me:

—Tebaa siguieel̄ luu gunguiac luu naa.

13 Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbe!

Horcogazha laa mgui biaanmbe lo guiedz co. 14 Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeysan̄ gon ne rnabey xley Moisés gdeed luu; zeena gan̄ zho ganle laa luu biacle.

15 Niicle sca nëd me gacnan̄ miecha, per znuse znuse rliaal̄ diidz grëtaa milagr ne run̄ me; miech guizhiu ne rdziñ lo me, zha ne zie yquiaadiag zhiwseed me, zha ne zieegaa gunguiac me zho tel̄ pe guielguidz ne rzac zho. 16 Zhiga, zhiga rbiche me lo miech, rie me zaatne choot guien̄ riezodiidznie me Pxoze me.

Biac tib zha ne gutoo xcuerp (Mt. 9:1-8; Mr. 2:1-12)

17 Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieë dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë miñe rnee me.

18 Laa grë miech co ndxie ga, zeene bdziñ bla zha bgui, ney zho stib men̄ bgui, zhoobse me lo yag, ib gacd së me sac dipse me gutoo. Gocladz zho nzëëbnie zho me len̄ yu ne no Jesús ga, ndziñnie zho me lo me. 19 Per ib godc nded zho lad

grë miech co. Nacne biepaque zho guic yu, pxal zho tiblë guic co, ga pteed zho men rzacnë co dib yag ne zhoob me ga, bdziñ me lo Jesús.

²⁰ Zeene gon Jesús ne nli dib zdoos zho rnalos zho me, me gunguiac men rzacnë co, rëbchaa me lo men co:

—Peet tsienied guic luu, ni-inagazh laa naa gun perdon grëse xtol luu.

²¹ Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¿Falt i gon noyun me lo Dios! ¿Tibaque men ne run perdon xtol miech, ni lëe men co nac Dios!”

²² Bienga Jesús sca quianee zho, dzigo rëbchaa me:

—¿Pe nacne rzac to laa naa quiayun falt? ²³⁻²⁴ Nli cholze zac guiab laa zho gun perdon xtol miech, per grielod gunguiac zho zho. Golwi ganle laa naa gunguiac mgui rii, zeena gacnan to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacnë co, rëb me:

—¿Niinagazh guche i, bi yag ne bzhoob luu i, zeen bzë!

²⁵ Zigne sca bnee me, laa mgui co bzoli, squi ndxie grë miech co laa me blis yag co, ine roolnie me Dios laa me zey. ²⁶ Psilo zho grëse zho, roolnie zho Dios; lala rzee zdoos zho, lala rdzieb zho, rnee zho:

—¿Nadzesi, laa ne bdzian ncuaane gard dzian ne!

Bredz Jesús Leví

(Mt. 9:9-13; Mr. 2:13-17)

²⁷ Blozh ga, laa Jesús brieeg ga. Ro nëz zieded me gon me tib men lë Leví, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. ²⁸ Biaanaque xmezhe me ga, guso me ga, laa me zienal.

²⁹ Bded ga, güeynie me Jesús tib wagw lidz me. Grë zha ne

run dziin co, ni grëragaa zha ne bdziñ ga, tipse brenie Jesús zho grë xpëedscuel me.

³⁰ Blalaa zha farisé, ni zla maistr ley, rlëe zho gon zho sca zobnie Jesús grë zha co, bded ga rëbchaa zho lo xpëedscuel me:

—¿Lëda i gon run to! ¿Pe nacne sca tipse rownie to grë zha ngoopdol co, grë zha beed ne nac recaudador ga?

³¹ Dzigo rëbchaa Jesús lo zho:

—Nanle to ganle, zha ne run rmed, zaatne no zha rzacnë ga rquiin zho, ¿niacxe squiin zho zaatne no zha ne ndip ndaan?

³² Scaque naa nagon, zialguibd naa zha wen, sinque laa naa zialguib grë zha ngoopdol, zeena gbig zho lo Dios.

¿Pe nacne rcuand xpëedscuel Jesús?

(Mt. 9:14-17; Mr. 2:18-22)

³³ Bdzinaque bla zha ne bnabdidz, rëb zho lo Jesús:

—¿Pe nac waa ib rcuand xpëedscuel luu, tibaque quiayow zho, tibaque quiaye zho? Zha xpëedscuel Juan, zha xpëedscuel farisé, rdzian no tibaque nocuan zho, tibaque nonab zho lo Dios.

³⁴ Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuan grë zha ne ndxie lo lni, ni ran to laa mgui ne notsieelnia zo lo zho?

³⁵ Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial ycuan zho.

³⁶ Blozhse sca bnee me, rëbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lë lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox. ³⁷ Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stiesz vin cuba; lozh ga zigtaa vina, zigtaa guid cow,

laaw nitlo ga. ³⁸ Gacxe waa, tel vin cuba none len tib guid cubaque tsotsowa.

³⁹ 'Nac cuent rii zig rzac miech vin, zha ne bienle rie vin ne padzeelale notsow, rdziladzd zho guie zho vin cub; sac biaanle guic zho rnee miech: "Vin ne padzeela notsow, min co nizhrra rdioow."

6

Dze ne rdziiladz zha Israel lo dziin

(Mt. 12:1-8; Mr. 2:23-38)

¹ Tib vuilt, lëetse dze ne rdziiladz zho lo dziina, bded Jesús zaatne zëeb zhobxtil grë xpëedscuel me; psilo zho pchoo zho mzion zhobxtil co, zigse runmbe zho zhob co, scase row zhow. ² Gon blalaa zha farisé sca no zho, dzigō rëbchaa zho:

—jLëda i gon noyūn to! Golguien ganle dze nda nac dze rii.

³ Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëeb me len yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mt. 12:9-14; Mr. 3:1-6)

⁶ Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me. ⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; ⁹ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuanea yquuin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—jBzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguiac me nia mgui, per nli rlëe zho, psilo zho quianediidz zho dien zha gun zho me.

Bzo Jesús zha ne tsienee xtiidz me

(Mt. 4:23-25; 10:1-4; Mr. 3:13-19)

¹² Tib vuilt, güey Jesús tib guic gui, dipse guieel blëz me ga bzodiidznie me Dios. ¹³ Biini liu co, bredz me grëse zha ne nac xpëedscuel me, dzigo lad co ble me tsiipchop zho, zha ne tsiepaa tsienee xtiidz me lo miech. ¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

¹⁷ Cho gui co biet me grë xpëedscuel me, bdziñ zho tib ro lets. Loxaque bdziñ zho ga, laa stib dzoon xpëedscuel me bdziñaque lo me ga; zhiits co nal stib dzoon miech, no zho racladz yquiaadiag

zhiwseed me, nogaa zho zie ga par gun̄giac me zho. Miech guizhiuw, zha ne ziaad n̄z Judé, zha ne ziaad n̄z Tiro, zha ne ziaad n̄z Sidón, zha ne brieegaa Jerusalén.

¹⁸ Nzian gr̄e zha co nosacsi men̄dox, gr̄ese zho beenguiac me zho. ¹⁹ Rbig be gr̄e miech co racladz zho x̄en zho lad xab me, sac ran̄ zho, zha ne rzhen̄ lad xab me, tel̄ pe guiel̄guiidztaa rzac zho, run̄giac me zho por gr̄etaa poder ne rap me.

*Cho nac zha ne wen zie
(Mt. 5:1-12, 38-48; 7:1-5, 12)*

²⁰ Dzigo dze bui Jesús lo gr̄ese zha ne nac xp̄ëdscuel me, r̄eb me lo zho:

—jWen zie zha ne rien̄ none gbig zho lo Dios, sac ib zdziñ zho zaatne rnabey me!

²¹ jWen zie zho! Sac niicle tel̄ne noyan̄ zho gbin, per me gdeed ncuane yquin̄ zho; niicle tel̄ no hor mban rac zho roon zho; per zdziñ dze ne gdeed me tib guiel̄bley nroob lo zho.

²² 'Zig nac to, zeene csilo miech gl̄ënie zho to, gun̄cxoon zho to, yquiaago zho to, gneen̄e zho to, sac zho haxta ni l̄e to gondraa zho, lox-aque ne nac to zha ne no xn̄z Mgui ne pxeel̄ Dios nu, jwen zie to ga! ²³ jNley gol̄co zdoo to dze co, nguieel̄ gol̄gac, sac gon̄ tib guiel̄nzaac nroob ne gneedz Dios lo to! Gol̄soladz gan̄le, scaque been̄ pxozgol zho gr̄e zha ne pxeel̄ me padzeela biadnee xtiidz me.

²⁴ Sañgue gr̄e zha ne rzac gr̄ese ncuane rquin̄ zho quianie zho, ib rquiind zho gbig zho lo Dios, jprob-saxe zho, sac lo guidzliu riise gac ncuane co guiel̄bley lo zho!

²⁵ jProbsaxe zho, sac niicle ne gr̄ew quianie zho niina, per zdziñ dze gan̄ zho gan̄le zha nac gbin; rlozhd gzhidz zho, rlozhd gley zho niina, per zdziñ dze laa zho gan̄ gan̄le zha nac guiel̄n̄!

²⁶ 'Padzeela, biaad bla zha ne pquidie r̄eb zho Dios pxeel̄ zho, bio

pxozgol to bleynie zho zho, jprob-saxe to tel̄ne yguib to sca gleynie miech to!

²⁷ 'Gol̄quiaadiaga gan̄le: Zha ne rl̄ë lo to, gol̄leynie zho, tel̄ pe nac xliaadz zho gol̄gacnie zho. ²⁸ Zeene rdzibdee zho to, gol̄nab lo Dios gun̄lay me zho; zeene rsacsigaa zho to, gol̄nab lo Dios yquia zdoo me zho. ²⁹ Tel̄ gneedz zho tib puñet lo to, gzoobd nia to, gol̄saan zho maase yquiaa zho stiba.

'Zha ne gla xabnal̄ to, gol̄saan maase ye biaagw güey zho. ³⁰ Zha ne gnabtaa pe cos lo to, gol̄deeda; tel̄ scasegaa x̄en zhow, ib gnabde tow lo zho. ³¹ None zaacse gac to lo miech, zeena scagaa zha, zaacse gac zho lo to.

³² 'Sac gon̄, tel̄ loxaque zha ne ndzieeldiidz to, zha cose rleynie to, jled ncuane nroobd ga run̄ to! Haxta gr̄e zha ntseeb run̄ min̄ co. ³³⁻³⁴ Tel̄ loxaque zha ne run̄segaa favor lo to, lo zha cosegue run̄ to favor; zeene run̄gaa to tib pextad, lo zha ne rgobeyse to zguizh lo to, lo zha cose run̄xtad to, jni lalnu peet nond ncuane run̄ to ga! Sac gon̄ haxta gr̄e zha ntseeb run̄ min̄ co.

³⁵ 'Gol̄guien̄ sca, none gleynie to zha ne rl̄ë lo to, none gacnie to zho lo xliaadz zho. Zha ne guiaad tib pextad lo to, gol̄deed ncuane rnab zho, ib guiabde to nend lega scase gun̄ to favor co lo zho. Zha ne gun̄ gr̄e min̄ rii, nroob guiel̄nzaac ne gdeed Dios lo zho, ni ga glu zho gan̄le nli xp̄ëd me nac zho; sac gon̄ tel̄ me wen me lo gr̄ese miech, niicle zha ne run̄ falt lo mew, niicle zha ne riendgaa gdeed xquizh lo me, rsaand me zho. ³⁶ Ndzinli sca gol̄gac, zigne sca wen Pxoz to lo gr̄ese miech, scaque none wen gac to lo zho.

³⁷ 'Ib gunde to n̄e gac zdoo to, zeene ran̄ to ncuane nonguiel̄d ne run̄ stib miech, sac to tozhal gun̄quizh zhow; zeena scagaa Dios gun̄scad me to. Gol̄guien̄ none gun̄

to samiech to perdon, zeena scagaa Dios zun me to perdon; ³⁸ sac grēse ncuane run miech, mincoque rcaania zho. Grēse ncuane run to, scaania tow, ni haxta ndziibraa mine ycaania to. Sac ncuane gun to lo samiech to, mincoque gun Dios to.

³⁹ Blozh sca bnee me, dzigo rēbchaa me:

—Golwi ganle, zig nac zha ne rold lo, zniacxe zrieelo glu zho nēz lo stib zha ne rold lo? Zha ne sca gun, tel griel ni tib zho zaatne nac tib ro blē, ib tedsod grop xcuaa zho tsietsobe ga.

⁴⁰ Grē zha ne nac mēēdscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, zdziñ zho medid co.

⁴¹ jLēda ga gon tso to lozhd gzee zdoo to dien cho pe run, ni nenda mazdraa mine run to! ⁴² jPe ro to glisqui to mine run stib zho, ni tel mazdraa nac mine run to? jGolguien sca glude to ncuane nacde to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

Nex rlu zha nac tib tib yag
(Mt. 7:17-20, 24-27; 12:34-35)

⁴³ Tib tib yag rdeedsew xnexa. Grielod yquia nex ncuane tib lo yag ne rdeed nex wen; grielodgaa yquia nex wen tib lo yag me rquia nex ncuane. ⁴⁴ Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodgaa lbē zarz ne gdeed uv. ⁴⁵ Scadaa nagon nac miech, zha ne wena, ncuane wen run zho, didz wen rnee zho, sac desde zdoo zho no guielwen co; laa zha ne ntseeb, niapse ncuane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzē xtiidz tib miech, gase rlu zha nac zdoo zho.

⁴⁶ Grielod lega gnee to, naa rnabey to, sac zha ne rneew ib none gun zho mine rnabey naa. Nzian

zha ne rnee, naa rnabey zho, ni rund zho mine rne naa.

⁴⁷ Zha ne rquiaadiag mine rne naa, ni rioxco zho rban zhow zigne naca, ⁴⁸ rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda. ⁴⁹ Laa zha ne rquiaadiag xtidz naa, ni rioxcod zho gban zhow, ziaad nac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lēw biaand.

7

Biac tib zha ne rquia dziin tib lo menquiib

(Mt. 8:5-13)

¹ Zeene blozh bnee Jesús lo grē miech co, dzigo laa me wbi ga, bdziñ me Capernaum. ² Lēētaaque len dze co rzacnē tib zha ne run dziin lo tib men ne rnabey lo xmenguiib zha Roma, no guiedz co; nzhoo rac zho zootle laa zho guetle. Rleyniedox men co zho, ³ zigne bin me laa Jesús bdziñ, lēēlēd pxeel me bla zha ne nac zha non lo menguedz Israel, güey zho güeynee zho lo Jesús siguiel Jesús tsiegunguiac Jesús zhingundziin me. ⁴ Bdziñ zho bnaab zho lo Jesús siguiel me tsie me.

—Bzhiguiel been xyudar me —rēb zho—. Tib zha wen nac me, ⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zienal Jesús zhits zho. Zhile gdziñ zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzē xtiidz me, rēb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa. ⁷ Nligaa rien

naa tib zha winse nac naa par gbig naa lo luu, gane niicle biald naa nialdziej naa luu. Nanpaa naa, zatne ziaad luu i, con tib lan xtiidz luu zac gnabey luu guiac zhin-gundziin naa. ⁸ Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguib ne rnabey naa, zeene rne naa tib lo zho: "Güey nu", rie zho; zeene rnegaa naa: "Dë nu", riaad zho; zha ne nacgaa zhingundziin naaw, mine rnabeytaa naa zho, run zhow.

⁹ Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

¹⁰ Grë zha ne güey mandad ga, zeene bdzin zho gon zho laa ngundziin co biacle.

Rrieeban xpëed tib wnaa viud

¹¹ Bded ga, güey Jesús tib guiedz lë Naín grë xpëedscuel me, miech guizhiu ne zienal zhits zho.

¹² Zeene bdzin zho gax ro guiedz co, lëetaque bdzieelo zho tib dzoon miech ziequeets xpëed tib wnaa viud; lëese mëed ga lo wnaa co. ¹³ Gon Jesús zha rac me, pquia zdoo Jesús me, wbig Jesús rëb Jesús lo me:

—jGoondraa luu!

¹⁴ Dzigo bzhen Jesús yag ne zhoob ngutoo co. Zeene gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, iguche i!

¹⁵ Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

¹⁶ Zeene gon grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—jTib men nroob ne gon ziad-teed xtiidz Dios i, ziaad lo ne! jLaa ne bdzian niina ganle, laa Dios ziaadgan ne, ziadbee me ne lo xquielnë ne!

¹⁷ Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

Zha ne pxeel Juan Bautist (Mt. 11:2-19)

¹⁸ Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho, ¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigoraad dzin men co ye.

²⁰ Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëele Men ne nacle diidz ga cxeel Dios i nac luu, te naraa guiaad me ye.

²¹ Lëetaaque ndal miech ndxie lo me ga, quiayunguiac me grë men rzacnë. Nzian zho, tel pe guielguiidztaa rzac zho, no zho nosacsi mendox, no zho rold lo, grëse zho runguiac me zho. ²² Dzigo rëbchaa me lo zha ne pxeel Juan ga:

—Grëse mine bin to rne naa, grëgaa ncuaane gon to quiayun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieeban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios; ²³ ni golguiab lo me: dichos zha ne tiblique riladz cho nac naa.

²⁴ Zeene laa xpëedscuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, zha güeynie guic to nian to me? zPe rëb to rlu me zig tib goobgui ne nëzrii nëzrec rey

me, ²⁵ te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho. ²⁶ Nligaa cho güeynie guic to nac me, ¿te rëb to ye tib men ne noteed xtiidz Diosa?

²⁷ Gacnan to ganle, tib men ne no-teed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ²⁷ Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nëz ne ted luu.” ²⁸ Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa za-atne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho. ³⁰ Sangue grë maistr ley ni grë zha farisé, pe liaadz zho nion zho mine rnabey Dios, ib güeyd zho nchoobnis Juan zho.

³¹ Blozhse sca bnee me, rëbchaa me:

—Nac grë miech rii, ib riend zho pepaa racladz zho. ¿Cho ganle run zigne run zho? ³² Lëe zho run mine run grë mëedlas ne rio wguic dib ro nëz. Niicle rool xcompañer win di nguieel, rieved win; niicle roolga zho di ngan, roond win. ³³ Sac gon, ziaad Juan, ran zho rowd me grë ncuaañe nac xquielwagw zho, niicle vina ried mew; dzigo rnee zho mendox nacie me. ³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me. ³⁵ Sca rnee zho, sangue zha ne rga gueilbiini

ne rdeed Dios, rien zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mez.

³⁷ Lad guiedz co no tib wnaa ro nëz, bin me laa Jesús bdzin lidz zha farisé co, dzigo bi me tib bot nceit nex, tiblo nceit niazha, brie me zie me nëz lidz zha co. ³⁸ Bdzin me ga, whig me zaatne zob Jesús, psilo me roon me. Zigse roon me, lëeque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga blee me nceit co bdëeb mew.

³⁹ Zeene gon zha farisé co sca been wnaa co, bza zdoo zho rëb zho: “Telne niaca mine nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguëebnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne bleidiñ dimi lo zho. Tib zho zëeb gaay mil pes plat, stib zho zëeb gaay gayoow. ⁴² Gonse men co ni tib zho rdzielz zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo mine been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—.
⁴⁴ ¡Mincopaa nagon squi rac wnaa prob qui! Gon ganle zeene bzëeb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me.

⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa. ⁴⁶ Nac costumbr none nchoob luu nceit guic naa, per beend luuw; mazd mele gon baaad biadtëeb me nceit nex rii zhits ni naa. ⁴⁷ Laa me noyun min rii, sacne nlipaa rzac zdoo me beñ naa me perdon grëtaa dolldox ne nzëeb me. Zigne rneeque ne ga, tel zha ne zhis xtoła, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtoł me. ⁴⁹ Zha ne zobgza Jesús lo mezh ga, zeene gon zho sca rëb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtoł wnaa qui?

⁵⁰ Horco biire Jesús bnee me lo wnaa co, rëb me:

—Laa naa psilaa luu lo xtoł luu, sac dib zdoo luu bnalo luu naa. Bzë naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brie Jesús grë xpëedscuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men wnaa güeynal zhits zho, tel pe ncuane quianie grë men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho benxoon me mendox ne nosacsi zho. Ga güeynal tib wnaa lë Marí Magdal (lëe wnaa co benxoon Jesús gadz mendox ne nosacsi me), ga güeynal stib men lë Zhuan (lëe tsieel Chuz ga, men ne quianap grë lo xtsiin rey Herod) ni stib men lë Susan.

Nac Xtiidz Dios zig zhobxtil

(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne brie zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

⁵ —Tib mgui name, brie zho güey zho gon zhobxtil. Zeene laa zho quialaal zho co liu, now bliaal gax ro nëz, now bliaal lad quie, nogaaw bliaal len yag guiets. Mine bliaal ro nëz ga, zha ne bded bzëni zhow, blozh ga güeyaque grë mguin dow maw. ⁶ Mine bliaal zaatne nac lad quie, blana per znuse bidza sac guiend gop ga. ⁷ Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa. ⁸ Sangue mine bliaal zaatne nac niapse lo liu, blana, brooba, ndzon goca, tib tib zho ne biab liu ga now goc haxta tib gayoo zho.

Blozhse bzodiidz me cuent co, nguiedz bnee me lo zho rëb me:

—¿Zha ne racladz guien mine rne naa, yquiaadiag zhow!

⁹ Dzigo wbig grë zha ne nac xpëedscuel me, bnabdiidz zho lo me dien zha nac cuent co. ¹⁰ Rëbcha me lo zho:

—Tel to, Dioszhal rlu lo to ganle zha rnabey me, niicle ncuane mazdraa ngueetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguicd zho zha naca.

¹¹ 'Znu gon nac cuent co: Zhobxtil co nac Xtiidz Dios. ¹² Ro nëz ne sca bliaal zho co, ga rlu ganle zha rzac zha ne rquiaadiag Xtiidz Dios, per znusaque rdziñ mendox rquiil ma zho gliladzd zhow, zeena laad zho lo dol. ¹³ Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran zho

zha run miech zho, zha rnee miech lo zho, rsaanga zhow. ¹⁴ Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, len rsilo zho gre zhgab ne dien zha gapchen cho, dien zha gdeedguxt xcuerp zho lo guidzliu rii, min co rionie guic zho; pa se zho gban zigne rnabey Dios. ¹⁵ Laa lo liu naal co, ga rlu ganle zha rzac zha ne nguudz zdo. Zeene rquiaadiag zho Xtiidz Dios, dib zdo zho rcaania zhow, dib zdo zho riladz zhow. Grese ncuane run zho, ndzinli rreeequiaw; sac tiblrique rac zho.

Xcuent biini
(Mt. 12:46-50; Mr. 3:31-35;
4:21-25)

¹⁶ Blozh ga, bnee me lo gre miech ne ndxie ga, reb me lo zho:

—Tsoh zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gzi-iniw len yu, zeena guiab biini lo grese zha ne seeb len yu. ¹⁷ Scaque nagon, gre ncuane rac ngueets, gre ncuane rnee miech zhlian, none xoobne.

¹⁸ Wen wen golquiaadiag mine rne naa, ni goltsoxcow. Sac zha ne tsoxcow, zdeedraa Dios guielbiini lo zho; sangue zha ne tsoxcoda, haxta tel palalse guielbiini ne rzac zho quianie zho, stiche mew.

¹⁹ Dze co, scaque noseed me miech, zeene bdzin xniaa me ni zha bets me ziegan zho me. Per brielod ndzin zho haxta lo me, sac miech guizhiu ne ndxie lo me ga.

²⁰ Dzigo reb tib zho lo me:

—Laa xniaa luu gon, ni zha bets luu bdzin ley ziaadguib zho luu.

²¹ Pquiab me reb me:

—Xnia naa ye, bets naa ye? Grese zha ne gon rquiaadiag Xtiidz Dios ni rioxco zho mban zhow, lee zha co nac xniaa naa, zha co nac bets naa, zha co nac bzian naa.

Pcuëz Jesús tib medox
(Mt. 8:23-27; Mr. 4:35-41)

²² Tib bdze dze, bzëebnie Jesús xpëedsuel me tib len barcw, reb me lo zho, tedquia zho stib nez ro nis co.

²³ Laa zho zie lo nis co zeene laa me gootguies. Tibaque zeene psilo brie tib medox, masaque riasoli lo nis co, zootle laa barcw ne no zho ga yguitsle len nis. ²⁴ Zeene gon zho scataa ntseeb rac lo nis co, leeléd güey zho güeycuaan zho me.

—¡Maestro! —reb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. ²⁵ Dzigo rebchaa me lo zho:

—¿Pe nacre rdzieb to? ¿Niacxe riladzde to Dios dib zdo to?

Ne nligaa rdzieb zho, ni lala rzee zdo zho, rnabdiidzlsa zho rnee zho:

—¿Bay cho nac me? ¿Zha nacre haxta me, haxta nis ron xtiidz me?

Men Gadar ne nosacsi mendox
(Mt. 8:28-34; Mr. 5:1-20)

²⁶ Bdzin zho stib nez ro nis co, ga nac xtan zha Gadar. Zo zho ga, nez dan squi riaan xtan zha Galilé. ²⁷ Laa Jesús biedz len barcw, zeene laa tib mgui ne no nez co bdzin lo me. Mban rlu mgui co nosacsi mendox me, niicle xab me nacwdraa me; ib rbëzd me lidz me, niapse gre len xpa ngutoo rio me. ²⁸ Zeene gon me Jesús, masaque roptsie me bdzin me pquitsgzhib me lo Jesús, zëeb tsi me rnee me:

—¡Psaan naa Jesús! Nanpaa naa gon xpëed Dios nroob ne zob gbaa nac luu. ¡Bzhiguiel csacsid luu naa!

²⁹ Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox

co me rquianzè me grè dan ngran, zaatne choot miech guienḁ.

³⁰ Dzigo bnabdiidz Jesús lo ma dien cho lè ma. Pquiab ma rëb ma: —Legion lè no.

Sca rëb ma sac nzian nac ma no ma zdoo mgui co. ³¹ Ni bnab ma lo Jesús gzonëzd me ma lo ncowdoo ne noraa ma ne nacgrë ma. ³² Gaxaque ga ndxie tib dzoon nguts notop lag, bnab ma gdeed me diidzbey lose grë nguts co gdziḁ ma. Dzigo bdeed me diidz.

³³ Horco laa grë menḁox co psaan mgui co, güeysëëb ma zdoo grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaaḁ ma haxta lo nis; grëse ma gut.

³⁴ Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga. ³⁵ Nacne brieë grë miech co ziewi zho. Zeene bdziḁ zho, per nli bdzieb zho gon zha laa men co zob gax lo Jesús, laa me nacwxable, rlu niinile nac guic me. ³⁶ Psilo grë zha ne gon zha biac me rzodiidz zhow lo grë zha ne bdziḁ ga. ³⁷ Mazdraa bdzieb grë miech co bin zhow, dzigo mazd bnab zho lo Jesús siguiel me gbi me xtan zho.

³⁸ Zeene laa Jesús zie sëëb me len barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguielḁ Jesús nienal me, rëb Jesús lo me:

³⁹ —jBiaan! Güey, güeyzodiidz lo grë menlidz luu ganle zha nactaa milagr ne been Dios beenguiac me luu.

Dzigo w bire men co. Güey me lad guiedz, grëse lo miech güeyzodiidz me zha nactaa guielnzaac ne been Jesús ga, beenguiac Jesús me.

Brieëban tib xpëdwnaa tib men lë Jair
(Mt. 9:18-26; Mr. 5:21-43)

⁴⁰ Zeene laa Jesús biire bdziḁ stib nëz ro nis co, miech guizhiu ne quiambëz me ga, rley zho gon zho laa me bdziḁ. ⁴¹ Loxaque bdziḁ me, laa tib men ne rnabey yadoo lè Jair wbigle pquiitsgzhìb lo me. Rnab Jair siguiel me tsienal me lidz Jair tsiegunguiac me tib xpëdwnaa win Jair.

⁴² Nzhoo rac mëed co, tib mëed tsiipchop iza, ni lëëse mëed ga lo me.

Dzigo laa Jesús zie nëz lidz men co. Miech guizhiu ne zienal zhits me, haxta rtaagw zho me. ⁴³ Lad grë miech co zienal tib wnaa rza-cnë, gogle tsiipchop iz rlan me tib guielguidz, rzac me zigne rzac grë men wnaa gzob mëë; tibaque rlan mew ib rbëzda. Grële ncuaaḁ rap me bloozh me lo grë men ne run rmed, per ni tib zho runguiacḁ me. ⁴⁴ Laa me no lad co, tibaque wbig gax me nëz zhits Jesús, bzhen me ni lar ne mbix Jesús; hor cogazha laa me biac. ⁴⁵ Bien Jesús sca bzhen wnaa co lad xab me, dzigo rëbchaa me:

—¿Cho ga bzhen lad xab naa?

Grëse zho rnee led zhada. Dzigo rëbchaa Pedr lo me:

—Maestro, wi ganle zha ndaagw-taa ziaad luu lad grë miech rii, haxta rcheep zho luu, ¿zha nan luu choot xenḁ lad xab luu?

⁴⁶ —Per no cho bzhen lad xab naa —rnee me—, sac bienpaa naa beenguiac naa zho.

⁴⁷ Zeene gon wnaa co bien Jesús sca bzhen me lad xab me, rdzieb me laa me wbig pquiitsgzhìb me lo Jesús. Squi ndxie grë miech co, bzodiidz me zha nacne sca been me, ni zha zigne bzhen me lad xab Jesús laa me biac. ⁴⁸ Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

⁴⁹ Laa Jesús bii quianeeque lo wnaa co, zeene laa tib zha ne nac

mandat ziaad nëz lidz Jair bdziņ, rēb zho lo Jair:

—Csodziindraa luu lo meņ qui, laa xpēēd luu gutle.

⁵⁰ Zeene goņ Jesūs sca rēb zha co, rēbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpēēd luu.

⁵¹ Bdziņ zho lidz Jair, psaandraa Jesūs naļ grē miech co zhits me ndziņ zho zaatne nix mēēd co. Loxaque Pedr, Jacob, ni Juan, pxoz win ni xniaa win bzēēbnie me len yu ne nix win. ⁵² Grē miech ne ndxie ga, roon zho no zho xquielnē win; dzigo rēbchaa Jesūs lo zho:

—Goonde to; sac goņ nixguiesse mēēdwin rii, gute win.

⁵³ Psilo zho lel rzhidznie zho me, sac nanpaa zho gutle win.

⁵⁴ Dzigo wbig me, bzheņ me nia win, nguiedz bnee me lo win, rēb me:

—jGuche i na, ndzoop yeen!

⁵⁵ Zigne sca bnee me, laa mēēd co brieēban, laa win guche ga; dzigo bnabey me bguiaaņ zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesūs diidz lo me, choot lo gzodidzd me zha brieēban win.

9

Pxeel Jesūs xpēēdscuel me güeyseed zho miech

(Mt. 10:5-15; 14:1-12; Mr. 6:7-29)

¹⁻² Tib dze bredz Jesūs gza tsiipchop xpēēdscuel me, pxeel me zho tsienee zho lo miech gacnaņ zho zha racladz Dios gban zho; bdeed me poder lo zho guņcxoon zho grē menđox ne nosacsi miech, ni guņguiac zho grē meņ rzacnē.

³ —Goļtsie —rēb me lo zho—. Per ib güeyde to ncuaaņe yquiin to nēz. Zig nac dimi, zig nac ncuaaņe gow to, pe bziuud, pe baxtongaa, güeyde tow; xab tow, miņe nacwse to miņcose goļtsienie. ⁴ Guiedz ne gdziņ to, zha ne gneedz zaatne cuēz to, lidz zha co goļcuēz,

haxta gdziņ dze ne gbi to guiedz co. ⁵ Per telne gdziņ to tib guiedz, nēd miech yquiaadiag zho miņe zienee to, dzigo gollit grē yudie co ni to, goļriegazh ga, zeena guieņ zho ganle dol ga been zho lo Dios, nēd zho ycaania zho xtiidz me.

⁶ Dzigo laa zho brieē, laa zho zie. Grēse guiedz ne ndxie dib gax ga, güey zho güeynee zho Xtiidz Dios lo miech, ni beēnguiac zho grē meņ rzacnē.

⁷ Bin rey Herod rzeet zho Jesūs, sac tel pa lotaaw zēēb diidz grētaa milagr ne ruņ me. Grē miech co, no zho rzac Juan Bautist ga brieēban, lēē me ga nac Jesūs; ⁸ nogaa zho rnee bod Līw, meņ ne biadteed xtiidz Dios padzeela, me ziaad stib; zzhisгаа zho rnee no cho stib meņ biadteed xtiidz Dios padzeelaw, sinque brieēban me gane ziaad me stib.

⁹ Zeene ron Herod rnee grē miech co lēē Juan ga, rio me zhgab, rnee me:

—jBay cho nac meņ co? Per gacda Juan; naazhal name bnabey pchug zho yaņ Juan.

Racladz Herod tebaa zha gan me Jesūs.

Bguiaaņ Jesūs gaay mil miech

(Mt. 14:13-21; Mr. 6:30-44;

Jn. 6:1-14)

¹⁰ Goc bla dzew, laa grē zha ne pxeel Jesūs ga wbiere bdziņ lo me. Blozhse bzodiidz zho lo me grēse tel zha güey zho, dzigo güeynie me zho tib lugar raaņ gax guiedz Bet-said.

¹¹ Zeene bin grē miech co laa me brieē, dzigo brieēnaļ zho me, bdziņ zho lo me ga. Zeene goņ me zho, rley me pcaania me zho, bnee me lo zho zha racladz Dios gban zho, ni beēnguiac me grē zha ne rzacnē.

¹² Laa dze rdzelew, wbig gza tsiipchop xpēēdscuel me rēb zho lo me, mazd gnee me lo grē miech co gbi zho ga; zeena guiob tsie zho grē guiedz las, grē yu ne raaņ gax ga,

yguib zho dien pa cuèz zho, yguib zho dien pe gow zho; sac choot miech nod ga.

¹³ Dzigo rëbchaa me lo zho:

—To goldeed ncuaaṅe gow zho.

Pquiab zho rëb zho:

—Gaayaque guietxtil ni chop meḷ ziaadnie no nu, ipe rnase ncuaaṅ co lo grëtaa miech qui! Niicle niaca miṅe gziuu ncuaaṅe gow zho, pe zhidaa dimi yquiin, ¿pa guioxi now?

¹⁴⁻¹⁵ Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho grol gayooga, grol gayooga zho tib lugar. ¹⁶ Laa grë miech co bzob, dzigo bzhen Jesús gza gaay guietxtil co ni grop meḷ co, blis lo me nëz gbaa, bdeed me xquizh lo Dios. Blozhse ga, beengrol me gza guietxtil co, meḷ co ne, dzigo zigse rdeed mew lo xpëèdscuel me, scase scase rguiz zhow lo grë miech co. ¹⁷ Grëse zho dow haxta zaatne bieltaa zdoo zho; ni zeṅe blozh dow zho, biodzë tsiipchop chicuid bio grë miṅe biaan.

Bnee Pedr cho nac Jesús

(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidznie me Dios; loxaque xpëèdscuelse me güeynaḷ zhits me. Ga bnabdiidz me lo zho rëb me:

—¿Cho dien ron to rnee miech nac naa?

¹⁹ Pquiab zho rëb zho:

—No zho rnee Juan Bautista, no-gaa zho rnee Lív (meṅ ne biadteed Xtiidz Dios padzeela); nogaa grol zho rnee no cho stib meṅ ne biadteed Xtiidz Dios padzeelaw, sinque brieëban me gane ziaad me stib.

²⁰ —¿To waa? —rëb me lo zho—.
¿Cho rzac to nac naa?

Horco pquiab Pedr, rëb Pedr lo me:

—¡Luu nac Meṅ ne zëëble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha guṅ miech me

(Mt. 16:21-28; Mr. 8:31-9:1)

²² Tib vuelt bzeet Jesús lo grë xpëèdscuel me zha csacsi miech me. Rëb me, nroob grë ncuaaṅe cteed zho me; grë zha non lo menguedz, grë pxoz rnabey, grë zha ne rseed miech ley, ible stsidil zho me, ni haxta zut zho me; per zeṅe gac tson ngbidz gut me laa me greeëban.

²³ Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnaḷ zho miṅe rnabey naa, niicle tel miṅ co yquiaaqui csacsi miech zho. Nodne yquia zdoo zho xquielmban zho, ²⁴ sac zha ne yquia zdoo xquielmban, leḷ znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdzind dze lozh. ²⁵ Zha ne zienie guic loxaque gapchen, ¿pa dien yquiina lo zho, tel por lëëw rsacsi zho zho, tel lëëw yquiaaqui guey zho gabil?
²⁶ Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtidz naa; scaque naa stoladznie naa zho gaḷ dze ne laa naa guial stib. Dze ne guialnie naa grë xanjḷ Pxoza naa, guiallu naa guielndzon ne rap me.

²⁷ Blozhse sca bnee me, rëbchaa me lo grë miech co:

—Ni gni naa lo to ganḷe, nzian grë zha ne ndxie nu niina, ib tedsod bii zan zho zeṅe laa Dios glu zha rnabey me.

Bdzëëlo Jesús

(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

29 Laa me nozodiidznie Dios, zeene laa me bdzēēlo. Masaque biinidoo ne rrie lo me, xab mew, nquitsbie rnaw, haxta rquiabniw. 30-31 Tibaque brieequia Lí grop Moisés bdziñ lo me ga, psilo zho nozodiidznie zho me grē guielñē ne cteed miech me Jerusalén, zeene laa me ghi lo guidzliu. Masaque biinidoo ne riab, ncuaañe gzee zdoow.

32 Laa zha ne zienañ zhits me, rcow zho mcaal zob zho ga; per zeene biab biini nroob co, hor co bzhial lo zho goñ zho zha rlu me gza me Lí ni Moisés. 33 Laa grop meñ co ziebiche lo Jesús, zeene rēb Pedr lo me:

—Maestro, ¡wena goñ tebaa gbi-aaz ne nu! Na maase gzaa no tson yu yag xiid win, tiba cuēz luu, tiba cuēz Moisés, stiba cuēz Lí.

Per niicle Pedr riendaque dien pe nacne sca rnee Pedr.

34 Laa Pedr bii quianeeque, zeene bre tib xcow zaatne zo zho ga; per nli bdzieb zho goñ zho laa zho biaan leñ xcow co. 35 Dzigo bin zho zēēb tib tsi meñ co lo xcow co, rnee me:

—Lēē Xpēēd naa i goñ, rleynie naa me. Golgon miñe rnee me.

36 Zeene blozh bin zho tsi meñ co, goñ zho loxaque Jesússe zo ga.

Grēse miñe goñ zho ga, ib choot lo bneed zhow leñ dze co.

Biac tib mēēd ne nosacsi mēdox
(Mt. 17:14-21; Mr. 9:14-29)

37 Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. 38 Lad grē miech co brie tib mgui, wbig me lo Jesús rēb me:

—Maestro, bzhiguiel bui ganle zha rac xpēēd naa. Tibaque mēēdbgui rii nac mēēd lo naa, 39 ni na laa mēdox nosacsi win. Zeene rdziñ ma rcoptsiedan ma win, rron ma win liu, ga nix win runcxidz ma win, ni masaque rdzib mtsiñ ro win; nen rsaan ma win. 40 Blansonie naa win nu, bnab naa

lo xpēēdscuel luu guñcxoon zho mēdox co, per brieelod zho.

41 Dzigo rēbchaa Jesús:

—¡Pe nac squitaa miech ntseeb nac to, ib nēde to gnalo to Dios! ¿Pa lal dze ne so naa gne naa lo to? ¡Ncuaañe cxcwdraa naa lo to squitaa nac to! Dēnie xpēēd luu nu —rēb me lo meñ co.

42 Zeene laa mēēd co ziegax lo Jesús, hor co bron mēdox co win liu, nix win ga masaque rzhidz win. Dzigo goctox Jesús lo ma, beñcxoon me ma. Horcogazh biac mēēd co, laa me bdeed win lo pxoz win. 43 Grē miech ne ndxie ga, per nli rzee zdoow zho goñ zho scataa nroob poder ne rap Dios.

Grēse miech ne ran grētaa milagr ne run Jesús, rzee zdoow zho.

Bzeet Jesús stib laa miech csacsi me

(Mt. 17:22-23; Mr. 9:30-32)

44 Biire Jesús bzeet me lo xpēēdscuel me zha guñ miech me, rēb me:

—Wen wen golquiaadiag miñe gni naa lo to nu ganle. Naa goñ ne nac naa Mgui ne pxeel Dios, ible ziolo zho naa ladznia miech.

45 Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzga zho, rdzieb zho gnabdiidz zhow lo me.

¿Cho nonraa?

(Mt. 18:1-5; Mr. 9:33-40)

46 Horco psilo zho noneelsa zho dien cho tib zho gac zha non.

47 Bien Jesús sca no zho, dzigo bnee me lo zho, bredz me tib mēēdbgui win, 48 rēb me:

—Grē zha ne no xnēz naa, zha ne guñcas tib mēēdwin zig mēēd rii, gleynie zho win, rrieequia naa ga rleynie zho. Ni zha ne gleynie naa, rrieequia meñ ne pxeelle naa ga rleynie zho. Telne racladz to gacnañ to dien cho nac zha non, gacnañ to ganle, zha ne tsoxco gac

zig tib ngundziin lo samiech, zha co nac zha non.

⁴⁹ Blozh ga, rëbchaa Juan lo me:

—Maestro, bdzion no tib zha co gon bzeet zho lë luu zeene benxoon zho mendox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—iGunsCADE to! Sac gon zha ne racnie ne, grieelod lëëque zha glëënie ne.

*Ndox Jesús lo Juan grop Jacob
(Mt. 8:19-22)*

⁵¹ Leñ dze ne ziaadyob gbi Jesús lo guidzliu rii, leñ dze co bio me nëz laa me zie nëz Jerusalén. Tiblique bio guic me, ib pquiad zdo me, laa me zie. ⁵² Zeene bdziñ me xtan Samar, pxeel me bla zho bd-edner zie zho tib guiedz win ne ndxie nëz co, par dien pa lo gdeed miech co cuëz me. ⁵³ Bdziñ zho guiedz co, choot bzhiguiel d ndeed zaatne mbëz me; sac bien zho nëz Jerusalén tsie me. Nac zha Samar, rlëënie zho zha Israel.

⁵⁴ Zeene bin Jacoba grop Jacob Juan, blëë guic zho, rëbchaa zho lo me:

—Maestro, imazd tibaque gotsaa gnab ne gliaal gui lad grë miech rii, zeena nitlogazh zho!

⁵⁵ Biecwaque me, goctox me lo zho rëb me:

—Riende to lëë zhapaa nac men ne nacnie to. ⁵⁶ Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga brieë zho güey zho stib guiedz.

⁵⁷ Nëz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. ⁵⁸ Dzigo pquiab Jesús rëb Jesús lo me:

—Gocnaa ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë

mguin, rap ma zhibliee ma, rap ma zhiptsieez ma; per naa per ni zaatne gaguies naa quianie naa.

⁵⁹ Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuëz naa, gangazh naa tsoliu pxoz naa.

⁶⁰ Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnañ zho zha racladz Dios gban zho.

⁶¹ Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

⁶² Dzigo rëbchaa me:

—Zha ne xen nia rad ni csilo zho gwi zho nëz zhits zho, niacxe zrieelo ygan zho ngon. Scaque zha ne sëeb xnëz Dios, grieelod sëeb zho telne mazdraa rleyne zho grë ncuaañ lo guidzliu rii.

10

*Güey tsongaltsii zha ne güeynee
Xtiidz Dios
(Mt. 11:20-24)*

¹ Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

² —Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneelew lo zho rgaad.

³ Goltsie sca, per nsin nsin golso. Golguien ganle rrieequia nac to zig cho mëcwxil yeen, ni laa naa rxel to zaatne no grë coyot dox. ⁴ Peet güeyde to, güeyde to dimi, güeyde to ncuaañe gow to, lab tow, minë quiase ni to mincose goltsienie.

'Miech ne yquiaabdiuzh to nëz, sode to dieen zharaa yquiaabdiuzh to zho. ⁵ Zeene yguib to zaatne

cuëz to, yu ne gdzintaa to, golnab gunlay Dios grë zha ne no yu co. ⁶ Telne squiaadiag zho mine rnee to, zunlay me zho; telne nëdga zho yquiaadiag zhow, dzigo toque gunlay me. ⁷ Zha ne gneedz zatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho mine non xtsiin zho.

⁸ Guiedz ne yquiaadiag miech mine zienee to, zaacse golgac lo zho, tel pe guielwagw ne gneedz zho, golquina; ⁹ golgunguiac grë men rzacne ne no ga. Golguiab lo zho, laa dze ne nolu Dios zha sëëb miech xnëz me, laa dze co bdzinle. ¹⁰ Sangue guiedz ne siguield miech yquiaadiag zho mine zienee to, golree grë ro xnëz zho, ¹¹ ganlo zho glit to grë yudie co ni to, zeena guien zho ganle nëz ne nitlo zho ga zie zho. Golguiab lo zho, zha bguiba, sac binpaa zho zha grieelo sëëb zho xnëz Dios ni nëd zho gon zho diidz. ¹² Gacnan zho ganle, gal dze ne gun Dios xquielwxtis me, lëëtaa gac guielne ne tsieguial zha Sodom, mazdraa nac guielne ne tsieguial zho.

¹³ Scadaa nac zha Corazín ni zha Betsaid. iProbsaxe zho, sac gon gonpaa zho grë milagr ne run Dios, per ib psaand zho xquielntseeb zho! Tel niaca mine ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielne, zëëb nsaan zho xquielntseeb zho mbig zho lo Dios. ¹⁴ Gacnan zho ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa mine yгаа zho. ¹⁵ Scaque zha Capernaum, masaque rzac zho niina zha nziuraa lo Dios, per gacnan zho ganle haxta guiet len gabil ga guey zho.

¹⁶ Blozhse sca bnee me, rëbchaa me lo zho:

—Grëse zha ne yquiaadiag mine gnee to, rrieequia naa ga rcaania zho. Zha ne nëdga ycaania to, rrieequia naa ga nëd zho ycaania to; ni zha ne nëd ycaania naa, rrieequia men ne pxeel naa ga nëd zho ycaania zho.

Wbire tsongaltsii zha ne pxeel Jesús ga

(Mt. 11:25-27; 13:16-17)

¹⁷ Zeene laa gza tsongaltsii zha co wbire, rley zho bdzin zho lo Jesús. Rëb zho haxta grë mendox bdzieb ma zho, zeene bzeet zho lë me.

¹⁸ Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye. ¹⁹ Laa naa bneedz poder qui lo to, parne gdeete to diidz gun ma mine racladz ma; grë meeldox, grë meegu ntseeb, niicle gzoobni to ma, peet gacde to. ²⁰ Nli laa to runcxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

²¹ Horco biaad tib guielbley nroob zdoo Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grë mine noyun luu nu niina, bdeete luu diidz niacnan grë zha raca, sinque laaw blu luu lo grë zha ne nac zig grë mëëdlas. Sca quiayun luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuaane ran to quiayun naa, Dios men ne nac Pxoz naa, me bneedz poder rii lo naa; sac ib laa me bzo naa, naa gūna. Xpëëd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rëbchaa me lo xpëëdsfuel me:

—Dichos to bgaa to noyan to grë min rii. ²⁴ Sac gon blactaa zha ne biadteed xtiidz Dios padzeela, haxta grë zha ne bnabey len dze co, bzoobladz zho nian zho grë ncuane noyan to, bzoobladz zho nquiaadiag zho grë ncuane noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dien, ¿pe nac mine gun naa parne grieelo ygaa naa guielmban ndzon ne gdziind dze lozh?

²⁶ Pquiab Jesús rëb me:

—¿Zha dien zhubnee lo ley? ¿Pe rnabeya?

²⁷ Rëbchaa maistr ley co:

—Znu rneew: “Dib zdoo luu, dib nacse luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

²⁸ —¡Min qui nagon bioxco gun luu —rëb Jesús—, zeena ygaa luu guielmban ndzon ne gdziind dze lozh ga!

²⁹ Per par glud ne noxcod me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

³⁰ Dzigo bzodiidz Jesús tib cuent lo me, rëb Jesús:

—Tib men wladz name briece me Jerusalén zie me guiedz Jericó. Nëz zie me briecequia ngbaan, bdiin ngbaan me, mer niut ngbaan me; grëse ncuane ney me, haxta xab me blan ngbaan. ³¹ Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad. ³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho. ³³ Sca nix me ga, zeene laa tib zha Samar bdiin.

Zeene gon zho me, wbig gax zho lo me; pquia zdoo zho me gon zho zha rna me. ³⁴ Gagazh been zho me rmed, blee zho vin bdiib zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziinnie zho me tib yu ne rbëz miech ne zo nëz; ga blëznie zho me, pquianap zho me.

³⁵ 'Biini liu, zeene laa zho briece ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Marí

³⁸ Laa Jesús no nëz gza xpëëdsfuel me. Bdziin me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdziin zho lidz Mart, lëëlëd bzëeb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu. ⁴² No tib ncuane mazdraa none tsoxco luu, ni lëë min co nu gon noyun Marí; gane grieelod ycaa naa mine quaiyun me.

11

Zha none gzodiidnie ne Dios

(Mt. 6:9-15; 7:7-11)

¹ Tib vult, loxaque blozh bzodiidnie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidnie no Dios, zigne been Juan Bautist pseed me xpëëdsuel me zha gzodiidnie zho Dios.

² Dzigo rëbchaa Jesús:

—Zeene gzodiidnie to Dios, golguiab:

Dios, luu nac Pxoꝝ no, zob luu gbaa; luuse nac men ne mazdraa ndzon. Luu nac men ne gnabey no, mine gnabeytaa luu, zigne raca gbaa,

scaque none gaca lo guidzliu nu.

³ Been guielnzaac bneedz ncuane djoow no nadze.

⁴ Bzhiguiel been no perdon grëse dol ne ziodziun no lo luu, zigne rdziun no samiech no perdon grë falt ne run zho lo no. Gdeete luu diidz yquil mendox no, been guielnzaac bla no lo ma.

⁵ 'Sca nagon gnee to —rëb Jesús—. Ncuane gnab to lo me zneedz mew. Samiechse to name, gzoob ne wxina, lega nacle glanso tib zha ne ndzieeldiidz to ni guiend pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beenxtad tsonaque xcuun luu lo naa. ⁶ Lega nacle blanso tib zha ne runbey naa, na guiend pe gded naa yquiiin zho.” ⁷ Segur znë zho: “Gunneete luu naa nu, dziitsle nioog ro lidz naa, nataa nixguies grë xpëëd naa; grielod gache naa gnedz naa ncuane racladz luu.”

⁸ Per telne sonaad to ga, ganse zho tibaque quianee to, gnid naa zho tsieched zho gneedz zho ncuane racladz to. Per gneedzd zhow porne ndzieeldiidz to zho, sinque laa zho gneedza porne gon zho tibaque quianab tow. ⁹ Scaque

nagon none gon to, zeene pe gnab to lo Dios. Ncuane rquiiin to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to. ¹⁰ Sac grëse zha ne rbig lo me rnab zho ncuane rquiiin zho, rdeed mew. Zha ne rguib ncuane racladz zho, racnie me zho rdziel zhow. Zha ne rbedzle me, rcaania me zho.

¹¹ 'Golguien ganle, zig nac to, zeene rnab xpëëd to tib mel gow win, zniacxe ziazh to co to tib meel nia win? ¹² Zeene rnabгаа win tib dzit, zniacxe zgo to tib meegu nia win? ¹³ Led rioꝝco to lëe niapse ncuane wen rdeed to lo xpëëd to, niicle ne miech ntseeb nac to. Telne sca rioꝝco to xpëëd to, pelel Pxoꝝ to dzigo, men ne zob gbaa, tsoꝝcod me to. Ib tedsod grëse zha ne gnab lo me gdeed me ncuane rquiiin zho, zdeed mew; haxta zha ne gnab cxeel me Espiritu Sant gacnie zho, zun me mine gnab zho.

Rëb zho mendox nacie Jesús

(Mt. 12:22-30, 43-45; Mr. 3:20-27)

¹⁴ Tib vult benccoꝝ Jesús mendox ne nosacsi tib mgui co. Ib gacd gnee mgui, sac psan ngop ma mgui. Dzigo zigne benccoꝝ Jesús ma, laa mgui psilo bnee. Grë miech ne ndxie ga, bzee zdoꝝ zho gon zhow. ¹⁵ Nogaa zho rnee, Beelzebú ma ne rnabey lo mendox, ma co nacie me gane rrieelo runccoꝝ me mendox. ¹⁶ Brieequia spalal zho, rnab zho lo me gon me pe stib milagr, parne gliladz zho nli Dios pxeel me.

¹⁷ Bien Jesús zha rza guic zha ne noneenë me ga, dzigo rëbchaa me lo zho:

—iNcuane gacd gon rnee to! Tel tib guiedz nadien, csilo miech, lëëque zha tilnie menladz zho, zniacxe nitlod guiedz co? Tib diigaa miecha, tel lëëque zha tilnie menlidz zho, led znuse lëe nitlo dii co.

18 Scaque mendox nagon, telne lëëque lëë ma gunxoon samendox ma, ipe nale na bnitlo ma! Laa naa rne min rii lo to, porne rnee to ma ne rnabey lo mendox nacie naa, gane rrieelo runxoon naa ma. 19 Nana telne sca rzac to, zha ne nacgrë to dzigo, cho nacie zho ne ye zho runxoon ma? Gase naganle rlu doldox i quiayun to squi rnee to. 20 Sangue tel naa, Dios nacie naa runxoon naa mendox, ni ga rlu ganle laa Dios pxeelle men ne gnabey lo to.

21 'iMasaque nac mendox zig tib zha ne no xfuers! Tib zha ne no xfuers, tel tibaque ney zho xquib zho, zcho dien lega sëëb lidz zho gla ncuane quianie zho? 22 Per zeene rriequia stib zha ne mazdraa no xfuers, zha cole rtiche zha co, runxoon zho zho, riaanne zho grë ncuane gopchen zho. 23 Gogacnan sca ganle, zha ne rlëë lo naa, ga rlu nacies zho naa; ni zha ne rancies naa lo xtsin naa, paat yquiind zho.

24 'Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guien, rguib ma dien pa cuëz ma; ranse ma rdzield zaatne cuëz ma, rnee ma: "Mazd gbire naa guia naa lidz naa stib." 25 Dzigo rbire ma, zeene rdzin ma lo zha ne psacsi ma ga, masaque rzac ma zho zig rzac miech tib yu ne griin bliob, tib yu ne ine nzhixcuaa len. 26 Dzigo rie ma riexi ma zgadz samendox ma, ma ne mazdraa ntseeb, rdzin ma gza ma rzëëb ma zdoo zha co, rsilo ma rsacsi ma zho. iHorcole mazdraa mban run ma zho!

27 Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—iDichos wnaa ne gop luu, wnaa ne bgadz luu!

28 Pquiab Jesús rëb me:

—iMazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

Zha ne riladz cho nac Jesús

(Mt. 5:15; 6:22-23; 12:38-42; Mr. 8-12)

29 Miech guizhiu ne quiazinraa lo me ga, dzigo bnee me rëb me:

—Nadzpaa ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás. 30 Haxta dzigora naagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me. 31 Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nëz Sabá, steedquie me to. Sac gon pa lo ga brie me, biaad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni nëd to gon to xtiidz me. 32 Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

33 'Tsod zha ne yquiaagui tib biini, lozh ga ctoos zho pe cos low, gzolangaa zhow zaatne ngeets. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. 34 Rriequia nac bziaalo miech zig nac tib biini. Telne niapse lo grë ncuane ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuane nonguieldgaa rwi zho, dzigo gdipse xcuerp zho no lo guielcow ga. 35 Goguien sca pa lo rwi to, napaa laa ne tso to lo biini, lel lo guielcow

no to. ³⁶ Sac gon, tel dipse xcuerp to no lo guielbiini, ni tib lew nod lo ncow, zlpaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé
(Mt. 23:1-36; Mr. 12:38-40;
Lc. 20:45-47)

³⁷ Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdziñ me lidz zho, bded me bzob me lo mezh, ³⁸ psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoo zho; ³⁹ dzigo rëbcha me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nëz zhitsse mbe rna, laa nëz lena rnadraa di beed. ⁴⁰ iNadzpaa ncow nac guic to! iPe riende to racladz Dios ne laglaase glu miech wen nac to, sinque racladz me desde zdoo to gac to miech wen? Sac dib nacle to psan me to. ⁴¹ Laa ne squi no to noban to, mazd goldeed ncuane nacchenpaa to lo grë zha ne guien pe yquii, zeena gac to miech ne nlipaa wen.

⁴² iProbsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcod to gban to zigne rnabey Dios, ib rioxcod to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to. ⁴³ iProbsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz. ⁴⁴ iProbsaxe to, lëëtaa rdzieel to grë to maistr ley! Masaque nac to zig

nac grë baa ne rludraa pa nac. Tel baa cow, zeene rded zho zaatne niaaw, ib rien zho lad grë ncuane noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, iye no dzigo lëë rzoob luu squi nac?

⁴⁶ Pquiab Jesús rëb me:

—Ye to gon. iProbsaxe to! Rio to rzadraa ley ne rnabey to gon miech, ni per ni to rioxcod to siquier csilo to gon tow. ⁴⁷ iProbsaxe to! Paat rquiinda gon squi rio to, rlozhd dieen paraa rzhixcuua to ro xpaa grë zha ne biadteed xtiidz Dios padzeela. ⁴⁸ iIgal ntseeb to grë pxozgol to! Sac gon, zha beet grë zha co, laa to no rzhixcuua to ro baa. ⁴⁹ Nanle Dios squitaa ntseeb zdoo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsienew lo zho, per nanle naa gandzed zho zho, haxta zut zho grol zho.” ⁵⁰ Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu, ⁵¹ desde Abel haxta Zacari men ne beet pxozgol to len yadoo zaatne nac gax lo pcoog. iNe nligaa grëse dol co gon, to quizha! ⁵² iProbsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtidz Dios, per nëde to gliladz tow, ni niicle nëëdga to gliladz zha ne racladz ycaaniaw.

⁵³⁻⁵⁴ Blozhse ga, laa me brie ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuane rnabdiidz zho lo me, rguib zho dien zha gunglëë zho me, par dien pe cxind me pe tib diidz, zeena min co yquiaaqui zho tsiezoob zho xde- mand me.

12

Grē ncuaaṇe rac nḡueets zhliiaan
(Mt. 10:19-20, 28-33; 12:32)

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpēēdsuel me, rēb me:

—Golḡuien ḡon, ḡunde to miṇe ruṇ zha farisé, tel zha rḡuiaalose zho miech wen nac zho. ² Sac grēse ncuaaṇe sca nḡueets rac, grēse ncuaaṇe rlud miech, zdziṇ dze ne xoobneṇa.

³ Zig nac grē ncuaaṇe zhliiaanse rnee to lo ncow niina, zdziṇ dze ne gon miecha zobna ngbidz; grē ncuaaṇe rnee to len yuse, zdziṇ dze ne dib lad guiedz ḡacnaṇ miecha.

⁴ Golḡona ḡanle bets: Ib ḡdziebde to zha ne ḡacladz gut to. Nli zrieelo gut zho xcuerp to, per peet grielodraa zho ḡuṇ zho. ⁵ Golḡuien, Dios nac meṇ ne mazdraa nroob, miṇe rnabey me miṇ co none gon to. Sac tel me, zrieelo me ḡnitlo me miech dib xcuerp zho, ni lozh ḡa zrieelo me ḡzonēz me zho nēz len ḡabiḷ.

⁶ Nligaa ḡdziebde to miech, csaand Dios lega pe ḡac to. Golwi ḡanle, zig nac grē mḡuiṇ, niicle ne rzac miech peet nond ma, haxta chop ma rto zho por tib ḡaay centav; per tel Dios, ib rsaanladzd me ma. ⁷ Peleḷ to dzigo csaan me, haxta guits ḡuic tow, grēsew ngaba lo me. ḡdziebde to sca, ḡolḡuien ḡanle nonraa to lo tib dzoon mḡuiṇ.

⁸ Ni ḡni naa lo to ḡanle, zha ne ḡlu lo miech nacie zho naa, scaque naa ne nac naa Mḡui ne pxeel Dios, zeṇ ḡal dze co zlu naa lo grē xanjḷ Dios, nacie naa zho. ⁹ Saṇḡue zha ne ctoladznie naa lo miech, scaque naa ziep naa lo grē anḷ co ruṇbeyd naa zho. ¹⁰ No zha ne rneenē naa, per zuṇ Dios zho perdon doḷ co; saṇḡue zha ntseeb ne ḡneenē Espiritu Sant, ib ḡuṇdraa me zho perdon.

¹¹ Zeṇe tsiezo miech rii to lo grē zha ne rnabey xyadoo zho, tsiezo-gaa zho to lo grē zha ne nac wx-tis, tsode to zhḡab dieṇ pe ḡnee to; ¹² sac zeṇe sca tsiegala, Espiritu Sant csiaab ḡuic to pe nac miṇe ḡnee to lo zho.

Zha ne loxaque rapchen

¹³ Horco wbig tib zha ne no lad grē miech co, rēb zho lo Jesús:

—Maestro, bzhiguiel bnee lo bets naa ḡlē zho ncuaaṇe psan pxoz no, ḡneedz zho miṇe ḡaguial naa yca naa.

¹⁴ —Aque luuw nli —rēb Jesús—, ḷcho nē lo luu laa naa noyun ḡuielwxtis co? Ziald naa ḡon par quiiz naa ncuaaṇe rap miech.

¹⁵ Dzigo bnee me lo grē miech co, rēb me:

—iGolḡuien ḡon, ḡzoobladzde to demas ḡapchen to! Sac niicle ndziibraa ḡapchen miech, grielod por grē ncuaaṇ co ndzon ḡac lo xḡuielmban zho. ¹⁶ Znu ḡon bzhaac tib meṇ ne nroob ḡopchen. Nat liu quianie me, zeṇe rlaap me grē ncuaaṇe ran me, nroob ncuaaṇe rlis me low. ¹⁷ Bdziṇ tib dze rḡaadraa pa tsotsow grē ncuaaṇ co, dzigo bzob me dieṇ zha ḡuṇ me. ¹⁸ Tibaque zeṇe rēb me: “Miṇe naca laa naa ḡuṇ nroob grē yu qui, zeṇa zigtaa grē ḡuielṇzaac quiw, grēragaa ncuaaṇe rap naa, ḡa tsotsowa grēsew. ¹⁹ iPe zhidaa iz ne lēb grē ncuaaṇ co! Peet tsieniedraa ḡuic naa, iṇe ḡuxt sob naa, ḡow naa, ḡuie naa ncuaaṇe ḡacladztaa naa.” ²⁰ Miṇ co rza ḡuic me, tibaque zeṇe rēb Dios lo me: “Nadzpaa nxen luu. ḡuiel riḡgazh ḡon laa luu ḡuet. iZhaale zha ne ḡuiaannie grētaa ncuaaṇe beenḷo luu i!”

²¹ Zeṇe blozh bzodiidz Jesús cuent co, rēbchaa me:

—Sca nagon rzac grē zha ne loxaque dieṇ zha ḡapchen zho zienie ḡuic zho. Ncuaaṇ cose rionie

guic zho, ib rioxcod zho guṅ zho ncuaaṅe non nēz lo Dios.

Rsaand Dios zha ne no xnēz me
(Mt. 6:19-21, 25-34)

²² Blozh ga, rēbchaā me lo xpēēdsuel me:

—Gacxe waa, gni naa lo to gaṅle: Tsoḁe to zhgab diēṅ zha gban to lo guidzliu rii, pa griee pe gow to par gban to, pa gḁzielgaa ncuaaṅe gḁze xcuerp to. ²³ Mazd goḁconie guic to diēṅ zha gac xquielmban to, diēṅ pa tsiebannie to xcuerp to.

²⁴ 'Goḁwi lo grē nga gaṅle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuaaṅe row ma. ¡Tel to gon, mazdraa non to lo grē mguin co! ²⁵ Ni lalnu paat rquiinda tant tso to zhgab. Telne guiab to tso to zhgab diēṅ zha gacnool xtse to spalal yeēse, ¿niacxe zrieelo to guṅnool tow? ²⁶ Naṅle to gaṅle led ncuaaṅe grieeḁod ga. ¿Pe nac dzigo tant tso to zhgab ncuaaṅe mazdraa nroob? ²⁷ Zig nac lar, ¿pe nacne tant tso to zhgab diēṅ pe gacwxab to? Pe rwide to lo grē guiee dzil ne gaṅle zēēb dan, zha rrooba, niow rluw, ni led yeda rio zhgab diēṅ zha gacwxaba; ni gni naa lo to gaṅle, per ni rey Salomón con grē xab niazh me, blud me scataa niow. ²⁸ Gase na gaṅle goḁwi, niicxe grē guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa; ¿pe lel to dzigo ygacwxabd me, niicle ne squi gard guieṅ to dib zdoo to gnalo to me?

²⁹ 'Tsodraa to zhgab sca, guiab to: “¿Pa griee pe dioow ne, pa griee pe dio ne?” ³⁰ Grē miech ne runbeyd Dios, tibaque zhgab co rio zho. Sangue to, golsoladz gaṅle Pxoḁ to meṅ ne zob gbaa, naṅle me pe nac grē xliaadz to. ³¹ Me nac meṅ ne gneedz ncuaaṅe yquuin to, per ib none glo tsoxco to gban to zigne rnabey me.

³² 'Nli zhis to, pale tib dzoon win mēcwxiiil yeēṅ, per gḁziebde to. Sac niicle zhis to, per rley Pxoḁ to meṅ ne zob gbaa, laa me rneedz grēse ncuaaṅe rap me lo to. ³³ Gacxe waa, laa ne tsonie guic to diēṅ zha gacnroob ncuaaṅe rap to, miṅe quianie to goḁtow, dzigo goldeed dimi co yquuin zha ne rappaa liaadz; zeēna sca nroobraa guielnzaac ne yгаа to gbaa. Guielnzaac cosi, led yeda nitlo, led yeda grē, led yeda tsoxtseeb lo ngbaan, tsoxtseebgaa lo mxil.

³⁴ 'Sca goḁguṅ, sac gon guielnzaac ne guṅlo to, zaatne guṅlo tow, ga gdzin to.

¡Nsin goḁso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ 'Nsin sca goḁso —rēb me lo zho—. ³⁶ Goḁgac zig tib ngundziin ne rquiambēz gbire meṅ ne rnabey zho zeēne pa rie me tib lo guieltsieel. Nsin rzo zho, zigne rdzin me, rxal zho ro yu rzēēb me.

³⁷ 'Dichos zha ne nsin zo zeēne laa meṅ ne rnabey zho glanso. Ib tedsod, steed me zho nēz leṅ yu, soob me zho lo mezh, csilo me mezhāl gḁziib ncuaaṅe gow zho. ³⁸ Nligaa dichos zha ne sca nsin so, horne glansotaa me; niicle tel wxiṅa, ziadyiinigaa liuw. ³⁹ Goḁgan gaṅle, tel niaca miṅe gacnaṅ miech laa ngbaan tsieban lidz zho guieel, per naṅd zho diēṅ pa horpaaw, ¿niacxe zaaguies zho? Led sobna zho lēē, nsin nsin so zho parne csaand zho sēēb ngbaan lidz zho. ⁴⁰ Scaque to nagon, none sca nsin so to, sac gon lega naclew zeēne gaṅ to laa Mgui ne pxeel Dios ziaadle.

⁴¹ Zeēne blozh sca bnee me, rēbchaā Pedr lo me:

—Maestro, miṅe blozh bnee luu i, ¿pe par nose naca, te ye par grēraa miecha ye?

⁴² Pquiab me rēb me:

—Laaw rne naa, par grēse zha ne zienie guic zaacse guṅ zho miṅe

rnee men ne rnabey zho. Nli-gaa nsin none so zho, sac laa zho guiaan nie zha ne nacgrê zho; zig riaan nie tib ngundziin sangundziin zho parne gdeed zho ncuane gow zho.

⁴³ 'Dichos zho, telne ine niowse noyūn zho dziin co zeene laa men ne rnabey zho glanso. ⁴⁴ Zeene gan mew, ib tedsod so me zho, zha gnabey grêse ncuane quianie me. ⁴⁵ Per tel tsienie wguīt guic zho guiab zho gbireniobd me, csilo zho lel csacsi zho grê zha ne biaan nie zho, tso zho loxaque gowcho zho, loxaque gzudz zho, ⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonêz me zho guey zho zaatne no grêraa zha ne rond diidz. Nroob caxtigw ne cteed me zho.

⁴⁷ 'Sac gon zha ne sca nanle pe nac mine racladz men ne rnabey zho, ni tsoxcd zho gun zhow; ible nroob nac caxtigw ne ted zho. ⁴⁸ Mazd lëetaa caxtigw ted zha ne peet nand, niicle gund zho mine rnabey me. Grêse zha ne nanle pe nac mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ct-sire zho.

⁴⁹ 'Niina ne laa naa zial, rrieequia zialzobgui naa lo guidzliu. iNi zoot naa gon, tebaa ranle naa laaw quiayazbel! iTebaa psiaalle naa lo dziin ne zialgun naa! ⁵⁰ Per na naraa none teed naa tib guielne nroob, ni mbanse gon rac zdoo naa quiambêz naa gdzin dze co. ⁵¹ iMasaque nan to na lëe, laa naa zial loxaque par cuin wense miech? Lëda gon, ye zial naa zialgunctil naa zho. ⁵² Sac desde len dze rii, yu ne no gaay miech, laa zho ctsolsa. Tel sëeb chop zho xnêz naa, laa stson zha ne guiaan ga, ctsidil zho; tel sëebga tson zho, scaque grop zha ne guiaan ga, gandzed zho zho. ⁵³ Mëed ne

gan laa pxoz zho, laa xniaagaa zho bzëeb xnêz naa, gandzed zho pxoz zho, gandzed zho xniaa zho; scaquegaa zha ne quianie mëda, zeene gan zho laa xingan zho, laa xindzoopgaa zho bzëeb xnêz naa, gandzed zho zho. Zha ne nac nguzhizha, zlëenie xniaa tsiel zho zho; tel xniaagaa tsiel zhow, zlëenie zho me.

⁵⁴ Blozhse sca bnee me, rëbchaa me lo grê miech ne ndxie ga:

—iPe nlipaa rnee to riende to pe nac grê ncuane noyac len dze rii! Zha zeene ran to rquia xcow nêz ne rzëeb ngbidz, znuse rien to laa guie guiab. ⁵⁵ Zeene rangaa to ziaad me nêz ne rzë ngbidz len mëe nal, nanle to laa nêeg gac. ⁵⁶ iGuieiwquiaalo i lo to gon! Zha zëeb dzigo runbey to grê señ ne rlu zhan gbaa, rlugaa lo guidzliu, laa grê mine quiayan to len dze rii riende to.

⁵⁷ 'iNone guien to tozhal cobey dien pe nac mine nonguie l gun to! ⁵⁸ Gzoob ne bdilnie to tib samiech to, laa to nole nêz zie to lo wxtis grop to. None guien to, laga no to nêz mazd golguiaan mpas, lëdle tsiezo zho to lo wxtis; sac tel laa to gdzin lo wxtis, ib znabey wxtis zha ne co to ladzguiib. ⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grêse miech, ngoopdol nac zho

¹ Len dze co, bdzin bla zho lo Jesús bzodiidz zho lo me zha bnabey Pilat gut bla zha Galilé, lëetse zeene no zho len yadoo noyut zho ma ne nogogon zho lo Dios. ² Dzigo rëbchaa Jesús lo zho:

—Segur na lëe, rëb to mazdraa ngoopdol grê zha co lo grêraa zha ne no nêz Galilé, gane sca bdzieelo zho. ³ iLëda gon! Zigtaa ngoopdol zha co, scaque to ngoopdol nac to; telne csaande to xquie lntseeb

to gbig to lo Dios, ye to znitlo to.
⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho. ⁵ Per gacnan to ganle, jläda! jZig rne naa ga, ye to miech ngoopdol nac to, ni telne csaande to xquielntseeb to gbig to lo Dios, ye to zdziñ dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, ⁷ dzigo bnabey me zha ne quianap liu co cchuggazh zhow, rëb me: “jPchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.” ⁸ Dzigo pquiab zha ne quia dziin lo me ga, rëb zho: “Psaan dieñ guiaaṇa stibtaa iz rii, na laa naa glë zhana, na laa naa gdziñ beeba. ⁹ Telne yquiadaque nex low iz ne ziaad, maase cchug new dzigo.”

*Biac tib zhuz ne nosacsi mendox
(Mt. 13:31-33; Mr. 4:30-32)*

¹⁰ Tib dze ne rdziiladz zha Israel lo dziina, bdziñ Jesús len yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi mendox me, ib gacd gacnli me. ¹² Zeene gon Jesús me, dzigo bredz me me, pxobnia me guic me, rëb me lo me:

—jNiinagazh gon, laa luu guiac!

¹³ jHorcogazh laa zhits me ga gocnli, rley me, psilo me rdeed me xquizh lo Dios! ¹⁴ Laa zha ne rnabey yadoo, zeene gon zho sca beenguiaac Jesús me dze co, blëë zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len

dze ne rac dziin, jled tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—jNazdpaa ntseeb to! Rquiaalo to ib peet dziin runde to dze rii. jPezhe ga waa run to zeene rsilaa to xcon to, rsilaa to xpurr to dze rii rieguie to ma nis? ¹⁶ Zha nac dzigo rzac to, nonguielda nu ben naa beenguiaac naa wnaa rii, dze rii. Golwi ganle zha xti Abraham nac me, len tsiimtson iz goc sca nosacsi mendox me.

¹⁷ Zha ne rlëë ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—jZha ganle racnroob lo xtsiin Dios lo guidzliu rii? ¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zatne racnwiw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ Ziaadaque gon gaca, zig ncobi.

²¹ Sac tel ncobiw, niipaquew rcots men wnaa tson lmud rin, ni dib nase ncob co rzibe.

Zha ne ycaania Dios

(Mt. 7:13-14, 21-23)

²² Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina. ²³ Tib vuelt bnabdiidz tib zho lo me, dieñ pe zhis nac miech ne ycaania Dios. Dzigo pquiab me rëb me:

²⁴ —Nligaa zhis zho, sac masaque naca zig tib puert niase. Goltsocxo sca niinasraa golsëëb xnëz me ycaania me to, sac zdziñ dze ne nzian zho gacladz sëëb, per grielodraaw. ²⁵ Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cxal me ro yu sëëb to, per cxaldraa mew. “Runbeyd naa to”, gnë me, “nañd naa dieñ cho zha to.” ²⁶ Niicle guiab to

runbey me to, biaadpaa me ladz to pseed me miech, haxta downie to me. ²⁷ “Laa naa nile”, gnè me, “runbeyd naa to. jGuñneetraa to naa, ib rdziguieend naa grè miech yozh, miech ngoopdol ne nac to!”

²⁸ Mban gac to zeene gan to laa Abraham, laa Isaac, laa Jacob ni grèraa zha ne biadteed xtiidz Dios, laa me pcaania zho, laa to biaanse nèz ley. Nligaa mbandox gac to, zoon to, haxta zow lay to lo guieInè co. ²⁹ Ni mazdraaw gon, zeene gan to pa lo guidzliu brieè grè miech ne bdziñ ga, ine zobnie me zho lo xmez h me noyownie me zho. ³⁰ Grè zha ne rzac to niina peet nond, lèetse zha co yгаа guieInzaac co; laa grè zha ne rzac non zho niina, peet ygad zho.

*Bzeet Jesús zha nac zha Jerusalén
(Mt. 23:37-39)*

³¹ Dze coquew, bdziñ bla zha farisé rëb zho lo Jesús grieeniob me ga, sac laa Herod racladz gut me. ³² Dzigo rëbchaa me lo zho:

—Goltsie golguiab lo mēz win co cxecw me spalal, nadzese ni gzhe gunguiac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guieIndle naa nu. ³³ jNligaa nadzesew ni gzhe, widz laa naa gdziñle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ jAque tow men Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grè zha ne rxeeł me lo to? Blactaa gocladz naa niacnie naa to, nquiianaap naa to zig run nguid rgueedz ma xpëed ma, per bzhiguielde to. ³⁵ Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “jzha ndzontaa men qui pxeel Dios lo ne!”

14

Biac tib men ne rrieè gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdzinaque tib men bgui, rzacnè me, gdipse me no gui. Grèraa zha farisé ne ndxie ga, quialeets zho Jesús quiambëz zho dien pe zunguiac me mgui co. ³ Dzigo rëbchaa Jesús lo zho, ni lo grè maistr ley ne ndxie ga:

—Golnè dien, ¿pe nonguiela gunguiac naa miech dze rii, te nonguiel da ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, ⁵ rëbchaa me lo zho:

—¿Pe nli na peet dziin runde to dze rii? Tel zha tsietsobe tib xpëed to, tib xmagaa to tib len guiuu dze rii, ¿niacxe tsiebeegazhde to xpëed to, tsiebeegazhdgaa to xma to ga?

⁶ Loxaque lo zho rac, ib bdzielid zho pe nquiab zho.

⁷ Grèraa miech ne nodziñ ga, no zho rguib zho dien zha yгаа zho zaatne nzhixcuaraa sob zho. Gon Jesús zha rac zho, dzigo bnee me lo zho, rëb me:

⁸ —Golguien gon, zeene znu cuedz miech to, zig nac tsie to tib wagw zaatne noyac tib guiełtsieel, ib gunde tsiesob to zaatne nzhixcuaraa. Sac gon, nenda glanso tib zha ne nonraa lo to, ⁹ lozh ga, laa zha ne bredz to lo lni guiaadliso to ga, gnè zho: “Guso i dien sob men rii.” Led tib guiełto ga par to, racse to laa to tsieso ga, tsiesob to zaatne rialle ro beel. ¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaadxi zho to tsiesobnie zho to zaatne nzhixcuua. Zha ne zoble lo mezh ga, zeene gan zhow, zianzniu to lo

zho. ¹¹ Gol̄soladz gan̄le: gr̄e zha ne l̄ēeque zha run̄non zho, lēl̄ r̄iaaṅwin zho; laa zha ne r̄iaaṅwin, run̄non miech zho.

¹² Blozh ga, r̄eb̄chaa me lo men̄ ne nac lidz ga:

—Scaque luu gon̄, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo gr̄egaa zha ne no gax lidz luu zha ne rapchense, zha cose cuedz luu; sac gon̄ ib ted-sod zbedzaque zho luu lo zhilni zho, stsire zho miṅe beṅ luu ga.

¹³ Mazd bredz gr̄ese miech, zig nac zha ne guiend pe yquiin, zig nac zha ne guiend tib n̄ia, zha ne guiend tib ni, zha ne rold̄gaa lo;

¹⁴ zeena gal̄ dze ne grieegan gr̄e zha ne bioxco wban zigne racladz Dios, ine gley luu yгаа luu guieln̄zaac ne tsieguial̄ luu gneedz me lo luu.

¹⁵ Lad zha ne zobgr̄e me lo mezh ga, p̄quiab tib zho r̄eb̄:

—jDichos gr̄e zha ne sca yгаа tsiesob lo mezh, tsietownie zho Dios zaatne rnabey me!

¹⁶ P̄quiab Jesús r̄eb̄ me:

—Tib men̄ name, nzian zha ne bredz me tsie tib wagw lidz me.

¹⁷ Zeene gol̄ dze ne laa guiel̄wagw co gac, p̄xeel̄ me tib zhingundziin me ziexi gr̄e zha co. ¹⁸ Per pas̄e zho nie, zhaase zhaase n̄cuaaṅe p̄quiaqui zho. Tib zho r̄eb̄: “Grieelod s̄e naa, sac laa naa p̄ca tib l̄ē liu, ni l̄ēetse nadze no gaso naa low; bzhiguiel̄ gudz lo me guṅ me naa dispensar.” ¹⁹ Stib zho r̄eb̄: “Niina wriin̄ p̄ca naa gaay n̄ez ngon, laa naa n̄o ganie ma dien̄ zha ruṅ ma dziin, gudz lo me yquiamb̄ezd me naa.”

²⁰ Laa stib zho r̄eb̄: “Grieelod s̄e naa, sac niina wriin̄ ptsieeln̄ia naa, bzhiguiel̄ gudz lo me gac̄d̄ guial̄ naa.”

²¹ Bdzin̄ ngundziin co bzodiidz zho lo me zha rz̄e xtiidz gr̄e zha co. Zeene bin̄ mew, wbin̄ladz guic me, bnabey me zho güey zho

dib lad guiedz güeyxi zho gr̄e zha ne guiend pe yquiin, gr̄e zha ne guiend n̄ia, zha ne guiend ni, zha ne rold̄ lo, gr̄ese zho bdziṅnie zho ga. ²² Blozh ga, r̄eb̄chaa zho lo me: “Laa naa wbirele xmandad luu gon̄, per scase noraa zaatne cue miech.” ²³ Dzigo p̄xeel̄ me zho stib, r̄eb̄ me: “Güey dib ro guiedz, zha ne gdzieeltaa luu, d̄enie zho n̄ez rii, bloo guic zho guiaad zho; ib none tsodz̄ese miech lidz naa. ²⁴ Sac gr̄e zha ne bredz naa glo ga, ni lalnu racladzdraa naa yгаа zho guiel̄wagw rii.”

*Zha ne racladz s̄ēeb̄ xn̄ez Jesús
(Mt. 10:37-38)*

²⁵ Laa Jesús no n̄ez zie me n̄ez Jerusal̄en, miech guizhiu ne nal̄ zhits me. Tibaque ptsire lo me bui me lo gr̄e miech co, r̄eb̄ me lo zho:

²⁶—Lo gr̄e to ne ziaadnal̄ to zhits naa, gacnaṅ to gan̄le zha ne racladz ygab xn̄ez naa, ib none gleynie zho miṅe rnabey naa. Sac zha ne mazdraa r̄leynie p̄xoz, mazdraa r̄leynie xn̄iaa, mazdragaa r̄leynie zho tsieel̄ zho, xp̄ēed̄ zho, bets zho, bziangaa zho, x̄quiel̄mban zhow, r̄quia zdoo zhow, peet x̄tsiind̄ gr̄e zha co par s̄ēeb̄ zho xn̄ez naa.

²⁷ Sac ni tib zha ne sca yquia zdoo cueeladz zho zho guiaadnal̄ zho zhits naa, grieelod ygab zho lo naa.

²⁸ Antes ne yquiabladz to s̄ēeb̄ to xn̄ez naa, none wen wen sob to dien̄ pe z̄l̄eb̄ to ted to miṅe rieguial̄ to. Zig nacse tib zha ne gzaa tib yu glaa ne gac chop tson̄ x̄cuua, led rzobgazh zho r̄bee zho cuent dien̄ pe zgaa x̄timi zho tsaalow. ²⁹ Sac gon̄ nenda loxaque cueeze zhow, ni lozh ga grieelod gzaalo zhow. Miech ne gaṅa laa zho gzhidzn̄ie zho, ³⁰ guiab zho: “Gol̄wi lo zha qui gan̄le, loxaque bleeze zho lidz zho, na bl̄eb̄d zho nzaalo zhow.”

³¹ Scaque rey ne no til̄nie stib rey, led none sobgazh zho gaṅ zho dien̄

pe zleëb tsii mil xmen̄guiib zho tsi-
etil̄nie gal̄ mil xmen̄guiib stib rey co.
32 Tel̄ne rgobey me lëbd me, laga bii
zit̄ ziaad stib rey co, rxeel̄ me bla
zha ne tsie tsienee dien̄ zha gataa
cuëz lo xtil̄ zho.

33 'Scaque to nagon̄ none glo gwi
to pe nac grë ncuaāne no csaan
to, parne grieelo ygab to xnëz naa.
34 Sac gon̄ zed ne nzhid, çpa dien̄
yquiina? 35 Per ni par gaca beeb
peet xtsiin̄da; min̄e ractaaw, laaw
rzaaab. Zha ne no liaadz guien̄ zho
pe rnee naa, yquiaadiag zhow.

15

*Zha rzac Dios zha ne zozit lo me
(Mt. 18:10-14)*

1 Zeene rseed Jesús miech, nzian
grë zha ne rtop dimi ne razh lo
zha Roma, ni grë zha ne rzoob
miech nac zha yozh, ye zho rbig
zho rquiaadiag zho zhiwseed me.
2 Nacne grë zha farisé ni grë maistr
ley, rneenë zho me, rnee zho lëda
ga run̄ me sca rtsieelsa me grë zha
co, rownie me zho. 3 Dzigo bnee me
lo zho, rëb me:

4 —Togase nadien̄, gzoob ne
quianie to tib gayoo mëcwxii, ni
lega naclew rziaab tib ma, çzha
dien̄ run̄ to? Led rsan̄ to ma ne
ndxie lo to ga lëë, laa to rie riëguib
to ma ne bziaab ga, haxta rdziel
to ma. 5 Zeene rdziel ma lo to,
lo guiel̄bley co haxta rxobyan̄ to
ma rdzinnie to ma ro yu. 6 Lëëlëd
rzodiidz tow lo zha ne ndzieeldiidz
to, lo zha ne no gax lidz to, sac rley
to laa xpëcwxii to brieequia. 7 Gni
naa lo to gan̄le, scadaa nagon̄ rzac
Dios, tib guiel̄bley nrooba lo me,
zeene ran̄ me laa tib zha ngoopdol̄
rsaana xquiel̄ntseeb, laa zho rbig lo
me. Ne nligaa tib guiel̄bley rac zha
co lo me, lëdle zha ne rzac miech
wenle nac zho lo me.

8 'Zig rzacgaa tib men̄ wnaa,
gzoob ne nzhen̄ me tsii gayoo pes,
ni lega naclew rsëëb me tib gay-
oow, çzha dien̄ run̄ me? Led hor

cogazh lëë rquiaa me biini, rsilo
me dzega dzega rloob me len̄ lidz
me haxta rdziel me dimi co. 9 Zeene
rdziel mew, rley me rzodiidz mew
lo grë zha ne ndzieeldiidz me, lo
grë zha ne no gax lidz me. 10 Zig rne
naa ga, scadaa nagon̄ rzac grë xanj̄l
Dios, tib guiel̄bley nrooba lo zho
zeene ran̄ zho laa tib zha ngoopdol̄
rsaana xquiel̄ntseeb, laa zho rbig lo
Dios.

11 Dzigo psilo Jesús bzodiidz me
tib cuent lo zho, rëb me:

—Tib men̄ name quianie me
chop mëëdbgui. 12 Tib dze, rëb zha
ne nac zha niab lo me: “Papá, tel̄
pe nac ncuaāne no gneedz luu lo
no, bzhiguiel̄ niinaga beengrol̄a,
zeena gneedz luu min̄e raguial̄
naa.” Dzigo beengrol̄ me ncuaāne
rap me, bdeed mew lo zho.

13 'Zhisaque goca, pto zha niab
co grëse ncuaāne bial̄ zho, brie
zho laa zho zie. Bdziñ zho stib
dan, ga been̄ zho grë guiel̄yozh ne
gocladztaa zho, grëse xtimi zho
pxin̄ zho ga. 14 Tibaque zeene laa
xtimi zho blozh, mbanse rac zho
guien̄draa pe gow zho, ni lëëtaque
len̄ dze co laa tib gbin psiloque nëz
co. 15 Dzigo racse zho güeyguib zho
dziin̄ lad guiedz co, ga brieequia
tib men̄ co bree zho, pxeel̄ me zho
yquiaanap zho nguts. 16 Lo gbin ne
noded zho ga, rzac zho tebaa cho
gdeed maase grë duuzhye dan ne
row grë nguts co gow zho, per ni
min̄ co choot rdeete lo zho.

17 'Sca no zho ga, tibaque zeene
biaa zho biini psoladz zho nzian
zha ne quia dziin̄ lo pxoz zho,
grë ncuaāne raclo row grë zha co,
haxta riaana, ni laa zho sca noded
ga; rëbchaa zho: 18 “Mazd min̄e
naca laa naa guia gdziin̄ naa lo
pxoz naa stib, guiep naa lo me gun̄
me naa perdon grëtaa falt ne ben̄
naa lo me, falt ne bengaa naa lo
Dios. 19 Maase sacdraa me naa zig
xpëëd me, siguiel̄ me ycaania me
naa gac naa zig tib zha ne quia

dziin lo me.”²⁰ Horco bio zho nêz laa zho zey nêz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

²¹ “Papá”, rêb zho lo me, “rien naa nroob falt ne ben naa lo Dios, bengaa naa lo luu. Riëguialdraa sac luu naa zig tib xpëed luu.”

²² “Ni blëzd me nlozh nee zho, lëelëd bredz me zha ne quia xtsiin me, rêb me: “iNa goltënie tib nêz lar wen nu gacw xpëed naa! iGoltënie tib nil wen tso nia me, tib nêz guielguid cub yquia ni me!”

²³ Bnabey me zho güeyxi zho tib ngon ne mazdraa ndaan, beet zho, rêb me: “iIb none gac tib lni, none dioow ne, none dio ne!”²⁴ iSac gon gun naa cuent, brieëban xpëed rii naa! iBnitle me ga, na laa me bdzziel!” iLaa lni psilo!

²⁵ iLni co noyac, zeene laa stib xpëed me zha ne nac zha gol ga, wbiro lo dziin dan. Bdzin zho gax ro yu, rlu rquia di, haxta wiee rlu noyac; ²⁶ dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac.

²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.”²⁸ Blëe zha gol co bin zhow, lo guielblëe co bzëëbd zho ro yu. Nacne brieë pxoz zho, bnee me lo zho sëëb zho ro yu.

²⁹ Dzigo rëbchaa zho lo me: “iLëdraaw i gon papá noyun luu! Bui ganle blactaa iz ne quiayun naa dziin lo luu, wlaltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiiz naa.

³⁰ Cho dzigo nac zha qui, blozhse güeyloozh zho xtimi luu lo grëtaa guielyozh ne been zho, na no luu beet luu ngon ne mazdraa ndaan, noyun luu zhilni zho.”³¹ Dzigo

rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuuaane quianie naa, luu guiaanniew.³² Per niina ne laa bets luu blanso, ib nonguiela znu dziuun ne tib lni gleyne ne me; sac gon bnit me, ni na laa me bdzziel. iDziuun ne cuent brieëban me nu!”

16

Ligier miech par lo guielntseeb

¹ Tib vuelt bzodiidz Jesús tib cuent lo xpëëdsuel me, rêb me:

—Tib men name nroob rapchen me, quianie me tib zha ne zo lo grëtaa ncuuaane rap me; tib dzew, lega nacle bded diag me zhlian noxin zha co xtimi me. ² Dzigo bredz me zho, rêb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quiayun luu dziin; sac grielodraa so luu lo grë ncuuaane rap naa.”

³ iWbiro zho ga, rël zho: “Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaabgaa ne na ga naa gatop naa gon, rtoladz naa gnab naa gon lo miech.”⁴ Tibaque zeene biab guic zho rêb zho: “iLaa naa bienle zha gun naa, zeena tso zha ne gun xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnabdiidz zho lo zho dien palal nzëëb zho lo me. ⁶ Rêb zha co: “Tib gayoo tamb nceit nac mine nzëëb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuua stiba, pquiaa lo co, gröl tamba zëëb luu.”⁷ Bdzinaque stib zha co, bnabdiidz zho lo zho dien palal nac xquielqui zho lo men co. Zha co rëb zëëb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per

na zac ctsieez luu miñ rii, bzhix-
cuaa stiba, pquiaa lo co tapgalaque
saca zëeb luu.”

⁸ Zeene bien meñ co zha noyun
zho, bzee zdo me gon me scataa
ndzielguic zho. Ncuane ntoladza,
per grese miech ne zianañ ncuaan
lo guidzliu rii, ndzielguic zho par
gun zho gre guieñtseeb. Par miñ
co ndziibraa ndzielguic zho lo
zha ne no xnëz Dios. ⁹ Sangue
to gzoobladzde to gun to miñ co,
ncuane rap to lo guidzliu rii,
golquiina per par gun to xyudar
samiech to. Zeene laa ncuane co
gre, nenda zacnie zho to, per miñ
mazdraa non Diossi ible zacnie me
to, zneedz me tib lugar ndzon cuëz
to, led yedraa ga pe nitlo.

¹⁰ 'Zha ne ndzinli rundziin tel
palal yeense ncuane riaanne
zho, scaque ndzinli gundziin zhow
zeene guiaanne zho nrooba. Laa
zha ne ndzinlid, mine gun zho
zeene guiaanne zho ncuane zhis,
mincoque gun zho zeene guiaanne
zho ncuane nroob. ¹¹ Nana zha
ne sca gacñ ne ndzinlise gundziin
zho ncuane no lo guidzliu rii, zha
dzigo grielo gundziin zho ncuane
ndzon ne gdeed Dios lo zho zaatne
no me? ¹² Stiba, tel sca ndzinlide to
lo chen ben, zpe naczhe ncuane
gun to tib ncuane chenpaa to?
¹³ Golgona ganle, grielod gon
gleynie to dimi ni gleynieque Dios.
Ib none telne Dios rleynie to, me
none gleynie to, togo dimigaaw,
dimi golleynie.

¹⁴ Gre zha ne nac farisé zeene
gon zho sca rnee me, lel rzhidnie
zho me, sac tel zhaw rleyniedox
zho dimi. ¹⁵ Dzigo rëbchaa me lo
zho:

—Masaque rzac to nalëe nli
miech wen nac to nëz lo Dios,
sangue me gon, wen wen nan me
zha nac zdo to. Nli miech ne ran
to, zha wen rzoob zho to; sangue
Dios ni lalnu rzacd zdo me mine
run to.

¹⁶ 'Len dze ne gard guiaad Juan
Bautist, niapse xley Moisés ni gre
mine bnee zha ne biadteed xti-
idz Dios, miñ co nac mine güeynal
to. Per zeene psilo Juan pseed
me miech, desde hor co laa miech
quiayacnan stib mod ne grielo
ygaa zho zaatne rnabey Dios; gane
na nzian zha ne noxco ygaa lugar
co. ¹⁷ Per guiabde to togo non-
draa ley, sac grese mine zhubnee
lo ley, jib laaw none gac! jZig
nac guidzliu, zig nac gbaa zrieelo
nitlow, sangue ley nitloda, tibaque
naca! ¹⁸ Gacxe waa, gre zha bgui
ne rsëbtsieel niina ni rtsieelnia zho
stib wnaa, zha ne rtsieelniagaa tib
wnaa ne psëëbtsieel, dol ga quiayun
zho; zigtaa dola padzeela, scaque
niina dola.

Xcuent tib zha prob lë Lazh

¹⁹ 'Tib ricw name —rëb Jesús—,
niapse gre lar niazh racw me,
gzobse dze run me lni lidz me.
²⁰ Zaatne noque me ga, guiedz co
no tib zha prob lë Lazh, lala prob
me ni rlanaque me guiedz, gdipse
lad me noyacñ guiedz co. Riese
me riesob me ro lidz zha ricw co,
²¹ rquiambëz me dien pe grielod
gow me maase ncuane rrieng-
gaale lo xmezhe meñ co; ga zob me
haxta rdziñ gre mëcw rzëeludz ma
lo guiedz ne rlan me ga.

²² 'Bdziñ dzew laa Lazh gut,
dzigo biet xanjl Dios beynie zho
me lo Abraham, zaatne rdziñ gre
zha wen. Goc palal dzew, laa meñ
ricw co gutaque, blozhse pquianap
zho me, laa zho güeyqueets me;
²³ zeene biao me biini laa me nole
gabil. Lëbdraa me no me lo guieñe
co, lega naclew blis lo me, zit squi
gon me Abraham, laa Lazh zobnie
Abraham ga. ²⁴ Horco bnab me lo
Abraham siguiel Abraham cxeel
me Lazh, maase guic mzhugniase
Lazh yquiaa Lazh nis tsiegadz
Lazh lo ludz me; sac lëbdraa me
lo guidox ne no me ga. ²⁵ Dzigo
rëbchaa Abraham lo me: “Xin,

psoladz ganle zeene wban luu lo guidzliu, ncuuaane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnē qui. ²⁶ Stiba, zha ne no nēz rii gacd guiaad zho i, niicle zha ne nogaa iw, gacd guiaad zho nēz rii; sac no tib yeedox ne rtse.” ²⁷ “Bzhiguieļ sca”, rēb men ricw co, “pxeel Lazh tsie me lidz pxoz naa, ²⁸ tsienie me diidz lo zgaay bets naa zha ne biaan, guiab me lo zho ib guṅd zho miṅe beṅ naa, zeena guiaate zho nu ygaa zho lo guielnēdox rii.” ²⁹ Pquiabchaa Abraham, rēb Abraham: “Tel miṅcow, tsoṅw glab zho lo grē ley ne psan Moisés, lo grē miṅe bnee grē zha ne güeyteed xtiidz Dios, beṅque lo co zhobnee zha no gban zho.” ³⁰ “Nliw”, rēb me, “per tel squi tib men ne gutle tsie tsienie lo zho, rien naa znuse csaan zho xquielntseeb zho gbig zho lo Dios.” ³¹ Dzigo rēbchaa Abraham: “Telne rond zho miṅe rnabey grē ley ne psan Moisés, grē miṅe bnee zha ne güeyteed xtiidz Dios, scaque gond zho diidz niicle tsie tib zha ne brieebanle tsienie lo zho.”

17

Zha ne guṅctal xtol stib zho

(Mt. 18:6-7, 21-22; Mr. 9:42)

¹ Tib vuelt rēb Jesús lo xpēēdsuel me:

—Nac lo guidzliu rii, ib guṅfalte ncuuaane rgogui miech guṅctal zho xtol zho, i per probsaxe zha ne rquiiil samiech ruṅctal zho xtol zho! ² Mazd zhi guielnēw lo zho ygadoo tib quie molin zhobxtil yaṅ zho tsieron zho zho nisdoo, lēdle guielnēdox ne gaṅ zho; sac gon dol nroob ga guṅ zho yquiiil zho zha ndooladz ne no xnēz naa. ³ iGolguieṅ sca ndzinli golgacl! Tib bets tow, zeene pe tib falt guṅ zho lo to, golnee lo zho guṅdraa zhow;

telne gnab zho perdon, golguṅ zho perdon. ⁴ Niicle telne nzian vuelt sca guṅ zho falt lo luu tib dze, beṅ zho perdon zeene laa zho rbig rnab zho perdon lo luu.

⁵ Stib dzew, rēb zha ne rzēnie me lo me:

—Bneedz guielbiini lo no dib zdooraa no gnalo no Dios.

⁶ Pquiab me rēb me:

—Tel niaca miṅe gzoob ne rnalole to Dios siquier lal tib midz moxtaz, niicle ncuuaane mazdraa ngan gnab to lo me, zuṅ mew.

⁷ iPe ran to ganle, zha nac zha ne ruṅ xtiin beṅ? Zeene rbire zho dan, yase güey zho gon, güeygaa zho güeyquianap zho ma, pe li-aadz men ne quia zho xtiin ga, guiab me lo zho: “Na bded, bzob, zeena gowxtsee luu.” ⁸ Miṅe ruṅ me, gloque rnabey me zho guṅlo zho ncuuaane gowxtsee me, gdziib zhow lo me; rlozhraa row me, dzig-oraa rowxtsee zho. ⁹ Niicle scataa ron zho miṅe rnabey me, ni rlozh ga, per ni xquizh rdeete me lo zho. ¹⁰ Scaque to nagon, zeene lozh guṅ to grē dziin ne pso Dios to guṅ to, peet yquiambēzde to, golguieṅ tib nguṅdziinse nac to, miṅe rieguial to ga, miṅ co beṅ to.

Biac tsii zha ne rlan guiedz lepr

¹¹ Laa Jesús no nēz zie me nēz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé, ¹² zeene brieequia tsii zha ne rlan guiedz lepr. Zit zo zho, ¹³ nguiedz rbedz zho me, rnab zho lo me yquia zdoo me zho. ¹⁴ Zeene gon me zho, rēbchaa me lo zho:

—iGoltsie, goltsielulo lo pxoz, zeena gan zho ganle laa to biacle!

Dzigo laa zho zie. Nēz no zho laa zho biaanmbe lo guiedz co. ¹⁵⁻¹⁶ Lo gza zho, hor co rias tib zho wbiere, nguiedz rnee zho:

—iZha ndzontaa Dios! iGolwi ganle laa me beṅguiacle naa!

Zigne bdziñ zho lo Jesús, pqui-itsgzhìb zho lo me, haxta bdziñ lo zho lo liu, rdeed zho xquìzh lo me. Tib zha Samara, zha zit nac zho. ¹⁷ Dzigo rëbchaa Jesús:

—¿Yoraazhe grë zha co waa? Conque tsii zho name beenguiac naa. ¹⁸ ¿Tibaque zha zit rii dzigo lëë rzac zdoo mine beeng Dios lo zho?

¹⁹ Dzigo bliso me zha co ga, rëb me lo zho:

—Porne dib zdoo luu gon bnaloo luu Dios, gane biac luu. Bzë, peet tsieniedraa guic luu.

Zeene gbiire guiaad Mgui ne pxeel Dios

(Mt. 24:23-28, 36-41)

²⁰ Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnañ to ganle, nacd min co ncuane ganlopa miech. ²¹ Griee lod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

²² Bded ga, rëbchaa me lo xpëedscuel me:

—Zdziñ dze, gacladz to tebaa zha znu so naa lo to maase tibaque dze, per gacdraaw. ²³ Len dze co, zio zha ne gnë lo to: “Golte ganle laa Mgui ne pxeel Dios bdziñ nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho. ²⁴ Sac zeene gbiire guial naa, grëse miech gana. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëëb ngbidz, ¿niacxe gand grëse miecha? ²⁵ Per ansraa ne gac min co, ible nroob guielnë ne cteed miech rii naa, ni lalnu gandzed zho naa. ²⁶⁻²⁷ Len dze ne guial naa ga, grë miech ne ndxie lo guidzliu gal hor co, zhaa grë ncuane tsonie guic zho. Rsoladz to ganle zha rac miech len dze ne biaad Noé, lel lo grë zhilni zho no zho, zha ne notsieelnia,

zha ne nobediñ xpëed, tibaque zeene baa zho biini laa guiedox co psilole. Laa Noé nole len barcw, laa zho biaan grëse zho bnitlo lo nis co. Scadaa nagon no miech len dze ne guial naa. ²⁸ Zig racgaa miech Sodom len dze ne brie Lot ga. Scaque, loxaque ncuane lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz. ²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co. ³⁰ Scapaa nagon rac miech ne ndxie lo guidzliu len dze ne laa naa guial.

³¹ Zha ne lëëtaque hor co no glaa guic yu, ib guiabd zho sëëb zho len yu tsiebee zho ncuane no len lidz zho, zha ne quiagaa lo dziin dana, ib guiabd zho gbi zho guey zho ro yu. ³² ¿Golsoladz ganle zha bzhaac wnaa ne goc tsieel Lot! ³³ Grëse miech, zha ne sca rquianë zdoo grë ncuane rap zho, ible znitlo zho xquielmban zho; sangue zha ne rquiad zdoo grë ncuane co, haxta xquielmban zho rbeeladz zhow, nitlod zho. ³⁴ Gal hor co, zaatne tipse nixguies chop zho, tib zho sënal zhits naa, laa stib zho guiaa. ³⁵⁻³⁶ Zaatne tipse quia yot chop wnaa, zaatne tipsegaa quia chop mgui lo dziin dana, tib zho sënal zhits naa, laa stib zho guiaa.

³⁷ Dzigo rëbchaa xpëedscuel me lo me:

—¿Pa lo dzigo gdziñ grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdziñ ma.

18

Zha ne rnaab lo Dios

¹⁻² Stib dzew, bzodiidz Jesús tib cuent lo xpëedscuel me, par guien

zho ib guiaand zdoo zho zeene racniobd miñe quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdoo me samiech me, per ni Dios rdziebd me. ³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëe lo zhuz. ⁴⁻⁵ Glo ib rquiaadiagd me miñe rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guiadgunneetraa me naa, miñe naca mazd laa naa gun guielwxtis ne rnab me.”

⁶ Blozhse bzodiidz Jesús cuent co, rëbchaa me lo zho:

—Telne sca bdziñ dze ne pquiadiag zha ntseeb co miñe bnab wnaa viud co, ⁷ ¿pe leñ Dios dzigo yquiaadiagd xtiidz zha ne ngab lo me, tel tibaque gnab zho miñe racladz zho? ⁸ ¡Nligaa, ib tedsod zun me miñe rnab zho! Per segur zhis zho quiambëz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdoo zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. ¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig naccse zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa. ¹² Haxta chop vult rcuan naa tib len zhamal, grëse ncuane run naa gan, run naaw tsiilal, rnedz naa tib laal miñe rieguial luu.” ¹³ Laa zha

ne rtop dimi ne razh Roma ga, gaxaque ga zo zho, per nquitsrunse zho liu. Mban rac zho, quia se nia zho zdoo zho, rnee zho lo Dios: “¡Dios, rnab naa lo luu pquia zdoo naa znutaa miech ngoopdol nac naa!”

¹⁴ ‘Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëeque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mëedlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdziñnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, leñ psilo zho ndox zho lo grë zha ne bdziñnie grë mëedlas co. ¹⁶ Zeene gon me sca quiaayun zho, dzigo bredz me zho, rëb me lo zho:

—¡Tsirede to grë mëedlas yeen qui! ¡Golsaan guiaad win lo naa! Sac gon grë mëedlas yeen qui, ni zha ne nac zig nac win, zha co nac zha ne sëeb ygab lo Dios. ¹⁷ Nligaa zha ne gacndooladz, zha ne gliladz dib zdoo, zigne run grë mëedlas, grielod gdziñ zho zaatne rnabey Dios.

Ncuane run dimi

(Mt. 19:16-30; Mr. 10:17-31)

¹⁸ Tib vult, wbig tib men ne nac zha non lo men guiedz Israel, rëb me lo Jesús:

—Nan naa luu nac tib men ne noseed miech, ni tib men wen nac luu, ¿bnë lo naa dien, pe nac miñe gun naa parne grielo ygaa naa guielmban ndzon ne gdziñ dze lozh?

¹⁹ Pquiab Jesús rëb me:

—Rnee luu lëe tib miech wen nac naa. ¡Nligaaw, Diosse gon nac men wen! ²⁰ Telne nli racladz luu ygaa luu guielmban co, none tsoxco luu gban luu zigne nac Xley Dios. Nanle luu ganle zha naca, rnee w:

Tsonied luu zha ne led tsieeld luu, gute luu samiech luu, cuand luu samiech luu, yquidiidzguizhd luu samiech luu. Gon pxoz luu, gon xnгаа luu, cueed luu xquielto me.

²¹ Dzigo rēbchaa men co:

—Maestro, grēse mine bzeet luu i, ni tiba gard quits naa wlal ne nac naa zha nguieg.

²² Horco rēb Jesús lo me:

—Stibaque mine rquiin gun luu. Güey, güeyto grēse ncuane quianie luu, dzigo bdiiz dimi co lo grē zha mban ne guieḡd pe yquiin; sca nroobraa guieḡnzaac ne yгаа luu gbaa. Lozh ga, dē, dēnal zhits naa.

²³ Zeene bin men co sca rēb Jesús, mbanse rac me laa me zey; sac nroob ncuane quianie me.

²⁴ Dzigo rēbchaa Jesús lo xpēēdsuel me:

—jZha nganta lēē, rzac zha ne squi rapchen sēēb zho xnēz Dios gnabey me zho! ²⁵ Mazd ngandse rded tib camell guieer guzh.

²⁶ Grē zha ne ndxie ga, zeene bin zho sca rēb me, rneechaa zho:

—Telne scataa ngan sēēb miech xnēz Dios, ¿choseszhe dzigo waa nac zha ne zrieelo sēēb xnēz me?

²⁷ Dzigo rēbchaa Jesús:

—Nligaa par miech, zootle tsod zha ne grieelo sēēb xnēz me; sangue me nan me no zho. Sac tel me, tsod ncuane grieelod gun me.

²⁸ Horco pquiab Pedr, rēb Pedr lo me:

—Tel no, grē ncuane rdziaapse no psan now, laa no ziaadnal zhits luu.

²⁹ Pquiab me rēb me:

—Golgacnana ganle, grēse zha ne psan lidz, psan zho tsieel zho, psan zho xpēēd zho, psan zho pxoz zho, psan zho xnгаа zho, psan zho bets zho, bziangaa zho, porne bzēēb zho xnēz Dios, ³⁰ na lo guieḡmban riique, mazdraa nroob mine gan zho, ni lozh ga ib tedsod zgaa zho guieḡmban ndzon ne gdziḡndraa dze lozh.

Bzeet Jesús stib zha csacsi miech me

(Mt. 20:17-19; Mr. 10:32-34)

³¹ Ne sca no Jesús nēz zie me nēz Jerusalén, tibaque bredz me gza tsiipchop zha ne rzēniepaa me ga, bzeet me lo zho zha gun miech me, rēb me:

—Grēse mine bzeetle zha ne biadteed xtiidz Dios padzeela teed naa, niina ne laa ne gdzin Jerusalén, laaw gac cumplir. ³² Ga gnaaz zho naa, tsielo zho naa ladznia grē zha ne nacdraa zha Israel, xidznie zho naa, squiaago zho naa, stsuc zho lo naa, ³³ zguin zho naa, ni haxta zut zho naa. Per zeene gac tson ngbidza, zriebaan naa.

³⁴ Per ib biend zho dien zha nacne sca rnee me.

Biac tib zha ne rold lo

(Mt. 20:29-34; Mr. 10:46-52)

³⁵ Laa Jesús bzēēb ro guiedz Jericó, miech guizhiu ne nal zhits me. Ro nēz co zob tib men ne rold lo, rnab me gon. ³⁶ Zeene bien me rlu nzian miech noded ga, dzigo bnabdiidz me dien pe nacne scataa ziaad grē miech co ga.

³⁷ Dzigo rēb zho lo me, Jesús, men Nazaret ziaad ga, zhits me ziaadnal grē miech co. ³⁸ Horco psilo me nguiedz rbedz me, rnee me:

—jJesús, men xtii rey David, pquia zdoo naa!

³⁹ Grē zha ne ner, psilo zho ndox zho lo me parne guioog ro me, per lel hor cole nguiezdraa rbedz me Jesús, rnab me yquia zdoo Jesús me. ⁴⁰ Nacne zeene bdzin Jesús gax zaatne zob me, blēz Jesús, bnabey Jesús güeyxi zho me. Bdzin me lo Jesús, rēbchaa Jesús lo me:

⁴¹ —¿Pe nadien gun luu naa?

Pquiab me rēb me:

—jRacladz naa guiac lo naa!

⁴² Dzigo rēbchaa Jesús:

—jNiinagazh gon laa luu gan stib! Laa luu biac, sacne dib zdoo luu bnal luu naa.

⁴³ Horcogazh laa men co psilo bui, ine rley me roolnie me Dios, laa me zienal zhits Jesús. Haxta grè miech ne zienal ga, zeene gon zhow, ye zho roolnie zho Dios.

19

Güey Jesús lidz tib men læ Zaquew

¹⁻² Guiedz Jericó, ga no tib men ne rnabey lo grè zha ne rtop dimi ne razh lo rey Roma, læ me Zaquew. Zeene laa Jesús zieded lad guiedz co, ³ briece me, ziewi me, sac racladz me gunbey me Jesús. Bdzin me, pasëse me gan me Jesús, sac lala miech guizhiu ne nal zhits Jesús, ni lala ndopse me. ⁴ Miñe been me, rias me bdedner me güeytsep me tib lo yag guigw zob ro nöz co, par gdeeda diidza gan me Jesús, zeene laa Jesús ted ga. ⁵ Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuöz naa nadze.

⁶ Rley Zaquew gon Zaquew sca rëb Jesús, lælëd biet me lo yag co, laa me zienie Jesús nöz lidz me.

⁷ Zeene gon grè miech cow, rlëe zho, rnee zho:

—iPe læëtaa lidz zha ngoopdol qui zieböz me!

⁸ Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnan luu gon, lo grè ncuane rap naa, laa naa gded grola ygaaz lo grè zha ne guiend pe yquuin, ni tel nogaa zha ne ndziibraa miñe beenquizh naa zho, naa maase ctsiree naa tap lal miñe blan naa zho ga.

⁹ Horco pquiab Jesús, rëb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xtii Abraham nac me, per bzonziaab me ¹⁰ ni naa ne nac naa

Mgui ne pxeel Dios, ible laa naa zial zialsilaa naa grè zha ne zonziaab.

Zha ne biaanmie dimi

¹¹ Grè miech ne zienal zhits Jesús ga, rzac zho zigne laa me gdzin Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

¹² —Tib xpëed zha non name, no me tib guiedz win, nacle didza laa me no tsie zaatne zob men nroob ne rnabey, parne gzo zho me gac me rey guiedz ne no me ga. ¹³ Zeene laa dze co bdzin, dzigo bredz me tsii zha ne quia xtsiin me, nroob dimi ne psan me lo zho tib tib zho, parne gundziin zhow, mientras gbire me.

¹⁴ Nzianlaa zha ladz me, rlëe zho ran zho me, dzigo pxeel zho bla zha ne güey lo men ne rnabey ne zie me ga, güeynab zho gdeete men co dziin co lo me. ¹⁵ Per niicle sca güey grè zha co, peet brieelod niun zho. Blozhse bzo rey co me, laa me bdzin ladz me. Zeene bdzin me, bredz me gza zha ne biaanmie xtimi me ga, par dien palal ziyaca. ¹⁶ Bdzin tib zho, rëb zho: “Laa xtimi luu nu gon, tsii lal miñe psan luu ga naca niina.” ¹⁷ Rley me rëb me lo zho: “iZha squi nagon racladz naa! iWen brieequia xtsiin luu! Niicle zhis ncuane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz.” ¹⁸ Bdzin stib zho, rëb zho: “Laa xtimi luu nu gon, gaay lal miñe psan luy lo naa ga naca niina.” ¹⁹ Scaue rley me. Bzo me zho gnabey zho gaay guiedz. ²⁰⁻²¹ Zeene bdziintaa tib zho, rëb zho: “Nli bendziind naa xtimi luu, sac nanle naa zha nac luu, niicle paraa niundziin naaw, grëse miñe niuna gan lo luu ni-aana; gane mazd pquia naaw tib læ lo lar, blootsow naaw, ledaaw nu.” ²² Blëe guic me, rëb me lo zho: “iBiche nu, paat rquiind naa miech yozh ne squi nac! Conque

nanle luu zha nac naa, ²³ ¿pex nac dzigo waa bioxcod luu maase mbediinan luu dimi qui, ndziniaaw palal ncaania naaw niina?” ²⁴ Dzigo rëbchaa me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.” ²⁵ Pquiab zho rëb zho: “Per pe nacne zha coque ycaaniaw, ni nrooblew beenlo zho.” ²⁶ “Ib sca no gaca”, rëb me, “sac zha ne rien zha gundziin zho ncuane rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdiooba lo zho. ²⁷ Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho.”

Bdzin Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

²⁸ Blozhse bzodiidz Jesús cuent co lo zho, laa zho bio nëz stib, nerse me lo zho. ²⁹ Zeene bdzin zho gax Gui Oliv, zaatne ndxie guiedz Betfagé ni guiedz Betain, pxeel me chop xpëèdscuel me, ³⁰ rëb me lo zho:

—Goltsie guiedz win ne ndxie danse lo ne i. Ga gdzin to zaatne quiadoo tib burr yeen ne choot gard sob lad, dzigo golxadz ma, goltënie ma nu. ³¹ Tel cho gnabdidz lo to pe nacne noxadz to ma, golguiab lo zho: men ne rnabey ne, men co rquiin ma.

³² Laa zho zie. Bdzin zho, zaatne quiadoo burr co, ³³ nligaa, lëëtaque noxadz zho ma, zeene laa bizhuan ma bdzin.

—¿Pe gun to xpurr naa? —rëb me lo zho—. ¿Pe nacne noxadz to ma?

³⁴ Dzigo rëbchaa zho:

—Men ne rnabey ne, men co rquiin ma.

³⁵ Bdzinnie zho ma lo Jesús, pxob zho lar ne rbix zho lad ma, bzob me ma. ³⁶ Zigse zie me, no grë miech guizhiu co rta zho xab zho ro nëz rded burr ne zob me ga. ³⁷ Grëse miech co, rleynie zho me. Laa zho

xiuxto dze cho gui Oliv, zeene psilo zho nguiedz zëeb tsi zho, rley zho roolnie zho Dios, por grëtaa milagr ne ziyañ zho run Jesús; ³⁸ rnee zho:

—¿Nasi laa Dios pxeel zhirey ne! ¿Zha ndzontaa Dios! ¿Haxta gbaa noyac guielbley dze rii!

³⁹ Blalaa zha farisé ne zienal ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho. ⁴⁰ Dzigo rëbchaa me:

—¿Zac guioog ro zho, per hor co dzigo laa grë quie rii csilo goolniew naa!

⁴¹ Zeene bdzin me zaatne nieenpaa Jerusalén, psilo biab guielnë me, biin me gon me guiedz co, ⁴² rëb me:

—¿Prob to men Jerusalén! ¿Tebaa ye to nien niunbey to men ne needz guielbley rii lo to! Per na ib biende tow, masaque rzac to zig zha ne niioog lo. ⁴³ Na nagon laa dze co bdedle. Grë zha ne rlëe lo to, ible ziaad zho ziadsioog corral zho to, ni tib nëz tedlaade to lo zho, ⁴⁴ haxta guiab to ladznia zho, grë xpëèd to. Znitlo zho ladz to, nëzrii nëzrec glaał zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdzin me Jerusalén, güey me yadoo, psilo me blee me grëse zha ne noyun lgui ga, rëb me lo zho:

⁴⁶ —Znu zhubnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguiedz, quiaguib zho dien zha gdeeda diidz gut zho me. ⁴⁸ Per rdzielz zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

20

Bnabdiidz zho cho nac Jesús

(Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vuelst bdiin bla zha ne nac pxoz ne rnabey, grē zho bla maistr ley ni zla men ne nac men non lo menquiedz, ² rnabdiidz zho lo me dien cho nac me, cho rnabey me, zha nacne sca quiayun me. ³ Dzigo rēbchaa me lo zho:

—Ye naa laa naa gun tib w nabdiidz lo to. ⁴ Golnē dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to mine bnee Juan?” ⁶ Tel na dzieets-gaa ne, miechse pxeel Juan, grieequiadaque ne; zgoquie menquiedz ne, sac grēse zho riladz Dios pxeel Juan.

⁷ Dzigo mazd lēē gdib mine been zho, rēb zho nand zho dien cho pxeel Juan. ⁸ Nacne rēbchaa Jesús lo zho:

—Niicle naagaa nagon, grieelod gni naa lo to cho rnabey naa quiayun naa grē min rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grē miech co. Bzodiidz me tib cuent rii lo zho, rēb me:

—Tib men name, nroob lbē uv beenni me lo liun me. Blozh ga blediin me liu co lo bla zha ne ran liu, dzigo laa me brieē ga, zey me stib dan.

¹⁰ Zeene gol mēē ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiin zho

zho, blozh ga scase bzonēz zho zho. ¹¹ Wbiire pxeel me stib zho, scaque peet bdeete zho lo zho, lel ndox zho lo zho, bdiin zho zho. ¹² Pxeelaque me stib zho, goc zho tson, scasaque been zho, haxta psiwee zho zho. ¹³ Quianie me tib mēēd, rleynie me mēēd co. Zeene gon me sca been zha co, rēbchaa me: “Mīne naca laa naa cxel xpēēd naa, zeene gan zho xpēēd naaw, peet gund zho me, nend zon zho xtiidz me.”

¹⁴ Pex guien zho cho nac xpēēd me, zeene gon zho men co, rēb zho: “¡Lēē zha qui nagon guiaaṅnie liu rii! ¡Golgotsaa dziuut ne zho, zeena guiaaṅa lo ne!” ¹⁵ Bnaaz zho xpēēd me, güeynie zho me zaatne nac tib lad lo liu co, ga güeygut zho me.

‘Zha sca dien rzac to gun bizhuan liu co gza zha ntseeb co? ¹⁶ Ib tedsod lēē, zeene gbire me, znitlogazh me zho. Lozhse ga, cuediinga me liun me lo zla zha ne gundziina.

Zeene bin zho sca rēb me, rnee chaa zho:

—¡ib lic Dios qui, dziuunscad no!

¹⁷ Dze bui me lo zho, dzigo rēbchaa me:

—Per led znu lēē, zhobnee lo Xtiidz Dios: “Quie ne psēēb zha ne nozaa yu, ni nand zho lēēpaa quie co nac mine rnazdziits yu.”

¹⁸ Ni quie co gon, zha ne tsiet-sobe low, zac zho zig tib ncuaane rac tson tap lē; laa tel lēēgaaw tso be lad zho, zac zho zig tib ncuaane die die rac.

¹⁹ Grē zha ne nac pxoz ne rnabey, ni grē maistr ley, hor co bien zho mine nac zho ga, bzeet me lo cuent co. ¡Gocladz zho gagazh naaz zho me! Per bdiieb zho, niacntseeb grē miech ne ndxie ga. ²⁰ Dzigo mine been zho, pxeel zho bla zha ne zie ziegunguet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho li-aadz dien zha gzoobdiag zho xtiidz

Dios, ²¹ bdziñ zho lo me, bnabdiidz zho rëb zho:

—Maestro, ndion no niapse diidzli ziena luu, ni scagaa zeene rseed luu miech, rguibd luu guianziuu luu lo zho, sinque niapse mine nac diidzli, mine rlu zha sëeb zho xnëz Dios, min co rnee luu lo zho. ²² Gane niina, racladz no gnë luu dieñ pe nonguiela ga rdeed no dimi ne razh lo rey Roma, te nonguielda ye.

²³ Bienga me racladz zho gungüet zho me, dzigo rëbchaa me lo zho:

²⁴ —iGolneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—¿Cho nu? ¿Cho lë nu quia lo pes rii?

Pquiab zho rëb zho:

—Lëe rey Roma i, lëe lë me i quia lo qui.

²⁵ Dzigo rëb me lo zho:

—Mine rieguial sca ycaa rey Roma, goldeeda lo rey Roma; scaquegaa mine rieguial ycaa Dios, lo Dios goldeeda.

²⁶ Bzee zdoo zho gon zho sca ptsire me lo xtiidz zho. Mazd dzese bre zho, sac bdziidz zho zha niungüet zho me; gocladz zho squi ndxie miech nxin me pe tib diidz, per brielod niungüet zho me.

¿Pe nli zrieeban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé riladzd zho zdziñ dze grieeban miech; bdziñ zho, rëb zho lo me:

²⁸ —Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mëed, dzigo none betsaque zho ct-sieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁹ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut,

biaand xpëed zho. ³⁰ Dzigo ptsieelnia wnaa co stib bets ngutoo co. Blozh ga, gutaque zha co, pa së zho nsan mëed. ³¹ Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me, ³² tibaque zeene yeque me laa me gut. ³³ Mine racladz no gacndion no, ¿chopaa dzigo gac tsiel wnaa co, zeene laa zho grieeban, ne sca gza gadzse zho ptsieelnia me?

³⁴ Pquiab Jesús rëb me:

—Tiba, gacnan to ganle, lo guielmban riise rtsieelnia miech. ³⁵ Zeene grieeban zho, zig nac zha ne yгаа guielnzaac gdziñ zho zaatne no Dios, led yedraa ga ctsieelnia zho. ³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanjl me, mëed gac zho lo me. ³⁷ Laa stiba, gacnan to ganle ible zrieeban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Zeene sca rëb me, ga rlu ganle mban zha co. ³⁸ Sac tel me, nacd me xDios mengut, sinque xDios zha mban nac me. iPar me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¿Cho xpëed nac Crist?

(Mt. 22:41-46; 23:1-36; Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dieñ ne rnee zho tib xpëedaque rey David gac Men ne nacle diidz cxeel Dios ga? ⁴² Led

Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

⁴⁴ Gase ganle rlu, led scada; telne nli zha xtii David gac men co, ¿zha nac dzigo ne lëëque David rnee ne me rnabey David?

⁴⁵ Squi ndxie grë miech co no-quiaadiag zho, zeene bnee me lo xpëëdsuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëëpaaze zha nac zha ne rzob grol mezh zeene laa wagw rac. ⁴⁷ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, iper ib tedsod nroob caxtigw ne ygaa zho!

21

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

¹ Laa Jesús no len yadoo ga noseed me miech. Ga no me, gon me zha rdzin grë zha ricw, nroob dimi rsañ zho len alcanci ne zob ga. ² Tibaque zeene bdzin tib wnaa viud, tib men proba, ye me laa me psan chop gaay win len alcanci co. ³ Zeene gon Jesús, rëbcha me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui. ⁴ Sac tel zha, dimi ne rianle lo zho i rgogon zho; sangue wnaa

prob qui gon, centav yeen ne quianiese me, mine rnalopaa me gziuu pe yquini me, per laa me bloogona.

⁵ Laa Jesús zieriee ga, zeene psilo bla zha ne nac xpëëdsuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalgiee lena. Zeene gon mew, rëbcha me lo zho:

⁶ —Niicle squitaa gon ran to niaaw niina, per dzin dze ne nitlow, dib nacsew. Ni stib quie qui guiaandraa zigne squi zho xcuaw i.

¡Nsin golso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

⁸ Dzigo rëbcha me lo zho:

—Nsin golso, zeena choot yquidiede to. Sac nzian zha ne griequia, guiab zho laa dze co bdzinle, guiab zho zha nac Men ne zëëble didz ga cxeel Dios. ¡ib gliladzde tow! ⁹ Zeene gon to pa lo ndxiedil tib guiedz, pa lo noyacгаа grë dildox, ib gdziebde to. Ib none gac grë ncuane co, per lega loxaque mine csilosew ga.

¹⁰ Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. ¹¹ Nëzrii nëzrec csilo gni grë zhodox, nzian zaatne gan miech gbin, zaatne glaangaa zho grë guielguidzdox. Nzian grë ncuane glu zhan gbaa, nzian grë ncuane co, ncuane ctseb miecha. ¹² Per ansraa gac grë ncuane co, stsidil miech to, squianañ zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnëz naa. ¹³ Ga nagon gdeeda diidz gnee to lo grë zha co,

gacnan̄ zho gan̄le cho nac naa. ¹⁴ Ib gunde to tso to zhgab dien̄ pe guiab to lo zho, zeene laa to ctsire lo mine rquiaqui zho to; ¹⁵ sac naa gnedz guiel̄biini lo to, zeene laa to gnee guien̄ to pe guiab to. Zha ne gona, squiaadiag zhow, per ni gdziel̄d zho pe ctsire zho lo to.

¹⁶ 'Haxta pxoz to, xniaa to, bets to, grē men̄lidz to, grē zha ne ndzieeldiidz to, stsidil̄ zho to, lēēque zha tsielo to ladznia zha ne csacsi to. Lo grē to, zio zha ne haxta zet ladznia grē zha co. ¹⁷ Grēse miech glēē gan̄ to porne nac to zha ne no xnēz naa. ¹⁸ Nli stiche zho xquiel̄mban to lo guidzliu rii, per, j̄ni tib guits guic to, grieelod zho gnitlo zho! ¹⁹ Tiblique sca golgac, sozite to lo naa, zeena yгаа to guiel̄mban ndzon ne gnedz Dios.

²⁰ 'Zeene gan̄ to igose guiedz Jerusalén̄ ndxienap men̄guib, nanle to len̄ dze co laaw nitlo. ²¹ Grē zha ne no guiedz ne ngab Judé, none xoon̄ zho tsie zho nēz yagui, ga tsietsolan zho. Zha ne no Jerusalén̄ nu, none grieeniob zho. Grēгаа zha ne quia dziin dana, ib guiabd zho gbire zho lad guiedz. ²² Tib guiel̄nēdox ne csiaab Dios gan̄ grē miech rii len̄ dze co, ga gac grē mine raquiet lo Xtiidz me ted zho. ²³ j̄Prob grē men̄ wnaa ne lēētse len̄ dze co zoney xpēēd, men̄ ne quianiegaa mēēd ne bii radz! j̄Mbandox ted miech, guiel̄nēdox ne csiaab Dios gan̄ zho guiedz rii! ²⁴ Zutxuu miech zho, zha ne tedlaagaa lo guiel̄gto zeyzhoo miech zho, zhaase zhaase dan ne gueynie zho zho. Horco laa grē zha zit co, sēēb gun̄cheñ̄ Jerusalén̄; haxta gdziñ̄ dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

²⁵ 'Nzian grē ncuaane glu lo ngbidz, glu lo mēē, glu lo mel. Mbanse gac miech, zdiebdox

zho zeene gon zho bidox ne tso tsasoli nisdoo. ²⁶ Nzian zha ne haxta scow zho lo dzeb, zeene laa zho gan̄ grētaa ncuaane noyac lo guidzliu len̄ dze co. Grē ncuaane no zhan gbaa, nēzrii nēzrec gaca. ²⁷ Horco bii zan̄ zho gan̄le zeene laa naa zial̄zēēb tib lo xcow con grē guiel̄ndzon, con grē poder ne rap naa. ²⁸ Zeene gan̄ to laa grē ncuaan co rsilo noyac, nley gol̄co zdoo to; j̄sac hor co laa Dios ycaania to!

²⁹ 'Gol̄zoob cuidad gan̄le zha nac yag guigw, beel̄zegaa pe stib yag. ³⁰ Led ran̄ to gan̄le, zeene laa grē zhicwa racnieen̄, laa zhiblaga rsilo rdzib, gase runbey to laa mēē nēēg ziaadgaxle. ³¹ Scaque nagon̄ zeene gan̄ to laa grē mine rne naa lo to nu rsilo noyac, dzigo nan̄le to laa dze ne csilo gnabey Dios ziaadgaxle. ³² Gneli naa lo to gan̄le, nzian grē miech ne mban niina, bii zan̄ zho zeene laa grē ncuaan co gac; sac ible ncuaane gaca. ³³ Zdziñ̄ dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac. ³⁴⁻³⁵ j̄Nsin sca gol̄so, zaacse golgac! j̄Adel̄ gal̄ dze ne laa naa guial̄, lel̄ lo grē ncuaane ndzinlid, lel̄ lo guiel̄gonzui, lel̄ lo grē zhgab ne rac lo guidzliu rii no to, zigne gun̄ grēraa miech! Sac gon̄, lega naclew glanso naa. ³⁶ Nligaa nsin gol̄so. Tibaque gol̄nab lo Dios, gacniēn̄ me to peet gacde to lo grē guiel̄nē co, ine peet xtol̄de to zeene laa to gacredz lo naa.

³⁷⁻³⁸ Gzase len̄ dze co pseed me miech. Silgaw, miech guizhiu ne rdziñ̄ len̄ yadoo, parne yquiaadiag zho zhiwseed me. Guidze sca rseed me zho, laa pcow liu riebēz me cho Gui Oliv.

22

Bnediidz zho dien̄ zha gnaaz zho Jesús

(Mt. 26:1-5, 14-16; Mr. 14:1-2, 10-11; j̄n. 11:45-53)

¹ Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad. ² Grè zha ne nac pxoz rnabey ni grè maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menquiedza; sac rdzieb zho gacntseeb menquiedz.

³ Tib dzew, laa mendox bzëëb zdoo Judas Iscariot, tib zha ne rzëniepaa me ga, ⁴ rias Judas güey Judas lo grè pxoz rnabey co, lo grè men ne zo lo zha ne rquiapan yadoo, rëb Judas zha csan Judas Jesús ladznia zho. ⁵ Zeene bin zhow per nli rley zho, nacne biaan zho diidz quizh zho Judas. ⁶ Dzigo desde hor co psilo Judas noguib Judas dien zha gdeeda diidz guien miech csan Judas me ladznia zho.

Dowxtseenie Jesús xpëëdsuel me
(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeen ne rowxtsee zho. ⁸ Dze co bnabey Jesús Pedr grop Juan tsiegunlo zho xtsee ne gownie me zho wdze co. ⁹ Dzigo bnabdiidz zho lo me, rëb zho:

—¿Pa lo racladz luu guio no guiodziunlo now?

¹⁰ Rëbchaa me lo zho:

—Goltsie Jerusalén. Zeene sëëb to lad guiedz, ga gan to tib mguin zobyen tib re nis, goltsienal zhits me. Yu ne gan to sëëb me, ¹¹ golguiab lo bizhuan yu co: “Znu në Maestro, ¿pa len yu me gneedz luu gac zaatne gowxtseenie me xpëëdsuel me wdze rii?” ¹² Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mezh gza me gza tsiipchop xpëëdsuel me. Xtsee co no zho, ¹⁵ zeene rëb me lo zho:

—¡Blactaa gon pquiambëz naa gdzin dze rii, znu gowxtseenie naa to nawdze rii, ansraa csacsi miech naa, gut zho naa! ¹⁶ Lëë lultm vuelt nu gon teed naa lni Pascw rii, haxta gdzin dze ne laa Dios csilo gnabey, dze ne glupaa ganle zha nac xtsee rii.

¹⁷ Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Golquiin vin rii gza to. ¹⁸ Gneli naa lo to ganle, lëë lultm vuelt nu guie naa vin rii, haxta gdzin dze ne laa Dios csilo gnabey.

¹⁹ Ni bzhen me quietxtil, bdeed me xquizh lo Dios, blozh ga beengrol mew bdiiz mew lo zho, rëb me:

—Golquiina, rriequia gon lëë xcuerp naa i, sac gon znu gun zho xcuerp naa parne csilaa naa to grè to. Zeene gdeedaaw diidz, golgun min rii parne glu to ganle tibaque rsoladz to naa.

²⁰ Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grè me miech, rriequia xchen naa nu nac vin rii, ren ne gzhiee xcuent to, ren ne tso firm trat co par glu nona. ²¹ Ni gacnan to ganle, lo mezhaque nu gon zob zha ne tsielo naa ladznia zha ne gut naa. ²² Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, iper probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien cho nac zha ne rzeet me ga; ²⁴ haxta psilo zho nodiidiidz zho dien cho gac zha ne gacnon lo zho. ²⁵ Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëë gdib rxcw zho, haxta rnee zho nroob quiayun zha co xyudar guiedz. ²⁶ Sangue to gon, zha ne gnabey lo to, none guien zho gac zho zig tib ngundziin lo to; zha ne racladzgaa gacnon, none guien zho guiaanwin zho. ²⁷ Lo guidzliu rii, zha ne rnabey, rzobse zho, zha ne nac ngundziin, zha co rdziib ncuaane row zho. ¡Sangue lo ne, led scad naca! ¡Golwi ganle, tib ngundziin nac naa lo to!

²⁸ Tose goc zha ne tibaque gocie naa lo grëtaa mine bdeed naa len dze rii. ²⁹ Gane niina, laa naa gneedz tib guienzaac nroob lo to ygaa to gdziin to zaatne bneedz PxoZ naa gnabey naa; ³⁰ zeena ine znu tipse zioob ne lo xmez naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

³¹ Horcoque bnee me lo Pedr rëb me:

—Bina ganle Pedr, racladz Satanás gon ycuiib ma to, zigne run zho zhobxtil. ³² Per laa naa bnable lo Dios, gacniën me luu, csaand me sozitpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

³³ Pquiab Pedr rëb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, itelne gutgaa zho luu, zaatne guet luu, ga guet naa!

³⁴ —Bina ganle Pedr —rëb Jesús—. ¡Guieel riigazh gon, gardle ycuedz gall, tsonle vuelte rëb luu runbeyd luu naa!

³⁵ Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase

güey to, peet dimi bide to, per ni ncuaane gow to, per ni lab to bide to. ¿Pe beenfalt ncuaane nquiin to hor co?

Pquiab zho rëb zho:

—Beenfaldedew.

³⁶ Dzigo rëbchaa me:

—Horco nagon peet bide to, sangue niina zha ne quianie dimi, zha ne quianiegaa ncuaane gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba. ³⁷ Sac nataa nagon, laa miech cteed naa mine zhobnee lo Xtuidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

³⁸ Pquiab zho rëb zho lo me:

—¡Bui ganle laa chop spad nule!

Dzigo rëbchaa me:

—¡Mazd peet gnedraa naa lo to!

Bzodiidznie Jesús PxoZ me Getsemani

(Mt. 26:36-46; Mr. 14:32-42)

³⁹ Blozhse ga, laa me brieze zie me nëz Gui Oliv, zaatne riettaque me; zienalaque gza xpëëdsuel me zhits me. ⁴⁰ Bdzin zho ga, rëbchaa me lo zho:

—Golnab lo Dios gacniën me to, zeena yquuild menox to.

⁴¹ Bzë me spalal, bdziin me zig zaatne riab tib quie ne rchel ne nia ne, dzigo ga pquitsgzhil me, psilo me bnab me lo Dios, ⁴² rëb me:

—Papá, laa naa rnab lo luu, telne zala zdoo luu, psilaa naa lo grë guienë rii. Per telne grieloda, mine gnëtaa luu sca gaca.

⁴³ Horco biet tib anjl gbaa bdziin pchoobladz zdoo me. ⁴⁴ Mban rac me laa me nozodiidznie PxoZ me, per hor cole mazdraa rnab me lo PxoZ me; lo guienë ro co haxta rzonis me, masaque zëbdzuun grë nis co lo me zootle ren.

⁴⁵ Zeene laa me guso ga, bdziin me zaatne biaan xpëëdsuel me,

gon me gzase zho laa zho nixguies. Ye zho mban rac zho, lo guielnë co bguudz zho mcaal. ⁴⁶ Dzigu pcuuan me zho, rëb me lo zho:

—¿Nixguies to ye? Lëda i gon, jgolsobna! Golnab lo Dios, gacnien me to, zeena yquuild menox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

⁴⁷ Laa Jesús quianeeque, zeene laa Judas bdziñ bdziñnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

⁴⁸ —¿Judas! —rëb me—. ¿Con tib bzhid dzigo lëë glu luu naa lo grë zha qui?

⁴⁹ Zeene bien xpëëdscuel me, me zienaaz grë miech co, rëbcha zho lo me:

—Maestro, ¿zha dziuun ne? ¿Pe zdeed spad no zho?

⁵⁰ Znuse biet tib zho pchel zho tib nia spad, pchug zho diag tib xmoz men ne nac pxoz nroob. ⁵¹ Dzigu bnee Jesús lo zho rëb me:

—Golsaan zho, ndzinli golgac.

Horco wbig me bzhen me diag zha co, beenguiac mew, lëëtse min derecha.

⁵² Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal men ne nac zha non lo menguedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan? ⁵³ Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grë mine racladz to grë to menox, niina laaw gac.

⁵⁴ Horco wbig be zho bnaaz zho me, laa zho zienie me nëz lidz men nac pxoz nroob. ⁵⁵ Bdziñ zho lidz men co, bre zho xley me, bzëëg zho gui, laa zho no nodzëë zho. Ye Pedr maase zit zit nal Pedr, laa Pedr

bdziñ ga; laa Pedr wbig bzob lo zho ga. ⁵⁶ Zeene gon tib wnaa ne quia xtsiin men co laa Pedr zob ga, dze rwi me, tibaque rëb me:

—¿Ye mgui qui gon rzënie men ne blansonie to!

⁵⁷ —¿Naa ye? —rëb Pedr—, i per ni runbeyd naa men qui!

Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëë ye luu nacnie men ne bgaa i?

Scasaque bneelid Pedr. ⁵⁹ Wdzeelaaque goca, zeen laa stib zho brieequia, rëb zho:

—Lëë tib zha ne nacnie men qui nu gon. jRlu zha galilé nac zho!

⁶⁰ Pquiab Pedr, rëb Pedr:

—¿Riend naa gon, pe nacne squi rnee luu!

Gardle lozh grieë diidz co ro Pedr, zeene laa tib gall pcuedz.

⁶¹ Gall co nocuedz, zeene ptsire lo Jesús, dze bui me lo Pedr; dzigora psoladz Pedr zeene rëb me lo Pedr:

“¿Guieel riigazh gon, gardle ycuedz gall, tsonle vuelte rëb luu runbeyd luu naa!” ⁶² Mbanse rac Pedr. Brieë Pedr ga, psilo Pedr biin Pedr guielnë co.

⁶³ Grë zha ne zopaa quianap Jesús, nzian grë ncuane run zho me, psilo zho noyunguzee zho me. ⁶⁴ Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed ttiidz Dios, ¿bnë sca dien cho ga bdiñ luu?

⁶⁵ Nzian grë ncuane rgoredz zho lo me.

Güeynie zho Jesús lo zhiwxtis zho
(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grë men ne nac zha non lo menguedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdziñ me ga, bnabdiidz zho lo me rëb zho:

⁶⁷ —Bnë lo no dien, ¿pe lëe Men ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëe men co nu nac naa, gliladzde tow, ⁶⁸ tel pe gnabdiidz gaa naa lo to, ctsirede to low; sac gliladzde to mine nac diidzli. ⁶⁹ Naa ne nac naa Mgui ne pxeel Dios, zhile laa dze gdziñ zeene laa naa sob cue Dios nëz derech, men nroob ne rrieelo run grëse ncuane racladz me.

⁷⁰ Horco grëse zho pquiab, rëb zho lo me:

—¿Xpëed Dios dzigo lëe nac luu?

Dzigo rëbcha me:

—Tozhal name rnee, nli Xpëed me nac naa.

⁷¹ Horco rëb zho:

—¿Pe mazdraa textigw ne racladz ne! ¿Laa ne bdzionle ganle mezhah rnee Xpëed Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

¹ Horcogazh pcaanie zho Jesús nëz, bdziñnie zho me lo Pilat, men ne nac gobernador ne nzoob zha Roma ga. ² Ga psilo zho nzian grë ncuane rquiaqui zho me, rëb zho:

—Laa no bnaaz men rii gon zi-aadnie no me lo luu, sac bgaa me noquiil me menladz no gacntseeb zho. Rnee me lo zho nonguielda gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

³ Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbcha me Pilat lo grë zha ne ne nac pxoz rnabey co, ni grë miech ne ziegrë zho ga:

—¿Ni tib dol rapd men rii!

⁵ —¿Zha gapd me dol? —rëb zho—. Ni zaatne zieetaa me noquiil me miech gacntseeb zho lo zhirey ne. ¿Dible nëz Judé nu güeyted me; desde nëz Galilé brie me ziaad me haxta nu!

⁶ Gon Pilat sca rëb zho, dzigo bnabdiidz me dien pe zha Galilé nac Jesús. ⁷ Zeene gocnan me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëetaque len dze co laa Herod no Jerusalén ga.

⁸ Rley Herod zeene gon Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod gun me pe tib milagr. ⁹ Psilo Herod nzian grë ncuane rnabdiidz Herod lo me, per ni tib lo wbnabdiidz co ib ptsired me.

¹⁰ Zeene gon Herod rquiaab me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaqui zho me, rnab zho cteed Herod me caxtigw, ¹¹ nacne lel psilo Herod grë xmenquiib Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. ¹² Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menguedz, ¹⁴ rëb Pilat lo zho:

—Laa zho biad-zoob xdemand men rii lo naa nu, nac diidz noquiil me miech gacntseeb zho lo zhirey ne. Nacne pquiep naa me, ni blalaga to gona; par naa peet dol rapd me. ¹⁵ Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuane guiab ne rieguial guet me. ¹⁶ Mine gaca, laa naa gnabey

ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis. ¹⁸ Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu men qui, bnabey guetgazh me! ¡Barrabás psilaa!

¹⁹ Barrabás lë tib men co no ladzguuib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëëbaque me tib ngutoo. ²⁰ Bguib Pilat dien zha nrieelo nsilaa me Jesús, ²¹ per psilo grë miech co nguiedz roptsie zho, rnee zho:

—¡None guetgazh men qui! ¡Lo cruz bnabey yquia me!

²² —Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc mine racladz zho. ²⁴ Racse Pilat, laa Pilat bdeed diidz. ²⁵ Blozhse bnabey Pilat psilaa zho Barrabás, zha ntseeb ne no ladzguuib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brienie Jesús laa zho zienie me zaatne yquia me lo cruz. Nëz zienie zho me, bdzieel zho tib men Ciren lë Simón wbire lo dziin dan, pcuëez zho men co, bnabey zho me bi me zhiczuz Jesús; nalse me zhits Jesús, laa zho zienie Jesús. ²⁷ Miech guizhiu ne zie ga, ndal grë men wnaa psilo zho roon zho no zho xquielnë me, ²⁸ dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to; ²⁹ sac zeene gal dze co grë men wnaa ne quianie mëed, ziab zho: “Mazd wenaque zie zha ne quianied mëed, zha ne nanđ zha radz mëed, zha ne niaadгаа gap mëed.” ³⁰ Horco grë miech, laa zho gnab tebaa zha pixche grë gui guiaa zho zhana. ³¹ ¡Golwi ganle, telne znutaa mine nodeed naa nac naa zig tib yag nguia, pelej to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz. ³³ Zeene bdzin zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhiczuz zho bzo tib nëz cue zhiczuz me. ³⁴ Lo cruz co quia me, zeene nguiedz bnee me rëb me:

—¡Papá! Ncuane quiayun grë miech rii nu, bzhiguiel gunquizhd luu zhow; sac riend zho pe run zho.

Gza menguiib ne bdzin ga yquiaanap me, hor co tib tib zho bzhense zho tib lë xab me, laa stiba bio zho rif. ³⁵ Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. ¿Pe rac me na ne riete me i? ¡Guet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

³⁶ Wbig menguiib co rdeed zho nziu bla guie me, rzhidznie zho me, rnee zho:

³⁷ —¡Zhirey zha Israel name nac luu! Psilaa luu lo guielnë qui nazho.

³⁸ Glaa guic zhiczuz me quia choplan diidz ne pquiaa zho, rneew: “LËË ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—iLed rëb luu lëe, luu nac Men ne zëëble diidz ga cxeel Dios! iBlu nazho nli men co nac luu, psilaa ne lo guielnë rii!

⁴⁰ Horco pquiab stib zha co, rëb zho lo zho:

—iPsoog ro luu! ¿Pe niicle niina ne laa luu guetle ib rdzieebd luu Dios? ⁴¹ Bien ganle, itel ne ible min rii riogual ne grop ne, nu nodizh ne grë guielntseeb ne bdziuun ne; sangue men qui, peet dol rapd me!

⁴² Dzigo rëb zho lo me:

—iBzhiguiel zeene guiaad luu gnabey luu, ib csand luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley Pxoza naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Gol grol dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biala biini stib. Horco pquiaa Jesús tib redz nroob, rëb me:

—Papá, laa naa rsan zhiespíritu naa ladznia luu, luu pcaaniaw.

Diidz co brieer ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, groltaa goca.

⁴⁷ Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—iNe nlipagaa tib men peet xtold goc men qui!

⁴⁸ Scaque grë miech ne goclo ga, zeene gon zho zha blozh me, bi-abguielnë zho, mbanse rac zho laa zho wbi ga. ⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brieenal zhits me zeene brieer me nëz Galilé, grë zho laa zho ndxiese tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grë zha ne nac zhiwxtis men Israel ga, no tib men guiedz Arimaté lë me José; lëe guiedz co ndxie xtan Judé. Tib miech wen nac me, noxco me mine rnabey Dios, ⁵¹ ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho. ⁵² Nacne hor co güey me lo Pilat, bnab me diidzbey tsielit me xcuerp Jesús lo cruz. ⁵³ Dzigo güey me, blozhse blit me cuerp co lo cruz, pchel me me tib lo lar nroob, güey me güeyqueets me me tib len baa cub ndieen tib cho quie gax ga.

⁵⁴ Lëe bdze dze co no zho xco ne laa dze ne gdziiladz zho lo dziin sëëb. ⁵⁵ Grë men wnaa ne sca nacgza grë zha ne brieenal zhits me zeene brieer me nëz Galilé ga, ye zho güeynal bgueets me, gon zho pa lo bio me. ⁵⁶ Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëeb zho lad xcuerp me; dzigo laa zho bdziiladz zigne rnabey ley no gun zho.

24

BRIEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene gol dze ne rzobni zhamal, silgaw laa gza men wnaa co brieer, bi zho grë zënex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble; ³ bzëëb zho len baa gon zho, niicle xcuerp me guiendle ga. ⁴ Laa zho zo ga, riend zho dien pe nacne scanialse ro baa co, pe nacne niicle xcuerp me guiendleen co. Tibaque zeene gon zho laa chop men bgui zole lo zho ga, masaque riaazbel lad xab grop men co. ⁵ Horco

per nli bdzieb zho, lo dzeb co mine been zho laa zho pquitsgzhib haxta bdziñ lo zho lo liu. Dzigo rëb grop meñ bgui co lo zho:

—¿Pe nacre ziaadguib to meñ mban zaatne rio mençut? ⁶ ¡Laa me brieabanle! ¡Guiendle me nu! Golsoladz ganle zha në me lo to len dze ne no me nëz Galilé, ⁷ në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieaban.”

⁸ Dzigoraa psoladz zho, nligaa sca bnee me, ⁹ hor co lëëlëd güeynie zho diidz lo gza tsiptib zha ne nac xpëëdsuel me, ni lo grëraa zha ne nacgza zho ga. ¹⁰ Nzianlaa nac meñ wnaa co, lad co no Marí Magdal, no Zhuan, ni Marí ne nac xníaa Jacob.

¹¹ Niicle bzodiidz zhow lo xpëëdsuel me, per con rnee zho led ncuaan gacd ga, ni lalnu biladzd zhow. ¹² Tibaque zeene brieed Pedr, rias Pedr laa Pedr zie nëz ro baa. Bdziñ Pedr bdiixlo Pedr len baa co, gon Pedr nligaa, ¡loxaque lar ne briel me zhoob leen co! Blozh ga, laa Pedr zeyaque, rzee zdoop Pedr gon Pedr nli guiendle xcuerp me ga.

*Gon zho Jesús nëz Maús
(Mr. 16:12-13)*

¹³ Dze co brieed chop xpëëdsuel me zie zho tib guiedz win lë Maús. Gax Jerusalén ríaan guiedz win co, maase chop hor rzë zho rdziñ zho ga. ¹⁴ Nëz no zho nozodiidz zho grë mine pteed miech Jesús ga, ¹⁵ tibaque zeene bien zho laa zho bgaa tib lo meñ co, gocgza me zho laa zho no nëz, per, ¡ib biend zho lëë Jesús ga! ¹⁶ Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuaane ptse lo zho. ¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho. ¹⁸ Pquiaib tib zha ne lë Cleof, rëb zho:

—¿Niacxe bind luu ganle zha nactaa ncuaane goc Jerusalén len dze rii? Grëse zha ne name güey Jerusalén, gocnana.

¹⁹ —Nligaa —rëb me—, ¿pe dien goc ga?

Rëbchaa zho:

—Len dze rii psacsi zho meñ Nazaret ne lë Jesús. Tib meñ ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib meñ nziuu nac me lo Dios. ²⁰ Per leñ brieed grë pxoz rnabey, grë zho zha ne nac wxtis, bnaaz zho me, bnab zho gut me, pquiaa zho me lo cruz. ²¹ Tibaque rdzieets no, me niac tib meñ ne nsílaa zha ladz ne ladznia zha Roma. Pasëse min co niac, nadzele rac tson ngbidz beet zho me. ²² Per riend no dien zha nac cuent co, sac nasil güey bla meñ wnaa ne nacgrë no ro baan zho, ²³ zeene wbire zho bzodiidz zho lo no në zho guiendle xcuerp me len baa, loxaque chop anjl brieequia lo zho ga, rëb anjl co mban me. ²⁴ Blozh ga, güeyaque bla zha bgui ne nacgrë no, gon zho nligaa guiendle xcuerp me ga.

²⁵ Dzigo rëbchaa me lo zho:

—¡Nadzpaa ncow nac guic to, nadzpaa ndip nac zdoop to! ¿Rililadze to grë mine dzigo lëë bzeet zho padzeela ted Meñ ne nole diidz ga cxeel Dios? ²⁶ Bzeetle zha co name ible no csacsi miech me, antes ne gbire me lo guieñdzon ne no me.

²⁷ Dzigo psilo me bnee me lo zho pa lo zho bnee grë mine bded me ga, psilo me desde grë mine pquiaa Moisés, haxta grë mine pquiaa grëraa zha ne biadteed xtiidz Dios.

28 Sca no zho nēz laa zho bdziñ Maús. Bdziñ zho ga, rac me zig nac zeene tib ted me, 29 dzigo quia zho rnaḅ zho lo me cuēz me ga, sac laa dze bdzele, zhile laa liu ycow. Nacne blēz me.

30 Laa zho zob lo mezh gowxtsee zho, bzheñ me guietxtil bdeed me xquizh lo Dios, blozh beengroḷ mew bdeed mew lo zho. 31 Dzigoraa zig nac zeene bzhiäl lo zho, laa zho beenbey me. Per par nianraa zho me, znuse bnit me lo zho, gonḍraa zho me. 32 Horco per nli rley zho rnee zho:

—Con razon zeene sca ziaadgza ne me nēz nonee me lo ne zha raquiet lo Xtiidz Dios, masaque tib guielbley nroob ne biaadnie xcodiidz me zdoo ne.

Sca rnee zho, sac bien zho bdziñ tib guielbley nroob zdoo zho, zeene sca nonee me lo zho. 33 Lēēlēdaque brieē zho ga, bio zho nēz wbiere zho Jerusalén stib. Bdziñ zho lo gza tsiiptib zha ne bzēniepaa me ga, ni grēraa zha ne nacgrē zho, 34 rēbchaa zha co lo zho:

—¡Tebaa gañ to gañle nli brieēban xmaistr ne! ¡Laa Pedr gonle me!

35 Psiloque zho grop zho bzodiidz zho zha gon zho me no zho nēz, per haxta horne no zho xtsee, zeene laa me beengroḷ guietxtil dzigoraa beenbey zho me.

Brieēquia Jesús lo grē xpēēdsuel me

(Mt. 28:16-20; Mr. 16:14-20; Jn. 20:19-23)

36 Lēētaaque sca nozodiidz zho, tibaque zeēñ gon zho laa Jesús zole lo zho ga, pquiaabdiuzh me zho, rēb me lo zho, peet tsieniedraa guic zho. 37 Leḷ rdzieb zho, haxta rzhidz zho lo dzeb co, sac rēb zho bod ndziin ga rañ zho. 38 Dzigo bnee me lo zho rēb me:

—¿Pe nacne rdzieb to? ¿Pe nacne riladzde to naa nu? 39 Goḷwi len nia naa, goḷwi zhits ni naa gañle. Goḷxeñ naa, zeēna gliladz to gañle

nli naaw; sac teḷ ndziina, mese naca, gacd xen tow.

40 Sca quianee me, blu me nia me, blu me ni me lo zho, zaatne biaaz me clav. 41 Per nli rley zho, rzee zdoo zho, per riladzdaque zho dien pe nlipaa lēē me ga. Gon me sca rac zho, nacne bnaḅ me ncuaane gow me lo zho. 42 Dzigo bdeed zho tib lē meḷ bguiee lo me, 43 bnaaz me meḷ co, squi ndxie zho gon zho dow me ma. 44 Dzigo rēb me lo zho:

—¿Pe ib rsoladzde to nile naa laa grē miñ rii no gac? Led ni naa lo to, grēse miñe bzeet Moisés, grēse miñe bzeet grē zha ne biadteed xtiidz Dios, miñe raquietgaa lo Salm teed naa, ible laaw none gac.

45 Psilo me clar nonee me lo zho, parne guienpaa zho zha zhobnee lo grē guits co, 46 rēb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieēban. 47 Rneew, Jerusalén nu, nu csilo gacnañ miech ible none csaan zho xquieḷntseeb zho, gnalo zho naa, parne guñ Dios zho perdon. 48 Ni to gon gañle grēse miñ co, goca. 49 Na len dze ne ziaadaque nu, laa naa cxel Espíritu Sant gacniē to, sac ib scale nac xtiidz Pxoza naa. Per guiabde to niinaga grieē to tsienēe to lo miech, Jerusaléne nu goḷcuēz, haxta nieeda yгаа to poder ne gneedz Espíritu Sant lo to.

50 Zeene goḷ dze ne laa me guey gbaa, dzigo güey me güeynie me zho nēz Betain. Bdziñ zho ga, blis me nia me, psilo me noyunlay me zho. 51 Laa me quiayunlay zho, tibaque zeene laa me bias lo guidzliu, iḡonlo zho laa me bzoquia gbaa!

52 Horco pquitsgzhīb zho liu, beennon zho me, rnee zho grē diidz ndzon lo me; blozh ga iñe rley zho laa zho wbi ga, bdziñ zho Jerusalén stib. 53 Psilo zho gzataa dze rie zho

yadoo roolnie zho Dios, rdeed zho
xquizh lo me.

XTIIDZ NDZON DIOS MINE PQUIAA JUAN

1-2 Jesús, men ne nac Diidz Ndzon, nole me zeene bīaa grētaa ncuaaṅe no; lo Dios no me ni Diosaque nac me. Notaque me, tībaque nac me: me ni Dios. 3 Me bzaa grētaa ncuaaṅe no, tsod ncuaaṅe lega scase nīaan; sac me bzaaw grēsew. 4 Ladznia me no guielmban ne gdziṅd dze lozh, nac guielmban co zig tib biini ne rziini lo miech. 5 Me nac biini ne quiaziini zaatne nac lo guielcow, ni rrieeḷod guielcow ctsew lo biini co.

6-7 Bio tib mguī brieelē Juan, Dios pxeel Juan biadnee Juan lo miech cho nac Jesús, zeena grēse zho gliladz Jesús. 8 Led Juand nac biini, sinque loxaque biaad Juan biaadlu Juan Jesús, men ne nac biini co. 9 Bdziṅ dzew laa Jesús biaad, ni niina me nac men ne noziini lo grēse miech, sac mēpaa nac biini co.

10 Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biēṅd miech cho nac me. 11 Per ni menladz me, niicle ne lopaa zho bdziṅ me ib gonzed zho me; tib chop zha ne blēzlo me. 12 Ni grē zha ne sca bleynie me, grē zha ne dib zdoo gliladz cho nac me, grēse zha co laa me bzo zho gac zho xpēed Dios. 13 ¡Grēse zho, rrieequia gol zho stib! Per guiabd ne togo gol zho zigne ral grē miech guidzliu rii, sinque laa zho gol zigne racladz Dios; gane niina xpēed me nac zho.

14 Zeene bdziṅ dze ne laa men ne nac Diidz Ndzon ga goc miech biaad me lo guidzliu, grop lo no bdziṅ no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac

me tibpaa mēed lo Dios, men ne nac Pxoz ne.

15 Zeene bzeet Juan Bautist me lo miech, tib vuelṅt haxta blu Juan me lo zho, rēb Juan: “Lēe men rii ga goṅ rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

16 Nquialadzdox Jesús ne, grēse ne gzataa dze laa ne nogaa grētaa guielnzaac ne rsiaab me. 17 Zeene psan Moisés ley, loxaque bnabeya ne; saṅgue niina ne laa Jesús biaad, laa me biaadnie mine nacpaa diidzli ni biaadlu me ganle pa lotaa nquialadz Dios miech.

18 Wlaltaa ib choot gard gan Dios; saṅgue niina ne laa Xpēed me Jesús biaad, men co biaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús
(Mt. 3:11-12; Mr. 1:7-8; Lc. 3:15-17)*

19 Tib dze pxeel grē zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dieṅ cho nac Juan.

Bdziṅ zho bnabdiidz zho lo Juan. 20 Dzigo bneeli Juan lo zho, rēb Juan:

—Golgacnan ganle, led naad nac Men ne quiambēz to ga cxeel Dios.

21 —¿Chox nac luu waa? —rēb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rēb Juan:

—Lēda, led Lí naa.

Biire zho bnabdiidz zho, rēb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rēb Juan:

—Zhaa men co, led naad nac men co.

22 —¿Cho dzigo nac luu? —rēb zho—. Bnē dieṅ cho nac luu; sac goṅ ib none gdziṅnie no tib xtiidz luu lo zha ne pxeel no.

23 Dzigo pquiab Juan, rëb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: “Zon to zëeb tsi tib mgui dan rnee me lo miech: ¡Golguñ nguudz zdoo to, sac gon ile ziaad men ne rnabey ne!”

24 Horco laa zha ne pxeel zha farisé pquiab, rëb zho lo Juan:

25 —Telne led luud nac Men ne zëeble diidz ga cxeel Dios, niicle led luud nac Lí, niicle nacdгаа luo cho stib zha ne pxeel Dios ziadteed xtiidz me, ¿zha nac dzigo ne nochoobnis luo miech?

26 Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to. 27 Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gun me dziin ne pxeel Dios me gun me.

28 Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiap zho me.

¿Cho nac Jesús?

29 Biet stib dzew, laa Jesús bdziñ zaatne no Juan ga. Zeene gon Juan me, rëbchaa Juan lo grë miech ne ndxie ga:

—¡Golwi ganle, lëe men qui gon csilaa miech lo grëtaa xto! zho! ¡Me gac zig tib carner yeen ne guet tso-gon lo Dios par guiaanmbe miech lo dol! 30 Lëe men rii ga nagon rzet naa lo to zeene rne naa: “Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.” 31 Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

32 Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesús.

33 —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luo guiet Espiritu Sant gbaa cuëz me guic tib mgui ne nochoobnis luo, dzigo gocnan lëe men co nac men ne rxeel Espiritu Sant zdoo miech.” 34 Gonlo naa blëz Espiritu Sant guic me; gane nanween naa ne nli Xpëed Dios nac me.

Zha ne gloopaa goc xpëedscuel Jesús

35 Biini liu co, laa Juan zoque ga zonie me chop xpëedscuel me. 36 Ga zo me, gon me laa Jesús zieded ga; dzigo rëbchaa me lo zho:

—¡Golwi ganle! ¡Lëe men qui gon nac Xcarner yeen Dios!

37 Zigne bin zhow, laa zho zienal zhits Jesús. 38 Zeene ptsire lo me, gon me laa zho nalle zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luo.

39 Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

40 Ndrës lë tib zha ne güeynal zhits me ga; lëe Ndrës co nac bets Simón Pedr. 41 Dzigo zigne brieë Ndrës ga güey Ndrës güeyguib Ndrës Simón. Bdziñ Ndrës rëb Ndrës lo Simón:

—¡Nasi gon laa no bdzion Men ne nacle diidz ga cxeel Dios!

42 Dzigo güeynie Ndrës Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luo ni xingan Jonás nac luo, sangue niina laa luo grieelë Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nêz tsie me nêz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrés grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa bzeet grë zha ne biadteed xtiidz Dios padzeela. ¡Laa no bdzion me, tib men Nazareta, lëe me ga nac Jesús, xingan José!

⁴⁶ Pquiab Natanael, rëb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. ⁴⁷ Squi ziaad Natanael, zeene gon Jesús Natanael rëbchaa me:

—¡Golwi ganle, lëe zha qui gon nac merpaa zha Israel, sac mesi ib rquidied me!

⁴⁸ —¿Zha nacne runbey luu naa? —rëb Natanael.

Pquiab me rëb me:

—Gole naa beenbey luu, dzigoo-raa bredz Lip luu. Zeene zob luu tib zhan yag guigw, hor co gon naa luu.

⁴⁹ Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

⁵⁰ Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuane mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlupaa grë xanj! Dios, zha ne ziadzëeb zha ne ziequia, quiayun zho

dziin lo naa, nac naa Mgui ne pxeel me.

2

Güey Jesús tib lo guieltsieel

¹ Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, ² ni bredz zho me; nacne bional no zhits me grëse no ne nac no xpëedsuel me.

³ Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvín men rii blozh. ¡Guiendraa pe quizz zho!

⁴ Pquiab Jesús rëb me:

—¿Pe nacne rnee luuw lo naa? Gon ganle naraa gdziñ dze ne ganan miech cho nac naa.

⁵ Niicle sca rëb Jesús lo me, güey me lo zha ne quiaguiz vin ga rëb me lo zho:

—Mine gnabeytaa me to, golguña.

⁶ Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena. ⁷ Dzigo bnabey Jesús zha ne rguiiz vin ga pcodzëe zho nis len gza guies co. ⁸ Blozhse guiel guiel pcodzëe zhow, rëbchaa me lo zho:

—Golcuae niip nis qui, golt sieniew lo men ne zo lo lni.

Zeene laa zho blee niip nis co tsienie zho, laaw nacle vin. ⁹ Nilalnu ib güeynied guic men co pa brieewin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelnia ga, rëb me:

¹⁰ —¡Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin lipase. Laa luu gon le! naraa bnabey luu brieewin niazh.

¹¹ Milagr ne been Jesús guiedz Caná ga, ga gloopaa blu me lo miech ganle nli tib men nroob nac me. Grése no ne nac no xpëédscuel me, zeene bdzion now, hor co bliladz no nli me nac Men ne zëëble diidz ga cxeel Dios.

¹² Zeene blozh guiełtsieel co, laa no wbiere guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

Blee Jesús grë zha ne noyūñ lgui len yadoo

(Mt. 21:12-13; Mr. 11:15-18; Lc. 19:45-46)

¹³ Len dze ne ziaadyob lni Pascw, lni nroob ne run zha Israel rso-ladz zho zha psilaa Dios zho Egipt, len dze co brieer Jesús zie me nëz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxil, zha ne no wto palom ne, haxta zha ne rtsëë dimi ndxie ga. ¹⁵ Dzigo bzhixcuua me tib lë doo zig rias dooguid ne rcaa ma, bzheñ me doo co beñcxoon me zho ga grë xma zho; blozh ga, ptiixche me xmez h zha ne notsëë dimi ga, nëzrii nëzrec blaal me xtimi zho.

¹⁶ —iNiinagazh golcuae grë ncuuan qui nu! —rëb me lo zha ne rto palom—. iGolguien ganle lidz Pxoza naa nu! iNacda yu lgui parne tso to wto nu!

¹⁷ Dzigo psoladz no zha ziaad lo Xtiidz Dios, zaatne rnee: “Rbiñladz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo menquiedz Israel, zeene gon zho sca beñcxoon me grë miech co, wbig zho lo me rëb zho:

—iCho nac luu ne squitaa noyūñ luu grë ncuuan qui? iBeen tib milagr, dzigo zliadz no men rnbey nac luu!

¹⁹ —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—iNcuuañe gliladzdraa no rnee luu! iLen choopxoojaa iz name biao yadoo rii! iZhazhe gun luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me. ²² Gane zeene brieerban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diidz ga cxeel Dios. ²⁴ Per ib pxend me lo zho, sacne nanwen me zha nac zho tib tib zho. ²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdo zho.

3

Jesús ni Nicodem

¹ Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo menquiedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grielod gdziñ zho zaatne rnbey Dios.

⁴ Pquiab Nicodem, rëb Nicodem: —iGal zho stib ye? iZha grielo gal miech stib? Tib zha ne nacle mengol, iñiacxe zrieelo sëëb zho zdo xniaa zho gbiere gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu

Sant, grieelod sëeb zho zaatne rnabey Dios. ⁶ Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho. ⁷ Gacxe waa, gzeed zdoo luu znu rne naa: “Grëse miech, ib none gal zho stib.” ⁸ Nac cuent rii zig nac me ne rtop xcow, zeene rree me, nêzrii nêz rec zie me, ron luu razh zhoob me; per rand luu dien pa nêz zie me dien pa nêz ziaadgaa me. Scaque nagon nac zha ne ral stib, grieelod guien miech zha rnabey Espíritu Sant lo xquielmban zho.

⁹ —Riend naa zha rnee luu —rêb Nicodem—. ¡Riend naa dien zha grielo gac grê mine rnee luu!

¹⁰ Rêbchaa Jesús:

—¿Riend luu ye zha rne naa? ¡Men rseed miech name nac luu lo menguedz Israel! ¹¹ Mine rne naa nu ncuaane rien naaw, ncuaane gon naaw, ni riende to zha naca. ¹² Telne riend luu zha nac grê mine rne naa nu zeene rzet naa ncuaane rac lo guidzliu, ¿zha dzigo guien luu mine gne naa telne gzet naa grê ncuaane rac gbaa?

¹³ ‘Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa. ¹⁴ Ni zigne pquianga Moisés tib meel brons tib guic yag zeene nonie me zha Israel dan zit co; scaque none yquianga naa tib lo yag, ¹⁵ zeena grëse miech, zha ne gbig dib zdoo zho gnalo zho naa, zgaa zho tib guielmban ne gdzind dze lozh. ¹⁶ Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdzind dze lozh; led yed zho nitlo. ¹⁷ Laa Dios pxeel naa lo guidzliu par csilaa naa miech lo dol, ziald naa par gdziibdol naa miech. ¹⁸ Sac grëse zha ne dib zdoo gnalo naa ne naa

csilaa zho lo dol, nitlod zho. Sangue zha ne gnalo naa, laa zho bnitlole ga, sac gon xpëed Dios nac naa ni bliladz zho naa. ¹⁹ Laa zho bnitlole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac mine zienal zho. ²⁰ Grëse zha ne run guielntseeb, rlëe zho ran zho biini. Ib rbigd zho lo biini, sac racladz zho xoobnen grê guielntseeb ne quiyun zho. ²¹ Sangue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

Rzeet Juan Bautist Jesús stib

²² Ga brieë Jesús güeynie me no nêz xtan zha Judé. Xtselaa bliaaz no ga grê no me, rchoobnis me grê miech co.

²³⁻²⁴ Len dze co gard guiab Juan Bautist ladzguuib; dzigo ye me nochoobnis miech zaatne lé Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpëedscuel Juan, psilo zho nodildiidz zho dien cho zhiwrobnis nonraa; pe zhiwrobnis Jesúsá, te zhiwrobnis Juana ye. ²⁶ Blozhse bdildiidz zho, wbig xpëedscuel Juan lo Juan, rêb zho:

—Maestro, men ne gon bzodidznie luu ro guibee Jordán ga, men ne scataa bzeet luu lo miech, ¡ye me laa me quiachoobnis miech niina, ni ndal miech niapse lo me zie zho, ziaatraade zho nêz rii!

²⁷ Pquiab Juan rêb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. ²⁸ Mine pso Dios naa, laaw ben naa: laa naa biallu ganle cho nac Men ne zëeble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me. ²⁹ Ible lo me none gdzin

miech. Nac me niina zig tib mgui ne notsieelna: Mgui ne notsieelna, ¡led zha lëe rzobnie ndzoop ne notsieelna zho! Ni grë zha ne ndzieeldiidz zho, rley zho ran zho laa xamigw zho notsieelna, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuaane run me. ³⁰ Zigse zie dze, laa me gacnonraa; scagaa naa, zigse zie dze laa naa guiaanwinraa.

³¹ 'Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuaane riense tib miech lo guidzliu min co rne naa; ³² sangue me, niapse grë mine bin me, grë mine gon me min co rnee me lo miech; ¡ni choot rliladzda! ³³ Zha ne rliladzse xtiidz me, rien zho ganle niapse diidzli rnee Dios. ³⁴ Xtiidz Dios rnee me lo miech; sac Espíritu Sant rdeed guielbiini lo me, ni Dios nac men ne pxeel me. ³⁵ Rleyniedox Dios me, nac me Xpëed Dios; gane grëtaa ncuaane no gbaa, no lo guidzliu, ladznia me psan Diosa. ³⁶ Grëse zha ne gnalo me, laa zho bgaale tib guielmban ne ib gdziñd dze lozh; sangue zha ne gond xtiidz me, gdziñd zho gbaa, zaatne ygaa zho guielmban co. ¡Grëse zha co, ible zgaa zho guielnëdox ne csaab Dios!

4

Tib wnaa Samar

¹ Zeene bien Jesús laa zha farisé gocnanle ndalraa miech zianal zhiwseed me, ni ndalraa miech ne quiachoobnis me lo Juan ² (niicle ne led medpaa rchoobnis, sinque zha ne nac xpëedscuel me zha co rchoobnis), ³ nacle brie me xtan zha Judé ga, wbire me nëz xtan men Galilé stib.

⁴ Par gdziñ me Galilé, none ted me xtan men Samar. ⁵ Xtan men Samar zieded me, zig gro! dzew, laa me zie gax guiedz ne lë Sicar,

⁶ dzigo güeyted me zaatne quia guiuu ne rnee zho "Zhibzie Jacob"; lo liu ne psan Jacob lo xpëed me José padzeela. Rdzag me ziaad-zë me lo nëeg co, bdziñ me bzob me ro guiuu co; ⁷⁻⁸ ga blëz me, laa no zio lad guiedz Sicar zioxi no ncuaane dioownie no me.

Ro guiuu co zob me bdziñ tib wnaa Samar zixi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

⁹ Bzee zdoo wnaa co gon me bnaab Jesús nis lo me, sac rlëedox zha Judé ran zho zha Samar, per ni rneed zho lo zho.

—¡Ncuaane gliladz naa! —rëb me—. ¡Ti zha Judé gnab nis lo ti zha Samar!

Dzigo rëbchaa Jesús:

¹⁰ —Tel niaca mine guien luu ganle cho rnab nis lo luu, ni guien luu zha nactaa ncuaane rzoladz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzhend luu name pe cuee luu nis, ¿pa dzigo tsiebee luu nis ne rdeed guielmban ga? ¡Gon ganle, guiedox bie rii! ¹² Stiba, ¿niacxe mazdraa dzigo nac luu que pxozgol ne Jacob, men ne psan bie rii? Nu name go me nis grë xma me; niicle grë xpëed mew, nuque go zho nis.

¹³ —Grëse zha ne rie nis rii —rëb Jesús—, rbiire rnab zhis zho; ¹⁴ sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo goltë grop to.

17 —Guiend tsiel naa —rëb wnaa co—. Gard ctsieelnaa naa.

—Nli rnee luu —rëb Jesús—; 18 sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ¡Nli miñe rnee luu i!

19 Zeene bin wnaa co sca rëb Jesús, rëbcha me:

—Zootne tib zha ne ziadnee xtiidz Dios lo miech nac luu. 20 Tel scaw, bzhiguiel bnë dien, ¿zha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grë xmenjol no ga güeygan zho Dios.

21-24 Pquiab Jesús rëb me:

—Bina ganle, dzin dze zeene yquiindraa ne goon guic gui ripaa, o Jerusalénpagaa tsie to tsiegan to Dios men ne nac Pxoze. ¡Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nliipaa racladz gleynie me, none dib zdoo zho gleynie zho me; zigne gdeedse Espiritu Sant guielbiini lo zho.

’Choot grieelod gan Dios; gacxe waa zha ne gleynie me, none gleynie zho me zigne rdeed Espiritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziunbey no men ne riogan no, sac gon lo xtiin men Israel ziaad men ne guiaadsilaa miech lo dol.

25 —Nenda —rëb wnaa co—, per nan naa ib ziaad Men ne zëëble didz ga cxeel Dios, men ne lë Crist; ni zeene laa me guiaad, me gnë diidzli lo no.

26 Pquiab Jesús, rëb me:

—¡Naa gon nac men co! Lëe me nu nonee lo luu.

27 Lëëtaaque hor co grëse no ne nac no xpëedscuel me laa no bdzin.

Bzee zdoo no bdzion no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

28 Laa wnaa co, zoque xche me ga, rias me laa me zie nëz lad guiedz. Bdzin me, rëb me lo grë miech co:

29 —¡Goltë ganle gunbey to ti men co! ¡Bzeet me grëse zha nac lo xquielmban naa! ¿Bay pe lëdle Men ne nole diidz cxeel Dios ga?

30 Horco brieer grë miech co lad guiedz, ziaad zho zaatne gon wnaa co Jesús.

31 Laa no, quia no rdeed no ncuaane gow me, per nëd me.

32 —Gowd naa —rnee me—. No stib xquielwagw naa miñe runbeyde to.

33 Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

34 Nëchaa me lo no:

—Lëe xquielwagw naa nac ne gun naa miñe rnabey Dios naa, ni csiaal naa dziin ne pxeel me naa zialgun naa. 35 To lëe rnee to: “Len stapraa mëe csilo gac wlaap.” ¡Per golwi lo grëtaa miech qui ganle, nac zho niina zig grë guielgon ne golle gli-aap! 36 Gacxe waa, ib none tsie to tsie-laap to, tsietop to zho, zeena yгаа zho tib guielmban ne gdzind dze lozh. Ni zigne razh zha ne rie wlaap, scaque zguizh Dios to tsietop to zho. ¡Ti guielbley nrooba, zigtaa par zha ne rana, zigtagaa par zha ne rlaapa! 37 Ible nli diidz ne znu rnee: “Zhaa zha ne rie gon, stible zha ne rie wlaap.” 38 Zig nac niina, laa naa rxel to tsie-laap to zaatne ni tib xtiin to psëëbde to; zhaa zha ne güey gon, na tole tsie wlaap.

39 Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuaane ziyun

me, bliladz zho Jesús. ⁴⁰ Laa zeene blanso zho ga, bnab zho lo me cuéz me ladz zho zhis. Dzigo nacne bléz me lo zho chop ngbidz. ⁴¹ Nzianraa grè miech co bliladz me, zeene bin zho grè zhiwseed me.

⁴² —Nasi nagon laa no riladz me —rnee zho lo wnaa co—, sac nozhal bdzion me, ni bdzion no grè mine rnee me. Nliw, ible me nac men ne ziaadsilaa grése miech lo xto] zho.

Biac xpëed tib zha ne quia dziin lo rey

⁴³ Zeene goc chop ngbidz co, laa no brie ga gza no me, laa no bdzio nêz stib zio no nêz Galilé. ⁴⁴ Niicle ne bzeetle me: grése zha ne ziadteed xtiidz Dios, ib randzed miech zho zaatne nac ladz zho; per ⁴⁵ zeene bzëeb me grè guiedz ne ngab Galilé, wen pcaania grè miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nêz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëetaque len dze co rzacnë xpëed me.

⁴⁷ Bin me laa Jesús brie xtan men Judé, laa me no gdziñ Galilé. Dzigo biaad me biaddzieelo me Jesús ga, bnab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoob rac win. ⁴⁸ Dzigo rëbchaa Jesús lo me:

—¿Pe haxta gan to dzigo gun naa milagr, dzigoraa gliladz to naa?

⁴⁹ —Been tib guielnzaac gotsaa guioniob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guielnë. ¡Laa xpëed luu biacle!

Dib zdoo men co bliladz me xtiidz Jesús, laa me bio nêz laa me zey. ⁵¹ Zhilew gdziñ me lidz me, zeene bdzieelo me bla zha ne quia

xtsiñ me, rëb zho laa xpëed me biacle. ⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brie zhixlëe win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grése zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Min co been me zeene wbire me nêz Judé.

5

Biac tib men ne gacd grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxii, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacnë, no zho rold lo, no zho nê ni, no zho ib gacd grial [grése zho laa zho ndxie ga quiambëz zho gni lo nis ne no len pil co, ⁴ sac nac diidz poc poc riet tib xanj] Dios riesini lo nis co, dzigo zha ne znuse sëeb lo nis co, tel pe guielguiidztaa rzac zho, riac zho].

⁵ Ga nix tib mgui, gocle galptsiipxon iz rzacnë me. ⁶ Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guien cho csëeb naa len pil qui zeene laa lo nis rni. Zeene racladz naa sëeb naa, zhaale stib zha ne glo rzëeb.

⁸ Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa meṅ co biac. Horcogazh blis me yag co, znëni me laa me brieë ga.

Ni ne dze co nac tib dze nda lo zha Israel, ¹⁰ zeene goṅ zho ney me yag ne bzhoob me, rëbchaa zho lo me:

—jPe riend luu nda nadze! jLëda i goṅ squi yquianlan luu ncuuan qui dze rii!

¹¹ Pquiab me rëb me:

—Meṅ ne beenguiaac naa, mezhal në lo naa, güey naaw.

¹² —jCho meṅ sca në lo luu? —rëb zho.

¹³ Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co. ¹⁴ Haxta len yadooraa bdzieel Jesús me, dzigo rëbchaa Jesús lo me:

—Nana goṅ ne squi laa luu biacle, bien gunctaldraa luu xtoṅ luu. Sac telne gond luu diidz, nend dzigole glaan luu tib guielguidz ne mazdraa ntseeb.

¹⁵ Zeene laa me brieë ga, güey me lo zha ne rnabey lo zha Israel ga, rëb me lo zho Jesús nac meṅ ne beenguiaac me. ¹⁶ Nacne psilo zho quianal zho dien zha gnaaz zho Jesús pe nacne runguiaac me miech dze nda. ¹⁷ Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni mincoque nac mine quiayun naa.

¹⁸ Zeene goṅ zho sca rëb me, mazdraa blëë zho lo me rzac zho tebaa zha gutgazh zho me. Rlëë zho, sac zienald me dien pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

Meṅ nroob nac Xpëed Dios

¹⁹ Ni rëb me:

—Gneli naa lo to ganle: peet grieelod gun Xpëed Dios lega guicse me, sinque ncuane ran me run Pxoz me, min co run me. ²⁰ Nquialadzdox Dios me, grëtaa dziin ne run Dios rlu Dios lo me; gane zun me milagr nroob ne

mazdraa gzee zdoo to; ncuane palalse i goṅ to niina ne biac meṅ qui. ²¹ Sac telne gacladz me cueeban me tib meṅgut, zbeeban me zho, zigne rbeebanaque Pxoz me meṅgut. ²² Ni bzo Dios me, me gun guielwxtis, ²³ zeena grëse miech guien ganle zigne nonaque Pxoz me, scaque meṅ non nac me, ni sca none gunnon zho me. Sac tel zha ne gunnond me, yele Pxoz me ga (meṅ ne pxeel me) runnond zho.

Ni rëb me:

²⁴ —Gneli naa lo to ganle: Zha ne gliladz xtidz naa, ni gliladz zho meṅ ne pxeel naa, laa zho bgaale tib guielmban ne gdzind dze lozh. Led yedraa zho ygaa guielnëdox ne ygaa grëraa miech ntseeb; sac laa zho brieële ladznia guielgut ga, bdzin zho lo guielmban co. ²⁵ Zdzin dze zeene ye grë meṅgut, zon zho xtiidz Xpëed Dios; ni grëse zha ne gzoobdiaga, zban zho. jNi lëë dze co bdzin niina! ²⁶ Sac goṅ, zigne rdeed Dios guielmban lo miech, scaque zrieelo gded naa guielmban lo miech. ²⁷ Ni bzo me naa, naa gun guielwxtis, gded naa mine tsieguial tib tib miech.

²⁸ jGzeed zdoo to! Sac ne nli-gaa, dzin dze, grëse meṅgut ne no len baa, laa zho grieëban ²⁹ zeene gon zho tsi naa. Grëse zha ne ndzinli wban, hor co laa zho ygaa tib guielmban ndzon; sangue zha ne been guielntseeb, hor co laa zho guey lo guielnëdox ne rieguial zho.

³⁰ 'Per grieelod gun naa guielwxtis naase, ib none gacnan Pxoz naaw. Grëse guielwxtis ne gun naa, laaw gun naa zigne gnabey Pxoz naa, laaw gun naa zigne nonguiela, sac goṅ gund naa mine guiaabtaa guic naa, sinque laa naa gun mine racladz Pxoz naa.

³¹ 'Telne niaca mine naase rne cho nac naa, zrieëquia zha ne guiab nlida. ³² Per na, no stib meṅ ne rzeet naa lo miech; ni nan naa diidzli rnee me. ³³ Haxta Juan

Bautist, zeene pxeel to bla zha ne güeynabdiidz lo me, grëse miñe rëb me lo zho ga, diidzliw. ³⁴ Laa naa rzet miñ rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa. ³⁵ Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to miñe bnee me. ³⁶ Nli bnee me cho nac naa; per grë milagr ne run naa miñ co quiaxobnenraa ganle cho nac naa. Pxoza naa rneedz diidz run naaw; ni ga rlu ganle ne me pxeel naa. ³⁷ Haxta ye me mezhäl quialu ganle cho nac naa, parga nli gard gan to me, niicle gard gon to tsi me. ³⁸ Ronde to pe rnee me, sac rililadzde to naa; sac gon me pxeel naa zialne naa xtiidz me.

³⁹ Nli rioxco to rseed to grë guits ne ziaad Xtiidz me, sac rien to ga ziaad dien zha yгаа to guielmban ne gdziind dze lozh. Ni niicle ne lo co zhobnee ganle cho nac naa, ⁴⁰ per nëde to gbig to lo naa, zeena yгаа to guielmban co. ⁴¹ Nëde to gunbey to naa, nëde to guien to cho nac naa, per peet nacd miñ co; ⁴² runbey naa to, ni lalnu rleyniede to Dios. ⁴³ Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëelëd rcaania to zho. ⁴⁴ iMiñ co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios. ⁴⁵ Ni guiabde to togo naapaa gazo to lo Pxoza naa, glisqui naa grë ncuaane run to. Moisés gon nac men ne glisquiw; sac ley ne psan me, miñe rnalo to csilaa to lo xtol to, lëew glu ganle pe nac grëtaa ncuaane quiaayun to. ⁴⁶ Sac gon, telne niaca miñe nlipaa rililadz to grë miñe pquiaa Moisés, zililadz to dzigo cho nac naa; golgan ganle, lo grë guits ne pquiaa me, ga rzeet me

naa. ⁴⁷ Rlu rililadzde to grë miñe pquiaa Moisés ga, gane rililadzde to miñe rne naa lo to.

6

Row gaay mil miech

(Mt. 14:13-21; Mr. 6:30-44; Lc. 9:10-17)

¹ Bded ga, tib dzew brieë Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

² Miech guizhiu ne brieenał zhits me, sac ziyan zho grëtaa milagr ne run me, runguiaç me grë men rzacnë. ³⁻⁴ Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëedscuel me, laa no nał zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me, ⁵ zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, ¿pa guioziu ne ncuaane gow grëtaa miech qui?

⁶ Per lega scase rëb me lo Lip, par dien pe guiab Lip; sac nanle me pe nac ncuaane gun me.

⁷ —iNe nligaa pe zhidaa zho! —rëb Lip—. Niicle telne niaca miñe gziuu nzian gayoo guietxtil, ni ygaad ncuaan co yгаа zho tiblë wingaw tib tib zho.

⁸ Dzigo pquiab Ndrés, bets Pedr, stib zha ne naczga no; rëb Ndrés:

⁹ —Nu zo tib mëëdbgwi win ney gaay guietxtil cebad ni schop mel win. ¿Per pa yгаа ncuaan co lo grëtaa miech qui?

¹⁰ —Golnee lo zho dien —në me lo no—. Golguiaç lo zho sob zho.

Ndzon zëeb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise). ¹¹ Dzigo bnaaz me gza guietxtil co, bdeed me xquizh lo Dios. Blozhse ga,

zigse rneedz mew lo no scase scase rguuz now lo grë miech co; scaque been me grop mel co. ¡Grëse miech co, dow zho zaatne bieltaa zho! 12 Blozhse dow zho, nëchaa me lo no:

—¡Goltsietop grëse mine biaan i, zeena nitloda!

13 Psilo no ptop no grë guietxtil ne biaan ga, zeene blozh bdopa, ¡lo gaay guietxtil cebad co, biodzë tsiipchop chicuid biow!

14 Zeene gon grë miech co milagro ne been Jesús ga, rneechaa zho:

—¡Ne nlipagaa, lëe men qui ga quiambiaaz ne! ¡Me nac Men ne zëëble diidz ga cxeel Dios lo guidzliu guiadteed xtiidz me!

15 Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzë Jesús lo nis

(Mt. 14:22-27; Mr. 6:45-52)

16 Rguetsle liuw, bzhiuxto no dan bdziñ no ro nisdoo co; ga bliiaz no me. 17 Bdzionse no choot rlansod ni laa liu rcowraa, dzigo mazd laa no bziaab len canó, laa no zio nëz Capernaum.

18 Laa no zionie canó co lo nis, tibaque zeene psilo rriee me, ntseeb riasoli lo nis co. 19 Maase gaay kilómetro o xoopgaaw goc zio no, tibaque zeene bdzion no laa me ziaad-zë lo nis co, gaxle lo no ga. Zeene bdzion no sca ziaad-zë me lo nis, bdzieeb no. 20 Dzigo bnee me, në me lo no:

—¡Gdziebde to! ¡Naa zial nu!

21 Dzigoraa rley no bdzion no laa me bzëeb len barcw; tibaque zeene bien no laa no brieequiale zaatne no gdziñ no ga.

22 Biini liu co, grë miech ne biaan stib nëz ro nis co, laa zho bdziñ zaatne nac ro nis ga, quiambëz zho gan zho me. Sac gon zho tibaque barcw zo ga, ni zeene wbii no ga, loxaque nose wbii. 23 Gax zaatne bguiaan me zho ga, ga bdziñ

bla barcw ne ziaad nëz Tiberias; 24 dzigo gonse zho niicle me niicle no ne nac no xpëëdscuel me, choot guien d ga, nacne bzëëbaque zho len barcw ne bdziñ ga ziaad zho nëz Capernaum.

Jesús nac men ne rdeed guielmban

25 Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, ¿pa horzhe waa blanso luu nu?

26 Dzigo rëbchaa me:

—¿Naa lëe ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquuin to.

27 ¡Golguien, tsienied guic to loxaque ncuaane gowse to, sac znuse rnitlo grë ncuaan co! Sinque, goltsoxco golgun mine racladz Dios, zeena ygaa to tib guielmban ne ib gdziñ dze lozh. Ni naa ne nac naa Mgui ne pxeel me, naa gneedz guielmban co lo to; sac ible min co pxeel me naa.

28 Dzigo bnabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuaane dziuun no?

29 Pquiab me rëb me:

—Mine racladz Dios gun to: gliladz to cho nac men ne pxeel me.

30 —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu! 31 Tel grë pxozgol ne, zeene wban zho grë dan bidz co padzeela, gzobse dze biet tiblo guietxtil zhan gbaa, dow zho; rnee lo Xtiidz Dios: “Moisés rdeed guietxtil co lo zho.”

32 Pquiab me rëb me:

—Golgacnan ganle led Moisés bdeed guietxtil co, sinque Pxoza naaw. Ni niina gon laa me quia-needz merpaa guietxtil gbaa lo to. 33 Sac gon, me pxeel men ne biet gbaa ziaddeed guielmban lo grë

miech rii; men co nac quietxtil gbaa co.

³⁴—Been tib guielnzaac sca —rëb zho—, igzataa dze bneedz quietxtil co dioow no!

³⁵Pquiab me rëb me:

—Naa gon nac quietxtil ne rdeed guielmban ga. Grëse zha ne gbig lo naa sëëb zho xnëz naa, gdzindraa dze ne ycaabedz zho; grëse zha ne gliladz cho nac naa, gdzindraa dze ne gnab zhis zho. ³⁶Laa to gon, zigne bnelegaa naa lo to ga, jniicle ran to naa, per riladzde to cho nac naa! ³⁷Grëse zha ne rxeel Pxo naa, rlanso lo naa; ni tib zho ctsireed naa. ³⁸Sac gon, laa naa bieet gbaa zialgun naa mine racladz Pxo naa (men ne pxeel naa); bieete naa par gun naa mine gacladzta naa. ³⁹Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo. ⁴⁰Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdzind dze lozh, ni cueeban naa zho gal dze ne nitlo guidzliu.

⁴¹Dzigo psilo grë zha Israel rneenë zho me, loxaque ne rëb me, me nac quietxtil ne biet gbaa; ⁴²rnee zho:

—Men rii ga name rnee zho Jesús, me nac xingan José. Rdziunbey ne xnial me, rdziunbey ne pxoz me. ¿Zha nac dzigo ne rnee me gbaa biet me?

⁴³Dzigo rëbchaa me lo zho:

—Lëëwga na, golsioog ro to. Nodne squitaa gzee zdoo to min co. ⁴⁴Laa Pxo naa pxeel naa zial naa lo guidzliu, per ni tib miech gon grieelod gbig lo naa telne niaca mine cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo. ⁴⁵Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëë min

co rac niina; gacxe nagon waa, grëse zha ne rquiaadiag mine rnee Pxo naa ni rseed zhow, grëse zha co lo naa rlanso zho. ⁴⁶Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyan me, sac zaatne no me ga brie naa zial naa lo to. ⁴⁷Golliladz mine gni naa lo to nu sca: ¡Grëse zha ne dib zdoo zho gliladz zho cho nac naa, zgaa zho tib guielmban ne gdzindraa dze lozh! ⁴⁸Ne nligaa naa nac quietxtil ne rdeed guielmban ga. ⁴⁹Grë pxozgol to, zeene sca bio zho grë dan bidz co, nli dow zho quietxtil ne biet gbaa ga, per bdeetew guielmban lo zho, sac grëse zho gut. ⁵⁰Sangue quietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdzind dze lozh. ⁵¹Xcuerp naa nac quietxtil ne biet gbaa, mine rdeed guielmban ga; grëse zha ne gow quietxtil co, zgaa zho tib guielmban ne gdzind dze lozh. Lëëw gded naa zeena grieelo ygaa grëse miech lo guidzliu rii stib guielmban.

⁵²Psilo grë zha Israel co stib, quianeelsa zho, rnee zho:

—¿Zha nacne squi rnee men qui? ¡Zootne rnee me none dioow ne xcuerp me!

⁵³—Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co. ⁵⁴Sangue zha ne gow xcuerp naa, ni guie zho xchen naa, ib zgaa zho guielmban ndzon ne gdzind dze lozh ga, ni naa cueeban zho gal dze ne laa guidzliu nitlo; ⁵⁵sac xcuerp naa nac mine mazdraa rquiin gow miech, ni xchen naa nac mine mazdraa rquiin guie zho. ⁵⁶Grëse zha ne row xcuerp naa, ni rie zho xchen naa, mbannie zho naa, niclegaa naaw mbannie naa zho. ⁵⁷Men mban nac Pxo naa, men ne pxeel naa, me nac men rneedz guielmban lo naa; ni scaquegaa

zha ne gow xcuerp naa, naa gded guielmban lo zho. ⁵⁸ Naa nac guietxtil ne nlipaa biet gbaa. Grëse zha ne gow guietxtil rii, zгаа zho guielmban; led yed zho guet zig gut grë pxozgol to, zha ne sca dow guietxtil co.

⁵⁹ Lëë grë min rii bnee Jesús zeene pseed me miech len yadoo win ne zob Capernaum.

Diidz ne rdeed guielmban

⁶⁰ Nzian grë zha ne rzënie Jesús, zeene bin zho grë miñe bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëë guic to bin to miñe rne naa ga? ⁶² ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo? ⁶³ Espiritu Sant rneedz guielmban lo to, telne guiend espirtu peet nond xcuerp to, sac bëëlse naca. Ni grë diidz ne bne naa lo to, lëew nac Espiritu, ni lëew gneedz tib guielmban ne gdzind dze lozh lo to; ⁶⁴ sinque to, bii no zla to riladzd cho nac naa.

Sca rëb me sac desde psilo bzënie zho me, rienle me cho nac zha ne ib riladzd me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grieelod gbig lo naa sëëb zho xnëz naa, telne niaca miñe cuedzd Pxoz naa zho.

⁶⁶ Nzian zha ne rzënie me, hor co laa zho bzozit lo me, bzëniedraa zho me. ⁶⁷ Dzigo bnee me lo no gza tsiipchop no ne nac no xpëëdsuel me, në me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech didz ndzon ne rdeed guielmban ne gdzind dze lozh. ⁶⁹ Laa no bliladzle

cho nac luu, laa no gocndionle ne luu nac Men Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

⁷¹ Zeene sca rëb me, lëële Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

7

Riladzd menlidz Jesús cho nac me

¹ Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me. ² Laa zeene bdzin dze ne run zha Israel lni ne rzhixcuuaa zho grë yu guizh, ni rbëz zho lena; ³ rëbchaa zha bets me lo me:

—¿Pe nacne ib rried luu nu? Brieë zho, güey dib xtan zha Judé, zeena ye grë zha ne racnie luu ga gan grëtaa ncuaane run luu. ⁴ Sac gon, zha ne racladz gunbeyraa miech zho, grë ncuaane rac zho, rund zhow ngueets zhliaan zigne run luu. Rac luu name run luu grë milagr nroob, beena zaatne gan nzian miecha.

⁵⁻⁶ Sca rnee zho lo me, sac nicle zha riladzd cho nac me; dzigo rëbchaa me:

—Grieeled ga naa niina, sac gard gdzin dze co; zhaa nac to, zac tsie to zeene gacladzataa to. ⁷ Tel to, rlëënie miech to; sangue naa rlëënie zho naa, sac rne naa lo zho pe nac grë guielntseeb ne run zho. ⁸ Goltsie, tedse lni rii dzigo ga naa; sac gard gdzin dze ne glu cho nac naa.

⁹ Dzigo laa me biaan ga. ¹⁰ Per loxaque brieë zho zie zho, yeque me brieë zie me; lëëraasi ngueetsse bdzin me.

¹¹ Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacre ib choot gard dzian me?

¹² Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” ¹³ Per zhlianse rzodiidz zho rzeet zho me, sac rdzieb zho grë zha Israel ne rlëe lo me.

¹⁴ Goc chop tson ngbidz ne noyac lni, tibaque zeene laa me bzëeb len yadoo nroob ne zob lad guiedz ga, psilo me pseed me grë zha Israel ne no len yadoo ga. ¹⁵ Zeene gon zho zha rseed me, rzee zdo zho rnee zho:

—¿Zha nac squitaa rac men qui, ni laa me pseete me grë zhiwseed yadoo?

¹⁶ Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa. ¹⁷ Telne yquiabladz to gun to mine rnabey me, ga guien to dien pe nli xtiidz Dios rseed naa miech, te mine riab guic naaw ye. ¹⁸ Sac grë zha ne rnee grë mine riab guicse zho, laa zho runa zeena gacnziiu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech. ¹⁹ Laa Moisés psan ley lo to, per, jni tib to gon zienald mine rnabeya! ¿Pe nac dzigo racladz to gut to naa?

²⁰ Pquiab be grë miech co, rëb zho:

—jMendzable i gon noguitnie guic luu! ¿Chozhe racladz gut luu?

²¹ Rëbchaa me:

—Tib vult, loxaque gon to beenguiaac naa tib men rzacne dze ne rdziiladz to lo dziin, na grëga to squitaa rac lo naa. ²² Ni to gon, no hor par gun to mine rnabey ley run to dziin dze co; zig nac zeene rio tib mëed bey (niicle ne rirole pxozgol to bey co, zeene laa ley biaan). ²³ jGase

na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiaac naa tib miech dze co? ²⁴ Golguien ganle, nonguield ne lega gdziibdol to tib miech. Goltsoxco goltensial mine nac diidzli.

¿Cho nac Jesús?

²⁵ Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho? ²⁶ Pa zotaa me gon quianee me lo grë miech qui, ni choot peet rund me. ¿Pe goon bliladzle zhiwxtis ne naye ne me nac Men ne zëeble diidz ga guiaad lo guidzliu? ²⁷ Per gacda men qui. Tel men quiw, rdzi-uunbey ne me, ndion ne cho zha nac me; sangue Men ne zëeble diidz guiaad ga, zeene gal dze ne laa me guiaad, choot gacnand dien cho zha me.

²⁸ Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguiedz bnee me rëbchaa me:

—Ah, conque runbey to naa dzigo, jnan to pa nëz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli. ²⁹ Sangue naa runbey naa me, sac lo me brie naa, me pxeel naa zial naa lo to.

³⁰ Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

³¹ Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. jTsodraa zha ne gun grëtaa milagr ne run me!

³² Bin zha farisé nozeet grë miech co Jesús, dzigo bnediidzaque zho grë zho pxoz ne rnabey, pxeel zho bla zhaguiib zie

zienaaz me. ³³ Bdzin grē zhaguiib co, rēbcha me lo zho:

—jGolxecw zniip! Zhile dze ne cuēz naa lo to; ib laa naa none gbiire guia naa lo men ne pxeel naa. ³⁴ Zguib to naa, per gdzieldraa to naa, ni grieelod gdzin to zaatne guia naa.

³⁵ Grē zha ne ndxie ga, zeene bin zho sca rēb me, rzee zdoo zho.

—jPa naczhe zaatne tsie me? —rnee zho—. jZha nacne ib gdziel ne me? Nend grē zha ladz ne tsieseed me, grē zha ne no stib ladz ben. ³⁶ jZha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guielmban

³⁷ Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grē miech co, rēb me:

—Grēse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho. ³⁸ Sac grēse zha ne dib zdoo gliladz cho nac naa, rnee lo Xtiidz Dios, masaque rriequia tib nis ndzon ne gdzib zdoo zho, pale tib guibee nroob; nis co gdeed tib guielmban cub lo zho.

³⁹ Sca bzeet Jesús Espíritu Sant. Ga bzeet me, grēse zha ne gliladz cho nac me zacnie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lēē men qui ga no guiaad antes ne glanso Men ne nacle diidz cxeel Dios ga.

⁴¹ Rriequia zla zha ne rnee:

—jLēda! jLēēgazh me i! Men qui nac Men ne zēēble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. jNi-acxe lo xtii grē zha co grieequia Men ne cxeel Dios ga? ⁴² Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; lel psilo zho nodildiidz zho dien cho nac me. ⁴⁴ Briequia bla zho go-cladz naaz me, per ni tib zho wbigd nzhen zho me.

⁴⁵ Grē zhaguiib ne zienaaz me ga, scase zho laa zho bdzin. Zeene gon grē pxoz rnabey co, grē zha farisé co choot bdzin nief zho, rēbcha zho:

—jPe nac dzigo ne ziaadniede to me?

⁴⁶ Pquiab zho rēb zho:

—jWlaltaa gard dzian no tib men ne scataa ndzon rnee!

⁴⁷ Rēbcha zha farisé:

—jPe nlipaa rnee to! jYelaque to dzigo beenguet me? ⁴⁸ jPe rwide to, niicle zhiwxtis new, niicle now, ni tib choot rliladz ne me nac Men ne zēēble diidz cxeel Dios ga? ⁴⁹ Grē zha nxen ne rliladz ne nli Dios pxeel me, jmiech ndziibdeele nac zho, sac gon rien d zho zha rnee lo ley!

⁵⁰ Ga zob Nicodem, men ne güeyzodiidznie Jesús ga glo, ye me nacgza grē zha rnabey co, dzigo guso me bnee me lo zho, rēb me:

⁵¹—jGolguien ganle nonguiel da ne lega pe gnee ne. Sac gon, zig nac xley ne, rnabeya none gacndiongazh ne zha nac xtiiidz tib miech, dien pe nac mine quiayun zho, dzigoraa gac guielwxtis.

⁵² Pquiab zho rēb zho:

—jZootne ye luu lēē nacgza grē zha Galilé ne rleyne me? jGrē zha ne cxeel Dios, ni tib zho grieequid Galilé! jLuuzhal bguiba lo grē guits ne ziaad Xtiidz Dios ganle, zeena gliladz luu!

⁵³ Blozh ga, grēse zho laa zho wbi, tib tib zho zeyse zho lidz zho.

8

Tib wnaa ro nēz

¹ Ga brieē Jesús gūey me zaatne rnee zho Gui Oliv.

² Zeēne biini liu co, silgaw laa me bdziñ leñ yadoo co stib. Nzian miech ne goclo lo me ga, nacne bzob me psilo me pseed me zho.

³ Laa me noseed grē miech co, zeēne bdziñ bla maistr ley, ni zla zha farisé, bdziñnie zho tib wnaa ne nole tseeel ni bgaanie me stib mgui; dzigo bzo zho wnaa co glow-taa lo grē miech ne ndxie ga.

⁴ —Maestro —rēb zho lo Jesús—, laa wnaa rii bgaa nonie me stib mgui. ⁵ ¿Pe gnē luu dieñ zha gac me? Sac zig nac ley ne psan Moisés, rnabeya gdeedquie no grē wnaa ne squi nac, haxta guet zho.

⁶ Sca rēb zho, sac laa zho quiaguib dieñ zha cxiñ me tib diidz, zeēna sca grieelo tsiezo zho me lo wxtis. Per zeēne bin me sca rēb zho pquiitsrunga me liu, psilo me con mzhugnia me noquiaa me lo liu.

⁷ Rañ zho rquiabd me, wbiire zho bnabdiidz zho lo me stib; haxta blis lo me, rēb me lo zho:

—Peet nacda, goldeedquie me. ¡Lēeraasi, zha ne rien ni tib doḷ rapd, zha co csilo gdeedquie me!

⁸ Blozh ga biire pquiitsrun me, psilo me stib noquiaa me lo liu.

⁹ Zeēne bin zho sca rēb me, mazd miñe beēñ zho laa zho brieē ga, sac bien zho miech ngoopdoḷ nac zho. Zha ne nacpaa zha gol lo zho bner; blozh ga zō zo brieē zho grē zho; loxaque wnaa cose biaan ga.

¹⁰ Dzigo bzoli me, rēb me lo wnaa co:

—¿Yo grē zha ne scataa baaad-zo luu nu? ¿Ni tib zho lēē beēñquizhd luu xtoḷ luu?

¹¹ —Ni tib zho —rēb wnaa co.

—Niicle naa —rēb Jesús—, guñquizhd naa luu xtoḷ luu. Bzē, per bien gbiiredraa luu guñ luu grē ncuaane guñctal xtoḷ luu.

Jesús nac zig tib biini

¹² Bded ga, tib dze nonee Jesús lo grē zha ne noquiaadiag zhiwseed me, rēb me lo zho:

—Nac naa zig nac tib biini ne rziini lo miech. Grēse zha ne gbig lo naa, led yed zho sorieḷ ni lo ncow, sac naa gziini lo zho zeēna ygaa zho tib guieḷmban ndzon.

¹³ Zeēne bin zha farisé sca rēb me, psilo zho nguiedz roptsie zho rnee zho:

—¡Cho gliladz xtiidz luu! ¡Lēēque luu rnee cho nac luu!

¹⁴ Pquiab me rēb me:

—Niicle ne naaque rne dieñ cho nac naa, per diidzli nac miñe rne naa. Rien naa pa nēz ziaḷ naa, pa nēzga za naa; sangue to gon peet riende to, ¹⁵ gacxe waa, rcaadz-doḷ to naa ncuaane ni nacd naa; ncuaane rcaadzdoḷ to naa, niapse guic to riaba. Teḷ naa, zig nac niina noyund naa guieḷwxtis ¹⁶ per zeēne gdziñ dze co, tib tib miech miñe beēñ zho miñ co glu dieñ pe nac miñe tsieguiaḷ zho; sac Pxoz naa meñ ne nacie naa, me gnē zha gun naa guieḷwxtis. ¹⁷ ¿Pe nacne rliladzde to miñe rne naa? Led rnee lo xley to zeēne tipse rzē xtiidz chop miech, ga rlu ne diidzli rnee zho. ¹⁸ Zig nac niina, naa nac tib zha ne rne cho nac naa, laa stib zho nac Pxoz naa meñ ne pxeel naa; sac gon ye me rnee ganle cho nac naa.

¹⁹ Pquiab zho rēb zho:

—¿Yo Pxoz luu na? ¿Pa no me?

—Runbeyde to me —rēb Jesús—, sac niicle naa runbeyde to naa. Teḷne niaca miñe runbey to naa, runbeyle to me na.

²⁰ Gax zaatne riesañ miech gon leñ yadoo nroob ne zob lad guiedz Jerusalén, ga zob Jesús zeēne sca rēb me; per choot bnaazd me, sac gard gaḷ dze co.

Grieelod gdziñ to zaatne guia naa

²¹ Bded ga, biire Jesús rēb me:

—Laa naa guia nagon. Squiaguib to naa, per lëëque lo xtoḷ to i nitlo to, sac zaatne guia naa grieelod gdziṅ to ga.

²² Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacne squi rnee me goon grieelod gdziṅ ne zaatne guey me.

²³ —Tel to —rëb me—, zha nëz lo guidzliu nac to; laa naa gon zha nëz gbaa nac naa. Meṅ guidzliu rii nac to, sangue naa nacd naa zha guidzliu rii. ²⁴ Gane ni naa lo to lëëque lo xtoḷ to i nitlo to. Ne nligaa, telne gliladzde to ne naa nac men ne nac naa, ible lëëque lo xtoḷ to nitlo to.

²⁵ —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsiṅ naa, laa naa rne lo to ganle cho nac naa.

²⁶ Ndal grë ncuaaṅe zac glisqui naa lo to nu niina, ni ndal ncuaaṅe racladz naa gne naa lo to, per laa naa noyūṅ miṅe rnabeyse meṅ ne pxeel naa; ni meṅ co nac meṅ ne rnee diidzli.

²⁷ Per ib riend zho ne Dios ga rzeet me lo zho. ²⁸ Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë miṅe quiayun naa; sinque miṅe pseed me naa, miṅ co rne naa lo to. ²⁹ Dios pxeel naa ni tibaque nacie me naa, ib rsaand me naa, sac tibaque noxco naa ruṅ naa miṅe rdziladz me.

Zha ne nac xpëëd Dios

³⁰ Grë zha Israel ne ndxie ga, zeene bin zho sca rëb me, bliladz zho ne me nac meṅ ne no cxeel Dios ga. ³¹ Dzigo bnee me lo zho, rëb me:

—Telne racladz to gac to xpëëdscuel naa, zha ne nlipaa ygab xnëz naa, none guiaadnaḷ to grëse

zhiwseed naa. ³² Sac sca gunbey to miṅe nacpaa diidzli, ni lëëw glu lo to zha laa to ne squi nac to zig tib ngundziin.

³³ Pquiab zho rëb zho:

—¿Ngundziin ye! ¡Tel no, zha xti- ipaa Abraham nac no, wlaltaa gard gac no ngundziin lo miech! ¿Pe lo dzigo laa no, ne rnee luu laa xtiidz luu csilaa no?

³⁴ Dzigo rëbchaa me:

—Golquiaadiaga ganle: zha ne tibaque noyūṅtal xtoḷ, rriee- quiaaxe waa tib ngundziin nac zho lo dol ga, sac lëëlew rnabey zho.

³⁵ Ni zha ne nac ngundziin lëë, zig ruṅ miech nëz rii, grieelod xoon zho lo meṅ ne rree zho; sangue zha ne nac mëëd, choot lo ngadood zho.

³⁶ Gacxe waa, tel csilaa Xpëëd Dios to, dzigosi choot lo ngadoodraa to.

³⁷ Nli lo xtii Abraham ziaad to; per laa to quia gon quiaguib to dien zha gut to naa, sac racladzde to yquiaadiag to zhiwseed naa. ³⁸ Laa naa rne grë miṅe blu Pxoz naa lo naa, zeene no naa lo me; sangue to gon, laa to zienalḷ miṅe rnabey meṅ ne nac pxoz to.

³⁹ Pquiab zho rëb zho:

—¿Ni Abraham gon nac pxoz no!

—¿Nlid ga nagon! —rëb me lo zho—. Telne niaca miṅe nli zhin- paa Abraham nac to, zuṅ to grë miṅe been me. ⁴⁰ Per na gon lel racladz to gut to naa, loxaque ne rseed naa to miṅe nac diidzli, miṅe blu Dios lo naa. ¡Tel Abraham led squid been Abraham! ⁴¹ Ni lalnu zienalḷde to miṅe been Abraham, sinque laa to noyūṅ miṅe ruṅ zha ne nlipaa nac pxoz to.

Pquiab zho rëb zho:

—¿Led-xe mëëd no nëzd no waa! Tibaque meṅ ne nac pxoz no, ni lëë meṅ co nac Dios.

⁴² Dzigo rëbchaa me lo zho:

—Telne niaca miṅe nli zhin Dios nac to, nleynie to naa, sac gon lo me brie naa zialḷ naa lo to nu. Led zhaald naa zialḷ naa, me nac meṅ ne pxeel naa. ⁴³ Ib rioguidce

to zha nac grè mine rne naa, ib riende tow, sacne ib nède to yquiaadiag tow. ⁴⁴ Golgacnan sca ganle, lèe pxoz to ga gon nac mendox, lo ma ngab to, gacxe waa rdziladz to run to grè ncuane run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli. Ible lèe xtsiin ma ga nac guielwquidie, gacxe waa ma nac pxoz zha ne rquidie. ⁴⁵ iMin co nagon, niicle diidzli nac grè mine rne naa lo to, per ib riladzde tow! ⁴⁶ Ni tib to choot grielod gnè laa naa noquidie, sac niapse diidzli rne naa. iPe nac dzigo riladzde to mine rne naa? ⁴⁷ Grèse zha ne nlipaa ngab xnèz Dios, rley zho rquiaadiag zho xtiidz Dios; per to gon led xnèzd me ngab to, gacxe waa nède to yquiaadiag tow.

⁴⁸ Horco pquiab zho rëb zho lo me:

—iPsoog ro luu men Samar ngoopdol! iNlique mine rnee no ga nagon, ne mendox noguitnie luu!

⁴⁹ —Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoz naa; laa to gon lel rsanwin to naa. ⁵⁰ Noguibd naa dieñ zha guiaanon naa, per Dios gon racladz me ne sca gaca; ni mesi nan me pe run me. ⁵¹ Gnelli naa lo to ganle: iGrèse zha ne gzoob xtidz naa, gdziñd dze ne guet zho!

⁵² Pquiab zho rëb zho:

—iPer nlique nagon mendox noguitnie luu! Zig nac Abraham name gut me, grè zha ne biadteed xtiidz Dios ne, grèse zho gut zho. iZha nac dzigo rnee luu, zha ne gzoob xtiidz luu, gdziñd dze guet zho? ⁵³ iPe mazdraa dzigo nac luu lo pxozgol ne Abraham, lo grègaa zha ne biadteed xtiidz Dios ga? iCho rzac luu nac luu?

⁵⁴ Rëbchaa me:

—Telne lèeque naa noyunnon naa, nlid mine rne naa dzigo. Per na gon, Pxoz naa, men ne nac Dios ne rnee to riladz to, me rlu ganle ne nli men non nac naa. ⁵⁵ Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, ye le naa ga dzigo noquidie zigne rquidie to. ⁵⁶ Pxozgol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

⁵⁷ Zeene bin zho sca rëb me, rëbchaa zho:

—iGon luu Abraham ye? iNi chooptsii iz name rapd luu! iZha dzigo gon luu Abraham!

⁵⁸ —Gnelli naa lo to ganle —rëb me—, notaque naa; nole naa zeene gol Abraham.

⁵⁹ Horco ptop zho quie laa zho gdeedquie me, per znuse bded me lad zho brie me len yadoo, gon draa zho me.

9

Biac tib mgui ne rold lo

¹ Zieded Jesús tib lugar co, gon me tib mgui ne rcow lo, scale nac lo men co zeene gol me. ² Dzigo bnabdiidz xpèèdscuel Jesús rëb zho:

—Maestro, i bay zha nacne squi golnie men qui guielnè qui? iPe no pe xtol mew, te xtol xmengol mew ye?

³ —Lèda —rëb Jesús—, led por xtol d zhow; sinque squi gol me, zeena zeene laa me guiac, ga gan miech ganle zha nactaa grè ncuane run Dios. ⁴ Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin. ⁵ Laga bii no naa lo guidzliu rii, naa nac zig tib biini ne rziini lo grè miech rii.

⁶ Blozhse sca bnee me, ptsuc me lo liu, bzhixcuaa me niip ben, dzigo

bdëëb mew zhits guidlo mgui ne rcow lo ga; ⁷ blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Px-eel zho zho.)

Dzigo güey mgui co güeytiib me lo me, zeene laa me wbire laa me ranle.

⁸ Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëë rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhal rëb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rëbchaa me:

¹¹ —Men ne rnee zho lë Jesús, men co bzhixcuaa niip beñ dzigo bdëëb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

¹² —¿Yo men co niina na? —rëb zho.

—Dieenda —rëb me—, nanđ naa dien yo me.

¹³ Dzigo güey zho güeynie zho me lo grë zha ne nac zha farisé; ¹⁴ sac lëetse dze ne rdziiladz zho lo dziin, lëetse dze co sca beenguiaac Jesús lo me.

¹⁵ Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëëb Jesús niip beñ lo me, blozh ga güeytiib me lo me, zeene laa me wbire laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë mi-lagr qui?

Zhaase zhaase rnee zho.

¹⁷ Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiaac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

¹⁸ Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xniaa me.

¹⁹ Bdziñ grop menğol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop menğol co—. Ni nli rold lo me zeene gol me; ²¹ per ndionđ no dien zha biaca ne laa me ran niina, niicle ndionđгаа no dien pe no cho beenguiaa. Benque zha gol-le nac me, mazd lo me golnabdiidz, mezhal gnë dien zha biac lo me.

²²⁻²³ Sca rëb grop menğol co, sac rdzieb zho greec zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëëb zho yadoo.

²⁴ Wbiire zho bredz zho men ne biac lo ga, rëb zho:

—Bien ganle Dios zobwi, bnë didzli lo no; sac tel no ndionđ no cholze miech ngoopdol nac men co.

²⁵ —Dieenda —rëb me—. Nanđ naa dien pe miech ngoopdol nac me, te men wena ye. Per me gon beenguiaac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiaac Jesús lo me.

²⁷ Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

²⁸ Dzigo psilo zho ndox zho lo me, rëb zho:

—Luuzhe tel̄ xn̄ez me no luu, sangue tel̄ no zhiwseed Moisés, min̄ co zional̄ no. ²⁹ Sac tel̄ Moisés, ndion̄ no nli Dios pxeel Moisés, per m̄gui co ni ndion̄d no dien̄ pa brieem̄e.

³⁰ Pquiab me r̄eb me:

—iNcuanē gzeegaa zdoos̄ ne i run̄beydaque to cho nac me, ni ron̄ to me beenguiac lo naa! ³¹ Ndion̄ ne gan̄le rquiaadiagd̄ Dios xtiidz chol̄ze miech ngoopdol̄, sinque laa me rquiaadiag xtiidz zha ne rien̄ ne nli men̄ nroob nac me, ni run̄ zho min̄e rnabey me. ³² Stiba, wlal̄taa gard dzion̄ ne cho zha beenguiac lo tib miech ne znu gol̄ rold̄ lo. ³³ Tel̄ne niaca mine nacnied̄ Dios men̄ co, nrieeelod̄ m̄e niunguiac me lo naa.

³⁴ —iPsoog ro luu! —r̄eb zho lo me—. īlb racladzd̄ no guiaad̄ tib ngoopdol̄ nu guiadseed̄ no!

Horco wbiḡ zho, blee zho me ga.

Zha ne rold̄ lo

³⁵ Bin̄ Jesús sca blee zho me ga, dzigo zeenē bdiieel̄ Jesús me, r̄ebchaā Jesús lo me:

—iPē riladz̄ luu men̄ ne nac Xp̄eed̄ Dios?

³⁶ Pquiab me r̄eb me:

—Bzhiguiel̄ bn̄e lo naa dien̄ cho nac men̄ co, zeenā gliladz̄ naa me.

³⁷ —Gon̄le luu me —r̄eb Jesús—. Naa gon̄ nac men̄ co, l̄ēe me nu nozodiidzniē luu niina.

³⁸ Dzigo pquitsgzh̄ib me lo Jesús, ni r̄eb me:

—Dib̄ zdoos̄ naa riladz̄ naa ne nli Xp̄eed̄ Dios nac luu.

³⁹ Blozh̄ ga r̄ebchaā Jesús:

—Laa naa zial̄ lo guidzliu rii, zeenā glu dien̄ cho rap̄ dol̄, dien̄ chogaa rapd̄ dol̄; sac zha ne rzac miech peet̄ riend̄, laa zho tsāa bi-ini; laa zha ne rzoob̄ zho niini, laa xquiel̄rien̄ zho ycow, guiaan̄ zho ziḡ tib̄ zha ne rold̄ lo.

⁴⁰ Blalaā zha farisé̄ zo ga, zeenē bin̄ zho sca r̄eb me, r̄ebchaā zho lo me:

—iRz̄ē diidz̄ qui na l̄ēe ye lo no rold̄?

⁴¹ Dzigo pquiab me r̄eb me lo zho:

—Tel̄ niaca min̄e nlipaā zha ne rold̄ lo nac to, grieeelod̄ gni naa rap̄ to dol̄. Per na, ne masaque rzac to rolr̄aa lo to, gane gr̄ese ncuanē quiayun̄ to xtol̄ to noyaca, to z̄ēeba.

10

M̄ecwxiil̄ ni zha ne rquianap̄ ma

¹ Ni r̄eb̄ Jesús:

—Gol̄quiaadiaga gan̄le: gr̄ese zha rded̄ stib̄ n̄ez zeenē rz̄ēeb̄ zho len̄ lidz̄ m̄ecwxiil̄, laa ne ted̄ zho n̄ez ro puert̄, gase rlu ngbaan̄ ga nac zho; ² sac tel̄ men̄ ne noyan̄ maw, n̄ez ro puert̄ n̄ez co rz̄ēeb̄ me. ³ Zha ne rquianap̄ ro lidz̄ ma, ga r̄xal̄ zho rded̄ me; niiclē magaaw, zeenē ron̄ ma tsi me, gr̄ese ma rdziñ̄ lo me; dzigo rbedz̄ me ma, rneel̄ē me ma tib̄ tib̄ ma, laa me rbeē ma ga. ⁴ Rlozh̄se rbeē me gr̄ē ma ne nac xma me, laa me rner̄ lo ma; gr̄ese ma laa ma rnal̄ zh̄its me sacne run̄bey ma tsi me. ⁵ Rienāld̄ ma zh̄its stib̄ miech, zeenē ran̄ ma zho znuse r̄zhoon̄ ma; sac run̄beyd̄ ma tsi zho.

⁶ Gr̄ē zha ne ndxiē lo me ga, ib̄ biend̄ zho zha nac godiidz̄ co; ⁷ dzigo wbiire me bneē me lo zho, r̄eb me:

—Gol̄quiaadiaga gan̄le: Naa gon̄ nac ziḡ ro Puert̄, zaatne rded̄ m̄ecwxiil̄ ga. ⁸ Gr̄ese zha ne biaad̄ glo rneē zho zha nac Men̄ ne nacle diidz̄ cxeel̄ Dios ga, gr̄ese zha co ngbaan̄ ga nac zho, loxaque psacsi zho par grieeelo cuan̄ zho; ni gr̄ese m̄ecwxiil̄ ne nacpaā xp̄ecwxiil̄ naa, güeynal̄d̄ ma zh̄its zho. ⁹ Sangue naa, laa naa nile lo to gan̄le: Naa nac ziḡ ro Puert̄, zaatne rded̄ m̄ecwxiil̄ ga. Gr̄ese zha ne gbiḡ lo naa, zlaā zho, peet̄ lo tsoxtseeb̄draā zho; pale gr̄ē m̄ecwxiil̄ ne zoz̄ēeb̄ zor̄iee ro lidz̄, ni rdziel̄ ma guizh̄ nguia, guizh̄ ndzon row ma. ¹⁰ Zha ne nac ngbaan̄, zeenē riaad̄

zho loxaque rban zho ni rut zho; sangue naa, laa naa zial zeena yгаа to tib guielmban ne mazdraa ndzon, tib guielmban ne gdziṅd dze lozh.

¹¹ 'Naa nac Baxtor ne nquialadzpaa xpëcwxiil. Sac zha ne nquialadzpaa xpëcwxiil, rquiad zdoo zho xquielmban zho, rsilaa zho ma lo guielxtseeb ne notaa ma. ¹² Per tel noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiil ga laa zho rzhoon; sac led chenḍ zho ma, led zhad nac xbaxtor ma. Zeene rdziṅ coyot, nëzrii nëzrec rtsieets coyot ma, nogaa ma rgaa lo coyot. ¹³ Rzhooṅ zho, sac dimise nonie guic zho, peet liaadz nod zho ma. ¹⁴⁻¹⁵ Naa nac Baxtor ne nquialadz xpëcwxiil. Zigne runbey Pxoz naa naa ni runbey naa me, sca runbey naa grëse xpëcwxiil naa, niicle magaaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

¹⁶ 'No spalal xpëcwxiil naa, ma ne ngabd len corral rii; grëse ma co, ible zon ma tsi naa sac laa naa no gaxi ma, zeena tipse gag ma grë ma yquianaap naa ma.

¹⁷ 'Men ne nac Pxoz naa, rleynie me naa sac laa naa rbeeladz xquielmban naa; per ible zriebaanaa. ¹⁸ Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbeey co lo naa.

¹⁹ Grë zha Israel ne ndxie ga, zeene bin zho sca rnee me, laa zho goc chop dii stib. ²⁰ No zho rnee:

—Yase mendox noguitnie guic men qui, o rzhinlegaa guic me. ¿Pe nacle rquiaadiag to xtiidz me?

²¹ Rquiab stib zho rnee:

—Niini rzë xtiidz men qui, led squid rac zha ne noguitnie

mendox. Stiba, ¿niacxe zrieelo mendox gunguiac ma tib lo zha ne rold lo?

Rnee Jesús Xpëed Dios nac me

²² Len mëe ne rac nala, len dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdziṅ Jerusalén len dze co. ²³ Laa me zieded tib len nsaap ne quia cho yadoo co, nsaap ne rnee zho zhiNsaap rey Salomón; ²⁴ zeene wbig bla zha ne rnabey Israel, bnabdidz zho lo me rëb zho:

—¿Poc dzigo gdziṅ dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinagazh bnëw lo no.

²⁵ Pquiab Jesús rëb me:

—Blactaale zine naaw lo to, per rliladzde tow. Stiba, pe zhidaa milagr ne ziyan to run naa, gase rlu ganle cho nac naa; sac Dios men ne nac Pxoz naa, men co racniën naa run naaw. ²⁶ Ib rliladzde tow, sacne led yede to ngab lo naa.

²⁷ Tel zha ne ngab lo naaw, runbey zho naa; niicle naagaaw runbey naa zho, ni zhits naa rzënal zho. ²⁸ Grëse zho, rded naa tib guielmban ne gdziṅd dze lozh lo zho, ni gdziṅd dze nitlo zho. Choot grielod ctiche zho lo naa, ²⁹ sac men nroob nac Pxoz naa men ne pxeel zho lo naa; choot grielod cuee zho ladznia me. ³⁰ Ni tibaque nac no grop no me.

³¹ Zeene bin grë zha rnabey co sca rëb me, psilo zho ptop zho quie nan zho ngoquie zho me. ³² Dzigo rëbchaa me lo zho:

—Lo grëtaa milagr ne quiaynien Pxoz naa naa quiayun naa lo to. Golnë dien, ¿pa min rlisqui to ne laa to racladz gneedzquie to naa?

³³ Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quiaquitiën luu Dios! ¿Tib

miech beñse name nac luu, ni rnee luu laa luu nac Dios!

³⁴ Dzigo rëbchaa me lo zho:

—¡Lo xlibr ley to name zhobnee zha rzac Dios zha ne pcaania xtiidz me, rëb me dios nac zho! ³⁵ Ni ndion ne ganle, grëse miñe rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, ³⁶ ¿niacxe rguitnie naa me ga, zeene rne naa Xpëed me nac naa, ni mezhal bzooblo naa pxeel me naa lo guidzliu rii? ³⁷ Telne rund naa milagr ne rlu Dios pxeel naa, ib gliladzde to naa. ³⁸ Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guiend to ganle ne tibaque nac no grop no me, zigtaa nacie me naa, scaque nacie naa me.

³⁹ Horco gocladz zho stib naaz zho me, per znuse brie me nia zho. ⁴⁰ Dzigo brie me ga güey me ro guiubee Jordán, zaatne bio Juan pchoobnis Juan miech; ga blëz me palal dze. ⁴¹ Nzian miech ne güey lo me ga, rnee zho:

—Nli beend Juan ni tib milagr nroob, per grëse miñe bnee me zeene bzeet me men rii, zigne bneese me laaw norieequia niina.

⁴² Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëëble diidz ga cxeel Dios.

11

Gut Lazh

¹ Len dze co blanguidz tib mgui ne no guiedz Betain, lë Lazh; no chop bzian Lazh tib zho lë Mart stib zho lë Marí. ² (Lëe Marí rii pchoob tiblo nceit nex ni Jesús, ni pcuudz mew con guitsguic me.) ³ Dzigo pxeel grop wnaa co diidz lo Jesús, gacnan me laa Lazh rzacné, sac nan zho rleyniedox me Lazh.

⁴ Zeene blanso diidz, nëchaa me:

—Peet tsienied guic to, niicle tel blanguidz me per nacda par guet

me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho, ⁶ per ib biobladz me; lel blëz me schop ngbidz zaatne no me ga. ⁷ Dzigoraa në me lo no:

—Laa ne guio nëz xtan men Judé stib.

⁸ Dzigo rdzieets no:

—Maestro, ¿racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹ Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; ¹⁰ loxaque pcow liu, noxtseeb pa griel ni ne; sac ncow rna.

¹¹ Blozh ga në me:

—Laa xamigw ne Lazh nixguiesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixguies Lazh, dzigo rdzieets no lo me:

—Telne raaguiesle me, zac-wen me sca.

Ib biend no ne gutle Lazh, gane sca rnee me. ¹⁴ Dzigoraa clar bnee me lo no, në me:

—Laa Lazh gutle. ¹⁵ Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nëz lo me ga niina sca.

¹⁶ Laa Mazh, zha ne rnee zho “Mëedgrop”, zeene bin Mazh sca në me, rneechaa Mazh lo no:

—Guiend rson, golgotsaa cchoob zdoo ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹ Gax Jerusalén riaan Betain. Zha ne rree Jerusalén, maase groj hor run zho nëz rdziñ zho Betain. Nzian grë zha Jerusalén

rdziñ riequiaabdiuzh zho Marí grop Mart, riechoobladz zho zdoo me lo xquielñé me ga.

Dze ne rac tap ngbidz bioliu Lazh, dzigora laa Jesús bdziñ.

²⁰ Goñ Mart pa lo ziaad Jesús, dzigo brie me biaad-xinéz me Jesús; laa Marí biaan ro yu.

²¹ —Jesús —rëb Mart—, telne niaca miñe nu no luu segur niete bzian naa; ²² sac nañ naa, grëtaa ncuaañe rnab luu lo Dios, ruñ me miñe rnab luu.

²³ —Peet tsienied guic luu —rëb Jesús—, ible zrieeban bzian luu.

²⁴ Pquiab Mart, rëb Mart:

—Nliw, nanpaa naa ible zrieeban me gal dze ne laa guidzliu rii nitlo, zeñe grëse mençut, laa zho grieeban.

²⁵ Dzigo rëb Jesús:

—Naa nac men ne rbeeban grë mençut, ni naa nac men ne rdeed guielmban lo grë miech. Grëse zha ne dib zdoo gliladz naa, niicle guet zho zig ret grëraa miech rii, zdziñ dze ne gban zho stib. ²⁶ Sac grëse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lëë Mart, ne sca gaca?

²⁷ —Rliladz naaw —rëb Mart—. Rliladz naa ne luu nac men ne bzooblo Dios ga, luu nac Xpëed Dios, Men ne zëëble diidz ga cxeel me guiaad lo guidzliu.

²⁸ Blozhse ga, wbiere Mart zie Mart zietsedz Mart Marí. Bdziñ Mart zhlianse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rëb Mart, brie nguzhoon Marí laa Marí zie nëz co. ³⁰ (Bdziñ Marí, laa Jesús bii zo zaatne güeydzieel Mart me ga; gase blëz me, bzëëbd me lad guiedz.) ³¹ Grë men Israel, zha ne ndxie lidz Marí ga ziechoobladz zdoo me, zeñe gon zho sca lëëled

brie me, nalaque zho zhits me; sac nañ zho bod ro xpaab bzian me ziegoon me.

³² Zigne bdziñ me zaatne zo Jesús ga, pquitsgzhiz me lo Jesús.

—Jesús, luu ne nac luu men ne rnabey —rëb me—, telne niaca miñe nu no luu zeñe blanguidz bzian naa, niete me.

³³ Psilo Marí roon Marí. Zeñe gon Jesús, niicle Maríw, niicle grë zha Israel ne bdziñ ga, mban rac zho, grëse zho roon, dzigo ye me biab guielñé me. ³⁴ Bnabdiidz me rëb me:

—¿Pa lo pqueets to me?

—Dë ganle —rëb zho—, zeña gan luu pa lo bgueets me.

³⁵ Horco psilo Jesús biin me. ³⁶ Grë zha Israel co, zeñe gon zho roon me, rneechaa zho:

—¿Golwi ganle, blactaa nquialadz me Lazh!

³⁷ Laa zla zho rnee:

—Led me name beñguiac lo mgui ne rold lo ga, ¿pe nrieelod zha niun me, zeña niete Lazh?

Brieeban Lazh

³⁸ Zeñe laa Jesús bdziñ ro baan Lazh, biire biab guielñé me.

Zig nac tib blee niaa baa co; rna tib quie nroob ntse zaatne rsëëb zho ngutoo; ³⁹ dzigo bnabey Jesús cob zho quie co.

Pquiab Mart, bzian ngutoo co rëb me:

—¿Mazd gdiobda! ¿Nadze rac tap ngbidz gut me, mbanle na rlaa me!

⁴⁰ Dzigo rëbçhaa Jesús:

—Led laa naa nile lo luu, telne dib zdoo luu rliladz luu naa, bii zan luu ganle zha nactaa grë ncuaañe ndzon ne ruñ Dios.

⁴¹ Zeñe blozh bdoob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoza naa, xquizh xquielnzaac luu sac rquiaadiag luu miñe rne naa. ⁴² Nañ naa tibaque rquiaadiag luu miñe rnee naa, per laa naa rzeta niina, zeña

grëse miech ne ndxie nu gliladz zho ganle ne nli luu pxeel naa.

⁴³ Dzigo nguiedz bredz me, rëb me:

—iLazh, brieel!

⁴⁴ Zigne sca bnee me, laa ngutoo co brieel ga, scase nriël lar dib nia me, dib ni me ne, ni nioog stib lë lar lo me. Dzigo rëb Jesús:

—iGolxadz grë lar ne nriël me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

⁴⁵ Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me. ⁴⁶ Nogaa zho lel güey zho güeyzodiidz zho lo grë zha farisé zha bleeban me Lazh. ⁴⁷ Horco lëéléd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiaayun me? ⁴⁸ Telne squise csaan ne me, mbe grëse miech sëëb xnëz me; lozh ga, zeene gacnan men rnabey ne zob Romaw, laa me cxeel grë xmenguiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, men ne nac pxoz nroob len iz co, rëb me lo zho:

—iNi lal nu lëë peet riende to! ⁵⁰ ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

⁵¹ Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel, ⁵² ni grëragaa zha ne no dipse lo guidzliu, zeena tipse gac grëse zha ne nac xpëed Dios.

⁵³ Dzigo grëse zha ne nac wxtis ga, laa zho biaan diidz ne ible no yгаа Jesús gut zho me. ⁵⁴ Nacne

briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliiaz no grë no me.

⁵⁵ Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse mine rnabey ley par guiaanmbe zho lo xtol zho. ⁵⁶ Grëse zha ne rdziñ, len yadoo no zho rnabdiidzlas zho dien pe zdziñ Jesús lo lni; sac grëse zho racladz gan me.

⁵⁷ Laa grë pxoz ne rnabey, ni grë zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaaaz me.

12

Pchoob tib wnaa nceit nex guic Jesús

(Mt. 26:6-13; Mr. 14:3-9)

¹ Sxoop ngbidz gdziñ dze lni Pascwa, güey Jesús guiedz Betain, zaatne no Lazh, men ne bleeban me ga. ² Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuaane gowxtsee zho lo mezh, ³ tibaque zeene bzëëb Marí bzëëbnie Marí tib lo nceit nex ne rriee guiee ne lë nard, tib lo nceit niazha, rgaaw maase groļ boté. Zigne bdziñ Marí bdëëb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zëbxlaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdëëb Marí nceit co ni Jesús, rneechaa Judas:

⁵—Mazd tebaa zha ndo nceit qui. Nguihpaa zhow maase tson gayoo pes plat, dzigo needz zho dimi co ngaaza lo grë zha mban ne guieñd pe yquuin.

⁶ Sca rnee Judas, per nliđ ne rquia zdoo Judas zha ne guiend pe yquiu, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhliaanse rbee Judas dimi co.

⁷ Dzigo rēbchaa Jesús:

—Psaan me. Ib laa me bdēeb nceit qui ni naa, zeena nzhixcuaale xcuerp naa gal dze ne laa naa ygueets. ⁸ Telne racladz to gun to xyudar zha ne guiend pe yquiu, tibaque ranla to grē to zho, zac tswogad to lo zho; sangue naa zdziđ dze gandraa to naa.

⁹ Ndal grē zha Israel, zeene bin zho laa Jesús no guiedz Betain, bio zho nēz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grē pxoz rnabey cow, nacne bnediidaque zho ye Lazh none gut zho; ¹¹ sac por Lazh, nzian grē zha non, laa zho rbig nēz lo Jesús, laa zho riladz ne nli me nac Men ne zēēble diidz ga cxeel Dios.

Bzēēb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob diidz laa Jesús gdziđ ga dze co. Grē miech guizhiu ne bdziđ ga zie lni Pascw, ¹³ psilo zho brie zho ziaad-xinēz zho me; tib tib zho nzhenē zho tib lē zin. Lo guielbley co, zeene gon zho me, psilo zho nguiedz roptsie zho, rnee zho:

—iZha men nroobtaa nac Dios! iZha ndzontaa men rii pxeel Dios ziaad lo ne! iLēē men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵ Grēse to men Israel, gdziebde to. iGolwi ganle, laa men ne rnabey ladz to ziaad i, zobse me lad tib burr yeen!

¹⁶ Grēse no ne nac no xpēēdscuel me, ni tib no biend hor co ne grēse

ncuaane noyac ga, raquietlew lo Xtiidz Dios; sinque haxta zeyle me gbaa, dzigoraa psoladz no nzian grē ncuane raquiet lo Xtiidz Dios ga, gonlo no goca; ni bien no Jesús raquiet ga.

¹⁷ Lad grē miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grē miech co. ¹⁸ Ni nzian grē miech co, laa zho blanso ga ziaad-xinēz zho me, sac bin zho zha been me milagr nroob co. ¹⁹ Grē zha farisé, zeene gon zho grē miech guizhiu co, rneechaa zho:

—iPe zhidaa grē miech qui racnie men qui! iPeraa nadien dziuun ne!

Rguib bla zha Gres Jesús

²⁰ Lad grē miech ne bdziđ Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, ²¹ dzigo bnee zho lo Lip (zha Betsaid nac Lip) rēb zho:

—Bzhiguiel bnē dien pa lo no Jesús, laa no racladz dzian no me.

²² Dzigo güey Lip rēb Lipa lo Ndrés, blozh ga güey zho grop zho güeynie zho diidz lo Jesús.

²³ Dzigo rēbchaa me lo zho:

—Naa ne nac naa Mgui ne pxeel Dios, niinataa nagon laa dze bdziđ zeene laa naa gbire guia gbaa stib.

²⁴ Golquiaadiaga ganle: Tib zhobxtil, telne tsoda liu tibaque zhob naca; per zeene laa zhob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnēz naa. ²⁵ Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zгаа zho tib guielmban ndzon ne ib gdziđ dze lozh. ²⁶ Zha ne racladz sēēb xnēz naa, none gun zho mine rnabey naa; ni zaatne gdziđ naa yeque zho no gdziđ ga. Ni grēse zha ne sēēb xnēz naa ni gon zho xtidz naa, zunnon Pxoz naa zho. ²⁷ Mban rac

zdoo naa niina. Per lēda ga guṇ naa, teṇe guiep naa lo Pxoṇ naa csilaa me naa lo grētaa guieṇē ne no teed naa. ꝑSac par miṇcopaa zial naa lo guidzliu rii!

²⁸ 'Dios, luu ne nac luu Pxoṇ naa —rēb me—. Blu lo grē miech rii ganṇe ne meṇ nroob nac luu.

Dzigo bin zho zēēb tib tsi meṇ co gbaa, rēb me:

—Laaw blule naa, ni niina laa naa gbire gluw stib.

²⁹ Nzian grē miech ne ndxie ga, zeēne bin zho tsi meṇ co, bzhaac zho nguziw; zha ne bien led nguzida, rnee zho:

—Xanjṇ Dios ga goṇ bnee lo me.

³⁰ Dzigo rēbchaa me lo zho:

—Laa to bin ganṇe laa Pxoṇ naa bnee, ni por to goṇ bnee me, zeēna gon to tsi me ni gliladz to ne me pxeel naa. ³¹ Laa dze nagon bdziṇ zeēne laa Dios guṇquizh naa xtol grēse miech guidzliu rii; lēē dze bdziṇ zeēne laa meṇdox piche gnabeydraa ma lo guidzliu rii zigne rnabey ma niina. ³² Sac zeēne laa naa quia glaa lo cruz, ga cuedz naa grēse miech zeēna sēēb zho xnēz naa.

³³ Ga bzeet me zha gut miech me.

³⁴ Grē miech ne ndxie ga, zeēne bin zho sca rēb me, rēbchaa zho:

—ꝑGuet luu ye? Lo Xtiidz Dios name rnee, ib guete Meṇ ne cxeel Dios ga. ꝑZha nac dzigo ne rnee luu laa luu guet? ꝑChopaa dzigo nac luu?

³⁵ Dzigo pquiab me rēb me lo zho:

—Naa nac zig tib biini ne noziini lo miech; ni ngabse dze ne cuēz naa lo to. Laga noziini naa lo to, golsēni zaatne riab biini zeēna ygaade to guieṇcow; sac zha ne rzē lo ncow riend zho palo zie zho. ³⁶ Niina ne rdeeda diidz golliladz cho nac naa, zeēna gac to zha ne nlipaa no lo biini.

Blozhse sca rēb me laa me biche ga, blulodraa me lo zho. ³⁷ Niicle gonlo zho nzian milagr ne beēn me,

per ib rliladz zho ne nli Dios pxeel me. ³⁸ Ni ib scalegaa no gaca, sac ga brieequia miṇe bzeet Isá (tib meṇ ne biadteed xtiidz Dios) zeēne znu rēb me:

Dios, bui ganṇe ni tib choot nēd gliladz xtiidz luu, niicle ran zho grētaa milagr ne run luu.

³⁹ Ni nligaa ib brieelod nliladz zho me; sac zeēne pquiaa Isá, znu rēb me:

⁴⁰ Ncow psan Dios lo zho, ni beēndip me zdoo zho;

zeēna ganṇd zho me, niicle guieṇdgaa zho zha gbig zho lo me csilaa me zho lo xtol zho.

⁴¹ Zeēne znu bnee Isá, ible Jesús ga bzeet me; sac goṇ me grētaa guieṇdzon ne rap Jesús. ⁴² Ndal zho sca ib bliladz me, per noquegaa zha ne bliladz me; zig nac grē zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo. ⁴³ ꝑNi stiba rdziladzraa zho guiaanon zho lo miech, laa ne guiaanon zho lo Dios!

⁴⁴ Leṇ dze co, tib vuelt nguiedz bnee Jesús, rēb me:

—ꝑGrēse zha ne rliladz naa, yele Pxoṇ naa ga rliladz zho! ⁴⁵ ꝑNi zeēne rwi zho lo naa, yele meṇ ne pxeel naa ga ran zho! ⁴⁶ Naa nac zig tib biini ne rziini lo miech, ni grēse zha ne dib zdoo gliladz cho nac naa, zriee zho lo guieṇcow ne no zho. ⁴⁷ Grēse zha ne gon Xtidz naa, ni gband zho zigne rnabeya, led naad guṇquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol. ⁴⁸ Xtidz naa gac ley ne guṇquizh zhow; zigtaa zhaw zigtagaa grē zha ne nēd guṇbey naa, grē zha ne nēd yquiaadiag xtidz naa. ⁴⁹ Sac grēse ncuane pseed naa miech, led guicd naa biaba, sinque Pxoṇ naa meṇ ne pxeel naa, meṇ co rnabey naa pe nac miṇe

cseed naa zho. ⁵⁰ Ni nanpaa naa, grëse diidz ne rnabey PxoZ naa naa rne naa, lëew rlu zha yгаа miech tib guielmban ndzon ne gdziñd dze lozh; gacxe waa, grëse mine rnabey me gne naa, zigne racladz me scase rne naaw lo to.

13

Rguiib Jesús ni xpëëdsuel me

¹ Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodiowxtsee. Rienle me ne gataa laa dze co bdziñ, zeene laa me gbi lo guidzliu rii gbire me lo PxoZ me stib. Grëse zha ne ngab lo me, rleynie me zho; ne nli-gaa rleynie me zho haxta bdeed me xquielmban me psilaa me zho. ²⁻⁴ Rien me grëtaa ncuaañe no, ladz- nia me psañ PxoZ mew; lo PxoZ me brieë me ziaad me lo guidzliu, ni lo PxoZ me gdziñ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziññe me tib lë lar nool. Par hor co, laa mendox pquii- le Judas, zhin Simón Iscariot, parne tsieto Judas me. ⁵ Dzigo blaas me nis tib leñ bandej laa me psilo noguiib me ni grë zha ne nacgza no, zigse rlozh rguiib me ni tib zho scase scase rcuidd mew con lar ne ndxie leñ me ga. ⁶ Zeene laa me zie quiiib me ni Simón Pedr, rëbchaa Simón lo me:

—jLëda i gon! ¿Pe nacne lel luu quiiib ni naa?

⁷ Pquiab me rëb me:

—Grieelod guien luu niina, pe nacne quiiib naa ni luu; haxta tedraa nu dzigo ganle guien luuw.

⁸ —jNend scaw! —rëb Pedr—. jPer naasi gon gnedzd naa diidz quiiib luu ni naa!

Dzigo rëbchaa me:

—Grieelod sca ygab luu xnëz naa, telne siguield luu quiiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to? ¹³ Golwi ganle: To lëë, Maestro rnee to lo naa, ni rnee to naa nac men rnabey; ni nonguiela gon, sac ne nli-gaa scaw. ¹⁴ Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to. ¹⁵ Laa naa blule lo to zha gun to, nana sca goltsienal min co. ¹⁶ Gnelli naa lo to ganle, lo grë zha ne nac ngundziin, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo zha ne rxeel zho. ¹⁷ Laa to nanlew nasca. Gacxe waa, telne tsienal to wseed rii, zaacse gac lo xquielmban to.

¹⁸ 'Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: “Lëëque tib zha ne rownie naa, grieequia tsielo naa ladznia zha ne gut naa.” ¹⁹ Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa. ²⁰ Ni golgona ganle, grëse zha ne ycaania Espíritu Sant, men ne cxel naa, naale ga nocaania zho; ni zha ne rcaania naa, yele men ne pxeel naa ga rcaania zho.

Rëb Jesús ne Judas nac zha ne tsieto me

(Mt. 26:20-25; Mr. 14:17-21; Lc. 22:21-23)

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwilolsa no, riend no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw); ²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga. ²⁵ Nacne wbig gax naa, bnaabdiidz naa lo me.

²⁶ Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëë zho ga.

Dzigo bzhen me tib lë guietxtil, blozhse bloobie me guietxtil co, laa me bdeeda lo Judas. ²⁷ Zigne bnaaz Judas guietxtil co, laa mendox bzëëb zdoo Judas. Dzigo rëbchaa Jesús lo Judas:

—Miñe no guic luu gon luu, na zeen nawdzegazh beëna.

²⁸⁻³⁰ Zigne blozh dow Judas guietxtil co, lëëled brieë Judas ley; pcowle liuw.

Lo grë no ne zioobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuane rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guiend pe yquiin; sac Judas nac zha ne ngotsow bziuud win ne no dimi.

³¹ Gonse Jesús laa Judas brieë ley, dzigo nëchaa me lo no:

—Niina nagon bdzin dze zeene glu ganle zha nroobtaa guieIndzon ne rap Mgui ne pxeel Dios, ni ga glu ganle pa lotaa nac guieIndzon ne rap Dios. ³² Ni scaque Dios, zlu me ganle pa lotaa nac guieIndzon ne rap Mgui ne pxeel me ga. ³³ Xin

yeëna, jzhile cuëz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Grieelod sënal to zaatne ga naa. ³⁴ Gane laa naa rsan tib diidz cub rii, ni laa naa rnabey to gon tow: Tib tib to, golleynie zha ne nacgrë to, golgantsi zho. Zigne rleynie naa to, sca golleynie zho. ³⁵ Zeene gan miech, ne nligaa dib zdoo to rleynie to samiech to, dzigo zien zho xpëëdsuel naa nac to.

Ible ziab Pedr runbeyd Pedr Jesús
(Mt. 26:31-35; Mr. 14:27-31; Lc. 22:31-34)

³⁶ Dzigo bnaabdiidz Pedr lo Jesús, rëb Pedr:

—Maestro, çpa dzigo nac zaatne tsie luu?

Dzigo rëbchaa me:

—Zaatne ga naa, grieelod sënal luu niinagazh; per ib laa luu no guiaadnal.

³⁷ Pquiab Pedr, rëb Pedr:

—çPer pe nacne grieelod sënal naa zhits luu niina? çSënal naa zhits luu gon, niicxe maase gut zho naa waa!

³⁸ Dzigo rëbchaa me:

—çGoon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuedz tsonle vuelt rëb luu runbeyd luu naa.

14

Niapse por Jesús gdzin miech lo Dios

¹ Tsode to zhgab, tsode to guieInë. Tiblique golgun guic to, zigne dib zdoo to rililadz to Dios, scaque dib zdoo to golliladz cho nac naa. ² Gologna ganle: Zaatne nac lidz Pxoz naa, ndaldoo zaatne cuëz miech no ga, tel niaca miñe guiend zaatne cuëz to, nile naaw lo to na. Gacxe waa, niina laa naa ga, gahzixcuaa naa zaatne cuëz to ga. ³ Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sënal zhits

naa; zeena tibaque zaatne gbiaaz ne. ⁴ Laa to nanle nasca pa lo ga naa, ni nanlegaa to nêz ne.

⁵ Pquiab Mazh rëb Mazh lo me:

—Maestro, pelej nêz na gacndion no, ni per ni zaatne tsie luu ndiond no.

⁶ Dzigo rëbchaa Jesús:

—Naa nac nêz co, naa rseed miech mine nac diidzli, ni naa rded tib guielmban ndzon ne ib gdzind dze lozh. Lo grëse miech, zha ne gliladz cho nac naa, zha co gdzin lo Pxoz naa; guiendraa stib mod ne gdzin zho lo me. ⁷ Telne runbey to naa, dzigo runbeyaue to Pxoz naa. Ni runbeylegaa to me, sac tibaque ran to me.

⁸ Dzigo rëbchaa Lip lo me:

—Bzhiguiel mazd blu Pxoz luu lo no. Totsaque dzian no me, lëëlew ga dzigo.

⁹ Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. ¡Grëse zha ne ran naa, lëëque Pxoz naa ga ran zho! ¿Zha nac dzigo ne racladz luu glu naa me lo to? ¹⁰ ¿Niacxe rliladz luu dzigo ne tibaque nac no grop no Pxoz naa? Grëse mine rseed naa to, led guicd naa riaba; grëse ncuaane run naa, me rnabeya, me runa sac tibaque nac no grop no me. ¹¹ Goliladz sca ne tibaque nac no grop no Pxoz naa. Telne goon rliladzdgaa tow zigne rnee naa lo to nu, siquier lo grë dziin ne nodziun no, ga golgan ganle ne nli tibaque nac no grop no me.

¹² Ne nligaa, gneli naa lo to ganle: Grëse zha ne rliladz cho nac naa, ye zho zun zho grë milagr ne run naa, ni haxta nroobraa ncuaane gun zho; sac tel naa, laa naa no guia zaatne no Pxoz naa. ¹³ Ncuaane gnabtaa to lo Pxoz naa, totsaque glu to ne nli rliladz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non. ¹⁴ Ne

nligaa, telne rnalto to naa, ncuaane gnabtaa to zun naaw.

Sxeel Jesús Espiritu Sant

¹⁵ Telne nli rleynie to naa, golgun grë mine rnabey naa to sca. ¹⁶ Scagaa naa, laa naa gnab lo Pxoz naa cxeel me tib men ne tibaque gacnien to, tibaque choobladz zdo to; ib gdzind dze ne csaan me to. ¡Lëë men co ga nac Espiritu Sant, men ne rlu pa min nac diidzli; ni ible sxeel Pxoz naa me! ¹⁷ Zha ne ngabd xnêz naa, grielod ycaania zho me, sac ran zho me niicle runbeyd zho me; sangue to, runbey to me sac me quianap to niina, ni zbëzgaa me zdo to.

¹⁸ Ib csaanladzd naa to, zbire naa guial naa lo to stib. ¹⁹ Nli zhilew, zeene gandraa grë miech naa, sangue to gon bii zan to naa; sac zriebaan naa, ni scaquegaa to zgaa to tib guielmban ndzon ne gdzind dze lozh. ²⁰ Gal dze co, zeene gan to laa naa grieeban, ga gliladz to ganle ne nli tibaque nac no grop no Pxoz naa, zigne tibaque nacie naa to ni naciegaa to naa. ²¹ Zha ne runbey zha nac grë mine rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxoz naa zleynie me zho; niicle naagaaw zleynie naa zho, ni zlu naa lo zho ganle cho nac naa.

²² Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

²³ Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoz naa gbannie no zho; sac zigne rleynie zho naa, scaque zleynie me zho. ²⁴ Sangue zha ne rund mine rnabey naa, ¿zha dien glu naa lo zho cho nac naa? Sac rlu rleyniéd zho naa. Golsoladz ganle: grëse diidz

ne ron to rne naa, led guicd naa riaba, xtiidz Pxoꝝ naaw. ²⁵ Laa naa rne grē miñ rii, laga bii zo naa lo to nu, ²⁶ per zeene laa Pxoꝝ naa cxeel Espiritu Sant meñ ne guiaad cchoobladz zdoo to (meñ co guiaad xcuent naa), meñ co lozh cseed to, ni guñsoladz me to grēse miñe bne naa lo to.

²⁷ Laa naa guia, per laa naa rsañ tib guiełbley zdoo to, zeena zigne tibliladz rac zdoo naa, scaque tibliladz gac zdoo to. Sac guiełbley ne rnedz naa lo to nu, nacda zig nac guiełbley ne runbey grēraa miech guidzliu rii. Tsoꝛde to zhgab sca, niicle gdziebde to. ²⁸ Laa to binle ganle, laa naa no guia lo Pxoꝝ naa per zbire naa guida naa lo to stib. Telne nli rleynie to naa ine nley golgac, niina ne ron to laa naa guia lo me, sac gon meñ nroobraa nac me lo naa. ²⁹ Laa naa rne grē miñ rii lo to niina, zeena zeene gaca, ga lozh guien to ganle cho nac naa.

³⁰ Led nroobdraa sodiidznie naa to, sac ile ziaad mendox, meñ ne rnabey lo guidzliu rii. Peet grieelod gun mendox naa, ³¹ per ible none gon naa xtiidz Pxoꝝ naa meñ ne pxeel naa, zeena gan miech ganle ne nli rleynie naa me. ¡Goltsieso nasca, zeena zio ne!

15

Jesús nac zig tib lbē uv

¹ Naa nac zig tib zhan lbē uv, laa to nac zhicwa, laa Pxoꝝ naa nac zig tib zha ne quianapa. ² Grēse zhicw lbē co miñe rquiad nex lo, rchug mew; laa grē miñe rquia nex lo, ine rsañmbe me low, rbelaan me low zeena yquiaraa nex low.

³ 'Zig nac to gon, laa Dios psañmbele to sacne zienal to grē xtidz naa miñe pseed naa to. ⁴ Gbichede to lo naa sca, sinque tibaque golgacnie naa zigne nacnie naa to. Golgan ganle, zig nac tib zhicw lbē uv, peet nex grieelod yquia low telne tibnēzle nixa;

scaquegaa to nagon, grieelod gun to grē ncuaañe rdziladz naa, telne nacniede to naa. ⁵ Golsoladz ganle: Naa nac zig nac lbē co, laa to nac zhicwa. Zha ne tibaque gacnie naa, grēse ncuaañe gun zho zdziladz Diosa; ⁶ sac tel piche zho lo naa, laa zho nacle zig tib zhicw lbē co miñe nixle tib nēz, laaw nixle ga, ga gbidza; lozh ga laaw tsec. ⁷ Telne tibaque gacnie to naa, ni tibaque tsoꝛxco to grē miñe pseed naa to, dzigosi ncuaañe gacladztaa to golnaba, ni scagaa scaania tow.

⁸ 'Golllu sca ne nli xpēēdsuel naa nac to, golsañnon Pxoꝝ naa, niapse ncuaañe rdziladz me miñ co golgun.

⁹ 'Ne nligaa rleyniedox naa to. Golwi ganle, zigne rleynie Pxoꝝ naa naa, scaque rleynie naa to. Golguien sca tibaque golgun miñe rnabey naa. ¹⁰ Sac gon, zha ne gun miñe rnabey naa, gzataa dze zleynie naa zho; sac sca rleynie Pxoꝝ naa naa ne run naa miñe rnabey me. ¹¹ Laa naa rzet miñ rii lo to, zeena guiaad tib guiełbley zdoo to. Ne nligaa, zeena guiaad tib guiełbley nroob zdoo to; ni naa gnedz guiełbley co lo to.

¹² 'Laa naa rnabey to, laa naa rnab lo to: ¡Golleynie samiech to, zigne rleynie naa to! Tel naa, golguien ganle pa lotaa rleynie naa to, ¹³ sac led lega gdeedse tib zha xquiełmban zho par csilaa zho samiech zho, sinque ga rlu zho ganle pa lotaa rleynie zho zho.

¹⁴ 'Ni to gon, telne gon to grē miñe rne naa lo to, dzigosi nli rleynie to naa. ¹⁵ Led yedraa niina nac to zig tib ngundziin, sac zha ne nac ngundziin nand zho pe run meñ ne rnabey zho. Ne nligaa rleynie naa to, sac grēse miñe rnabey Pxoꝝ naa, grēse zigne rnee me, laaw bzodiidzle naa lo to. ¹⁶ Golguien ganle, led tod gon bzooblo naa, sinque, ¡naa bzooblo to! Ni laa naa bzooblo to

zeena gun to niapse ncuaaane rdzladz Dios; dzigosi ncuaaane gnabtaa to lo PxoZ naa, ne nac to zha ne no xnëz naa, zneedz mew. ¹⁷ Laa naa rso diidz lo to: Golleynie samiech to. ¹⁸ Niicle rlëe zho ran zho to, golsoladz ganle, desde naa squi rlëe zho ran zho. ¹⁹ Rlëe zho ran zho to, sac laa naa bleele to lad zho, zienaldraa to ncuaaane rleynie zho; laa telne nagon bii nac to zigne nac zho, dzigosi zëeb gleynie zho to. ²⁰ Golsoladz ganle, zeene znu ni naa lo to: ¡Tsod ngundziin ne ndziibsrara non lo zha ne rnabey zho! Tel naa, pquiana miech naa, ¿pe lel to dzigo gandze zho? Nana, zigne brieequiagaa palal zha ne bliladz xtudz naa, scaque zrieequia zha ne yquiaadiag mine gnee to.

²¹ 'Ible squiana miech to ne nac to zha ne ngab xnëz naa, sac runbeyd zho Dios men ne pxeel naa. ²² Tel niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe yquiaaqui zho; sac bial naa bne naa lo zho. ²³ Zha ne rlëe ran zho naa, yeLe PxoZ naa ga rlëenie zho. ²⁴ Ne nligaa telne niaca mine niand zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben naa, ni laa zho bii rlëe ran zho no gop no PxoZ naa. ²⁵ I nagon norieequia mine raquiet lo Xtudz Dios, zaatne znu rnee: "Peet guielntseeb quiaayund naa lo zho, per rlëenie zho naa."

²⁶ 'Laa naa nile lo to ganle, ible sxel naa Espiritu Sant gacnie to, niapse diidzli rnee me. Lo PxoZ naa gree me guiaad me, me cchoobladz zdoo to, ni me gneedz guielbiini lo to lozh guien to cho nac naa. ²⁷ Ni scagaa to, ye to laa to none sodiidz lo grëraa miech gacna zho cho nac naa; sac gon tibaque bzënie to naa desde ne psilo naa xtsin naa.

16

¹ 'Laa naa rne grë min rii lo to zeena peet tsienied guic to, tibaque dib zdoo to gnalo to naa. ² Sac gon zunxoon zho to, zbee zho to yadoo; ni zdzin dze haxta zut zho to, sac masaque sac zho lëe mine racladz Dios ga noyun zho. ³ Laa zho gun grë min co, sac niicle PxoZ naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidz naaw lo to glo, sacne hor co laa naa bii zo lo to. ⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. ⁶ Lëe gdib mine run to, riab guielne to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grieelod guiaad men ne guiadchoobladz zdoo to ga. Sangue telne guia naa, dzigo naazhal cxel me. ⁸ Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdzin tib dze zeene laa Dios gun xquielwxtis me. ⁹ ¿Pe nacne nac zho miech ngoopdol? Miech ngoopdol nac zho, sacne rliladz zho cho nac naa. ¹⁰ ¿Zha grieelo laa zho lo dol co guiaanwen zho lo Dios? Zrieelow, mincocxe waa nacne bial naa, ni na laa naa guia zaatne zob PxoZ naa, gandraa to naa. ¹¹ ¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnedox ne ygaa mendox, men ne quianabey lo guidzliu rii.

¹² 'iNzianraa ncuaaane racladz naa sodiidz naa lo to! Per rien naa grieelod tsoguic to zha naca niina. ¹³ Zeene guiaad Espiritu Sant,

me gneedz guielbiini lo to guien to grëraa ncuuaane no gacnan to, ni grëгаа ncuuaane naraa gac. Niapse diidzli gnee me, sac led guicd me guiab grë mine gnee me, sinque mine nac xtiidz Pxoza naa, min co gnee me. ¹⁴ Ga glu me lo miech ganle ne nli men nroob, men non nac naa. ¹⁵ Rne naa ga glu me, sac grëtaa ncuuaane rnabey Pxoza naa, yeque naa rnabeya. ¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneequeme laa me guey lo Pxoza me.

¹⁹ Bien me racladz no gnabdiidz no lo me, dzigo në me lo no:

—¿Racladz to lëe gacnan to zha nacne znu rne naa?

²⁰ Golquiaadiaga sca ganle: Zeene gdzin dze co, laga noyoon to no to guielnë ne laa naa biche lo to, laa grëraa miech haxta zley zho ne laa naa wbiche lo zho. Nli nroob guielnë ne tso to, per zeene laa to gan naa stib, guielbley nroob ne tso to. ²¹ Nac cuent rii zig rzac tib men wnaa ne ral xpëed. Glo yoob ro, yoobdox ne rquia me, per deque laa mëed co ralse, ni rsoladzdraa me yoob co; sac mazdraa nroob nac guielbley ne rio me ran me laa xpëed me blanso lo guidzliu. ²² Scadaa nagon rzac to, nli mban rac to niina, per zeene laa to gan naa stib, dzigosi tib guielbley nroob ne tso to, ni choot grielod ctiche guielbley co lo to.

²³ Zeene gal dze co, yquiindraa to pe gnabdiidz to lo naa. Ncuuaane gnabtaa to, lo Pxoza naa gnab tow, ni zneedz mew, sac xnëz naa ngab to. ²⁴ Haxta lo nadze peet gard gnab to, niicle ne xnëz naa ngab

to; laa niina laa naa rne lo to ncuuaane rquiin to glnaba lo me, ni ible zneedz mew gon. Nroob guielbley ne tso to hor co. ²⁵ Nzian grë ncuuaane zine naa lo to, rned naaw clar; per laa dze bdzin zeene grëse ncuuaane gne naa, clar gne naaw lo to, zig nac zeene gzet naa Pxoza naa. ²⁶ Ni zig nile naa ga, hor cosi ncuuaane gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuuaane gnab to lo me, ²⁷ sac ye me rleynie me to. Rleynie me to, sac gon rleynie to naa ni riladz to ne nli lo me brie naa bial naa lo guidzliu. ²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

²⁹ Dzigo rdzieets no lo me:

—¿Nasi nagon rien no zha rnee luu! Sac clar rnee luu, rneedraa luu zigne rnee luu glo. ³⁰ Nasi rien no grëse ncuuaane nan luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brie luu.

³¹ Pquiab me, në me:

—¿Wen ga telne riladz to niina cho nac naa! ³² Per lëe hor co nagon bdzin; ni niina, grëse to laa to csaan naa, tib tib to zhaase zhaase nëz ne xen to. Per guiaand naa loxaque naase, sac tibaque nacnie Pxoza naa naa. ³³ Grëse ncuuaane bne naa lo to nu, laaw bne naa zeena peet tsienied guic to, benque nanle to ganle tibaque nacnie naa to. Parga nli, laga no to lo guidzliu rii, nzian grë guielnë ne ted to, per gdziebde to; sac gon naa rnabey, ladznaa naa no grëtaa ncuuaane no lo guidzliu.

17

Rnab Jesús gacniën Dios xpëedscuel me

¹ Blozhse sca në me lo no, blis lo me bui me nëz gbaa.

—Dios, luu ne nac luu Pxoza naa —rëb me—, niina nagon laa dze co

bdziñ. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu. ² Zigne psan luu grëse miech ladznia naa, ni gdeed naa tib guielmban ndzon ne gdziñd dze lozh lo grëse zha ne bneedz luu ngab xnëz naa; scaque niina blu ganle men nroob nac naa. ³ Lëë guielmban co yгаа grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. ⁴ Grëse ncuaane bnabey luu naa, laaw noyui naa; ni ga rlu naa lo grë miech rii ganle pa lotaa men nroob nac luu. ⁵ Scagaa luu ne nac luu Pxoza naa, niina ne laa naa glanso lo luu, blu ganle men nroob nac naa; sac desde mazd glo zeene gard tsaa grëtaa ncuaane no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. ⁷ Zig nac niina, grëse ncuaane bneedz luu lo naa, nanle zho ne luu bneedza, ⁸ sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni rliladz zho ne luu pxeel naa. ⁹ Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, ¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuaane nacchen naa, chen luuw; ni grësegaa ncuaane nacchen luu, chen naaw. ¹¹ Rien naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guiaaque nu. Gane niina, luu ne nac luu Pxoza naa, luu ne nac luu tib

men ne guien xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacre grop ne. ¹² Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

¹³ Zhilew laa naa glanso zaatne no luu i; per len dze ne blëz naa lo zho nu, nzian grë ncuaane bne naa lo zho, zeena ye zho tso guielbey nroob ne no naa. ¹⁴ Pseed naa zho mine nac xtiidz luu; per na rlëë grëraa miech ran zho zho, sacne zienaldraa zho grë ncuaane ndzinlid ne rac lo guidzliu rii. Nac zho zigne nac naa, rleynied naa grë ncuaan co. ¹⁵ Per rnabd naa cuee luu zho lo guidzliu rii, sinque laa naa rnab csaand luu gon zho ncuaane racladz mendox. ¹⁶ Sac niicle zhaw, niicle naaw, choot zionald grë ncuaane ndzinlid ne rac lo guidzliu rii. ¹⁷ Bzhiguiel sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu. ¹⁸ Sac gon, niina laa naa rxel zho lo grëraa miech guidzliu rii, zigne ne pxeelaque luu naa. ¹⁹ Ni niina, dib zdoo naa laa naa gon mine rnabey luu, zeena ye zho guien zho none dib zdoo zho gon zho mine rnabey luu.

Rnab Jesús por grë zha ne ygabrax xnëz me

²⁰ Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho; ²¹ zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. ²² Laa naa psannon zho zigne psannonaque luu naa, ni tipse gac zho zigne tibaque nac ne grop

ne. ²³ Zigne nacnie luu naa, scaque nacnie naa zho. Bzhiguiel gocnieh zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. ²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsaa guidzliu.

²⁵ Papá, luuse nac men ne rapd ni tib dol, niicle ne runbeyd grë miech ri luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. ²⁶ Laa naa pseedle zho gocnañ zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeene blozh bnaab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedrón. Ga no tib zaatne zëeb niapse yag nex, dzigo ga bliaaz no gza no me.

² Judas zha ne pto me ga, wen wen runbey Judas lugar co, sac nzian vuelt ziyenie me no ga.

³ Dzigo zeene laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhen gaa spad. (Lëe grë zha co pxeel grë pxoz rnabey, ni grë zha farisé.) ⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuane ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶ Zeene bin zho rëb me: “Naa nac men co”, wbiire rzhitsaque zho, grëse zho biab liu. Ye Judas no lad co. ⁷ Wbiire Jesús bnaabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga brieequia xtiidz me zeene rëb me: “Lo grë zha ne bneedz luu lo naa, ni tib zho bnitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëe mgui co quia xtsiin men ne nac pxoz nroob.) ¹¹ Zeene gon Jesús, rëbchaa me:

—¡Blootsow spad qui Pedr! ¡Bien ganle Pxoz naa rnabey znu teed naa! ¿Niacxe gond naa mine rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdziñnie me lidz men ne lë Anás, pxozdzoop Caifás. Caifás nac pxoz nroob len iz co, ¹⁴ ni me ga rëb lo grë men non lo zha Israel, ne mazd wena tibaque zha ne ygae guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵ Zhiits co, ga naļ no grop no Pedr. Ni ne runbey naa Caifás meņ ne nac pxoz nroob ga, zeņe bdziņ no ro lidz Anás, loxaque naa brieelo bzēēb nēz ley. ¹⁶ Laa Pedr, zaatne nactaa ro yu par gdziņ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigoraa bdeed wnaa cō diidz bzēēb Pedr. ¹⁷ Dzigo rēbchaa me lo Pedr:

—¿Bod ye luu dzigo lēē nac xpēēdscuel meņ ne bdziņnie zho i?

—Coo, led yed naa —rēb Pedr.

¹⁸ Grē zha ne quia xtsiņ meņ co ni grē meņguiib ne ndxie ga, laa zho bzēēgle gui. Grēse zho, laa zho ndxiedzēē lo gui ga, sac rac naļ. Ye Pedr bdziņ lo zho ga nodzēē Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹ Laa nēz leņ yu, laa Anás psilo noquiep Jesús dien yo grē xpēēdscuel me, ni dien pe nac grē wseed ne nolu me lo miech. ²⁰ Dzigo pquiab Jesús, rēb me:

—Grēse miech, naņwen zho ganle pe nac zhiwseed naa. Sac zeņe pseed naa zho, beņd naa ne ngueets zhliaan nseed naa zho; sinque zaatne rcaalsa nzian miech, ga bne naa lo zho. No hor pseed naa zho leņ grē yadoo win, nogaa hor pseed naa zho leņ yadoo nroob ne zob lad guiedz nu. ²¹ Nana bod rieguialda ne lo naa rnabdiidz luu. Mazd lo grē zha co ganle bnabdiidz, zha bin grētaa ncuaaņe bne naa.

²² Loxaque blozh sca pquiab Jesús, zeņe bias tib meņguiib ne rquianap yadoo zo gax ga, bdap me lo Jesús.

—¡Bien ganle! —rēb me—. ¡Led squid goņ none yquiab luu lo meņ ne nac pxoz nroob!

²³ Dzigo rēbchaa Jesús:

—Telne rzac luu beņ naa falt, bnē dien pe nac diidz ne pxin naa. ¿Te

waļ rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, meņ ne nac pxoz nroob.

Rnee Pedr stib runbeyd Pedr Jesús
(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzēēque lo gui nēz ley. Dzigo wbiire zho bnabdiidz zho lo Pedr, rēb zho:

—¿Bod xpēēdscuel meņ ne blansonie zho i lēē nac luu?

Laane neeli Pedr, leļ pquiab Pedr rēb Pedr:

—¡Lēda! ¡Zha gaczhe naa xpēēdscuel meņ qui!

²⁶ Ye tib zhalidz Malcw, zha ne pchug Pedr diag ga, laa zho zodzēē lo gui ga, sac ye zho quia xtsiņ pxoz nroob co; dzigo rēbchaa zho:

—Ni goņ naa name, ye luu no lad zha ne zonie me leņ yag oliv ga.

²⁷ Wbiire Pedr rēb Pedr runbeyd Pedr me, ni lēētaque hor co laa tib gall pcedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyiinile liuw, zeņe laa zho brieenie Jesús lidz Caifás, zienie zho me zaatne nac xyulow Pilat, meņ ne nac gobernador. Zeņe bdziņ zho, ni tib zho bzēēbd leņ yulow, sac racladzd zho quiits zho miņe rnabey xley lay zho; parne grieelo yquīn zho guielwagw ne row zho lni Pascw co. ²⁹ Nacne briece Pilat bnabdiidz Pilat lo zho, rēb Pilat:

—¿Pe nacne ziaadnie to meņ qui nu? ¿Pe rquiaqui to me?

³⁰ Pquiab zho, rēb zho:

—¡Por grētaa guielntseeb ne noyūn me, gane ziaadnie no me! ¡Telne niac me meņ ndzinli, niacxe lega guiaad-zo no me lo luu!

³¹ Dzigo rēbchaa Pilat:

—Golšēnie me, tose golgunquizh me miņe beņ me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

³² Ga brieequia mine bnee Jesús, zeene bzeet me ible zut miech me. ³³ Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca mine lo guidzliu riiw, dzigosi grëse zha ne nacnie naa niacntseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey naa; zigne rnee luu i. Ible min co nacne bial naa gol naa lo guidzliu rii, ni bial naa bialseed naa miech gunbey zho mine nac diidzli. Ni zha ne zienal mine nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brieec Pilat ga güeynee Pilat lo grë zha ne bdziinnie me ga, rëb Pilat lo zho:

—Ni tib dol gon rapd men rii. ³⁹ Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa men nac zhirey to nu?

⁴⁰ Pquiabbe zho, rëb zho:

—¿Csilaad luu me! ¿Mazd psilaa Barrabás!

Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús. ² Bzieecw zho bla lë yag guiets zbooz zho guic me, ni bgacw zho me tib lë lar nizhnie nlaan. ³ Dzigo psilo zho runnguzee zho me, nguiedz roptsie zho rnee zho:

—¿Bley na ganle, laa luu nacle zhirey zha Israel!

Ni rgap zho lo me.

⁴ Whiire Pilat brieequia Pilat zatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguald guet me; laa naa pquieple me rlu ni tib guielntseeb beend me.

⁵ Zeene laa Jesús brieequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëë me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—¿None guet me! ¿Bnabey yquia me lo cruz!

Dzigo rëbchaa Pilat:

—¿Goltsienie me sca! ¿To golquiaa me lo cruz! Sangue naa, grieelod yquia naa me lo cruz; sac laa naa gonle peet guielntseeb beend me.

⁷ Pquiab zho rëb zho:

—¿Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me. ⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat. ¹⁰ Dzigo rëb Pilat:

—¿Pe nacre rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

¹¹ Pquiab Jesús, rëb me:

—Nli luu nac zha rnabey niina, per telne niaca mine needzd Dios guielrnabey qui lo luu, grielod ne luu gnabey zha gac naa. Mincoce waa, zhi nac xtolu luu, mazdraa nac xtol zha ne biaadlo naa nia luu.

¹² Dzigo gocladz Pilat nsilaa me Jesús, per bzhiguield grë zha ne güeysan me ga.

—Telne laa luu csilaa mgui qui gon —rëb zho—, rriequia dzigo ye luu rlëënie César. Sac gon, grëse zha ne racladz gac rey, lo César ga racndaan zho.

¹³ Zeene bin Pilat sca rëb grë miech co, bnabey Pilat brieie Jesús nëz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.) ¹⁴ Lëë dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

¹⁵ Psilo zho stib, nguiedz roptsie zho, rnee zho:

—¡Beetgazh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëë men co nac César!

¹⁶ Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

¹⁷ Zeene laa Jesús brieie ga, rna tib cruz nroob ney me; laa zho

zienie me. Bdzinnie zho me ro guiedz, zaatne rnee zho “Gui Beer-guic Ngutoo”; ¹⁸ ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

¹⁹⁻²⁰ Bnabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga. ²¹ Nacne güey grë pxoz rnabey, güeylisqui zhow lo Pilat, rëb zho:

—¿Pe nacre pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

²² Pquiab Pilat rëb Pilat:

—Mine pquia naa, laaw pquiale ga. Ni sca none guiaana.

²³ Laa grë menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaan nie zho tib tib zho. Laa lar ne rbix me, tiblagaque naca, ndiibda; ²⁴ dzigo rëbchaa zho:

—Minritaa nagon dziuungrold ne. Mine naca gotsaa dzio new rif, dzigo zha ne griequia zha co guiaan niewicz.

Ga briequia mine raquiet lo Xtiidz Dios, zaatne rnee: “Xab naa, mine racw naa nzian lë been zhow bgaaza lo zho; laa mine rbiix naa, bio zhow rif.” Ni scadaa been gza menguiib co.

²⁵ Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal. ²⁶ Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëë xpëed luu i zo i.

²⁷ Laa lo naa në me:

—Been cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me gun me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

²⁹ Gax lo grë menguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me. ³⁰ Zeene bdziñ nziu co ro me, pquün me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pquianrun guic me; laa me blozh.

³¹ Guini liu co nac tib dze ne maz-draa nda lo zha Israel. Nacne güey grë zha ne rnabey lo menguiidz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena guietgazh zho lo cruz dze co; sac racladzd zho scaque quia zho lo cruz zeene laa dze nda co gdziñ.

³² Dzigo pxeel Pilat bla menguiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho. ³³ Zeene bdziñ zho zaatne zo zhiczuz Jesús, gon zho laa me gutle; nacne bdiitsd zho ni me.

³⁴ Horco wbig tib menguiib co, bliz zho xlanz zho ro xcuxti me. Zeene bdoob zho lanz co, nis ne, ren ne briece ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. ³⁶ Ga briecequia mine raquiet lo Xtiidz Dios, zaatne rnee: “Ni tib dzit ne no me quüitsd zho.” ³⁷ Ni stib

lugar, zaatne rnee: “Bii zanaque zho ganle cho nac men ne bliz lanz zho ga.”

Bgueets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieele tselit me xcuerp Jesús lo cruz. Ye me xpëedscuel Jesús nac me, per pxobnend me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

³⁹ Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne ríaa yaal ne lë mirr ni yaal ne lë áloe. ⁴⁰ Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

⁴¹ Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; ⁴² dzigo nacne gase güeyqueets zho me, sac zhile runfalt sëeb dze nda co, ni baa cose nac mine ríaan gax ga.

20

BRIEEBAN JESUS

(Mt. 28:1-10; Mr. 16:1-8; Lc. 24:1-12)

¹ Gol dze ne rzobni zhmalá, sil-gaw, scase bii ncow rnaw, briece Marí Magdal zie me ro baan Jesús. Zeene bdziñ me, gon me laa quie ne nioog ro baa co bdiooble, laaw zole tib nëz.

² Horco lëelëd wbire nguzhoon me, biaad me zaatne no no grop no Pedr; biaadnie me diidz lo no, në me laa zho güeybeele Jesús len baa, dieen palo güeysan zho me.

³ Dzigo lëälëd, brieë no grop no Pedr; zioso no ro baa. ⁴⁻⁵ Zeene bdiixn naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëëbd naa. Laa naa blozhdze bdiixlo len baa, zeene laa Pedr blanso. ⁶ Zigne blanso Pedr bzëëb Pedr len baa, gon Pedr nligaa laa lar co zhoob ga, ⁷ niicle lar ne briel guic mew, laaw zhoobaque ga; ndibëdsew, zhooba tib lad.

⁸ Nacne bzëëbaque naa. Zeene gon naa zha zhoob lar co, dzig-
oraa bliladz naa ne nli brieëban me. ⁹ ¡Sac hor co, bii gard tsoguic naa zha rnee lo Xtiidz Dios; sac ga raquiet ne ible zrieëban me!

Gon Marí Magdal Jesús
(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr; laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nëz len baa co, ¹² gon me laa chop anjl zob len co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me; ¹³ dzigo rëbchaa me lo Marí:

—¡Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeyan zho me.

¹⁴ Loxaque blozh sca bnee me, zeene ptsire lo me gon me laa tib men co zo gax zhits me. ¡Per ib beenbeyd me ne Jesús!

¹⁵ —¡Pe nacne roon luu? —rëb Jesús—. ¿Cho rguib luu?

Le! güeynie guic Marí rëb me bod men ne rquianap gaw, dzigo rëbchaa me:

—Bzhiguiel, telne luu biadbee me nu, bnë dien pa lo güeyan luu me; zeena ga naa gaxi naa me.

¹⁶ Horco bneelë Jesús Marí, bredz me me. Zeene bin Marí lë me, lëälëd biecw me; dzigoraa beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús.
¹⁷ Dzigo rëbchaa Jesús:

—¡Xeend luu naa! Sac gard guia naa lo Pxoz naa gbaa. Mine naca, güey güeynie diidz lo grë zha ne bzënal zhits naa; gudz lo zho: Laa naa nole nëz guia naa lo men ne nac Pxoz ne, men ne nac Dios ne rdziunbey ne.

¹⁸ Horco lëälëd wbi Marí ga, ziaadnie me diidz lo no. Blanso me bzodiidz me zha gon me Jesús, ni në me lo no zigne rëbse Jesús lo me ga.

Brieëquia Jesús lo xpëëdsuel me
(Mt. 28:16-20; Mr. 16:14-18;
Lc. 24:36-49)

¹⁹ Pcow liu dze dmingw co, grëse no ne nac no xpëëdsuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no grë zha Israel ne rlëënie me. Laa no ndxie ga, tibaque zeene brieëquia me bzo me glowtaa lo no; pquiaabdiuzh me no. ²⁰ Blozhse pquiaabdiuzh me no, dzigo blu me len nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdzion no ne nli mew! ²¹ Blozh ga, në me lo no:

—¡Laa naa rnedz tib guielbley zdo to, zeena peet tsienied guic to! Zigne pxeel Pxoz naa naa bial naa, scagaa niina laa naa rxel to.

²² Dzigo blub me lo no grëse no.

—Golcaania Espíritu Sant —në me—. ²³ Ni zeene gon gun to tib miech perdon, scaque Dios zun me zho perdon; laa telne siguiel d zho gun to zho perdon, laa zho biaanle lo xtol zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mëëdgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaaz clav, ni cteed-xug naa ga; ni csëëbnia naa ro xcuxti me zaatne biaaz lanz ga.

²⁶ Goc xon ngbidza, laa no pcaal-saque len yu co stib; hor cosi yele Mazh ndxiegrë no ga. Scaque dzi-its nsioog no ro yu, per tibaque zeene bdzion no laa Jesús bzëëb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, ²⁷ rëbchaa me lo Mazh:

—Wbig na Mazh, bui len nia naa, psëëb mzhugnia luu nu. Dien nia luu nu, psëëbnia ro xcuxti naa. Gac-chopdraa guic luu, sinque bliladz ganle ne nli mban naa.

²⁸ Dzigoraa bliladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

²⁹ Pquiab Jesús rëb me:

—Laa luu rliladz niina, lëëcxe laa luu gonle naa waa. ¡Dichos zha ne gliladz ne nli mban naa, niicle ranð zho naa!

¿Pe nacne pquia grë diidz rii?

³⁰ Lo lal ne bzënie Jesús no, ndaldoo milagr ne bdzion no been me, led grëda raquiet lo guits rii.

³¹ Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biaadsilaa ne lo xtol ne, Dios bzooblo me biaad me, ni Xpëëd Dios nac me; sac zha ne dib zdoo gliladz cho nac me, zгаа zho tib guieḷmban ndzon ne gdziñd dze lozh.

21

Gon zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr, Mazh, Natanael (men ne nac men Caná ga), bets

naa Jacob ni schop zha ne nacgza no. ³ Tibaque zeene në Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzionie no barcw co lo nis, per ni tib mel bgaad. ⁴ Laa liu ziaadle lozh guini, zeene bdzion no laa tib men co zo ro nis, per ni tib no bdziunbeyd me. ⁵ Dzigo bnee men co lo no, në me:

—Yo to dien xin, ¿pe bгаа ma?

Pquiab no rdzieets no lo me:

—Choot ma bgaad.

⁶ Dzigo nëchaa me:

—Golron guieḷ ne rgaa ma i nëz derech ganle, znaaz to ma.

Dzigo bron no guieḷ co nëz derech. Zeene laa no cueew lo nis, ib lëbd no glis now; ndaldoo mel ne biodzë lena.

⁷ —¡Pedr! —rep naa—. ¡Bina ganle, xmaistr ne i gon!

Zeene bin Pedra, lëëled wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis. ⁸ Laa no biaan len barcw ga; nole bdziñniew zaatne nac ro nis. Maase tapgaltsii metr sca bdiobniu no guieḷ co lo nis.

⁹ Zeene briece no len barcw, bdzion no laa gui noyecle, laa tib mel zhooble lo gui co, ye quietxtil ne. ¹⁰ Dzigo në Jesús lo no:

—Goltënie bla mel ne blozh bnaaz to i nu dien.

¹¹ Dzigo güey Pedr bieḷ me len barcw, güeyxadz me guieḷ ne no mel ga; dzigo bdoobniu mew bdziñnie mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsiiptson lo grë ma; niicle scataa nzian ma, per blëb guieḷ co, briezda.

¹² Blozh ga, bredz me no, në me:

—¡Goltë na, zeena gowxeren to!

Ni tib no bnabdiidzd lo me dien pe nli mew; sac, jriēnpaa no ne nli mew!

¹³ Dzigo wbig me bdiiz me guietxtil co lo no, bzhen me mel ne, bneedz me ma lo no.

¹⁴ Ga bion vult briequia me lo no wla ne brieaban me.

Bzodiidznie Jesús Pedr

¹⁵ Blozhse bdioowxeren no, bredz Jesús Pedr, psilo zho bzë zho grop zho; dzigo rëb me lo Pedr:

—Simón (xingan Jonás), ¿pe nli dzigo rleynieraa luu naa que grë zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grë xpëcwxiiil win naa sca —rëb me.

¹⁶ Wbiire me, rëb me lo Pedr:

—Simón (xingan Jonás), ¿pe nli paa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiiil naa sca.

¹⁷ Wbiireque me stib rëb me lo Pedr:

—Simón (xingan Jonás), ¿pe nli paa nquialadz luu naa?

Zeeñe bin Pedr sca rëb me, mban goc zdo Pedr; sac gale rac tson vult zinabdiidz me lo Pedr, dzigo rëb Pedr:

—Luu nac men ne rnabey, luu naña grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiiil naa sca.

¹⁸ Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladz luu.

¹⁹ Zeene znu rëb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rëbchaa me:

—¿Dënal zhits naa!

²⁰ Dzigo nalaque naa zhits me grop me Pedr. Zeene ptsire lo Pedr, gon Pedr laa mëëdscuel ne scataa

rleynie me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me ladz-nia zha ne gut me; dzigo rëbchaa Pedr lo me:

²¹ —Telzhe zha rii waa, ¿pe nac mine ted zho?

²² Rëbchaa me:

—¿Pe nadien gon luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¿Na zeen dënal zhits naa!

²³ Zeene gocnan grëraa zha ne rliladz Jesús sca bnee me, grëse zho tibaque güeynie guic zho gdzindraa dze guet naa. Per led scada, sinque znu naca, rëb me: ¿Pe gon Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴ Grëse mine pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

²⁵ Ndaldooraa grë ncuane nroob ne been Jesús, tel niaca mine yquiw grësew, ni ygaad dib lo guidzliu tsotsow grë guits ne yquiw ga.

MIÑE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹ ¿Yose luu dieñ bets? Naa gon nac Luc, laa naa rxel stib guits rii lo luu. Miñe pxel naa lo luu glo ga, lo co pquia naa grëse miñe been Jesús, grëse wseed ne blu me lo miech zeene psilo me xtsiin me ² haxta gol dze ne psan me diidz pe nac ncuane gon grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³ Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho grë zho me, dzigo pso me diidz lo zho ible gried zho lad guiedz Jerusalén, haxta quiet Espíritu Sant gdeed guielbiini lo zho zigne nacle xtiidz Pxo; me; ni biire rëb me lo zho:

⁵ —Golsoladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa miñ co gac.

⁶ Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndiñ no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men ne nac Pxo; naa, ncuane gon me rieguialde to gacnañ tow, mese nañ dieñ pa dzew, dieñ pa horgaaw; sac mese nac

men ne grieelo gūa. ⁸ Sinque to, zeene laa Espíritu Sant gneedz guielbiini lo to, hor co laa to ygaa poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdo; p tib xcow, laa me biongueetsse len xcow co, gondraa zho me. ¹⁰ Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; ¹¹ rëb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

¹² Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziñ. ¹³ Bdziñ zho zaatne rbëz zho, bie; p zho len yu ne riaan glaa; sac len yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob. ¹⁴ Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gon dziñ ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grëse to bets, grëse to bzian, golgacnañ ganle, miñe been Judas zeene sca güeyto me Jesús, nole ne sca gaca. Lo Xtiidz Dios zho; bneew, lëe miñ co pquiaa rey David zeene psiaab Espíritu Santa guic me. ¹⁷ Ye

Judas gogza no, ye me nac diidz niun dziin ne nodziun no niina.

¹⁸ 'Ni nligaa laa ne niun me dziin co, le₁ been me guie₁ntseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbi₁lgazh me, nëzrii nëzrec bliaa₁ le₁ me. ¹⁹ Mi₁ co nacne zeene laa grë zha Jerusalén gocnana, dzigo bleelë zho liu co "Liu Ren".

²⁰ 'Zigne rneque naa ga —rëb Pedr—, ible lo Xtiidz Dios sca zhobnee; ni lëë mi₁ co ga raquiet zaatne znu rnee:

Ible ziaandets lidz zho,
ni stib choot gbandraa zaatne bio zho.

Ni rneequew:

Zhaale zha ne guiaanne dziin ne no niun zho.

²¹⁻²² 'Mi₁ co nagon, ible nonguiela so tib zha ne guiaan xlugar Judas, gacgza zho no guioxobne₁ no ne nli brieegan Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta go₁ dze ne laa me zey gbaa, lad co go₁gotsaa cue ne tib zha ne so gacgza no.

²³ Dzigo ble zho tib me₁ ne lë José Barsabás (lëëque me ga rnee zho Just), ni stib me₁ ne lë Matí.

²⁴ Blozh ga, bnab zho lo Dios, rëb zho:

—Dios, ndion no luu nac me₁ ne rnabey no; ndion no luuse nac me₁ ne runbey zdo₁ tib tib miech, gane niina laa no rnab lo luu, luu blu dien cho tib zha rii racladz luu so ²⁵ gu₁ dziin ne psaan Judas; sac laa Judas zeyle zaatne rieguia₁ Judas.

²⁶ Blozhse bnab zho lo Dios, laa grop zha co bio rif. Nacne brieequia me₁ ne lë Matí ga, dzigo dze cotaa laa me gogza stsiptib zha poptl co.

¹ Zeene goc gadz zhmal gut Jesús, lëëtaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa. ² Laa zho ndxie grë zho, tibaque zeene bio tib bi nroob zhan gbaa, zig nac zeene rree tib medox, haxta le₁ yu ne ndxie zho ga pquiab; ³ ni brieequia nzian biini, rluw zig nac ludz miech, tibga tibga biini co blëz guic zho grëse zho. ⁴ Horco grëse zho pcaania guie₁biini ne bdeed Espíritu Sant, psilo zho rnee zho grë xtiidz stib miech mi₁ rsiabtaa me guic zho.

⁵ Le₁ dze co nziandoo grë zha Israel ne no stib ladz be₁ bdzi₁ Jerusalén, grë zha ne bi₁ ziana₁ xley Dios. ⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guie₁biini co nonee xtiidz zho, per nli rzee zdo₁ zho. ⁷⁻⁸ Rlozhd gwi zho rnee zho:

—iPe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? iTib tib ne ndxie ne nu, zhaase zhaase diidz ne rnee ne! ⁹⁻¹⁰ Nu ndxie grë me₁ Part, me₁ Media, me₁ Elam, me₁ Mesopotam, me₁ Judé, me₁ Capadós, me₁ Pont, me₁ Asia, me₁ Frij, me₁ Panfil, me₁ Egipt, haxta grë me₁ ne ziaad nëz África, delant guiedz Ciren; grë me₁ Cret, me₁ Arab, grë zha Israel ne ziaad nëz Roma, grë me₁ Roma, zha ne ziana₁ zhiwseed zha Israel.

¹¹ 'Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne run Dios.

¹² Grëse zho per nli rzee zdo₁ zho, rdzieldraa zho zha gu₁ zho, rnabdiidzlsa zho rnee zho:

—¿Bay pe i? iNcuane gard dzian ne!

¹³ Laa nogaa zho rzhidznie, rnee zho:

2

Biaad Espíritu Sant

—Rzudz grë zha qui, gane squi rzë xtiidz zho.

Bdeed Pedr tib lban

¹⁴ Dzigo bzoli Pedr gza me stsi-iptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle. ¹⁵ No bla to quianee rëb to rzuudz no, per led rzuudzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz. ¹⁶ Led rzuudzd no, sinque niina nagon noyac grë mine bzeet Joel padzeela (tib men ne biadteed xtiidz Dios), zeene znu rëb me:

¹⁷ Znu rnee Dios:

Zeene wzhile runfalt gal dze co, laa naa cxel zhiEspiritu naa zdoos grëse miech;

grë xingan zhow, grë xindzooop zhow, laa zho cteed xtidz naa,

grë zha nguieg, nzian grë ncuaane glulo lo zho,

grë mengol, nzian grë ncuaane glumcaal lo me.

¹⁸ Len dze co,

grëse zha ne nguzobdiidz lo naa, niicle nguiew, niicle wnaaw laa naa cxel zhiEspiritu naa zdoos zho,

dzigo grëse zho cteed xtidz naa.

¹⁹ Nzian grë ncuaane gzee zdoos to glu naa zhan gbaa, scaque lo guidzliu, zan to ren, zan to bel, zan to grë goxdoo.

²⁰ Zeene zhile gdziñ dze ne guiaad men ne rnabey ne, laa lo ngbidz ycow, laa mëe gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

²¹ Grëse zha ne dib zdoos gnab lo Dios yquia zdoos me zho, grëse zha co scaania me zho.

²² 'iGrëse to, golquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaane bzee zdoos to; ga blu ganle ne nli Dios nacnie me. ²³ Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz. ²⁴ Per bleeban Dios me, psilaa Dios me ladznia guielgut; sac lëbd guielgut ne lëew gnabey lo me.

²⁵ 'Zeene bzeet David Jesús, znu rëb me:

Men ne rnabey naa, ran naa tibaque quianap me naa; tibaque zo me cue naa nëz derech, çpe nac nadien ne lega pe gac naa?

²⁶ Gacxe waa, nley no zdoos naa, niicle ludz naaw, rleya roolnie naa me.

Ni gane tibliladz rac naa;

²⁷ sac nan naa niicle guet naa, ib csaand me guiaan naa len baa, ib gdeete me diidz xin xpëel naa.

Naa nac tib ngundziin lo me, ni rleynie me naa.

²⁸ Me blu lo naa zha grieelo ygaa naa guielmban, ni tib guielbley nroob ne ygaa naa zeene laa naa gdziñ lo me.

²⁹ 'Bets, bzian, to ne nac to menladz naa, golgona ganle: led mine bdeete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpaa me bii niaa.

³⁰ Sinque mine bded Jesús ga bzeet me, sac gon tib zha ne biadteed xtiidz Dios goc me. Gocnanle me ne lo xtii me grieequia Men ne nacle diidz ga cxeel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me. ³¹ Dzigo zig nac zeene ranle me

grëtaa miñe ted Jesús, nacne bzeet me ne ib zrieeban Jesús, rëb me guiaanđ xcuerp Jesús zaatne rbëz grëraa menđut, niicle xindgaaw.

³² 'Jesús ga gon bzeet me, sac zig nac Jesús grop lo no bdiön no bleeban Dios me, ³³ ni niina gbaa zob me cue Dios nëz derech, sac me nac men rnabey. Ni zigne nacle xtiidz Dios men ne nac Pxož me, laa me pxeel Espiritu Sant lo no; ni niina grëse ncuaañe noyan tow, grëse ncuaañe noyongaa tow, xtsiin Espiritu Santow. ³⁴ Laa naa rbire rne lo to stib ganle, led miñe bdete David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob, ³⁵ nieeda lozh gnaz naa grëse zha ne rlëe lo luu, csañ naa zho ladznia luu.”

³⁶ 'Grëse to men wladz, golgona sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

³⁷ Zeene bin grë miech ne ndxie ga sca bnee Pedr, biab guielñe zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ÷pe nac ncuaañe dziuun no?

³⁸ Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espiritu Sant gacnie to. ³⁹ Sac psanle Jesús didz ne ible sxeel me Espiritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraa menzita.

⁴⁰ Nzianraa grë ncuaañe bzodidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii. ⁴¹ Lo grë zha ne bzoobdiag grë miñe pseed

me zho dze co, rgaa zho maase tson mil; blozh ga, grëse zho brobnis, laa zho gocgrë grë zha ne rililadzle Jesús ga.

Niowse mban zho

⁴² Grëse zha ne rililadz Jesús ga, dib zdoo zho zienal zho grë miñe rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanse Jesús diidz gun zho. ⁴³ Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵ Tipse rnee zho, rdeedlsa zho ncuaañe rquiiñ zha ne nacgrë zho; zha ne quianie liu, tel pe grëragaa ncuaañe quianie zho, haxta rto zhow, dzigo rguiiz zho dimi co lo grë zha ne guieñd pe yquiiñ.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guietxtil zigne psan Jesús didz ga; ine nley, ine ndooladz rbe zho grë zho rquiiñ zho guielwagw ne runlo zho, ⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib men ne në ni

¹ Tib dze zig rbixwe ngbidza, brieed Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëeb yadoo. ³ Laa dze co, zeene gon me laa Pedr grop Juan zieded ga ne laa zho sëeb yadoo, zëeb nia me rnab me gon lo zho. ⁴ Dze rwi zho lo me, tibaque rëb Pedr:

—Lo no bui.

⁵ Dzigo blis lo me bui me lo zho, nan me bod no pe dimi ne gdeed zho lo me. ⁶ Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaane grielose gnedz naa, laaw gnedz naa niina, jniapse por Jesús (men Nazaret), laa naa rnab lo luu, niinagazh guso i zeen bzëni!

⁷ Dzigo bzhen Pedr nia derech me bliso Pedr me, hor cogazh laa grop ni me ga bdaan, ⁸ laa me psilo bzë. Rley me laa me bzëeb len yadoo gza me zho, lo guielbley co haxta rias me, ni roolnie me Dios.

⁹ Grë miech ne no len yadoo, zeene gon zho laa me rzële, ni scataa rley me roolnie me Dios, ¹⁰ bzee zdoo zho; sac runbey zho me, nanpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan briece len yadoo nroob co, yeque me nal zhits zho ib rsaand me zho, laa zho bdzin stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho. ¹² Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuunguiac men rii, zig nac zeene por nguzobdiidz no lo Dios gane brieelo psëe no me? ¹³ Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëe Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. ¹⁴ Bdeete to diidz nlaa men ne nac men ndzon, men ne peet xtold; lej bnab to blaa tib zha ntseeb ne nzëeb ngutoo. ¹⁵ Laa me, pquia to

haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

¹⁶ 'Ni niina men ne ran to biac nu, niapse por Jesús biac me; led runbeyle to me nanle to ganle rzëd me glo. Ne dib zdoo no riladz no Jesús, gane brieelo bnab no beenguiac Jesús me.

¹⁷ 'Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to. ¹⁸ Laa Dios bneedz diidz been to grë guielntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

¹⁹ 'Dol nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtol to. Me gneedz guielbley lo to stib, ²⁰ ni zbiire cxeel me Jesús lo to stib, guiaadsilaa me to. ²¹ Gbaa no me niina, ni ga cuëz me nieeda gal dze ne laa Dios blozh bnabey goc grëse ncuaane none gac, zigne bzeetse grë zha ne pxeel me padzeela, biadteed xtiidz me. ²² Zig nac Moisés bzeet me laa Jesús guiaad, rëb me lo grë pxoz gol ne: “Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me; ²³ sac zha ne gond xtiidz me, ib tedsod znitlo zho.” ²⁴ Scaque Samuel, ni grëraa zha ne biadteed xtiidz me, grëse zho bzeetle zho grë ncuaane noyac len dze rii.

²⁵ 'Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne grieequia lo xtii luu, laa

naa gunlay grëse miech ne ndxie gdiiboose lo guidzliu.”²⁶ Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grë miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrë zha saducé.²⁻³ Zigne bdziñ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse mengut, scaque grieeban zho.

⁴ Niicle ne scataa rlëe grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵ Zeene biini liu co, grëse zha non, grëse zha ne rnabey lo menguedz, laa zho pcaalsa.⁶ Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menlidz pxoz ne rnabey ga.⁷ Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, ¿cho rnabey to, cho pxeel to ne squi no to?

⁸ Horco laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguedz, grëse to ne nac to zha gol ne non xtiidz.⁹ Telne miñe rliisqui to nac ne dien zha bdziun no men rii ne laa ni me biac,¹⁰ golsiguiel golquiaadiaga ganle, zeena gacnan tow ni gacnan grëragaa menguedza. Jesús gon, men Nazaret ne bnabey to gut lo cruz ga, men ne bleeban Dios ga,

men co beenguiac men rii; ni laa to rangaa me laa me zo lo ne nu.

¹¹ Lëe Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëepaa quie co nac miñe rnazdziits yu.” Ni scapaa nagon bzhaac to me.¹² Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene gon grë zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

¹⁴ Peet brieelod nliisqui grë zha co, sac nligaa laa men ne biac ga zo lo zho ga.¹⁵ Dzigo mazd bnabey zho brieed Pedr ley grop me Juan; laa zho biaan bzodiidz zho dien zha gon zho zho,¹⁶ sac rien zho tib milagr nroob ga sca biac ni men co; niicle ne racladz zho yqueets zhow, per grële menguedz bina.¹⁷ Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grëraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon—rëb zho—, gbiiredraa to cseed to miech zhiwseed men ne rnee to Jesús ga.

¹⁹ Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no miñe rnabey Dios, lel miñe rnee to i dziuun no?²⁰ Grieeelod gon dziuun no miñe rnee to i, sac grëse ncuaane bdzion no, grëse ncuaane bdzionga no ib none gnee now, zeena gacnan grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech;

blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr²² beenguiac me men co, ni choole iz rac sca gacd sē me.

Bnab zho lo Dios

²³ Zeene laa Pedr grop Juan bdzin lo grē zha ne nacgrē zho, bzodiidz zho grēse tel zha rēb grē zha rnabey co, zha rēb pxoz non co. ²⁴ Grē zha ne nacgrē zho ga, zeene bin zhow grēse zho psilo zho bnab zho lo Dios, rēb zho:

—Dios, luu nac men ro ne rnabey grētaa ncuaane no, luu bzaa gbaa, luu bzaa guidzliu, luu bzaa nis-doo, luu bzaa grēraa ncuaane no. ²⁵ Padzeela zeene bdeed Espiritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacne squitaa rac grē miech ne nacd zha Israel rlēenie zho Dios?

Racladz zho gun zho ncuaane ni grieelod lo zho.

²⁶ Grēse zha non ne rnabey grē guiedz,

tipse rac zho laa zho racntseeb lo Dios rlēenie zho me, ni rlēenie zho men ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grē zho menladz no ni grē menzit, tipse bnediizd zho psacsi zho Jesús, men ndzon ne bzooblo luu pxeel luu biaadgun xtsiin luu lo guidzliu nu. ²⁸ Grēse zigne psanle luu diidz, scase been zho.

²⁹ Ni scaque niina, bui ganle zha racladz zho ctseb zho no parne peet gneedraa no; luu nac men ne gocniē no ne nac no zha ne rdziuun xtsiin luu, zeena gdzieebd no cseed no miech xtiidz luu. ³⁰ Laa no rnab lo luu, beenguiac grē men rzacnē, been grē milagr nroob, blu grē ncuaane gzee zdoo miech;

zeena gan zho ganle men nroob, men ndzon nac Xpēed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grēse zho laa zho bgaaraa guielbiini ne bdeed Espiritu Sant lo zho; peet rdziebdraa zho laa zho zieseed miech Xtiidz Dios.

³² Len dze co, grēse zha ne riladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquiin ncuaane rap zho; sinque grēse ncuaane quianie zho cheñ grē zho naca. ³³ Grē zha poxtl co, zeene rseed zho miech zha brieaban Jesús, nzian zha ne riladz me; rlupaa ne Dios nacnie zho.

³⁴⁻³⁵ Ne nligaa tipse nac zho grē zho, nod zha ne guiab ne guienḍ pe yquiin, sac grēse zha ne quianie liu, zha ne quianie nzian yu, rto zhow dzigo rdeed zho dimi co rguiz grē zha poxtla lo zha ne rquiina. ³⁶ Sca been tib men ne nacgrē zho lē José. (Zha xtii Leví nac me, gol me tib lo guidzliu win ne no lo nisdoo lē Chipr; zha poxtl-le bleelē me Bernabé, Bernabé, nac zig nac ne rnee ne: Zha ne rchoobladz zdoo miech.) ³⁷ Pto me tib lē liun me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lē Ananí, laa tsieel me lē Safir; ye me pto tib lē liun me. Gonlo tsieel me, tel palal dimi ne bdo liu co, bzhenga me zhisa. Zeene laa me ziesan mine biaan ga, lo poxtl, rēb me lēē grē dimi ne bdo liun me ga. ³ Dzigo rēbchaa Pedr lo me:

—Ananí, ¿pe nacne bdeed luu diidz bzēēb mendox zdoo luu? Mendox i gon noquuil luu nan luu yquidiee luu Espiritu Sant, rnee luu lēē grē dimi ne bdo liun luu nu. ⁴ Bien ganle cheñ luu liu co.

Dimi ne bdiizh zhow, chen luuw, niac niuñ luuw zigne niaccladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. ⁶ Dzigo güey bla zha nguieg pchel zho ngutoo co lar, blis zho me ga laa zho ziqueets me.

⁷ Wdzeelaaque goca zeene laa tsiel me bdziñ, ni lalnu güeynied guic me ne laa tsiel me gutle. ⁸ Bnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liuñ to nu?

Pquiab wnaa co, rëb me:

—Nliw, lalgui pto now.

⁹ —¿Pa brieë pensar qui lo to grop tsiel to? —rëb Pedr—. Ne squi tipse bnee to nan to yquidie to Espiritu Sant; dol nroob i gon been to lo Dios. Laa zha ne güeyqueets tsiel luu blansole ro yu nu, ni nina gon laa zho güeyaque luu.

¹⁰ Diidz co blozh brieë ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len yu, laa me nixle ga; gon zho gutle me, dzigo blis zho me güey zho güeyqueets zho me cue xpa a tsiel me. ¹¹ Grëse zha ne gon sca goc men co grop me, zha ne bingaaw, zigtaa zha ne riladz Jesúsa zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho. ¹³ Grëse miech ne rcaalsa ga, rleynie zho grë zha poxtl co, nzian zho riladz mine rseed zho, per rbigd zho gacgrë zho zho.

¹⁴ Zige zie dze, scase racndalraa miech ne rzëëb xnëz Jesús, mguisaaque wnaasaque laa zho

riladz me dib zdo zho. ¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted. ¹⁶ Haxta grë guiedz win ne ndxie gax Jerusalén ga, rriee grë miech rdziñnie zho grë men rzacnë, no grë men co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, ¹⁸ bnabey zho bgaa zho psëëb zho zho ladzguiib stib. ¹⁹ Pcow liu co, guieela bdziñ tib xanjl Dios pxal me ro ladzguiib, blee me zho ga; dzigo rëb me lo zho:

²⁰ —Goltsie len yadoo, grëse miech ne ndxie ga golnee lo zho, zeena gacnan zho zha ygaa zho guielmban ndzon ne nodeed Dios niina.

²¹ Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo men guiedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. ²² Bdziñ zho ro ladzguiib, ni tib choot guiend leen co; rzhitsaque wbiere zho güeynie zho diidz, ²³ rëb zho:

—¡Choot guiend len ladzguiib! Dziits niooga bdziñ no, ga zo zha ne quianap; per zeene bzhiäl ro ladzguiib bziaab no, bdziñ no choot guiend leen co.

²⁴ Grë pxoz ne rnabey, ni men ne zo lo men guuib ne rquianap yadoo,

zeene bin zhow, rdziendraa zho zha gun zho. ²⁵ Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

²⁶ Lëëlëd brieë meñ ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho. ²⁷ Zeene bdziñnie zho zho lo grë zha wxtis co, dzigo rëb meñ ne nac pxoz nroob ga lo zho:

²⁸ —¿Pe nacre ronde to diidz? Led pso no diidz lo to csetraade to miech zhiwseed mgui ne nac Jesús ga. Ni na gon dible lad guiedz nu nozhoobneñ zhiwseed to i, haxta rcaadzol to no ne no bdziuut me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no. ³⁰ Meñ co bliladz grë pxozgol ne, ni meñ co gon bleeban Jesús, meñ ne sca psacsi to beet to lo cruz. ³¹ Ni meque zeynie Jesús gbaa, bzoob me Jesús cue me nëz derech; sac Jesús nac meñ ne rnabey, meñ ne rsilaa miech lo dol. Ni Jesús gon, gdeed guieibiini lo grëse meñ Israel gbiire gbig zho lo Dios stib; zeena gunquizhd me zho xtol zho.

³² Mine rnee no lo to nu diidzliw, nozhal bdziona, ni led loxaque nodsegaa; sinque ye Espiritu Sant meñ ne rxeel Dios racnien grë zha ne ron xtiidz me, ye meñ co quianee ganle ne nliw.

³³ Zeene bin zho sca rëb Pedr, blëëye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguietz; dzigo guso me rnabey me brieë grë zha poxtl co nëz ley, ³⁵ bnee me lo grëraa zha ne ndxie ga, rëb me:

—Grëse to menguietz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladztaa to gun to zho. ³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga. ³⁷ Laa len iz ne nodop lë miech, scaque brieëquia tib meñ Galilé brieelë Judas. Ndal zha ne gocnie me, per zeene laa me gut scaaque nëzrii, nëzrec bliaal grë zha ne gocnie me; brieëlo daque pe niun me. ³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdziñ dze ne nitlow. ³⁹ Laa telne nli-gaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grë zha non co zho loxaque ne rliladz zho Jesús.

⁴² Ib psaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëë Meñ ne zëëble didz cxeel Dios lo guidzliu ga nac Jesús.

6

Bzo gadz zha ne gun xyudar poxtl

¹ Ni ne len dze co quiayac nzian-raa miech ne rzëëb xnëz Jesús,

dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuaañe row zho, rgaad zho lal miñe rgaaz grë wnaa viud ne nac zha Israel.

² Dzigo nacne bredz gza tsiip-chop poxtl co grëse zha ne nole xnëz Jesús ga, bnee zho lo zho rëb zho:

—Gacnañ to ganle, grieelodraa ne noque so dzian no dien zha ygaaz ncuaañe yquiin to, sac gon nonguiel da csaan no miñe nac xtsiin no, ib none guioseedraa no miech Xtiidz Dios. ³ Miñ co nagon, mazd golzo gadz zha bñui ne gun dziin co, lëeraasi golguien cho gzo to; golguib zha ne ndzinli, zha ne nixbiini, zha ne nacie Espiritu Sant; ⁴ zeena sca guioib lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib meñ lë Lip, tib meñ lë Prócoro, tib meñ lë Nicanor, tib meñ lë Timon, tib meñ lë Parmen, tib meñ lë Xteb, rlupaa dib zdo me rliiladz me Dios ni nacie Espiritu Sant me; ni tib meñ Antioquí lë Nic, mazd glo Nic goc tib zha ne bleyniedox grë zhiwseed zha Israel. ⁶ Dzigo güeynie zho gza zha co lo zha ne nac poxtl. Blozhse bñab poxtl lo Dios gacnieñ me zho, dzigo pxobnia poxtl guic zho, bñab zho lo Dios gdeed me guielbiini lo zho.

⁷ Zigse zie dze, laa Xtiidz Dios quiagaazraa dib Jerusalén. Nzian grë zha ne rzëeb xnëz Jesús, haxta grë meñ ne nac pxoz, nzian zho laa zho bliladz me dib zdo zho.

Bnaaz zho Xteb

⁸ Goc palal dzew, nzian grë mi-lagr nroob ne run Xteb, sac tibaque sca dib zdo me rliiladz me Jesús, ni nacie Espiritu Sant me.

⁹ Laa tib dze, briequia bla zha ne rie tib xyadoo win zha Israel, lë

“Esclavos Libertados” gocladz zho ndilidznie zho Xteb. Brieque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëe zho lo Xteb. ¹⁰ Gonse zho rlëbd xtiidz zho lo Xteb, sac niapse Espiritu Sant rdeed guielbiini lo me, rien me pe rnee me lo zho; ¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeene bin menguietza, blëe zho; nacne bñabeyaque zha ne rñabey lo menguetz bñaa Xteb güeyzo zho me lo wxtis. ¹³ Ni güeynie zho bla zha ne lega bñexuu, rëb zho:

—Nliw, rtsidil mñui qui xyadoo ne, rtsidil me xley ne. ¹⁴ Bdzionpaa no gon quianee me laa Jesús meñ Nazaret ne quiazeet zho dib i ctsil yadoo rii, ni ctsëe me ley ne psan Moisés lo xmengol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanj Dios.

7

¹ Dzigo bñabdiidz meñ ne nac pxoz nroob ga lo Xteb, rëb me:

—¿Bñe dien pe nli quiayun luu grë ncuaañe rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, briequia Dios ndzon ne no gbaa lo me, rëb Dios ³ griece me ga, csañ me grë menlidz me, tsie me nëz ne glutaa Dios lo me.

⁴ Nacne briece me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. ⁵ Niicle ne laa me blanso lo liu rii, ni tib lë win zaatne so ni me bdeete Dios lo

me; per rëb Dios ib grë zha xpëed me guiaannew. ⁵Ni laa me quianied mëed len dze co! ⁶Rëbgazh Dios lo me, ib zieban grë zha xpëed me ga ladz ben dipse len tap gayoo iz, ga csacsi miech zho guñcuñ zho zho dziin. ⁷“Per ib tedsod sacsi naa zha ne csacsi zho ga”, rëb Dios, “ni ga gree zho glanso zho nu, nu goolnie zho naa.”

⁸Ni parne glu ib zac miñe bnee Dios lo Abraham ga, dzigo psañ me diidz grëse mëedbgui ne griequia lo xti Abraham none tso tib bey lad zho. Miñ co nagon, zeñe laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José, ¹⁰psilaa me José lo grëtaa guielné ne bded José, ni gocien me José beenbey rey Egipt José. Ib psaand me José, bdeed me guielbiini lo José. Zeñe gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaan non ne no lidz rey, me bnabeya. ¹¹Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guendraa pe gow zho. ¹²Laa zeñe bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³Zeñe goc chop vult ziexi zho zhob Egipt, dzigora gocnan zho bets zho ga rnabey Egipt; niiclegaa rey cow, hor coraa beenbey me bets José. ¹⁴Dzigo bnabey José güeyxi zho pxoz me Canaán, güeyxi zho tsieel zho, güeyxi zho xpëed zho. Lo grë zho rga zho tsongal tsiin, laa zho bdziñ Egipt.

¹⁵⁻¹⁶’Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. ¹⁷Grë zha ne briequia lo xti zha gol co, zha ne na guiab ne nac menladz ne, ndal iz ne bio zho Egipt ga, ni ndaloo goc zho. Laa zeñe ziaadyob cuee Dios zho ga zigne rëble me lo Abraham glo, ¹⁸laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne been José lo menladz me. ¹⁹Psacsi me zho, haxta me zho zigne gocladztaa me, haxta bnabey me grëse mëedbgui ne ral gandraa zho win parne guet win.

²⁰’Len dze copaa nagon gol Moisés, tib mëed niow nac win. Tson mëe bloolan xniaa win win, ²¹laa zeñe brielodraa ngolan me win, dzigo güeysaan me win tib ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me; ²²haxta bioxco me grëse wseed ne rac zha Egipt, pseed win. Zeñe laa win broob, tib men nixbiini goc win, niicle ne gnee wina, niicle ncuane gungaa wina.

²³’Choo iz rap Moisés, zeñe biab guic me güeyted me lo menladz me. ²⁴Dzigo gon me laa tib zha Egipt quiaguin tib zha Israel; nacne bzëëbaque me bla me zho, beet me zha Egipt co.

²⁵’Sca been Moisés, nan me nien grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. ²⁶Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho. ²⁷Dzigo biasaque tib zha ne noquiaaw ga pcheep zho me, ntseeb rac zho rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziun no?” ²⁸¿Te racladz luu ye

gutaque luu no zigne beet luu zha Egipt co nieeg?"

²⁹ 'Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieel-nia me, ga gop tsieel me chop mëëdbgui.

³⁰ 'Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo groltaa tib lo yag zarz, masaque rso bel lo yag co. ³¹ Bzee zdoo me, lëëtaque laa me zie gbig-gax me, zeene bin me tsi Dios rëb Dios lo me: ³² "Naa nac Dios ne bliladz pxozgol luu Abraham, pxozgol luu Isaac, pxozgol luu Jacob."

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³ Dzigo bnee Dios stib, rëb me lo me: "Blit lab luu, sac gax lo naa i zo luu. ³⁴ Laa dze nagon bdziñ ne laa naa csilaa grë zha Israel ladznia zha Egipt; sac ran naa zha nactaa grë guieinë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

³⁵ 'Dzigo laa Dios pxeel Moisés ziesilaa me zha Israel; niicle ne glo rëb zho lo me: "¿Cho bzo luu guiaadnabey luu no, guiaadlisquigaa luu dien pe nodzi-uun no?" Per me bzo Dios bnabey lo zho, blee me zho Egipt.

³⁶ 'Nzian grë milagr; nzian grë ncuuañe nroob ne gzee zdoo ne been Moisés blee me zho ga; zig-taa len guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len choo iz ne bzënie me zho ga.

³⁷ 'Moisés ga bzeet lo pxozgol ne, ne laa Dios gnabey lo xtiique zho grieequia tib men ne cxeel me guiadteed xtiidz me, zigne pxeel me Moisés.

³⁸ 'Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl

co lo zho; me pcaania ley ne biaan lo ne ga, diidz ne rap guieľmban.

³⁹ Per ib bind zho xtiidz me, leľ gocladz zho mbiire ney zho Egipt stib, ⁴⁰ bnabey zho Aarón rëb zho: "Bzaa tib mdio tedner lo no gac-nien no laa no guioo Egipt stib; sac loxaque biadbee Moisés no ga, na choot nan dien yo Moisés."

⁴¹ 'Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleynie zho ncuuañe bzaania zho. ⁴² Nacne wbiñladz Dios, psaan me zho; psilo zho bleynie zho grë ncuuañe ran zho zhan gbaa. Been zho zigne bzeetse zha ne biadteed xtiidz me padzeela, zeene rëb zho: Golsoladz ganle,

laa ne nleynie to naa dipse len choo iz ne bio to grë dan bidz co, laa ne niut ma ne ngogon to lo naa, ⁴³ leľ grë mdio ne bzaa to, mdio co bleynie to, lo mdio co pqui-itsgzhib to.

Mdio ne rnee to Moloc, zaatne zieetaa to tibaque ney to lidza, zhmel mdio ne rnee to Renfán, pa csaan to ma.

Mincoxe waa, laa naa cuee to ladz to, gzonëz naa to guey to grë dan ne riaan zitraa lo guiedz Babiloin.

⁴⁴ 'Len dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeene blozh bnitlo Dios grë guiedz ne brin nu glo, laa Josué blansonieque yu co. Haxta len dze ne goc David rey, bii lëew nac xyadoo zho.

⁴⁶ 'David goc tib rey ne gocnziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷ Per brielod nzaa mew, Salomónraa goc rey ne bzaaw. ⁴⁸ Nli laa yadoo co biaa, per tel Dios, men nroob

nac me, led yed me cuëz leñ grë yu ne rzaa miech. ⁴⁹ Zigne zhob-neeque lo Xtiidz me, zeene znu rëb me:

Gbaa nac zaatne zoob naa, laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ 'Golgona sca ganle —rëb Xteb—, zigne beenaque grë pxozgol to ga padzeela, scadaaque gon quiaayun to niina. Miech nad, miech ntseeb zdoo nac to; ib ronde to mine rnee Espiritu Sant. ⁵² Tel pxozgol to, nêlte gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bgaa me beet to me. ⁵³ Tibaque squi quia to quiaguiits to Xley Dios; xanjlpaa me biaadsana lo to, ni runde to mine rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me. ⁵⁵ Laa me, ne nacie Espiritu Sant me, zeene blis lo me bui me nëz gbaa, gon me lo guelndzon ne no Dios, gonpaa me laa Jesús zo cue Dios nëz derech. ⁵⁶ Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

⁵⁷ Mine been zho ptse zho diag zho, ni nguedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸ Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespirtu naa.

⁶⁰ Dzigo pquiitsgzhib me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiaayun miech ri, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxc ro rleynie Dios, güey zho güeyqueets zho Xteb; mban rac zho, bio zho xquielnë me.

Leñ dze co, psilo zha ne sca rlëenie zha ne rliladz Jesús, ptsidil zho grëse zha ne rliladz me; dipse leñ guiedz Jerusalén pquianañ zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nace poxtl biaan Jerusalén. ³ Ntseeb rac Saul, rzac me tebaa zha gnitlogazh me grëse zha ne rliladz Jesús. Stib yu stib yu zie me, riebezhoo me zho lidz zho, mgui wnaasaque rey me riesëeb me zho ladzguuib.

Bdziñ Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech.

⁵ Zig nac Lip, zeene bdziñ me tib guiedz nëz Samar, psilo me bnee me Xtiidz Jesús lo grë miech co.

⁶ Ndal zho rquiaadiag mine rnee me, rzee zdoo zho ran zho grëtaa milagr ne run me. ⁷ Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo, grë zha ne nde ni, runguiac me zho. ⁸ Grëse miech ne no guiedz co, rley zho.

9-11 Ga no tib men ne rool di-idz dox, lè Simón. Ye me rzee zdoo miech grè ncuaañe run me. Nzianle iz sca noquidie me zho, grèse menguedz runbey me, haxta niats rac me rnee me guien draa cho zig me. Grèse zho, haxta grè zha non rbig lo me, rzac zho lèe poder ne rap Dios ga nacie me.

¹² Laa zeene bnee Lip lo grè miech co gocnañ zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grèse zha ne bliladza, nguì wnaasaque, laa zho brobnis. ¹³ Dzigo yeque men ne lè Simón ga bliladz Jesús, ye me laa me brobnis; zaatne zieetaa Lip nañ me zhits Lip, rzee zdoo me ran me grètaa milagr nroob ne run Dios.

¹⁴ Grè zha poxtl ne no Jerusalén, zeene gocnañ zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nèz co. ¹⁵ Laa zho zie gnab zho lo Dios yгаа grè zha ne bliladzle Jesús ga guielbiini chen Espíritu Sant; ¹⁶ sac zeene bliladz zho Jesús, loxaque brobnisse zho, gard yгаа zho guielbiini co. ¹⁷ Bdziñ zho pxobnia zho guic grè men co, bñab zho lo Dios; dzigo grèse men co laa me bgaa guielbiini ne rdeed Espíritu Sant.

¹⁸ Zeene gon men ne lè Simón ga, ne loxaque rxobniase zha poxtl co guic grè miech co laa zho rgaa guielbiini ne rdeed Espíritu Sant, dzigo laa me rdeed dimi, ¹⁹ rëb me:

—Golneedz poder qui lo naa; zeena ye naa zha ne cxobniataa naa guic yгаа zho guielbiini ne rdeed Espíritu Sant.

²⁰ Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grè xtimi luu i! ²¹ Ni lalnu rieguañd luu gun luu dziin rii, ni gdziñd gaa dze gun luuw; sac mbed zdoo luu, zienied guic luu gun luu miñe rnabey

Dios. ²² Blee zhgab yozh qui guic luu, bñab lo Dios zeena togo squia zdoo me luu, gunquizhd me luu dol ne squi bza zdoo luu i; ²³ sac rlu niapse guielntseeb nonie guic luu, ni lèeque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guielnzaac, golnab lo Dios yquia zdoo me naa, zeena ygaad naa grè guielnedox ne rnee to i.

²⁵ Blozhse bzodiidznie Juan grè miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grè miech co.

Bzodiidznie Lip tib men Etiopí

²⁶ Laa Lip no Samar ga, tib dze brieequia tib xanjñ Dios lo Lip, rëb me tsie Lip nèz ne rriee Jerusalén zie nèz Gaza.

²⁷ Dzigo güey Lip nèz co. Tib dan ngana, lèetaque laa tib men ne nac dziin lo rein ne lè Candás zie ga, dziin nroob nac me lo rein co, sac me ngotsow grètaa dimi ne no Etiopí. ²⁸ Zobse me tib len carret nroob zie me ga; znu wbirele me Jerusalén güeygan me Dios. Laa me zob leen co quialab me lo Xtiidz Dios miñe pquiaa Isá, men ne biadteed xtiidz Dios padzeela.

²⁹ Dzigo bnabey Espíritu Sant Lip tsie Lip yгаа carret co lo Lip. ³⁰ Zeene bgaa carret co lo Lip, bin Lip pa lo nolab men co; nacne rëbchaal Lip lo me:

—¿Pe rien luu cho raquiet zaatne nolab luu i?

³¹ —Riend naaw —rëb me—, rquiin tib zha ne gnè lo naa dien zha naca.

Dzigo bredz me Lip biepp Lip len carret co, güeysob Lip cue me.

³² Znu rnee zaatne nolab me ga: Zigne racse mëcwxil yeen zeene rnaaz zho ma rut zho ma, scadaa ndooladz goc me,

peet beend me zeene laa zho zienie me.

Ni zigne roptsied ma zeene rtsiib zho ma,

scaque ni tib diidz ptsired me lo zho.

³³ Niicle ne gon zho scataa ndooladz me,

per psacsi zho me.

iPa lotaa bdziñ guieIntseeb ne been gre menladz me!

Sac gon, ptiche zho xquieImban me lo guidzliu.

³⁴ Dzigo rebchaa men co lo Lip:

—BzhiguieI bnë lo naa dien, cho nu znu rzeet Isá lo rii. iPe me bded min rii, te stib zhow ye?

³⁵ Dzigo reb Lip lo me Jesús raquiet ga, ni bnee Lip grëraa mine nac zhiwseed Jesús. ³⁶ Laa zho no nëz, tibaque zeene bdziñ zho tib lugar co no nis; rebchaa me lo Lip:

—iBui ganle laa nis no nu! Mazd bzhiguieI pchoobnisgazz naa.

³⁷ [—Zaca —reb Lip—, totsaque dib zdoo luu rililadz luu Jesús.

—Rililadz naa me —reb men co—, rililadz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me. ³⁹ Blozhse ga, laa Espiritu Sant blis Lip gondraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtüidz Dios lo grë miech co. Sca bio me nëz, haxta bdziñ me guiedz Cesarea.

9

Gon Saul Jesús

¹ Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rililadz Jesús. Güey me lo men ne nac pxoz nroob, ² bdeed pxoz co ti xtüidz me guey lo grë zha ne zo

lo xyadoo zho nëz Damasc, parne gacnie zho Saul gnaaz zho grëse zha ne rililadz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguuib Jerusalén.

³ Laa Saul bio nëz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazz me liu. ⁴ Liu nix me, bin me zëeb ti tsi men co rnee lo me:

—Saul, Saul, ipe nacne quianaI luu naa?

⁵ —Been guieInzaac —reb me—, bnë dien cho luu.

Dzigo pquiab men co, reb me:

—Naa nac Jesús men ne squi quiatsidil luu. [Lëëque luu gon nosacsi luu i, rzac luu zigne rzac ngon ne rcaanni, ni lëëque lo guuib lots ne rtseb zho ma riecaanni ma.

⁶ Rdzieb Saul, rzhidz me lo dzeb co reb me:

—BzhiguieI bnë dien, ipe racladz luu gon naa niina?]

Rebchaa Jesús lo me:

—Guche i, güey Damasc, ga gnë zho ganle pe nac mine no gon luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi men co ron zho zëeb, per choot rand zho.

⁸ Laa Saul guche ga. Zeene laa me pxal lo me gwi me randraa me, jlaa lo me pcowle! Zha ne ziegzale me ga bzhen nia me bdziñ me Damasc. ⁹ Tson dze sca brieelod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne rililadz Jesús lë Ananí; dzigo gon me Jesús, bredz Jesús me. Pquiab me, ¹¹ dzigo rebchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz men Tars ne lë Saul. Zeene quiazodiidznie me naa, ¹² blu naa lo me laa tib zha lë Ananí bdziñ

rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuane noyun me Jerusalén, notsidil me grë zha ne rililadz luu. ¹⁴ Haxta pxoz nroob ne rnabey bdeed diidzbey gnaaz me grëse zha ne no nëz rii.

¹⁵ —Güey —rëb Jesús lo Ananí—, sac laa naa bzooblome me, ib me tsie grë guiedz zit tsieeed me miech xtidz naa, me gnew lo grë zha rnabey, ni lo grëгаа zha Israel. ¹⁶ Na naa glu lo me ganle zha nac grë guielnë ne gan me, zeene laa me quiayunle xtsin naa.

¹⁷ Dzigoraa güey Ananí zaatne no Saul ga. Bdzin me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, men ne brieequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guielbiini ne rneedz Espiritu Sant.

¹⁸ Zigne sca bnee Ananí, laa lo Saul biacgazh; lega zigne nac xmed mel nac grë ncuana co briece lo me. Horcogazh laa me brobnis. ¹⁹ Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne rililadz Jesús Damasc ga, dzigo briece me ²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneehaa zho:

—¿Led lëe men qui ga name scataa ntseeb rac Jerusalén, notsidil me grë zha ne rililadz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús.

Grë zha Israel ne no ga, riendraa zho dien pe gililadz zho.

²³ Goc bla dze no me ga, laa grë zha Israel ne no ga blëe lo me; bnediudz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew, ²⁵ nacne gol ti pcow liu pcaalsa grë zha ne bililadz mine bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz briece me ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne rililadz Jesús ga, per lel bdzieb zho zeene gon zho me, sac rililadz zho ne nli yele me bzëeb xnëz Jesús. ²⁷ Dzigo güeynie Bernabé me lo grë zha ne nac poxtl, bzodiudz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech co nac Jesús, len dze ne blëz me Damasc. ²⁸ Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Brieequia bla zha Israel ne rnee xtiidz zha Gres bdilidznie zho me. Zhisaque goca, laa zho gocladz niut zho me. ³⁰ Zeene gocnan grë zha ne rililadz Jesús gaw, dzigo güeyan zho me guiedz Cesarea; ga briece me laa me zie nëz Tars, zaatne nac ladz me.

³¹ Len dze co, grëse miech ne no xnëz Jesús, zigtaa zha ne no Judé, zha ne no Galilé, zha ne no-gaa Samar, nguieel rac zho peet lo guielxtseeb nodraa zho; zigse zie dze rioguicraa zho zha nac Xtiidz Dios. Grëse zho rioxco zho mban zho zigne rnabey me, tibaque nacie Espiritu Sant zho. Ni scagaa,

zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne rililadz Jesús

³² Len ngbidz coque, zie ziaad Pedr rieted me lo grëse zha ne rililadz Jesús. Nacne güeyted me lo grë zha ne no Lida. ³³ Guiedz co, beenbey me ti mgui lë Ené, gogle xon iz nix mgui co, ib gacd së me sac dipse me gutoo. ³⁴ Dzigo rëbchaa Pedr lo me:

—jEné, niinagazh gon laa Jesús guṅguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. ³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne rililadz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquiin, run me xyudar zho. ³⁷ Lega nacle blanguidz me, laa me gut.

Zha ne rililadz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdzinne zha co diidz, zienalgazh Pedr zhits zho. Bdzin zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. ⁴⁰ Dzigo bnabey Pedr brieë zho ley grëse zho, laa me biaan ga, pquitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhial, zeene gon me laa Pedr zo ga, laa me bzobli. ⁴¹ Bzhen Pedr nia me, bliso Pedr me, dzigo bredz

Pedr grë zha ne rililadz Jesús ga, ni grë wnaa viud co; gon zho laa me brieëbanle.

⁴² Dipse lad guiedz co bzhoob diidz sca brieëban wnaa co; grë zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blëz me lidz Simón ti men ne rcuudz grë guid ma.

10

Güeyzodiidznie Pedr Cornel

¹ Guiedz Cesarea, ga no ti men lë Cornel, rnabey me lo ti partid menquiib lë partid Italian. ² Zigtaa mew, zigtaa grë menlidz mew, dib zdoo zho rililadz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaane rgad zho lo grë zha ne guiend pe yquiin.

³ Tib dze, bdzele dzew tibaque zeene gon me laa ti xanjl Dios bdzin zaatne zo me, bredzlë anjl co me. ⁴ Dze rwi me lo anjl co, rdzieb me laa me pquiab. Dzigo rëbchaa anjl co lo me:

—Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin.

⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. ⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguiib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rililadz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lëëtaaque hor co laa Pedr biep nëz glaa guic yu ne rbëz me ga. Rcaabedz me, dzigo

laga noyaclo ncuaane gow me laa me biep guic yu co ziezodiidznie me Dios. ¹¹ Dios nozodiidznie me, tibaque zeene gon me laa ti lar nroob ziad-zëeb zhan gbaa, nzhi-doo gzatap nëza laaw bdziñ lo me. ¹² Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe. ¹³ Horco bin me ti tsi men co, rëb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rëb me:

—iMin cogaa nagon grieelod! Wlaltaa gard gow naa grë ma beed qui.

¹⁵ Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdziñ ro yu ne rbëz me ga, ¹⁸ rnabdiidz zho me.

¹⁹ Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu. ²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bdziñ me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rëb zho:

—Laa no ziaad xmandad Cornel, ti men ne rnabey lo menguiib Cesarea. Laa me pxeel no ziaad-xi no luu, sac ti xanjl Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me riladz me Dios, grëse zha Israel rleynie zho me.

²³ Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal

zha Jop, zha ne riladz Jesús zienal zhits me.

²⁴ Dze ne rac chop ngbidz briece zho Jop, laa zho bdziñ Cesarea. Laa Cornel bredzle grë menlidz me, grë zha ne ndzieeldiidz me; ndal nac zha ne ndxienie me lidz me, quiambëz me Pedr. ²⁵ Zeene laa Pedr bdziñ, briece me güeydzieelo me Pedr, pquiitsgzhib me lo Pedr nan me niun me Pedr zigne riegant me Dios. ²⁶ Dzigo bliso Pedr me, rëb Pedr lo me:

—iGuso i, nodne yquiitsgzhib luu lo naa! Bien ganle samiechaque luu nac naa.

²⁷ Dzigo laa menguiib co guso ga. Nozodiidz zho laa zho bzëeb len yu. Zeene bdziñ zho zaatne ndxie grë miech co, ²⁸ psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ct-sieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho. ²⁹ Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, golnë dien pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me, ³¹ në me: “Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin. ³² Gacxe waa, laa naa zialnie diidz lo luu: pxeel bla zha ne tsie guiedz Jop tsie xi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.” ³³ Sca nagon në men co lo naa, nacne bnabey naa biaad-xi

zho luu; ni xquizhga luu ne laa luu ziaad. Dios zobwi ganle, grëse no laa no ndxie nu par yquiaadiag no miñe bnabey me luu gnë luu lo no.

³⁴ Dzigo rëbchaa Pedr:

—iNaraa rien naa, led yed Dios cue miech dien cho nac zha Israel, cho nacga zha zit! ³⁵ Sinque grëse miech lo guidzliu, tel pa guiedztaa nac zho, rcaania me zho totsaque ron zho miñe rnabey me, ni rioxco zho zaacse rban zho. ³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuane no). Zig nac dib Judé, desde ne psilo Juan pseed me miech Galilé, laa zho gocnana. ³⁸ Ni nanaxe to ganle, bdeed Dios poder lo Jesús, pxeel me Espiritu Sant gocnie Jesús. Zaatne bdedtaa Jesús, pquia zdoo me miech, grë zha ne nosaci mendox psilaa me zho ladzna ma; sacne nli Dios nacnie me. ³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, ⁴⁰ per zeene goc tson ngbidza laa Dios blee-ban me, ni bneedz Dios diidz biire bdzian no me. ⁴¹ Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdiowonie no me, bdionie no me, ⁴² ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana. ⁴³ Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grë zha ne noquiaadiag

ga bgaa guielbiini ne bdeed Espiritu Sant lo zho. ⁴⁵⁻⁴⁶ Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guielbiini ne rdeed Espiritu Sant. ⁴⁷ Dzigo rëbchaa Pedr:

—iPeraa nadien gbiaaz ne, ne cchoobnigazhd ne zha rii? Laa ne bdzianle ganle zigne rdeed Espiritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëeb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza menzit co Xtiidz Dios. ² Dzigo zeene laa Pedr bdziñ Jerusalén güey bla zho güeytildiidznie zho Pedr, ³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëeb zhan gbaa, nzhidoo gzatap squina laaw ziaad nëz lo naa. ⁶ Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. ⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.” ⁸ Dzigo pquiab naa rep naa: “Miñ cogaa nagon grielod, wlaltaa gard gow naa grë ma beed qui.” ⁹ Nëchaa me lo naa: “Grë ncuane beenlayle

Dios, nodne gnee luuw ncuuan beed.”

¹⁰ Tson vult sca gon naa lar co. Blulow tib, bluloqew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne bléz naa ga, pxeel men Cesarea co zho ziaadguib zho naa.

¹² Ni laa Espíritu Sant bneeque lo naa, no ganał naa zhits zho, niicle ne zhazit nac zho; nacne bianał naa. Ye gza xoop zha ne zialnie naa nu bzë bio no.

¹³ Bdzin no lidz men co, psilo me bzodiidz me lo no zha bzhaac me, në me len yu no me, zeene gon me ti xanjł Dios, rëb anjł co lo me cxeel me bla zha ne tsie Jop tsiexi zho naa ¹⁴ zeena gane naa lo me zha grielo csilaa Dios me lo dol grë menlidz me.

¹⁵ Laa naa psilo quiane lo me grë menlidz me, zeene grëse zho laa zho pcaania Espíritu Sant, ni bgaa zho grë guielbiini ne rdeed me zigne bgaaque new. ¹⁶ Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zgaa to guielbiini ne rneedz Espíritu Sant.” ¹⁷ Sca nagon pcaania zho Espíritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸ Zeene blozh bin zho grë mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrieelo gbig zho lo Dios, gdeed me ti guielmban ndzon ne gdziind dze lozh lo zho.

Bliladz zha Antioquí Xtiidz Dios

¹⁹ Zeene sca pquianał zho grë zha ne rliladz Jesús len dze ne beet zho Xteb ga, nëzrii nëzrec bliaał zho. No zho bdzin haxta Fenicia, no zho bdzin Chipr, nogaa zho bdzin

nëz Antioquí. Zaatne bdziintaa zho bnee zho cho nac Jesús, per loxaque lo grë menladz zho bnee zhow. ²⁰ Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. ²¹ Ni ne nacnie Dios zho, ndal grë miech co bzëeb xnëz Jesús.

²² Grë zha ne no Jerusalén, zeene gocnañ zhow pxeelaque zho Bernabé güey Antioquí. ²³ Zeene bdzin Bernabé Antioquí, rley me gon me scataa quiayunlay Dios grë miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoo rliladz Dios nac Bernabé, nacnie Espíritu Sant me, ti miech wen nac me; gane zeene laa me bdzin ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdzinnie me Saul Antioquí. ²⁶ Dipse ti len iz bléz zho ga grop zho, blozh pseed zho grë zha ne bliladz Jesús. Ga gloopaa psilo ne laa grë zha ne rliladz Jesús brieelë CRISTIAN.

²⁷ Len iz co blalaa zha ne no- teed xtiidz Dios no Jerusalén. Dzigo brieë zho ga güey zho Antioquí. ²⁸ Lad co no tib men lë Agab, psiaab Espíritu Sant guic me bnee me laa ti gbin dox gañ miech nëz Israel. (Ni nligaa scase goca, lëë gbin co baaad len iz ne zobnabey men ne lë Claud.)

²⁹ Grë zha ne rliladz Jesús Antioquí, zeene bin zho sca rëb Agab, nacne bnediidz zho grë zho, tel palaltaa ncuaañe rgaa lo zho tib tib zho gdeed zhow gaclo ti gon cxeel zho lo zha Judé. ³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grë zha rnabey ne zo lo zha ne rliladz Jesús nëz Judé.

12

Bio Pedr ladzguiib

¹ Len̄ dze co psilo rey Herod not-sidil̄ me grē zha ne rililadz Jesús.

² Bnabey me bgaa Jacob bets Juan, beet zho Jacob lo spad.

³ Zeene gon̄ Herod rley grē zha ne rnabey lo mengüedz Israel ran̄ zho zha rsacsi me grē zha ne no xnēz Jesús ga, dzigo bnabeyaque me bgaa Pedr bio Pedr ladzguiib; lēētaque len̄ dze co noyac lni Pascw.

⁴ Laa Pedr no ladzguiib, bnabey me bzo xon nēz mengüiib quianap Pedr. Quiambēz me tedse lni co, laa me cuee Pedr gan̄ grē mengüedz zha csacsi me Pedr.

⁵ Grē zha ne rililadz Jesús, zeene gocnan̄ zho scataa ndxienap mengüiib Pedr no Pedr ladzguiib, psilo zho tibaque quianab zho lo Dios gacniēn me Pedr.

⁶ Nacle diidz pa dze cuee Herod Pedr. Wdze ne guiini liu co, laa Pedr nixguesse len̄ ladzguiib; tib ga caden zob ti nia me, tibga mengüiib tib nēz cue me, ni zhaaque zo zla zha ne quianap ro ladzguiib. ⁷ Tibaque zeene biab ti biinidoo len̄ ladzguiib, laa ti xanj̄l Dios bdziñ ga. Bdziñ me, pcaannia me cue Pedr, pcaaan me Pedr, rēb me:

—iNa zeen̄ guche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr; ⁸ dzigo rēbchaa anjl co lo Pedr:

—iPxidoo len̄ luu, pquiaa lab luu ni luu!

Blozhse pxidoo Pedr len̄ Pedr, ni pquia lab Pedr; rēbchaa anjl co:

—iWbix xab luu na, zeen̄ dēnal̄ zhits naa!

⁹ Nalse Pedr zhits anjl co laa Pedr brieew ga. Rien̄d Pedr ne nli nosilaa anjl co Pedr, masaque rzac me nonixqueel̄ mew. ¹⁰ Bded zho chop len̄ yu zaatne ndxie mengüiib ne quianap, laa zho bdziñ zaatne quia puert guiib ne rriee ro nēz.

Zigne bdziñ zho, zhal puert co bzhiala; laa zho brieew. Bzēnie anjl co Pedr spalal, zeene gol̄ zho za-atne rdedlsa nēz co, dzigo laa anjl co psan̄ Pedr ga.

¹¹ Dzigoraa bien̄ Pedr led nonixqueel̄d Pedr, nli Dios pxeel̄ xanj̄l me güeysilaa Pedr ladznia Herod, zeena gleyd zha Israel nian̄ zho grē guiēlnē ne nded Pedr.

¹² Dzigo laa Pedr zie nēz lidz Marí, xniala Juan Marcw; lēētaque hor co nzian zho ndxie ga quianab zho lo Dios. ¹³ Zeene bdziñ Pedr pcaannia Pedr ro yu. Brieew ti nd-zoop ne quia dziin ga lē Rode, zieso ndzoo dien̄ chow.

¹⁴ Zeene beenbey ndzoo co tsi Pedr, rley ndzoo. Lo guiēl̄bley co niicle pxaldaqe ndzoo ro yu, rias ndzoo zienie ndzoo diidz lo grē zha ne ndxie ga; rēb ndzoo laa Pedr bdziñ ro yu ga. ¹⁵ Per bliladzd zhow.

—iDieen̄ pe rool̄ luu! —rēb zho—.
iNcuanea gliladzd ne rnee luu!

—iCoo, nli lēē mew! —rnee ndzoo—, laa me zo ga.

—iLed meda, —rnee zho—, bod anjl ne quianap mew!

¹⁶ Sca no zho, laa Pedr bii no-caannia ro yu. Zeene güey zho pxal zho ro yu, bzee zdoo zho gon̄ zho nli Pedra, laa Pedr zo ga. ¹⁷ Dzigo blunia Pedr lo zho gnee nguiedzd zho; laa zho bzēēbnie Pedr len̄ yu. Ga psilo Pedr bzodiidz Pedr lo zho zha güeybee xanj̄l Dios Pedr len̄ ladzguiib; ni pso Pedr diidz lo zho sodiidz zhow lo Jacob, ni lo grēraa zha ne nacgrē zho. Blozhse ga, laa Pedr brieew ga.

¹⁸ Zeene biini liu, grē mengüiib ne pquianap Pedr len̄ ladzguiib ga, rdziēdraa zho zha gon̄ zho; sac ib bien̄d zho dien̄ yo Pedr. ¹⁹ Zeene laa Herod pxeel̄ zha ne ziebee Pedr ladzguiib, pa sēle Pedr. Dzigo güey zho güeynie zho diidz lo Herod; nacne bnabey Herod gocredz grē zha ne pquianap Pedr ga, pquiep

Herod zho; blozhse ga, bnabey Herod gut zho gzase zho. Bded ga, laa Herod brie Judé zey me Cesarea.

Dow mziog Herod

²⁰ Leñ dze co, pcaalsa menġuedz Tir ni menġuedz Sidón ġüeynee zho lo Herod; sacne rlëenie Herod zho. Lëëque ti men ne nac dziin lo Herod lë Blast ġüeynie zho bnee lo Herod, bnab zho tilniedraa me zho, nicle zhagaaw laa zho gbig lo me; sac grëse ncuane rquiin zho, grë ġuedz ne rnabey me ga rriew.

²¹ Dzigo bzo Herod ti dze ne tsie zho tsiezodiidznie zho me. Zeene gol dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co. ²² Goc palo quianee me, psilo zho rleynie zho me, ġuedz ropt-sie zho rnee zho:

—iLed miechdraa i gon! ;Ti diosle i nac men qui quianee lo ne!

²³ Laa me bii quianeeque, zeene biet tib xanjł Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey.

²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozëeb xnëz me.

²⁵ Jerusalén ga no Bernabé ġrop Saul leñ dze co; zeene bialse xtsiin zho, laa zho brieque ga laa zho zie nëz Antioquí zienie zho Juan Marcw.

13

¹ Lo grë zha ne rliladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mġui lë Simón ne rnee zho “Men Yaas”, no ti men Ċiren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espíritu Sant bnee lo zho, rëb me:

—Golcueextso Bernabé i ġrop Saul, zeena csilo zho lo dziin ne gded naa ġun zho.

³ Blozhse pcan zho, blozhse bzodiidznie zho Dios, dzigo pxobnia zho ġuic Bernabé ġrop Saul, bnab zho lo Dios ġacniñ me zho; bnee zho lo zho, laa zho zie.

ġüey Saul Chipr ġrop me Bernabé

⁴ Ga brie Bernabé ġrop Saul zienie Espíritu Sant zho bdziñ zho ġuedz Seleucia, Seleucia bzëeb zho barcw laa zho zie nëz Chipr (ti ġuidzliu win ne no lo nisdoo). ⁵ Ye Juan Marcw zienie zho ġun xyudar zho.

Bdziñ zho ro ġuidzliu win co zatne ndxie ġuedz Salamin, biet zho barcw ġüey zho grë leñ xyadoo men Israel ne no ga, ġüeyseed zho miech Xtiidz Dios. ⁶ Ga brie zho ġüeyted zho dipse lo ġuidzliu co bdziñ zho ġuedz Pafos; ġuedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

⁷ ġuedz co ga no ti men lë Sergio Paul, men co zob rnabey ġuidzliu co; dzigo lo men co ga no Barjesús. Ti men nixbiini nac men ne lë Sergio ga, no me liaadz ġacnañ me zha nac Xtiidz Dios; dzigo bnabey me ġocredz Bernabé ġrop Saul. ⁸ Zeene bdziñ zho psilo Barjesús quiaguib me dien pe yquiaaqui yquiaadiagd men rnabey co Xtiidz Dios.

⁹ Dzigo buitipaque Pabl lo Barjesús (Pabl nac sti lë Saul), ni ne nacie Espíritu Sant Pabl ¹⁰ rëb Pabl lo me:

—iBiche nu zhin mendox! Zhin mendox gon nac luu, squitaa noquidiee luu miech, notsidil luu didzli. ;Zha rna dze ne csaan luu miñe nac luu i, squi notsidil luu Xtiidz Dios? ¹¹ Gon ġanle, ;laa Dios csiaabzi luu, niinagazh laa lo

luu ycow, ni spalal xbiini ngbidz gandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho gnaaz nia me.

¹² Zeene gon men rnabey co sca pcow lo Barjesús, hor co bliladz me Xtiidz Dios, bzee zdoo me gon me scataa poder ne ziaadnie zhiwseed Dios.

Bdzin zho guiedz Antioquí

¹³ Bded ga, laa Pabl gza Bernabé ni Juan bzëeb barcw stib, laa zho zie nëz xtan zha Panfil. Bdzin zho guiedz Perg laa zho brieel leñ barcw, ga ptso Juan lo zho, laa Juan zey nëz Jerusalén; ¹⁴ laa zho bio nëz zie zho nëz xtan zha Písid, bdzin zho sti guiedz lë Antioquí.

Zeene goł dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho mine pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; gołquiaadiag chop lan xtidz naa ganle gne naa lo to:

¹⁷ Dios ne rliladz no nac no men Israel, ib me bzooblo grë pxozgol no laa zho bgab lo me. Me gocnien zho zeene bio zho ladz men Egipt, ni me güeysilaa zho ga, blu me ganle ne nli men nroob nac me. ¹⁸ Dipse leñ choo iz ne bio zho grë dan bidz ne bded zho ga, pxcw me grëtaa xquiełntseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse

leñ tap gayoo goł iz, me bzooblo grë zha ne bzo rnabey lo zho; lëe lultm zha ne bzo me ga rnabey lo zho goc profet Samuel. ²¹ Blozh ga, laa zho bnaab so ti rey rnabey lo zho, nacne bzo me Saúl, bzob Saúl choo iz goc me zhirey zho. Lëe pxoz Saúl ga brieelë Cis, men ne ziaad lo xtiı pxozgol no Benjamín. ²² Zeene laa Dios ptiche dziin co lo Saúl, dzigo bzo me David goc rey. Lëe David ga rzeet Dios zatne znu rnee: “Rleynie naa xingan Isaı zha ne lë David, laa naa gonle ib zun David mine rnabey naa.” ²³ Ni lo xtiı David co nagon brieequia Jesús, men ne pxeel Dios lo guidzliu biaadsilaa miech lo doł, zigne psanle me diidz lo xmengol no padzeela.

²⁴ Leñ dze ne merle xoobnen cho nac Jesús, leñ dze co bnee Juan Bautist lo grë men Israel: csaan zho xquiełntseeb zho gnab zho perdon lō Dios, zeena chobnis zho. ²⁵ Laa zeene zhile gdzin dze ne gut zho Juan, dzigo bnee me lo miech rëb me: “Gołgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glił lab me ni me raguiald naa.”

²⁶ Gołgacnan sca ganle bets: zigtaa tow ne ziaad to lo xtiı Abraham, zigtagaa tow ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnaab zho gut me zigne bneese grë zha co. ²⁸ Niicle ne gon zho peet xtold me, niicle ne brieequiad doł ne pquiaqui zho me, per bguib zho bdeeda diidz rnabey Pilat gut me.

29 'Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne bliit me lo cruz, güeyqueets zho me. 30 Per bleeban Dios me. 31 Grë zha ne güeynal zhits me zeene brieë me Galilé bdzin me Jerusalén, nzian zho gon me; ni niina grëse zho laa zho quianee lo miech ganle cho nac me.

32 'Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela. 33 Lëë Jesús ga raquiet lo Salm brop, zaatne rnee: "Xpëëd naa nac luu. Desde nadze laa zho gunbey ne Xpëëd naa nac luu." 34 Ni bzeetle Dios ne laa me cueeban Jesús, bzeetle Dios xin dxuerp me len baa; min co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa." 35 Laa stib lo Salm ne pquiaa David rnee: "Gdeete luu diidz xin dxuerp naa len baa." 36 Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo dxuerp me. 37 Led meda, zhaa men ne raquiet ga; gacxe na rnew waa peet gacd dxuerp men co, zbeeban Dios me.

38-39 'iGrëse to bets, golgacnan sca ganle! iJesús nac men ne rsilaa miech lo dol! Zha ne gliladztaa me dib zdo zho, tel pe nactaa grë xtol zho, sanmbe me zho. Mine wlaltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

40 'iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

41 Grëse to ne rzhidznie to mine nac diidzli, bii zan to ganle laa naa gun ti mi-lagr nroob ne gzee zdo zho;

per znitlo to, sac gliladzde tow niicle guiaad zha ne gzodiidza lo to.

42 Blozh bnee Pabl; laa zeene laa Pabl griee ga grop Pabl Bernabé bnaab grë miech co lo zho, siguiel zho guiet sti zhmal co biire tsie zho tsieseed zho zho. 43 Zeene brieë zho len yadoo co, nzian grë zha Israel, nzian grë zha stib guiedz zha ne riladzle Dios zienal zhits zho. Nöz no zho bnee zho lo grë miech co tiblique tso guic zho tsienal zho zhiwseed Dios, guien zho ganle pa lotaa noxco me zho.

44 Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. 45 Zha ne rnabey lo grë zha Israel ne no ga, zeene gon zho scataa ndal miech ne goclo ga, blëë zho lo Pabl, ndox zho lo me, rëb zho led diidzliid nac mine rseed me.

46 Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo riegual yquiaadiag Xtiidz Dios ne nac to zha Israel. Per ne squi run to guieintseeb nède to ycaania tow par yгаа to guielmban ndzon ne rneedz Dios; na laa no guioseed grë zhazit. 47 Ni scalegaa rnabey Dios gaca, sac znu rnee me: Laa naa bzole luu tsienee luu Xtiidz naa lo grë menzit, luu gac zig ti biini ne gziini lo grë miech ne ndxie lo guidzliu; zeena guien zho zha laa zho lo dol.

48 Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yгаа guielmban ndzon ne gdeed Dios ga, grëse zho dze cogazh laa zho bliladz Jesús. 49 Dipse dan co, gocnan miech Xtiidz Dios.

50 Grë zha Israel ne rlëë lo Pabl ga, psilo zho pquiil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz

co; zeena ctsidil̄ zho Pabl grop Bernabé, guñcxoon̄ zho zho dan co. ⁵¹ Zeene bin Pabla grop Bernabé, par glu ne nonguiel̄d sca been̄ zha co zho, been̄mbe zho grē yudie co ni zho laa zho brieeḡa, laa zho zie nēz Icon. ⁵² Grē zha ne bliladz̄ Jesús ga, nguieel̄ rac zho, rdeed Espiritu Sant̄ guie|biini lo zho.

14

Bdziñ Pabl Icon grop me Bernabé

¹ Zeene bdziñ Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz̄ Dios lo grē zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladz̄a. ² Laa grē zha Israel ne bliladz̄a, psilo zho bloo zho diidz̄ lo grēraa miech guiedz co glēenie zho Pabl grop Bernabé. ³ Niicle sca been̄ grē zha co per wbid̄ zho, bii blēz̄ zho ga, peet dzeb nod lo zho rie zho rienee zho Xtiidz̄ Dios lo miech; scagaa Dios, nzian grē milagr̄ ne bdeed me diidz̄ run̄ zho par glu ne nli Xtiidz̄ me nonee zho.

⁴ Dzigo grē miech ne no lad guiedz co goc zho chop dii, grol̄ zho racnie grē zha Israel ne rlēē ga, zgrol̄ zho racnie grop zha poxtl̄ co. ⁵ Zha ne rlēē ga, zigtaa zha Israela zigtagaa zha guiedz cow, bnedidz̄ zho grē zho wxtis laa zho tsie tsiedeed̄que zho Pabl grop Bernabé. ⁶⁻⁷ Zeene bin Pabla grop Bernabé, mazd laa zho brieeḡa, laa zho zie nēz xtan zha Licaon. (Güey zho Listr, güey zho Derb ni grēraa guiedz ne ndxie gax ga; güeynee zho lo grē miech co zha nac Xtiidz̄ Dios.)

⁸ Guiedz Listr ga goñ zho ti mgui nē ni, wlal̄taa lo xquie|mban me ib gard sē me; sac scale nē ni me zeene gol me. ⁹ Zeene goñ Pabl dze zob me rquiaadiag me mine nonee Pabl lo grē miech co, dzigo dzeque bui Pabl lo me, goñ Pabl

dib zdoo me riladz̄ me nli zrieelo guñguiac Dios me; ¹⁰ dzigo nguiedz bnee Pabl lo me, rēb Pabl:

—iBeen̄ni ni luu, zeena bzoli!

Zigne sca bnee Pabl, znuse guso nguzhoon̄ me, bzoli me laa me psilo bzē. ¹¹ Zeene goñ grē miech co sca biac me, psilo zho con xtiidz̄ zho nguiedz rnee zho:

—iDiosle i goñ, nasi zig rlu miech rlu me laa me biet gbaa ziaadgan̄ me ne!

¹² iMasaque rzac zho lē xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. ¹³ Ro guiedz co ga zob xyadoo zhimdio zho Júpiter, dzigo brieeḡa pnoz ne no yadoo co grē me miech lad guiedz, zienie zho ngon, zienie zho guiee, nan̄ zho gut zho ngon co cogon zho ma lo Pabl grop Bernabé. ¹⁴ Zeene bien̄ Pabla grop Bernabé wbinladz̄ guic zho. Ptsiez zho xab zho, bzēēb zho lad grē miech co, nguiedz rnee zho lo zho:

¹⁵ —iNdzinli golgac! iPe nacne squi rac to? iGolgan̄ ganle miech guidzliuque nac no, tibaque nac ne grē ne! Laa no ziaad lo to ziadseed no to wseed cub ne nac Xtiidz̄ Dios, zeena guien̄ to csaan to grē ncuaañe paat rquiind ne run̄ to i, gbiire gbig to lo Dios men̄ ne nlipaa mban. Me bzaa gbaa, me psan̄ guidzliu, me psan̄ nisdoos, grēse ncuaañe no gbaaw, ncuaañe no lo guidzliuw, ncuaañe no lo nisdoow, me bzaaw grēsew. ¹⁶ Niicle ne glo bdeed me diidz̄ been̄ miech grē ncuaañe gocladz̄taa zho, ¹⁷ per psaanladz̄d me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaañe rdioow ne gzataa dze, rneedz me guie|bley lo ne.

¹⁸ Niicle sca rnee grop zha poxtl̄ co, nen bin grē miech co diidz̄ beete zho ngon co ngogon zho ma lo zho.

¹⁹ Leñ dze co, blalaa zha Israel ne ziaad nëz Antioquí ni nëz Icon bdziñ Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdobniu zho me güeyron zho me tiblad ro guiedz. ²⁰ Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz leñ guiedz. Biini liu, pcaa me nëz grop me Bernabé laa zho zie nëz Derb.

²¹ Bdziñ zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, ²² güeynee zho lo grë zha ne rliladz Jesús ga, pchoobladz zho zdoo zho, pso zho diidz lo zho, niicle nroob guieñe ne noded zho per none tibaque gac guic zho tsienal zho Xtiidz Dios; sac ible sca nzian ncuaane ted zho laga gdziñ dze ne gdziñ zho zaatne rnabey Dios.

²³ Tib tib guiedz co, bzose zho grë zha ne so gnabey lo grë zha ne rliladz Jesús ga; rlozhse rcuan zho grë zho zho ni rzodiidznie zho Dios, dzigo laa zho rsañ zha co ladznia me yquianap me zho.

Bdziñ Pabl grop Bernabé nëz Siria stib

²⁴ Nëz no Pabl grop Bernabé bded zho dib xtan zha Pisisid, bzëeb zho xtan zha Panfil, bdziñ zho guiedz Perg. ²⁵ Blozhse bnee zho Xtiidz Dios lo grë miech co, dzigo laa zho briece ga, bdziñ zho guiedz Atalia. ²⁶ Atalia ga bzëeb zho barcw bdziñ zho sti guiedz ne lë Antioquí, gataa laa zho psiaal viaj co. Guiedz coque ga briece zho grop zho güey zho grë guiedz co güeynee zho Xtiidz Dios lo miech; zeene sca bñab grë zha ne rliladzle Jesús ga lo Dios

gacniën me zho tsiegun zho xtsiñ me.

²⁷ Zigne bdziñ zho Antioquí ga, bnabey zho pcaalsa grëse zha ne rliladz Jesús, bzodiidz zho lo grë miech co grëse zha gocniën Dios zho güeygun zho xtsiñ me, ni zha rquia zdoo Dios zha ne nacd zha Israel rbedz me zho ye zho rzëeb xnëz me.

²⁸ Xtselaa bio Pabl ga grop me Bernabé, blëz zho lo grë zha ne rliladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdziñ bla zha ne ziaad nëz Judé, psilo zho noseed zho grë zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

² Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bñediidz grë zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, diën pe guiab zho.

³ Nacne briece zho zie zho. Nëz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grëse zha nobedz Dios grë zha ne nacdraa zha Israel, rsaan zho grë zhiwseed xmengol zho laa zho rliladz Jesús. Rley grë miech co ron zhow. Sca bio zho nëz, laa zho bdziñ Jerusalén.

⁴ Zeene bdziñ zho Jerusalén, pcaalsa grë zha poxtl, grë zha ne rliladz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech. ⁵ Miñ co quianee zho zeene guso

bla zha ne glo goc farisé rëb zho, grë zha ne nacd zha Israel zeene laa zho riladz Jesús ib none tso zho bey, ni none guñ zho grëse mine rnabey Xley Moisés. ⁶ Dzigo nacne bnabey grë zha poxtl co ni grë zha rnabey co, ycaalsa zho stib dien zhapaa gaca, pe nonguiela tso grë zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho:

—Grëse to bets, golquiaadiag mine gne naa lo to nu ganle. Led rso-ladz to, zeene griinpa psilo quia-gaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel giladz zho me. ⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espíritu Sant nacie zho, zigne pxeelaque Espíritu Sant nacie ne. ⁹ Gotsaa gwi ne ganle, led yed Dios rbe dien cho nac zha Israel cho nacgaa zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰ ¿Zha nac dzigo ne racladz to gnabey to grë zha co guñ zho grë mine nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmenjol ne brieelod niuna zigne naca! ¹¹ Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuaa ne rdziuun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë menzit zaatne güeynee zho Xtiidz me lo grë miech co. ¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to. ¹⁴ Laa Pedr bzodiidzle lo ne ganle zha psilo bredz Dios grë

zha zit, bzooblo me zho ye zho gac zha ne sëeb xnëz me. ¹⁵ Ga nagon goca zigne zho bneese lo Xtiidz me, mine pquiaa grë zha ne pxeel me padzeela, rneew:

¹⁶ Tedse nu ganle,

laa naa cuedz grëse miech ne ygab lo naa;

grë zha xtiü David zha ne bzozit, laa zho gbig stib.

¹⁷ Horco grëse zha zit, laa zho gon ganle cho nac naa,

zeena grieele sëeb zho xnëz naa.

¹⁸ Znu nac xtiidz Dios, ni padzeelale bzeet me ne laa me guñ min co.

¹⁹ Min co nagon grë zha zit ne riladzle Jesús, ib nonguielda ga gnabey ne zho guñ zho mine nac xley ne. ²⁰ Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëel co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho mgui ne nacd tsieel zho. ²¹ Niicle mazd padzeelaw, tibaque quiyon miech gund zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne riladz Jesús ga. ²³ Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne riladz Jesús nuw, grë no laa no rquiaabdiuzh to grëse to bets ne nac to zha ne no

guedz Antioquí, ni grëraa guiedz ne ndxie nëz Siria i, ni nëz Cilis.

²⁴ 'Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no gun to. Gacnan to ganle led nod pxeel zho, ²⁵⁻²⁷ gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiaayun zho xtsiin Jesús.

²⁸ 'Lo godiidz ne bdziunun no, laa no bdzianle nonguielda ne dien peraa gnabey no to gun to, ni niiclegaa Espíritu Sant scaque rnee me. Rquiind ne peraa gun to, lëëlew ga totsaque tsoxco to ²⁹ gowde to xpëel grë ma ne rgogon miech lo grë zhindio zho; grë ma ne rxieed ren zeene ret ma, gowde to ma; ni niicle gowdga to xchen grë ma ne gut to. Grë zha bgui, nodne tsonie zho wnaa ne nacd tsiel zho; niiclegaa wnaaw, nodne tsonie zho mgui ne nacd tsiel zho. Min rii nagon nac miñe no tsoxco to.

'Guiaannie Dios to sca.'

³⁰ Gza tap zha co laa zho brie Jerusalén, laa zho zie nëz Antioquí. Zeene bdziñ zho ga, bnabey zho pcaalsa grëse zha ne riladz Jesús, dzigo bdeed zho guits co lo zho. ³¹ Zeene gocnan grë zha co zha rnee low, rley zho sacne pchooblada zdoo zho. ³² Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa bléz Silas ga grop Judas, laa zeene gol dze ne laa zho griece gbiire zho nëz Jerusalén stib, ine güeyzonëz grë zha co zho, rdeed zho xquizh lo zho. ³⁴ [Laa zho nole nëz, tibaque zeene rëb Silas laa Silas guiaanaque ga spalad dze.] ³⁵ Laa Pabl grop Bernabé ible laa

zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶ Goc palad dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnan zho dien yo grë zha co. ³⁷ Dzigo gocladz Bernabé ye Juan Marcw nienie zho; ³⁸ per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynal Juan nlozh nsiaal zho lo dziin co.

³⁹ Min co pquiaqui bneelsa Bernabé grop Pabl, nrooblaa güey lo xtiidz zho; nacre gataa laa zho ptso. Pcaa Bernabé nëz grop Bernabé Juan bzëeb zho barcw zie zho nëz lo guidzliu win ne no lo nisdoo lë Chipr; ⁴⁰ laa Pabl goc grop Silas. Blozhse bnab grë zha co lo Dios gacniñ me Pabl grop Silas, laa zho brie ga ⁴¹ güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne riladz Jesús nëz co, güeychoobladz zho zdoo zho.

16

Beenbey Pabl Timoté

¹ Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne riladzaque Jesús lë Timoté, ti men Israel ne riladzle Jesús nac xnial me, laa pxoz me nac men Gres.

² Grëse zha Listr, zha Icon, zha ne riladz Jesús tibaque rzeet zho Timoté rnee zho ti miech ndzinli nac me, nacre bnee Pabl lo me tsial me zhits Pabl. ³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴ Laa me zial zhits Pabl. Guiedz ne rdedtaa zho rnee zho lo

grë zha ne rililadz Jesús ga, tsoxco zho guñ zho grë mine pso zha poxtl ga diidz, grë zho zha rnabey ne no Jerusalén. ⁵ Zeene ron grë zha cow, dib zdooraa zho rnaló zho Dios, zigse zie dze racnzianraa zha ne rililadz Jesús.

⁶ Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grë guiedz ne ndxie nëz Asia ga. ⁷ Zeene bdziñ zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espíritu Sant diidz nie zho nëz co. ⁸ Dzigo tibbdeed zho dib xtan Misia bdziñ zho ti guiedz ne ndxie ro nisdoo lë Troas.

⁹ Guieel co blulo ti mgui Macedon lo Pabl, rnab me guñ Pabl guieInzaac tsie Pabl nëz co, tsiegun Pabl xyudar grë miech co.

¹⁰ Nacne hor cogazh bzhixcuaa no, sac bien no ible Dios racladz guio no nëz co guionee no Xtiidz me lo miech.

¹¹ Dzigo brieë no ga bziaab no ti len barcw bdziñ no ti lo guidzliu win ne no lo nisdoo lë Samotras. Biini liu brieë no ga bdziñ no Neápolis, ga bliaaz no wdze co. ¹² Biini sti liu co brieë no Neápolis bziani no bdziñ no Filip. Lëë guiedz co riaan zaatne rsilo xtan zha Macedon, niapse meñ Roma no ga; nzianlaa ngbidz bliaaz no ga.

¹³ Laa tib dze ne rdziiladz miech lo dziin, brieë no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa meñ wnaa ndxie ga, dzigo psilo no bnee no lo zho cho nac Jesús. ¹⁴ Lad co no ti wnaa Tiatir lë Lidia, rto me grë lar nizhnie nlaan mine nac lar niazh; ye me dib zdoo me rililadz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grë menlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacne biobi-aazaque no lidz me.

Bio Pabl ladzguuib grop Silas

¹⁶ Tib dze, lëëtaque zio no zaatne riozodiidznie no Dios, bdzieelo no ti ndzooop nguieg noguitnie men_{dox}. Zëëb diidz grëse tel pe rnabdiidz miech lo ndzooop, rnee men_{dox} cow; nroob dimi ne riab nia zha ne rnabey ndzooop. ¹⁷ Nañ ndzooop zhits no, nguiedz roptsie ndzooop rnee ndzooop:

—jXtsiin Dios ndzon ne zob gbaa gon noyūn gza mgui rii! ¡Laa zho ziadseed to zeena gacnan to zha csilaa Dios to lo xtol to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo men_{dox} ne noguitnie ndzooop ga, rëb me:

—Jesús nacnie naa, ni laa naa rnabey luu gon niinagazh psaan ndzooop qui.

Zigne sca rëb Pabl laa men_{dox} co bzhooñ.

¹⁹ Gza zha ne rnabey ndzooop ga, zeene gon zho run_{draa} ndzooop guieInsin co gdziniaa ndzooop dimi, bnaazaque zho Pabl grop Silas güeyzo zho zho lo wxtis, rëb zho:

²⁰⁻²¹ —jGolwi ganle pe nac ncuaane noyūn grop zha Israel rii lad guiedz nu! ¡Nogodiñ zho miech, laa zho quiaseed miech ncuaane nonguieldraa dziuun ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brieë xab zho grop zho bdeed bar zho zho, nroob bdiñ zho zho. ²³ Blozhse bdiñ zho zho laa zho psëëb zho

ladzguiib, bnabey zho meñ ne quianap ladzguiib ga tibaque yquianap me zho, sac tel laa zho xoon me tsietizha. ²⁴ Zeeñe bin meñ co sca rëb zho, güeyaue me güeysëeb me zho stib lena miñe riaan caanraa, ga psëeb me ni zho lad chop lê yag nroob.

²⁵ Wdze co, zig groļ guieela laa Pabl grop Silas bii noyoolnie Dios, ni rnab zho lo me gacniñ me zho. Grëse zha ne no ladzguiib ga, ron zho sca no Pabl grop Silas. ²⁶ Tibaque zeene bni ti zhodox, psiniw dib nacse ladzguiib co, grëse ro ladzguiib co bzhial, guiib ne no nia grë zha ne no ga, wbiļa.

²⁷ Lëëlëd brie mcaallo meñ ne quianap ga, zeene gon me grëse ro ladzguiib co zonial, masaque güeynie guic me bzhoonle grë zha ne no ga, bdobaque me spad ne ney me laa me zie gut me me. ²⁸ Horco broptsie Pabl lo me, rëb Pabl:

—jGute luu luu! jGrë no ndxie no, choot bzhioond!

²⁹ Lëëlëd bnab me biini, bzëeb nguzhoon me len ladzguiib, masaque rzhidz me dzeb pquiits-gzhib me lo Pabl grop Silas. ³⁰ Blee me zho ga, rëb me lo zho:

—Golnë lo naa, ipe nac miñe gun naa zeena csilaa Dios naa lo grëtaa xtoļ naa?

³¹ —Dib zdoo luu bliladz Jesús, meñ rnabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

³² Dzigo güeynie me zho lidz me, bnee zho Xtiidz Dios lo me grë menlidz me. ³³ Guieel co no me bdiib me zhits zho, zaatne brëe bar ne bloobar zho zho; blozhse ga, laa me brobnis grë menlidz me. ³⁴ Bnabey me goclo ti guielwagw downie me zho, rley me, niicle grëgaa menlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl

ladzguiib grop Pabl Silas. ³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca griece to, peet tsieniedraa guic to.

³⁷ Dzigo rëbchaa Pabl lo zha ne bdziñnie diidz ga:

—jZha ndzielguictaa zhiwxtis to gon! Squi ndxie menquiedz bdiñ zho no, ni gardle gacnañ zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhlianse griece no. jLëda ga gon! jGoltsie golguiab lo zho, lëezhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho; ³⁹ lëëlëd güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

⁴⁰ Ga briece zho güey zho lidz wnaa ne lê Lidia ga, bnee zho lo grë zha ne pcaalsa ga, zha ne rililadz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho briece guiedz co.

17

Güey Pabl Tesalónica grop me Silas

¹ Briece Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziñ zho guiedz Tesalónica. Lad guiedz co zob ti xyadoo zha Israel, ² dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zhmal, gzobse dze ne rdziiladz miech lo dziin güey Pabl güeyzodiidznie Pabl grë zha co, ³ bzeet me lo zho grë zaatne raquiet grëtaa ncuane ted meñ ne cxeel Dios lo guidzliu ga, ni zha

grieeban me; ni blu me lo zho gacnan zho ganle lëe men co ga nac Jesús.

⁴⁻⁵ Ndal zha ne pquiaadiag xcodi-idz Pabl, bien zho ne nli sca naca, laa zho bliladz Jesús, ndal zho nac zha nêz Gres, zha ne noxcole miñe rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëe zho; güey zho güeytop zho grë zha yozh ne quianzê lad guiedz co, ti ruid ne been zho lad guiedz. Güey zho güeyseëb zho lidz Jasón nan zho niebee zho Pabl ga grop Silas, ngo zho zho lадznia grë miech co.

⁶ Zeene gon zho bgaad grop zha co lo zho, bnaaзаque zho Jasón ni zla zha ne rliladz Jesús, bдобniu zho zho bdzinne zho zho lo wxtis, roptsie zho rnee zho:

—iGolgan ganle laa zha ne sca quianzê nocots guic grë miech, laa zho blansole nu! ⁷ Ni Jasónpaa rdeed zaatne rbëz zho. Racladz-draa zho gun zho miñe rnabey rey César, sac rnee zho no sti zhirey zho lë Jesús.

⁸ Grë zha wxtis co ni grë men guiedz ne pcaalsa ga, zeene bin zho sca rnee grë zha co, rien draa zho zha gun zho. ⁹ Miñe been zho beenquish zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxina laa grë zha ne rliladz Jesús ga bleese Pabl ga grop me Silas, pxeel zho zho nêz Beré. Zigne bdzin zho Beré, gloque ti xyadoo zha Israel güey zho.

¹¹⁻¹² Grë zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtiidz Dios rwi zho dien pe nli miñe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men wnaa co zha non nac zho guiedz co. Tibliladz

nac grë miech co, gocntseebd zho zigne gocntseeb zha Tesalónica.

¹³ Laa zeene gocnan zha Israel ne no Tesalónica laa Pabl nolaque guiedz Beré, güeyaque zho güeyquil zho grë miech co glëenie zho Pabl. ¹⁴⁻¹⁵ Dzigo lëelëd brieë bla zha ne rliladz Jesús ga, zienie zho Pabl nêz ro nis; laa Silas grop Timoté biaan ga. Güey zha co güeysan zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Len dze ne no Pabl Aten

¹⁶ Laga quiambëz Pabl gdzin Silas grop Timoté güey me güeyted me lad guiedz co, wbinladz guic me gon me led zhid grë mdio ne riegan grë miech co. ¹⁷ Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne rliladzle Dios. Gzobse dze rie me len guiedz rieneë me lo grë miech ne rdzin ga. ¹⁸ Tib dze bdzieelo me bla zha rac ne zienal zhiwseed ti men lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieëban Jesús. Zeene bin zho zha rnee me, no bla zho rzhidznie me, rnee zho:

—iDieen pe riab guic men qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; ¹⁹ dzigo rëb zho lo Pabl:

—Bzhiguiel mazd, së luu guio ne lozh sodiidz luu lo no dien zha nac wseed ne ziaadnie luu, ²⁰ sac wlal-taa gard dzion no grë ncuane rnee luu i.

²¹ No zho liaadz gacnan zho pe rnee Pabl, sac sca nac grë zha Aten, niiclegaa grë zha ne quiadzin ga, rdziladz zho rded-dze zho rzodiidz zho dien zha nac grë diidz cub ne griin ron zho.

²² Bdzin zho ti guic gui win ne rnee zho Areópago, bzo Pabl glow-taa zaatne rcaalsa zho ga, bnee me lo zho rëb me:

—Grëse to ne nac to men Aten, ran naa ne nligaa rioxco to rleynie to grë men ne rzac to nac Dios; ²³ sac len dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Gologacnan sca ganle, Dfios ne runbeyde to ga, runbey naa me ni lëe zhiwseed me none naa lo miech len dze rii.

²⁴ Dios co bzaa guidzliu, me bzaa grëtaa ncuaañe no lo guidzliu; gacd ne guiab miech zha gzaa ti zaatne cuëz me, sac men nroob men rnabey nac me, me rnabey gbaa, me rnabey guidzliu. ²⁵ Niicle rqui-indgaa me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuaañe rquiin ne. ²⁶ Lo tib nëzaque miech ne bzaa me ga, bnabey me brieequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. ²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne, ²⁸ sac gon, niapse por xpoder me laa xcuerp ne niaa zigne naca, laa ne mban, laa ne rriel. Lëew ga bnee bla menladz to, zha rac ne znu rëb: “Xtii Dios nac ne.”

²⁹ Gase na ganle gotsaa gwi ne, conque xtii Dios name nac ne, pe nac dzigo gliladz ne lëe Dios ga nac grë cho mdio or, cho mdio plat, cho mdio quie ne riab guic miech rzaa zho; ³⁰ ni ib sca riladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuaañe bliladz zho ga gbig zho lo me, mese

gleynie zho; ³¹ sac laa me bzole tib dze ne gacredz grëse miech lo me yгаа zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

³² Zeene bin zho bzeet Pabl no ti men ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëez zho lo xcodiidz Pabl, laa Pabl wbi lo zho ga. ³⁴ Brieequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brie Pabl Aten bdzin me guiedz Corint. ² Ga beenbey me ti men Pont lë Aquil, ti zha xtii zha Israel nac Aquil. Roma no me glo, wriin bdzin me Corint ga grop tsieel me; sac bnabey rey Claud brie grëse zha Israel ne no Roma. ³ Dzigo güey Pabl blëz Pabl lo zho ga, sac ye zho rzhixcuua grë lar nroob ne rquia nac, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdzin Corint, dzigo laa Pabl psilo gzobse dze güey me güeynee me Xtii dz Dios lo grë zha Israel ne no ga, rnee me lo zho cho nac Jesús. ⁶ Laa zeene gontaa me rond zho diidz, lelntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bial bialne naa lo to per pquiaadiagde to mine rne naa; xtolle to nasca tel laa to nitlo! Gbi-iredraa naa gne naa Xtii dz Dios lo

to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdo me rililadz me Dios. ⁸ Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—jGdziebd luu! jib ycuëezd luu lo dziin ne noyun luu i, bnee xtidz naa lo grë miech qui! Ndal grë miech rii no sëëb xnëz naa. ¹⁰ Peet tsienied guic luu, choot grielod lega pe gun luu sac naa quianaap luu.

¹¹ Nacne blëz Pabl ga stib iz grol, pseed me grë miech co Xtiidz Dios.

¹² Laa zeene bzob men ne lë Galión zobnabey me xtan Acay, grë zha Israel ne no Corint ga bnediudz zho grë zho bnaaz zho Pabl güeyzo zho me lo Galión ¹³ rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod mine ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca mine no pe ti falt, pe ti guieintseeb ne quiayun me, dzigosi naa raguial gun guielwxtis. ¹⁵ Per telne laa to ziaadnie me nu porne rdziladzde to mine quiaseed me miech, rdziladzde to tel cho rzeet me, sac led scad nac xley to, tsow golgan dien pe gun to. Nodaque xtil to guic naa.

¹⁶ Bleega Galión zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

Biire bdziñ Pabl guiedz Antioquí

¹⁸ Goc spalal dze no Pabl Corint ga, dzigo bnee me lo grë zha ne rililadz Jesús ga laa me ghi; ye Aquil

ni Priscil wnaa ne nac tseel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco Pabl gun me tel pe nac ncuaane rëb me lo Dios gun me, dzigo zeene bdziñ zho Cencré bnabey me liu liu ptsiib guic me.

¹⁹ Cencré bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiidz Dios lo zho. ²⁰ Dzigo bnab zho mbëz me lo zho ga ti blalaa dze, per brieelod mbëz me ²¹ sac laa guic me no gdziñniob me Jerusalén yгаа me lni ne ziaadyob len dze co, rëb me:

—Na telne zneedz Dios diidz, bii zialteadaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea. ²² Cesarea brieë me barcw, laa me zie nëz Jerusalén. Bdziñ me güeyquiaabdiuzh me grë zha ne rililadz Jesús ga; biireraa me ga bdziñ me Antioquí.

²³ Goc palal dze no me Antioquí, laa me brieëque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne rililadz Jesús ga dib zdo zho gleynie zho Dios.

²⁴ Len dze co bdziñ ti men xti zha Israel guiedz Efés, ti men Alejandriw lë me Apol. Ti zha rac nac me, rien me zha gnee me Xtiidz Dios lo miech. ²⁵⁻²⁶ Güey me xyadoo zha Israel ne no ga, nguieel rac me, peet dzeb guiend lo me psilo me nonee me lo zho grëse mine bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grë zha ne rililadz Jesús ga, zeene gocnan zho laa guic me no

tsie me nêz Gres, dzigo ye zho rëb wen tsie me, pquiaa zho ti cart pxeel zho lo zha ne no nêz co zaccse ycaania zho me. Zeene bdziñ me nêz co, pseed me grë zha co. Rley zho blozh gocnañ zho cho nac Jesús; ²⁸ sac squi ndxie miech rsioog me ro grë zha Israel, rnee me lo zho lëële men ne quiambëz zho cxeel Dios ga nac Jesús, ni rlu me lo zho pa lo zhobneew lo Xtiiidz Dios.

19

Biire güey Pabl Efés

¹ Leñ dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nêz xtan zha Galás, laa me bdziñ ga. Ga bdzieel me blalaa zha ne riladz Jesús, ² dzigo bnaabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bliladz to Jesús?

Pquiab zho rëb zho:

—¿Güelbiini ye? Gard gon dzion no rdeed Espíritu Sant guielbiini.

Dzigo rëbchaa Pabl:

³ —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nace wrobnis co par glu miech ne laa zho csaan guelntseeb, laa zho sëëb xnëz Dios; per grëse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵ Min co bin zho nace brobnis zho stib zigne psañ Jesús didz. ⁶ Zeene laa Pabl pxobnia guic zho bnaab me gdeed Espíritu Sant guielbiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnañ miech. ⁷ Lo gza zho rga zho tsiipchop, niapse zha bguiw.

⁸ Tson mëë blëz Pabl ga, tibaquerie me xyadoo grë zha Israel ne no ga, ible rdziebd me rnee me lo zho zha nac Xtiiidz Dios, ni rguib me rgo me guic zho gliladz zho cho nac Jesús. ⁹ Per zeene gon me no palal zho ib rond diidz, lel psilo zho squi ndxie miech rneenë zho Jesús, nace bleextsoque me grë zha ne riladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

¹⁰ Dipse len chop iz blëz me ga pseed me grë zha co; nace grëse miech ne no dib nêz Asia ga, zigtaa zha Israela zigtagaa grëraa miech cow, bin zho zha nac Xtiiidz Dios. ¹¹ Bdeed Dios diidz been me grë milagr nroob ne rzee zdo miech; ¹² sac haxta lar ne rzëse nia me, lar ne rbixse me rzhooob lad men ne rzacnë laa zho riac, niicle grëgaa mendox ne noguitnie miecha, rzhooñ ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoñ zho mendox ne noguitnie miech. Ti vuelt, nañ zho na ye zho cuedz lë Jesús gacnieñ me zho guñcxooñ zho mendox; bdziñ zho zaatne guñcxooñ zho ma, rëb zho:

—¿Zig zobwi Jesús ne rzeet Pabl, laa no rnabey to golrieegazh i niina!

¹⁵ Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶ Znuse bias men ne noguitnie mendox co, bnaaz me gza zha co bdiñ me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli men non, men rnabey nac Jesús.

¹⁸ Haxta ye grë zha ne riladzle Jesús, hor co laa zho bleeroe pe nac

grë ncuaañe ndzinlid ne bliladz zho glo. ¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal gocon grëtaa guits co, biirew zig chooptsii mil pes plat. ²⁰ Ga blu poder ne nacie Xtiidz Dios, sac grë zha ne bina bdzëë lo xquielmban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén griee me tsie me Roma. ²² Nacne ptedner me Timoté grop Rast (zha ne noyuj xyudar me len dze co) zie zho nëz Macedon, laa me bii biaan nëz Asia ga.

Gocntseeb zha Efés

²³ Len dze co brieequia palal zha Efés ptsidil zho zha ne riladz Xtiidz Dios. ²⁴ Guiedz co no ti men ne rundziin guiib plat lë Demetr, rzaa me grë yadoo yeen zig niaada xyadoo xnaxnazh zho Dian; nroob dimi ne rial me grë me zha ne runnie me dziin co; ²⁵ bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶ —Rien naa ziyonle to, ziyangaa to ganle laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun ne? ²⁷ Golguien ganle noxtseeb guiabdraa xtsiin ne, ni nanwen to ganle lëë xtimi ne nu. Ni tebaa mincosegaw, mine mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibgaa lo guidzliuw con guiaanladz zho me.

²⁸ Zeene gon grë zha co sca rëb Demetr, rlëë zho, roptsie zho rgo zho xviv Dian. ²⁹ Wdzeepaaw grëse

menquiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdozni zho zho bdziñnie zho zho ro yulow.

³⁰ Nacne gocladz Pabl nie me nie-nee me lo grë miech co, per psaand grë zha ne riladz Jesús ga. ³¹ Haxta bla zha wxtis ne ndzieeldiidz Pabl, pxeel zho diidz lo me tsied me.

³² Zhaase zhaase rnee grë miech co ndxie zho ro yulow ga, no zho haxta ni rien pe nacne zie zho ga. ³³ Blalaa zha Israel, zeene gon zho scataa rac grë miech co, bdoz zho zhiw ti men lë Lejandr go-cladz zho nee me chop lan xtiidz zho. Laa men co blis nia me parne cuedze zho gnee me; ³⁴ zeene gon zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brie men ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Golgona ganle, grëse miech lo guidzliu nan zho guiedz rii zob nazhnazh Dian, nan wen zho gbaa biet me zob me nu; ³⁶ tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi lëëled dieen pe rzhixcuaa to. ³⁷ Golwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiauitnie yadoo, cho zha ne nozhidzniegaa xnaxnazh ne.

³⁸ Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe rungaa stib! ³⁹ Laa telne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien zha

niaca. ⁴⁰ Sac goṇ ne squi been to nadze, noxtseeb glisqui zha Romaw lo ne; ni pe nadienṇ dzieets ne telne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nêz Macedon ni nêz Gres

¹ Zeene laa ruid co blêz, dzigo bredz Pabl grêse zha ne riladz Jesús, bnee me lo zho zaacse gac zho. Blozhse bnee me lo zho, laa me briece ga zie me nêz xtan zha Macedon; ² güeynee me lo grê zha ne riladz Jesús nêz co, pso me diidz lo zho zaacse gac zho. Nêz co briece me bdziṇ me nêz Gres. Ga blêz me tsonṇ mēē.

³ Laa zeene laa me gbi ga tsie me nêz Siria, laa me ziele sēēb me barcw zeene gocnaṇ me laa zha Israel ne no ga bnediudz pa tsetiṇ zho me, nacne güeydaque me barcw, mazd bio me nêz güeyted me nêz Macedon.

⁴ Blalaa zha ne bzēnaṇ biogza no me, bzē ti meṇ Beré lē Sópater xingān ti meṇ lē Pirr; bzē chop zha Tesalónica, Aristarco ni Segund; ti zha Derb lē Gay, Timoté, ni schop zha nêz Asia, Tíquico ni Trófimo.

⁵ Goṭ no Filip laa zho bner, per biaanṇ no diidz Troas cuêz zho no; ⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no briece ga. Goc gaay ngbidz no no lo nis laa no bdziṇ lo zho Troas, dzigo bliaaz no Troas ga gadz ngbidz.

⁷ Zeene goṭ dze dmingw, bio no yu ne rcaalsa zha ne riladz Jesús ga. Ti yu tsonṇ xcuaaw, laa no pcaalsa par dziuunṇ no xtsee ne psan Jesús diidz ga guṇ grê zha ne riladz me. Laa no ndxie grê no, dzigo psilo Pabl pseed me no; nzian ncuane nonee me lo zho sac guini liu co laa me griece ga; goṭ grol güieela rsiaaldaque me. ⁸⁻⁹ Nzian

nac biini ne noquia leṇ yu co; zatne nac ro ventan ga zob ti niib lē Tic. Wdzeelaaw rsiaaldaque Pabl, tibaque bzheṇ mcaal niib co, wbi niib ga biab niib nêz ley; ni glaaw, leṇ yu ne riaanṇ glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziṇ me lo niib bdeedz me niib.

—jGdziebde to! —rêb me—. jZrieceban niib!

jNi nligaaw brieceban niib! ¹¹⁻¹² Grêse zho per nli rley zho. Blozh ga bdzieep no glaa stib bdziṇ no leṇ yu co, dzigoraabdiiz Pabl guietxtil pquiu no. Blozhse bdziuunṇ no xtsee co, laa Pabl psilo bnee lo zho stib, quianeeque Pabl laa liu biini.

Bdziṇ Pabl Milet

¹³ Lban co psiaaṇ Pabl, laa me wbi ga laa me zie nêz Ason nzēni me; laa no bziaab barcw bdiednier no lo me. Bdziṇ no Ason ga bliaaz no me zigne biaanṇ no diidz. ¹⁴ Zeene blanso me lo no, laa no bziaab barcw gza no me bdziṇ no guiedz Mitilen. ¹⁵ Biini liu briece no Mitilen, bdieed no gax Quío, bietraa stib dze co bdziṇ no Samos, ga bliaaz no; bzia no lo nis co zig sti dze dzigoraabdziṇ no Milet.

¹⁶ Biotieete no Efés, sac laa guic Pabl no gdziṇniob me Jerusalén, zeena ygaa me lni Pentecostés. ¹⁷ Nacne zigne bdziṇ no Milet pxeel me diidz Efés bredz me grê zha ne zo lo zha ne riladz Jesús ga. ¹⁸ Zeene blanso zho, bnee me lo zho rêb me:

—Wen wen runbey to naa, nanle to ganle zha noxco naa noyūn naa xtsiṇ Jesús meṇ ne rnabey ne. Wlal ne psilo ziyal naa nêz Asia nu, ¹⁹ blactaa biin naa lo grê miṇe bdeed naa, blactaa lo guieṇxtseeb ne ziyo naa, tibaque quianaṇ grê zha Israel quinṇ zho naa. ²⁰ Per goṇ to ganle, tibaque bioxco naa bialseed naa to miṇe nac diidzli, zigtaa

pseed naa to zaatne rcaalsa tow, zigtaga pseed naa to tib yu stib yu. ²¹ Grëse miecha, tibaque miñe pseed naa zho, miñe bne naa lo zha Israel miñcoque bne naa lo miech stib guiedz; grëse zho bnee naa lo zho none csaan zho xquie|ntseeb zho dib zdoo zho gnalo zho Jesús, zeena gbig zho lo Dios.

²² 'Scaque niina ne laa Espíritu Sant rnabey ga naa Jerusalén, nan|d naa dien| peraa nac ncuaane gdzieelo naa ga; ²³ per nan|paa naa ible zgo zho naa ladzguib, ible sacsi zho naa, sac guiedz ne gdziintaa naa miñ co rnee Espíritu Sant teed naa. ²⁴ Lo guie|xtseeb co no naa per rquiad zdoo naa xquie|mban naa; miñe nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeena ine gley naa csiaa| naa dziin ne bzo Jesús naa nu quiayun naa. ²⁵ Rien naa lo grë to ne nac to zha ne bial|seed naa gocnan| to zha nac xnëz Dios, gandraa to lo naa lo guidzliu rii. ²⁶⁻²⁷ Laa naa pseedle to grëse miñe nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien| sca, |golquianap to, ni scagaa golquianap grë zha ne zo to lo! |Golwi ganle xnëz Dios no zho, haxta lo cruz gut Xpëed me bdiizh me xtol| zho! Ni stiba, |ib Espíritu Sant bzo to yquianap to zho zigne rquianap baxtor xpëcwxii| zho!

²⁹ 'jNsin golso! Sac rienle naa zeene laa naa gbiche lo to, |b zrieequia grë zha ne guiaad guiaadquidie to, zguib zho zha gnitlo zho to zigne run| grë coyot mëcwxii|. ³⁰ Haxta lad to, zrieequia bla zha ntseeb ne ctsëe Xtiidz Dios, squiil zho to tsienal| to zhiwseed zho. ³¹ Gacxe waa laa naa rne lo to, |nsin golso! Gol|soladz ganle tson|raa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac men| ne

gacniën to, laa naa rsan| to ladznia me grëse to; Xtiidz Ndzon me miñe rnee ganle zha nquialadzttaa me to, lëew lozh quix biini to dib zdoo to gnalo to me, zeena yгаа to zaatne gneedz me cuëz to grë to zha ne noraa xnëz me.

³³ 'Wlaltaa |b rzobladd naa dimi, |b rzobladd naa lar, guiep naa tebaa zha yquianie naa grë ncuaan| co. ³⁴ Len dze ne blëz naa lo to, gon| to ganle niapse nia naa bdziniaa naa ncuaane pquiin naa, ncuaane pquingaa grë zha ne bzënie naa. ³⁵ Ga blu naa lo to ganle, |b none dziuun| ne dziin zeena griee|lo dziuun| ne xyudar zha ne guien|d pe yquiin. |b riaan|ladz naa xtiidz Jesús men| ne rnabey ne, zeene znu bnee me: "Mazdraa nroob guie|bley ne rgaa zha ne rgad, lëdle zha ne rad."

³⁶ Zeene blozh bnee Pabl lo zho, laa me pquiitsgzhib ga grë me zho bzodiidznie zho Dios. ³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonëz zho me zaatne sëeb me barcw.

21

Biire güey Pabl Jerusalén

¹ Blozhse bzhieen| no nia grë zha Efés co, laa no bziaab barcw, laa no zio bdziñ no ti lo guidzliu win ne no lo nisdoo co lë Cos. Biini liu brie no ga bdziñ no lo sti guidzliu win co lë Rodas. Rodas brie no bdziñ no guiedz Pátara. ² Guiedz Pátara, ga bziaab no ti barcw ne zie nëz xtan zha Fenicia. ³ Zeene zieded barcw co ngali zaatne riaan| guidzliu win ne lë Chipr, bui no nëz revés rlupaa guidzliu co. Laa no zio haxta bdziñ no guiedz Tir, xtan zha Siria, ga blëz barcw co biet grë yo ne neya.

⁴ Zigne bdziñ no ga bdzieet no barcw bziaab no lad guiedz co, biodziel no grë zha ne riladz

Jesús ga; bliiazaque no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no briece ga, grése zha ne rliladz Jesús grè tsiel zho grè xpëed zho baaad-zonéz zho no ro nis co; dzigo lo yuzh co ga pqui-itgzhib no grè no, bziodiidznie no Dios. ⁶ Blozhse bzhieen no nia zho, laa zho wbi ga.

⁷ Briece no Tir bdziñ no guiedz Tolemaid, ga bio no bioquiaabdiuzh no grè zha ne rliladz Jesús ga, bliiaz no lo zho tib dze. ⁸ Biini liu briece no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lê Lip. Lêe Lip co ga gocgza xoop zha ne bzo been xyudar zha poxtl. ⁹ Quianie me tap ndzooop ne gard ctsieelnia, gzase zho bdeed Dios guielbiini lo zho rnee zho tel pe nac mine racladz Dios gacnan miech.

¹⁰ Nzianle dze goc no no lidz Lip, zeene blanso ti men ne ziaad nêz Judé lê Agab, biadquiaabdiuzh me no. (Ye me rnee tel pe nac mine racladz Dios gacnan miech.)

¹¹ Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, nê me:

—Znu gon rnee Espíritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

¹² Grè zha ne rliladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no. ¹³ Pquiabaque me nê me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiab guielnê to naa i gon squi rac to!

¹⁴ Bdzianse no nliid yquiaadiag me xtiidz no, dzigo mazd psaan no, rdzieets no:

—Golgotssaa csaan ne, Diostaa nan dien zha gaca.

¹⁵ Bdedse ga bzhixcuaa no laa no briece ga, laa no zio nêz Jerusalén; ¹⁶ blalaa zha ne rliladz Jesús Cesarea ga bzënal zhits no, bzënie zho ti men Chipr lê Mnasón. Izle rliladz me Jesús, lidz me biobiaaz no zeene bdziñ no Jerusalén.

¹⁷ Grè zha ne rliladz Jesús Jerusalén, rley zho zeene gon zho laa no bdziñ, blêzlo zho no.

¹⁸ Biini liu co güeynie Pabl no lidz Jacob bioquiaabdiuzh no me, lêëtaque laa grè zha rnabey ne zo lo grè zha ne rliladz Jesús Jerusalén ga, ndxie ga. ¹⁹ Blozhse pquiabdiuzh Pabl grè zha co, dzigo psilo me bzodiidz me lo zho grése zha gocniën Dios me güeyseed me grè miech stib guiedz. ²⁰ Zeene bin zhow per nli rley zho, rdeed zho xquizh lo Dios; dzigo rëbcha zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho mine rnabey Xley Moisés. ²¹ Grè zha ne no nu bin zho laa luu güeyseed grè men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpëed zho bey, niicle tsienaldraa zho grè zhiwseed xmengol ne. ²² ¿Zha ganle dziuun ne? Sac zeene gon zho laa luu blanso, ible ziaadguib zho luu. ²³ No tap bets ne nu ziaadyoble gun zho mine bnee zho lo Dios; mine gaca güey ²⁴ güeynie zho yadoo, golgun grè mine rnabey ley, bdiizh ctsiib guic to gza to; zeena ga gan grè zha rii ganle nliid grè mine rnee miech luu ga.

²⁵ Sangue grè miech stib guiedz zha ne rliladz Jesús, laa no pxeelle diidz lo zho zigne bzodiidz ne nu: grè ma ne rut miech rgogon zho lo zhimdio zho, gowd zho bëel co;

grë ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grë zha bguì, nodne tsonie zho wnaa ne nacd tseeel zho; niicle wnaagaaw, nodne tsonie zho mguì ne nacd tseeel zho.

Bnaaz zho Pabl

²⁶ Laa Pabl zienie gza zha co. Bi-ini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsenie gon ne gdeed zho tib tib zho. ²⁷ Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nëz Asia laa me no len yadoo. Nacne wbig zho ²⁸ bzhen zho zhicw me, roptsie zho rnee zho:

—¡Grëse to menguedz! ¡Golgun xyudar no gnaaz ne men rii! Sac lëe me ga quianzë quiaseed me zha wladz glëenie zho ladz zho, rnee me lo zho gundraa zho grë miñe rnabey ley, gapdraa zho respet yadoo rii; haxta grë zha zit zizëebnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lë Tróximo, dzigo rzac zho güeynie me zha co len yadoo.

³⁰ Pe ga bin grë menguedz, grëse zho bdzin wbigbe zho lo Pabl bdoobniu zho me blee zho me len yadoo, zigne blee zho me ga lëelëd psioog zho ro yadoo; psilo zho noguin zho me, nan zho gut zho me.

³¹ Zeene gocnan men ne rnabey lo menguiib ne ndxie ga laa ruid co noyac, ³² lëelëd brieenie me grë xmenguiib me ni grëraa zha ne rnabey lo zho. Zeene gon grë zha ne noguin Pabl ga, laa grë menguiib co bdzin, dzigora blëz bdiñ zho me.

³³ Dzigo wbig men rnabey co, rnabey me grë zhaguiib co bzoob zho Pabl chop caden. Nnabdiidz me lo grë miech co dien cho naa

Pabl, pe quiayun me ne scataa rlëenie zho me. ³⁴ Psilo zho nguiedz roptsie zho, zhaase zhaase ncuaane rcaadzol zho me. Gonse men rnabey co rfud dien pepaa rlisqui zho, nacne rnabey me grë menguiib co ziesan zho Pabl yu ne rbëzpa zho.

³⁵ Laa grë menguiib co csilo soquianie Pabl lo scaler ne rdzin ro yu co, gataa mazd bzoobyan zho me, sac ntseeb rac grë miech co; ³⁶ nalbe zho, roptsie zho rnee zho:

—¡Golnitlogazh men qui! ¡Ni-inagazh golgut me!

³⁷ Laa grë menguiib co csëeble me len yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres? ³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nëz dan.

³⁹ —Led naada —rëb Pabl— men Israel nac naa. Guiedz Tars gol naa, lëe guiedz co nac miñe nroobraa lo grë guiedz ne ngab Cilis. Na laa naa rnab lo luu, been guielnzaac bneedz diidz gne naa chop lan xtidz naa lo grë miech qui.

⁴⁰ —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

22

¹ —Grëse to men wladz, laa naa rzaac to zig ti bets naa zig pxozgaa naa, golquiaadiag miñe gne naa nu ganle zeena gacnan to quiayund naa miñe rquiaqui to naa.

² Zeene gon zho xtiidz zho rnee me, grëse zho dzese bre zho; dzigo rëb me:

³ —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa

wseed, maistr Gamaliel goc men ne pseed naa. Pseed me naa grēse zigne nac xley xmengol ne, grēse zigne nac zhiwseed zho; pseed me naa tibaque noxco naa runnon naa lē Dios zigne noxcoque tow. ⁴ Mine been to nu nadze, ye naa blactaa squi ben naa ptsidil naa grē zha ne rliladz Jesús, pquianał naa yгаа zho guet zho; mguì wnaasaque razobdoo naa zho lidz zho rasan naa zho ladzguiib. ⁵ Men ne nac pxoz nroob ni grē mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndziñnie naa lo zha ne rnabey xyadoo grē men wladz ne no Damasc, zeena niacnie zho naa nianaz naa grēraa zha ne no ga rliladz Jesús, nialnie naa zho Jerusalén nu nded zho cax-tigw.

⁶ Min copaa nagon brie naa nu za naa nēz co. Zhile gdziñ naa Damasc, zig rwe ngbidza tibaque zeene ziaad ti biinidoo nēz zhan gbaa biab lo naa. ⁷ Biabgagh naa liu, ga nix naa bin naa ti tsi men co rnee me lo naa: “Saul, Saul, ¿pe nacne quianał luu naa?” ⁸ “¿Been guielzaac bnē dien cho luu!”, rep naa. Dzigo nē men co lo naa: “Naa nac Jesús men Nazaret ne squi quiatsidil luu.”

⁹ Grē zha ne zanie naa ga, bdzieb zho gon zho biini co, per biend zho pe rnee men co lo naa. ¹⁰ Dzigo rep naa lo me: “Bzhiguiel bnē dien, ¿pe racladz luu gun naa niina?” Nēchaa me: “Guche i, güey Damasc ga gnē zho ganle pe nac mine no gun luu.”

¹¹ Dzigo bzhen zha ne zanie naa ga nia naa, bdziñnie zho naa Damasc; sac lo biinidoo co pcow lo naa. ¹² Ga no ti mguì lē Ananí, zēeb didz rioxco me grē mine rnabey ley, grēse men wladz ne no ga nanpaa zho ti men wen nac me; ¹³ dzigo baaad me zaatne blēz naa ga, nē me lo naa: “Saul, niinagagh gon bets laa luu gbiire gwi stib.” Zigne sca

bnee me laa lo naa biac, gongagh naa me. ¹⁴ Dzigo nēchaa me lo naa: “Dios men ne biladz grē pxozgol ne, ib men co bzooblo luu gacnan luu pe nac mine racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co. ¹⁵ Ib laa me bzo luu tsienee luu lo miech mine bzhaac luu ga, mine bin luu ga. ¹⁶ Guso i sca, zeena chobnispagh luu. Dib zdoo luu bredz Jesús, bnab lo me csañmbe me luu lo xtol luu.”

¹⁷ Zeene laa naa blanso Jerusalén nu, tib dze lēetaque no naa yadoo nozodiidznie naa Dios, ¹⁸ tibaque blulo me lo naa nē me: “Na zeena biobladz brie Jerusalén nu, sac ib gliladz grē miech rii mine gnee luu zeene gnee luu xtidz naa lo zho.” ¹⁹ “Per runbey zho naa waa”, rep naa lo me, “nanpaa zho scataa ra naa grē yadoo raxizhoo naa grē miech ne rliladz luu, rnabey naa rguin zho zho ni rio zho ladzguiib, ²⁰ niicle zeene beet zho Xteb men ne bnee xtiidz luu ga, ye naa bdēd diidz beet zho me, haxta pquianaap naa xab grē zha ne bdeedquie me.” ²¹ Dzigo nē me lo naa: “Na zeena pcaaniob nēz brie nu, sac gon laa naa cxel luu stib dan tsienee luu xtidz naa lo grē menzit.”

²² Zeene bin zho sca rēb me bdeetraa zho diidz nee me, psilo zho nguiedz roptsie rnee zho:

—¡Ib rieguialdraa gban men qui! ¡Golnitlogagh me!

²³ Nguiedz zēeb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psēeb men rnabey co Pabl len yu co, ni bnabey me grē menguiib co quin zho Pabl, zeena cueero Pabl dien pe nac ncuaane been Pabl, zha nac ne scataa rac grē miech co lo Pabl. ²⁵ Laa zho blozhle pxidoo me, laa zho csilo quin me, zeene rēb me lo sti zha ne rnabey lo grē zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶ Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

²⁷ Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

²⁸ Rzedz yan men rnabey co rëb me:

—iNaasi zha Roma nac naa, ni nroob dimi bdizh naa bgab naa lo zha Roma!

Dzigo rëbcha Pabl:

—Sangue naa, desde gol naa bgab naa lo zha Roma.

²⁹ Grë zhaguiib ne bzo nguin Pabl ga parne cueero me, lëëlëd wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguin zho ti zha Roma.

Bnee Pabl lo wxtis Israel

³⁰ Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnan me dien pepaa nac ncuaane rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdo naa, Dios zobwi ganle zanaid naa ncuaane rdziguiend me.

² Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—iGolcap ro zha qui!

³ Dzigo rëbcha Pabl lo me:

—iTebaa squique cap Dios ro luu! iNac luu gon zig ti lidz nguts lox- aque nëz zhtisew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

⁴⁻⁵ Pquiabbe zha ne ndxie ga rëb zho:

—iBieñ ganle lo pxoz nroob i, lo men ne quiayun xtsiin Dios i no- quiabro luu!

—Golgun dispensar —rëb Pabl—. Nand naa lëe pxoz nroob i, tel niaca mine nan naaw ne scad naa; sac zhubnee lo Xtiidz Dios: “Gneenëd luu zha ne rnabey ladz luu.”

⁶ Zeene bieñ Pabl grol zha wxtis co zienal zhiwseed zha saducé, zgrol zho zienal zhiwseed zha farisé, dzigo psilo me nguiedz bnee me rëb me lo zho:

—iGrëse to bets, golgona ganle, zha farisé nac naa, niiclegaa pxoz naaw farisé goc me! iNi porne rliladzpaa naa gon zrieeban zha ne ret, min co gane znu zo naa lo to nu!

⁷ Zeene sca rëb Pabl, psilo zho bdildiidz zho. Goc zho chop dii, ⁸ rree zha saducé rnee nlid grieeban zha ne ret, nlid no anjl, nlid no espíritu; laa zha fariségaa na rnee zrieeban miech, no anjl ni no espíritu. ⁹ Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ini ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon men ne rnabey lo menguiib ga, laa lo xtil zho noyac nroobraa, bdzieb me rëb me nend znuse gzhiizh zho Pabl; bnabeyaue me gocredz menguiib güeyxi zho Pabl biire güesañ zho me len yu ne rbëz zho ga.

¹¹ Gol guieel co, blulo Dios lo Pabl rëb me:

—Gdziebd luu, zigne bnee luu xtidz naa lo miech Jerusalén nu, scaque none tsienee luuw lo grè zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsrää choo zha Israel bnediidz rëb zho gowd zho, ni tib ro peet guied zho haxta gut zho Pabl; telne gund zho minne rnee zho maase csiaabzi Dios zho. ¹⁴ Dzigo güey zho lo pxoz ne rnabey, lo grè zha ne nac zha non lo mengüedz, bzodiidz zho minne no guic zho ga, ni rëb zho:

¹⁵ —Nana gon, golnab lo men ne rnabey lo mengüiib cxeel me Pabl lo to gzhe, golquiaalo nora pe lozh yquiep to Pabl; laa no nsinle zioambiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lëälëd güey win yu ne rbëz mengüiib ga güeynie win diidz lo Pabl. ¹⁷ Dzigo bredz Pabl ti zha ne rnabey lo mengüiib co, rëb Pabl lo zho:

—Bzhigüiel güeynie mëed rii lo men ne rnabey to, sac laa win no tsienie ti diidz lo me.

¹⁸ Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzgüiib ga bñab lo naa guialnie naa win.

¹⁹ Dzigo bzhen men rnabey co nia win, güeynie me win stib nëz, bnabdiidz me lo win dien pe nac diidz ne zienie win lo me. ²⁰ Dzigo rëbchaa win:

—Laa zha Israel gon bnediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho nora pe yquiep zho me.

²¹ Bzhigüiel gliladz luu xtiidz zho, sac ndziibsrää choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa

zho gund min co maase gdzibdee Dios zho. Ible zun zhow, loxaque quiambëzse zho dien pe guiab luu.

²² Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lëälëd bredz men rnabey co chop zha ne zo lo mengüiib, rëb me:

—Laa zhagüiib gon none gree nagüieel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Nagüieelgazh, zig rlozh xtsee none gree zho nu; ²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinne to me lo gobernador Wech Cesarea.

²⁵⁻²⁶ Dzigo pqüiaa me ti guits ne güey zho gdziinne zho lo gobernador, rneew:

“¡Diuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho men qui zaatne zob luu i.

²⁷ ’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhagüiib güeyla me lo zho. ²⁸ Gocladz naa niacnan naa dien zha nacne rlëenie zho me, dzigo bñanie naa me lo zhiwxtis zho. ²⁹ Ga gon naa led ncuaane rnad rlëenie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzgüiib.

³⁰ Zeene gocnan naa laa palal zho bnediidz gut zho me, nacne bnabeyaque naa ziaadsan grë mengüiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me. ’Lëäd bii gdzieel ne sca dien.”

³¹ Zeene laa liu pcow, zig rlozh xtseew laa grë mengüiib co pcaanie

Pabl nêz; dib guieel bio zho nêz bdziñnie zho me guiedz Antípatris. ³² Biini liu, loxaque zha ne zob guay ga pcaa nêz zienie zho me Cesarea, laa grêraa menguiib co wbiire bdziñ Jerusalén stib.

³³ Zeene bdziñ zho Cesarea, bdeed zho guits ne zienie zho ga lo meñ ne nac gobernador, dzigo laa zho psañ Pabl ga.

³⁴ Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rêbcha Pabl lo me, zha Cilis nac Pabl.

³⁵ —Nasca —rêb me—, zeene laa zha ne rlêënie luu glanso nu, dzigo yquiaadiag naa dien zhapaa nac xtil to.

Dzigo bnabey me, pquianap menguiib Pabl zaatne nac leñ xyulow Herod.

24

Gocredz Pabl lo gobernador

Wech

¹ Zeene goc gaay ngbidza, laa Ananí meñ ne rnabey lo pxoz bdziñ ga, gza me blalaa zha ne nac zha non lo menguiidz Israel, zienie zho ti licenciad lê Tértulo; grê zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdziñ, psilo licenciad co bzeet me grê ncuaane rquiaqui zho Pabl, rêb me:

—Xquizhdoo luu goñ gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaane yquiin lo no noyũ luu. ³ Rzac zdoo now, tel pa lotaa zo no rsoladz no luu nac luu meñ ne rnabey no. ⁴ Nli nonguielda dziunneed no luu, per been ti guielnzaac pquiaadiag ganle pe nac ncuaane rlisqui no quiayũ mgui ne zo lo ne nu.

⁵ Masaque nac me lo no zig nac ti guielguidz dox ne rded, grêse

guiedz quianzê me noyũngüet me menladz no gacndaan zho lo meñ ne rnabey no. Lêe me ga zo lo grê zha ne rnee zho nazaren.

⁶ Zeene bgaa me, lêetaque laa me no leñ yadoo ro ne zob Jerusalén quiayũnguzee me xyadoo no. Nacne gocladz no gagazh nguizh me falt co zigne rnabey xley no; ⁷ per biaad Lisias grê xmenguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luu ganle nli quiayũ me grê miñe rnee no nu.

⁹ Grê zha Israel ne zianañ ga, pquiabbe zho rêb zho nli quiayũ me grê miñ co.

¹⁰ Dzigo blunia meñ ne nac gobernador ga lo Pabl gnee Pabl; nacne psilo Pabl bnee me rêb me:

—Nanle naa ziele iz zob luu nu rquiaadiag luu grê ncuaane rac xtan no nu, gane rley naa zial naa lo luu par yquiaadiaggaa luu ganle zha nac xtudz naa.

¹¹ 'Na rac tsiipchop ngbidz ga bdziñ naa Jerusalén, biagan naa Dios leñ yadoo roob ne zob ga (niicle tel niaca miñe griee diidz ganle). ¹² Laa naa bia Jerusalén biagan naa Dios, choot biatilnied naa ga; niicle leñ grêragaa yadoo wina, ro nêzgaaw, waltaa noquild naa miech cho lo gacntseeb zho. ¹³ Grêse miñe rquiaqui grê zha qui naa grielod glu zho nliw, sac led ncuaane gocda.

¹⁴ 'Miñe nac diidzli, niina wriin psañ Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanañ naaw, dib zdoo naa quiayũ naa dziin lo Dios meñ ne bliladz pxozgol no; ni scaquegaa, noxco naa grêse miñe nac ley. Riladz naa grêse miñe bnee grê zha ne biadteed xtiidz me. ¹⁵ Riladz naa zdziñ dze ne cueeban Dios grêse miech, zigtaa zha wena zigtagaa zha ntseeba, ni haxta zha ye zho riladz miñ

co. ¹⁶ Ni miñ copaa nagon gane tibaque noxco naa guiaanmbe zdoonaa, guntaldraa naa xtol naa zigtaa lo Diosa zigtagaa lo samiech naaw.

¹⁷ 'Nod naa Jerusalén tibaque, blale iz goc no naa ladz menzit; dze ne bdziñ naa Jerusalén ga, laa naa bia porne zasan ti gon lo menladz naa ni zanie naa ti gon ne gded naa lo Dios. ¹⁸ Miñ co nagon nacne no naa len yadoo zeene gon grè zha qui naa. Blozhle ben naa grè miñe rnabey xley no rdziuun no zeene sca riosan no gon, zeene laa bla zha Israel ne no nèz Asia blanso lo naa ga; per choot miech taf ndxieñied naa ga, niicle choot noquildgaa naa. ¹⁹ Zha co nagon rieguañ niaad nu, nlisqui zho tel pe ncuaañe rzac zho nonguield noyuu naa ga. ²⁰ Zha ne ndxieñaa nu niina, zac gnè zho telne brieequia falt ne rquiaqui zho naa zeene gocredz naa lo wxtis Jerusalén. ²¹ Te goon falt ga naye ben naa, lèe gdib nguietz bne naa lo zho rep naa: "Laa naa racredz lo to, zig nac zeene falt ga rap naa loxaque ne riladz naa zdziñ dze ne grieeban miech." Scase nagon naca.

²² Nanle gobernador co led ncuaañe guñd zha ne riladz Jesús ga rquiaqui zho Pabl, dzigo bnee me lo zho cuèz zho nieeda gdziñ Lisias, dzigo dien zhapaa guiaan xtil zho. ²³ Bnabey me zha ne zo lo menquiib yquianap zho Pabl, ni pso me diidz zaacse gac zho lo Pabl, gdeed zho diidz ted grè zha ne ndzieeldiidz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsiel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵ Zeene bzeettaa Pabl, zha nac guielwxtis, zha none tsoxco miech guñd zho miñe riaabtaa guic zho, ni zha gdziñ dze ne guñ Dios guielwxtis,

dzigotaa laa me bdzieb, rëbchaa me lo Pabl:

—jLèelewga na nadien! Na zeene guioba, dzigo naazhal cuetz luu guiaad luu ziodiidz ne stib.

²⁶ Zhiga zhiga rbedz me Pabl, sac quiambèz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguiib ga, laa Wech brieeguielgobnador, bzèeb ti men lè Pons Fest. Niicle brieeguiel Wech per psilaad me Pabl, sac racladz me dien zha guianñziuuraa me lo grè zha Israel.

25

Güeyo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgobnador, laa me brieegüey me Jerusalén.

² Grè zha pxoz non ni grè zha ne rnabey lo menguietz Israel, zeene bin zho laa Fest bdziñ Jerusalén lèlèd güey zho lo me güeyxob zho xdemand Pabl; ni ³ bñab zho lo me cxeel me Pabl Jerusalén. Laa zho rnab miñ co sac laa zho bñediidzle, nèz tsiesoblan zho, yquiambèz zho ted Pabl gut zho Pabl. ⁴⁻⁵ Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nèz co dzigo zac tsienal zho zhits me.

⁶ Ndziibsrää ti zhaml blèz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl. ⁷ Laa grè zha Israel ndxieñ ga, wbig zho lo Pabl ndal grè falt nroob ne rcaadz dol zho me, per loxaque diidzsew, guieñd zha glu zho ne nlipaa goca. ⁸ Dzigo pquiab Pabl rëb Pabl:

—Grètaa miñe rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardgaa

gacntseeb naa lo zhiwxtis zha Roma.

⁹ —¿Pe racladz gaa luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianziuu me lo grë zha Israel.

¹⁰ Dzigo rëbcha Pabl:

—¡Gad naa! ¡Nod pe nac ga naa ga, to rieguiäl gun guielwxtis rii! Benque nan wen luu ganle peet falt nzëebd naa lo zha Israel.

¹¹ Tel niaca mine nli ziyun naa pe guielntseeb ne raguial naa guet naa, maase guet naa. Per na nanaa naa ni ti ncuane rquiaqui zho naa i nlid, ¿pe nac dzigo cho co naa ladznia zho gut zho naa? Laa naa racladz, mazd golneedz diidz tibaque ga naa lo zhiwxtis nroob ne, men ne zob Roma.

¹² Dzigo bzodiidz Fest grë me men rac ne nacie me dziin; blozhse ga rëbcha me lo Pabl:

—Guiend rson sca. ¡Tel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmalä, laa rey Agrip grop wnaa ne lë Berenis bdzin Cesarea ga güeyquiaabdiuzh me Fest. ¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Leñ dze ne bii nac Wech dziin biab ti mgui ladzguiib nu, ¹⁵ laa leñ dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me.

¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nliidgaaw; ¹⁷ nacne biaad zho nu. Zna dze blanso zho, binigazh liu co bnabey naa gocredz me. ¹⁸ Tibaque ni naa bod no pe

ti falt nroob ne rquiaqui zho me, per zeene biaad zho yulow gon naa ¹⁹ lëe gdib tel zha nac grë ncuane rililadz zho min co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

²⁰ 'Zeene gon naa grë ncuane co rquiaqui zho me nli riend naa zha gon naa, dzigo rep naa lo me, telne racladz gaa me zac tsie me Jerusalén ga dien zha guiaan lo xtil zho. ²¹ Per bnëd me, leñ bnab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegash gnabey naa gacredz me.

²³ Biini liu, ti lni nroob ne rac laa Agrip ni Berenis bdzin leñ yu ne rac guielwxtis ga, grë zha non ne rnabey lo menguiib, grë zha non lo menguiiedz, nal zho zhits me. Dzigo bnabey Fest gocredz Pabl, zeene laa Pabl bdzin ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëe men rii nagon rlëeniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. ²⁵ Sangué naa gonle naa rapd me falt, par guiab ne rieguiäl guet me; per laa me bnab tsie me lo César, na laa naa no cxel me nëz co.

²⁶ 'Nli riend naa dien pe nac diidz ne cxel naa lo César, ne squi lega ncuane nlid rquiaqui zho me. Min co nagon bnabey naa gocredz me lo to nu, ni laga laa luu ziaad gaa nu rey Agrip, bzhiguiel pquiaadiag ganle zha rzë xtiidz me; zeena togo zdziel naa pe nac diidz ne cxel naa gal dze ne laa me tsie nëz co. ²⁷ ¡Sac

nonguield ga guṇ naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rēb rey Agrip lo Pabl, mezhald gnee dien zha naca. Nacne blis nia Pabl psilo Pabl bnee Pabl rēb Pabl:

²—Rley naa guṇ rey Agrip ne laa naa zial lo luu nadze, zeena gzodidz naa lo luu gacnaṇ luu ganle nliid grē ncuaane rquiaqui grē menladz naa naa. ³ Rley naa sac naṇ naa naṇpaa luu zha nac grē xcostumbr no, grē ncuaane rililadz no. jRnab naa lo luu sca, guieete luu yquiaadiag luu grē miṇe gne naa!

⁴ Grēse zha Israel naṇ wen zho ganle zha mban naa, sac mēēdlas naa bdziṇ naa Jerusalén, ga broob naa. ⁵ Naṇpaa zho zha farisé goc naa, ni zha farisé nac zha ne rioxcoraa ruṇ grēse miṇe rililadz zha Israel. ⁶ Per mazd guṇ, laa zho rlēē lo naa porne dib zdoo naa rililadz naa laa Dios beenle miṇe psan me diidz lo grē pxozgol no. ⁷ Grēse zha Israel, zigne ziaad zho lo gza tsiipchop dii ne psan xmenṅol no, grēse zho dze guieel bii quiambēz zho gac miṇ co. jMasaque rzac zho dol ga quiayun naa rililadz naa laaw gogle! ⁸ Haxta to, zeene rzet naa zrieeban miech, rzhidz to ron tow, ḷpe rzac to naa grieelod Dios guṇ me miṇ co?

⁹ Glo nli ptsidil naa grē zha ne rililadz Jesús meṇ Nazaret, masaque rzaac naa lēēw ga quiayun naa. ¹⁰ Pe zhidaa zha ne blo naa ladzguuib Jerusalén, haxta grē pxoz non bneedz diidz beṇ naa grē miṇ co; ni zeene rnabey zho ret grē zha co, ye naa rded diidz ret zho. ¹¹ Nzian grē yadoo win bia naa, biasacsi naa zho haxta gneenē zho Jesús. Blēēniedox naa zho, haxta grē guiedz zit bia naa biaguib naa zho.

¹² 'Miṇ copaa nagon brie naa za naa guiedz Damasc, masaque grē pxoz rnabey bneedz ti xtiidz zho bi naa laa naa za. ¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nēz zhan gbaa biab lo naa, ni lo grē zha ne zanie naa ga, nroobraa nac biini co lo xbiini ngbidz. ¹⁴ Grēse no biab liu, dzigo bin naa ti tsi meṇ co rnee me xtiidz no, bredz me naa nē me: "Saul, Saul, ḷpe nacne quianaṇ luu naa? Lēēque luu guṇ nosacsi luu i, rzac luu zigne rzac ngon ne rcaanni, ni lēēque lo guuib lots ne rtseb zho ma riecaanni ma." ¹⁵ Dzigo rep naa: "Been guieṇzaac bnē dien cho luu." Nēchaa meṇ co: "Naa nac Jesús, meṇ ne squi quiatsidil luu. ¹⁶ jNa zeena guche i, bzoli! Laa naa bredz luu zeena guṇ luu xtsin naa, tsiezodiidz luu lo miech miṇe blozh bzhaac luu nu, ni grēragaa miṇe naraa gan luu. ¹⁷ Peet tsienied guic luu, naa yquianaap luu, niicle zhaladz luuw niiclegaa zha zita peet grieelod guṇ zho luu. Sac laa naa cxel luu grē guiedz zit ¹⁸ tsienee luu lo miech gacnaṇ zho miṇe nacpaa diidzli, zeena greee zho lo ncow gbig zho nēz lo biini, greee zho ladznia mendox ygab zho lo Dios. Dib zdoo zho gliladz zho naa zeena guṇ Dios zho perdon, ni yгаа zho zaatne gdziṇ grēse zha ne mbe zdoo."

¹⁹ 'Miṇ co nagon rey Agrip nacne bioxco naa beṇ naa miṇe nē meṇ co lo naa ga. ²⁰ Glose Damasc psilo naa bne naa lo miech, ga brie naa bdziṇ naa Jerusalén, bia naa dib Judé ni grē guiedz zit, bne naa lo miech csaan zho grē xquieṇtseeb zho gbig zho lo Dios.

²¹ 'Miṇ co nagon nacne rlēēnie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa. ²² Gocniēn Dios naa, gane laa naa bii zo nu quiane naa Xtiidz me

zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela. ²³ Tej zha, bzeetle zho ib sacsi miech men ne cxeel Dios ga, ni me gac men ne glopaa grieaban, me gac zig ti biini ne gziini lo grëse miech, zigtaa zha Israela zigtagaa grë menzita.

²⁴ Tibaque nguiedz bnee Fest rëb me lo Pabl:

—jBod rzhinle guic luu gon Pabl! jNe tibaque nagon rio luu wseed gane squi riots xtiidz luu!

²⁵ —Coo, gobernador Fest —rëb Pabl—, led rzhind guic naa. Niapse mine nac diidzli min co none naa, ²⁶ laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanpaa naa nan me nli mine rnee naa, nacda ncuane goc ngeets zhli-aan. ²⁷ jLed nli lëë rey Agrip rililadz luu mine bzeet grë zha ne biadteed xtiidz Dios padzeela? Nanpaa naa rililadz luuw.

²⁸ Pquiab rey Agrip, rëb me lo Pabl:

—jZlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—jNend zhilew o nroobragaaw, per rnab naa lo Dios led loxaque ludse sëëb xnëz me, sinque ye grëraa zha ne noquiaadiag mine none naa nu niina; zeena yгаа to mine bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brieeg ga. ³¹ Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguuib.

³² —Niacpaa nsilaa ne me —rnee Agrip lo Fest—, telne nabd me tsieppaa me lo César.

27

Pxeel zho Pabl nëz Roma

¹ Bdzin dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo menguiib lë Jul, gza Pabl zlalaa zha ne no ladzguuib ga. Lëë Jul co rnabey lo tib dii menguiib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdzin guiedz Sidón. Zeene bdzin no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

⁴ Ga brieeg no bdieed no tib ro guidzliu win ne lë Chipr, psaac guidzliu co palal, sac psilo rriee me rtsire me barcw ne zio no ga. ⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdzin no ti guiedz ne ndxie xtan Licia lë Mira; ⁶ ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandri no grieeg ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigora bdzin no gax guiedz Gnid; ib rbëzdaque me, nacie bguuib zho dien pa nëz zhi rcaan me, dzigo güeynie zho barcw co nëz Cret. Tib ro guidzliu win co zio no bdieed no Salmon; ⁸ nen bdzin no zaatne rnee zho Buenos Puertos, gaxle ga riaan ti guiedz lë Lasé. ⁹ Nrooble dze goc no no lo nis, len dze co laa mëë nal psilole ni zëëb diidz gacd së barcw len mëë co, nacie bnee Pabl lo grë zha ne zienie no ga, ¹⁰ rëb me lo zho:

—Golgona ganle, telne laa ne grieeg no len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac mine rëb Pabl ga, leḷ mazdraa bliladz me xtiidz zha ne rsëë barcw ni men ne nac bizhuana. ¹² Stiba, zaatne nac Buenos Puertos ga rapda zaatne zaacse cuëz miech leḷ mēë naḷ, nacne nzian zho rëb mazd gdziḷ guiedz Fenice, ga zac gbiaaz no gdipse leḷ mēë naḷ. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu zi-aadquia psilo brieel no nis co, zootle na nli griedraa me. Nacne lēëlēd bnabey zho bziaab no barcw, blis-glaa zho lar nroob ne rcaan me rzëw, laa no zio, gax gax ro guidzliu co zienie zhow. ¹⁴ Zhisaque goca zeene laa ti me dox ne rnee zho Nordest psilo brieel, laa me co psilo rtsire barcw. ¹⁵ Niicle racladz zho tsienie zhow nēz ne no guio no ga, per rsaand me; gonse zho led ncuuaane gacda, mazd psaan zho zienie mew nēz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lē Clauda, ga nē nē brieelo blis zho grē canó win ne naḷ zhits barcw ga bzëëba nēz leḷ barcw; ¹⁷ dzigo blibdoo zho barcw co zeena gbilda, ni blit zho lar nroob ne rcaan me rzëw, sac rdzieb zho rëb zho telne scaquia lar co nend tsieniezho mew nēz ro nis, pa tsiesobnagwa lo yuzh.

¹⁸ Zeene biini sti liu co mazdraa rrieel me, ni guieuxo ne ziaadnie me, nacne blee zho grē yo ne no leḷ barcw blaal zhow lo nis. ¹⁹ Goc biōn ngbidz scataa zo guie dox co, bnabeyaque zho blee no grēse ncuuaane runxtsiin zho leḷ barcw blaal now lo nis.

²⁰ Goc bla ngbidza rbëzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. ²¹ Niicle wagw choot rsoladzdraa, dzigo bnee Pabl lo grē zha ne ziogrē no ga, rëb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grē ncuuaane nodzian ne nu, niicle nlaaldga ne grē yo co lo nis. ²² Per laa ne znule bzhiaac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd. ²³ Led nanle to ganle, xnēz Dios no naa ni xtsiin me noyun naa, nieewdze pxeel me ti xanjl me ²⁴ nē lo naa: “Gdziebd luu gon Pabl, peet gacd luu, sac ib none laa luu gdziḷ lo rey ne zob Rona. Niicle grē zha ne ziadgrëe luu leḷ barcw i peet gacd zho, sac bin me mine rnab luu.” ²⁵ Gane rne naa lo to peet tsienied guic to, nanle naa csaand Dios ne, ible zac mine nē anjl co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nēzrii nēzrec zienie me no, laa no no lo Nisdoo Adriático. Wdze co, zig grol guieela, bien grē zha ne rsëë barcw ga gaxle ti ro guidzliu ga nonie barcw no; ²⁸ dzigo ptiix zho dien palal guiet nis ga, gon zho loxaque gal yas guieta. Bzë zho spalal biire ptiix zhow stib, gale guieta loxaque tsiiptib yas. ²⁹ Gataa laa zho bdzieb rëb zho nend pa tsiecaan barcw lo quie, dzigo psilëe zho lo doo ne zob gza tap guiib cruz nroob ne quia nēz zhits barcw, bron zho gza guiib co lo nis, zeena tsowga sē barcw; rzac zho tebaa laa liu biinile.

³⁰ Grē zha ne run dziin leḷ barcw, gocladz zho nzhoon zho, psilo zho noxadz zho grē canó win ne ney barcw, rquiaalo zho zig nac zeene guiib cruz nroob ne ney barcw nēz quiaaw quialit zho csëëb zho leḷ nis. ³¹ Zeene gon Pabla, rëbcha me lo Jul ni lo grē xmenGUIIB Jul:

—¡Laa grē zha rii gon racladz xoon! Csaande to, sac telne laa zho xoon nlidraa grieequia to lo nis rii.

³² Dzigo pchug grē menGUIIB co doo ne zob grē canó win co, bron

zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rëb Pabl:

—iNone gow to! Golwi ganle nale gac tsiin ngbidz ga ni ti lë peet gard gow to, ni squique raguiesde to zacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen Pabl ti quietxtil, squi ndxie zho grë zho bdeed me xquizh lo Dios, dzigo beengrol me quietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grë no zig zio no len barcw co rgaa no chop gayoo tsongaltsiimtib.

³⁸ Blozhse bdioow no, dzigo laa zho blee grë zhoobxtil ne zie len barcw ga blaal zhow lo nis, zeena gnitnë barcw spalal. ³⁹ Zeene laa liu blozh biini, gon grë zha ne rsëe barcw ga laa ti lë ro guidzliu rlu gax ga, per riend zho dien paw. Natlaa nac ro guidzliu co, rlu zac gdzin barcwa, nacne rëb zho dien pe grielod gdzinie zho barcw ga. ⁴⁰ Dzigo pchug zho doo ne zob guuib cruz nroob ne no len nis ga, biaanse guuib co ga. Psilëe zho doo ne naaz yag nlag ne rchug nis rzë barcw, ni blisglaa zho lar nroob ne rcaan me rzëw; zeena csëe mew gdzina gax ro guidzliu co.

⁴¹ Per ziese zho, lëetse lo yuzh ne zobli len nis co güeytsiba, loxaque güeysëebguica ga laa nëz zhitsa psilo nobilaque, sac grëse nis ne rias riecaan choo co. ⁴² Dzigotaa laa grë menguib co gocladz niut grë zha ne zie ga guey ladzguuib, rëb zho nend znuse xoobnis zho xoon zho. ⁴³ Per bdeete men ne rnabey lo zho diidz, sac racladz me gut zho Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co; ⁴⁴ laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

28

Blëz zho Malt

¹ Zeene bdzin no ga, dzigoraa gocndion no lëe guidzliu win ne lë Malt ga. ² Grë miech ne no ga pquiadox zdoo zho no, bzëeg zho gui bredz zho no bdzëe no, sac lala rac nal ni scataque bgaa no guie.

³ Ye Pabl güey güeytop chop lë yag ne cuib lo gui. Lëetaaque laa me nodziiba lo gui, tibaque bias ti meel ne zizhoon lo zhindzëe gui co, pquiaalay ma nia me, quiataque ma ga. ⁴ Grë miech ne no ga, zeene gon zhow rneechaa zho:

—iSe nagon rlu, nzëeb men qui ngutoo! Niicle blaa me lo nisdo, per no guielwxtis ne quianab guet me.

⁵ Znuse bdzib Pabl nia me bron me meel co lo gui. ⁶ Grëse zho rwi quiambëz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lë liun men ne rnabey lo guidzliu win co lë Publ, dzigo bneedz me zaatne bli-aaz no ga tson ngbidz ni bneedz me ncuaane bdioow no.

⁸ Lëetaaque len dze co laa pxoz me nix rlan xlëe ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹ Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho. ¹⁰ Dzigo rleynie zho no, nroob grë ncuaane bgad zho lo no. Zeene gol dze ne laa no wbii ga, scasaque nroob ncuaane yquiin no nëz bneedz zho.

¹¹ Tson mëe bliiaz no lo guidzliu co, dzigo laa no briece ga bziaab no ti len xbarcw zha Alejandrí, ti barcw ne blëz ga dipse len mëe nal co. Guic barcw co quia chop mdio, mdio ne rnee zho Cástor ni

mdio ne rnee zho Pólux. ¹² Bdzin no guiedz Siracús, ga bliaaz no tson ngbidz. ¹³ Siracús brie no, gax gax ro guidzliu zio no bdzin no guiedz Regio; biini liu ine zhoob ti me ne ziaadquia lo nis co, dzigo laa no brie Regio laa no zio. Biiniraa sti liu bdzin no guiedz Puteoli, ¹⁴ ga bdzin no lo blalaa zha ne rliladz Jesús. Bnab zho lo no gbiaaz no, nacne bliaazaque no lo zho ga ti zhma. Garaa brie no bdzin no Roma.

¹⁵ Grë zha ne rliladzle Jesús Roma, zeene bin zho laa no gdzin ga, brie zho biaad-xinèz zho no. Zhis zho biaddzieel no zaatne lè Foro de Apio, szhis zho biaad zaatne lè Tres Tabernas. Zeene gon Pabl scataa biaad-xinèz zho no, rley me rdeed me xquizh lo Dios.

Bdzin Pabl Roma

¹⁶ Zeene bdzin no lad guiedz Roma, bdeed zho diidz Pablzhal bguib ti yu ne blèz me grop me menguiib ne quianap me, blood zho me ladzguuib.

¹⁷ Goc tson ngbidz bdzin no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbcha me lo zho:

—Laa naa bredz to nu gon bets, gacnan to ganle laa grë zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditd naa. ¹⁸ Niicle wxtisgaaw, blozhse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

¹⁹ 'Per zeene gon naa néd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho. ²⁰ Wen ne laa naa beenbey to nagon, ni beenbeyga to naa; gacnan to sca

ganle laa caden rii zob nia naa, per nacda por pe falt ne rap naa, sinque laaw zob nia naa porne rliladz naa laa Dios pxeelle men ne quiambèz menladz ne ga.

²¹ Dzigo pquiab zho rëb zho lo Pabl:

—jWlaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyun pe guie^lntseeb. ²² Per na laga laa luu ziaad nu, siguiel luu sodiidz luu lo no dien zhapaa nac wseed ne rliladz luu i, sac blactaa zidzion no, zaatne notaa zha ne rliladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbèz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lèele men ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosa. Dipse dze sca bzodiidznie me zho grë min co.

²⁴ Brieequia bla zha ne bliladz grë mine bnee me ga, ni scaquegaa brieequia zha ne bliladzda. ²⁵ Grë zha ne riod zdoo mine rnee me ga, laa zho psilo noriee, nacne rëb me:

—Iblëepaa mine nac to i ga nagon bzeet Espiritu Sant, zeene psiaab me guic profet Isá znu rëb Isá ²⁶ lo grë xmengol to:

Niicle peraa gon to, niicle peraa gan to,

per peet guiende to;

²⁷ sac gocntseeb zdoo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcodgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiaagaz lo grë

miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëe zho, nodildiidzlsa zho laa zho zey.]

³⁰ Dipse leñ chop iz blëz Pabl ga, ga bree me ti leñ yu ne bio me. Ga rdziñ grë miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse leñ dze co, ib biod zha ne ntsidil pe nacre sca noseed me miech.

GUILTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³ Lëew ga rnee ganle cho nac Jesús (men ne brieequia lo xtiirey David ne laa me goc miech lo guidzliu; ⁴ sangue Espíritu Sant, pxobnen me ganle Xpëed Dios nac me; min co gane brieegan me).

⁵ Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleyne Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze, ni Jesús men ne rnabey, tibaque noxco me to, me nac men ne gacnien to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nliipaa dib zdoo to riladz to me. Me zobwi, me nan ganle zeene

rnabtaa naa lo me, ib riaanladz naa to, tibaque rnab naa lo me gacnien me to; ¹⁰ ni tibaque rnab naa telne zneedz me diidz gdziñ tib dze ne grieelo guial naa i guialgan naa to. ¹¹ Ne nliipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espíritu Sant; zeena tistique gac guic to dziitsraa so to. ¹² Ni scagaa tipse gac ne ziodiizd ne zha nac Xtiidz Ndzon Dios, mine riladz ne; zeena tipse gac ne sodziits ne low.

¹³ Bets, bzian, tel gan to ganle blactaa vuel ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴ Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëga zha ne peet rienda. ¹⁵ Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladz naa gne naa Diidz Ndzon rii lo miech, sac ncuuan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdzina, laa niina laaw quiazziñ lo grëraa miech, zeena grëse zho gbig sëeb xnëz Dios. ¹⁷ Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire riaanwen zho lo me: totsaque nli dib zdoo zho gliladz zho mine nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho riladz zho mine nac Xtiidz me.”

Xtol miech

¹⁸ Ndiõle ne ganle no guielnë ne csiaab Dios yгаа grëse miech ntseeb, miech ne nëd gac-wen, ni desde gbaa cxeel me guielnë ne yгаа zho; sac por xquielntseeb zho rsaand zho gacnan grëraa miech miñe nac diidzli.

¹⁹ Grë zha ntseeb, nanle zho zha nac Dios, sac mezhal blu lo miech zha grielo gunbey zho me. ²⁰ Niicle ne grielod ganlo ne Dios, per de lo grëtaa ncuaane bzaa me, grëtaa ncuaane run me, gase rlu ganle cho nac me. ¡Gase rlu ne nli me nac Dios, ni gdziñd dze ne lozh xpoder me!

Gacxe waa grë zha ntseeb, ib tedlaad zho lo guielnë ne csiaab me ga; ²¹ sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuaane guiaabtaa guic zho. ²² Niicle ne rzac zho zharien zharac nac zho, per zha nac miech ne qialoozhraa lo xquielnxen; ²³ sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaan co ziegan zho laa ne gleynie zho men ne nacpaa Dios.

²⁴ Miñcocxe nagon waa, rsaanladz Dios zho laa zho zienal grë ncuaane ndzinlid ne rzoobladztaa zho. Grë ncuaane ntoladzdox ne run zho, lëeque zha runnguzee zho rguitnie zho xcuerp zho. ²⁵ Sac laa ne gleynie zho diidzli miñe rnabey Dios, lel miñe rnee zha ne rquidie rleynie zho; lel grë ncuaane bzaale Dios, ncuaane psanle me, ncuaan co ziegan zho, lo grë ncuaan co

zieuquitsgzhib zho; laa ne yquitsgzhib zho, gleynie zho men ne nac Dios mban, men ndzon ne psan grëtaa ncuaane no. ¡Diosse rieguial gunnon miech, men co rieguial tibaque goolnie zho! Sca rieguiala.

²⁶ Ne sca nagon nac zho, gane psaan Dios zho laa zho run grë guilyozh, ncuaane ngubeeguelto ne rieguialdraa gun miech. Grë wnaa laa ne gdeed zho diidz gnee tsieel zho lo zho, lel lëeque sawnaa zho rquiangob zho, laa zho zienal grëraa guilyozh; ²⁷ grëгаа mgui, laa ne gnee zho lo wnaa ne nac tsieel zho zigne biaan no gaca, lel lëeque sabgui zho rzoobladz zho. Ncuaane mbixladz run zho, rquiangob zho lëeque sabgui zho; ni ne sca run zho grë ncuaan co, lëe miñe rdziniaa zho nac grë guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoli-aadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, miñ co ne scataa nac zho. ²⁹ Nroobdoo nac xtol zho, sac:

rsacsixuu zho samiech zho, rzoobladz zho ncuaane quianied zho,

racntseeb zho lo samiech zho, në rac zdoo zho ran zho stib noded samiech zho,

rut zho samiech zho, rtsidil zho samiech zho, rquidie zho samiech zho, rquiadiidzguizh zho samiech zho, miech yozh nac zho,

³⁰ rneenë zho samiech zho, rquiabro zho lo samiech zho, racniats zho lo samiech zho, rlu zho ncuaane rapd zho, ncuaane nacd zho;

rlëenie zho Dios, rio zho rbeebey zho grë guielntseeb, rond zho xtiidz pxoz zho, rond zho xtiidz xniaa zho,

³¹ racladz zho gon zho diidz, rund zho miñe rnee zho,

rleynied zho samiech zho, rund zho samiech zho perdon, rquiad zdoos zho samiech zho.

³² Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiayuna, ni haxta rley zho ran zho cho grëraa zha ne run grë mine run zho.

2

Xquielwxtis Dios

¹ Ib tedsod no to gnë: “iZha ntseebtaa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguial zha co yгаа zho guielnë ne csiaab Dios, ye zho rieguial min co. ² Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

³ Zha ne sca rlozhd gzee zdoos pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoos zho gban zho zigne rnabey me. ⁵ Telne tibaque squi ndip gac zdoos zho, gond zho mine rnabey me; gacnan zho ganle, quiayunloraa zho grë guielnëdox ne yгаа zho gal dze ne laa me gun guielwxtis. Ni xquielwxtissi me, zigne rieguial gaca sca gun mew.

⁶ Gal dze co, laa me gdeed mine rieguial yгаа tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë

ncuaane rnitlo, lo zha co gdeed me tib guielmban ne gdzind dze lozh. ⁸ Sanguë grë zha ne güeynal lox- aque grë zhixco zho, güeynal zho grë guielntseeb, laa ne nienal zho mine nac diidzli; zha co yгаа grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа zho tib guielnëdox; ¹⁰ sanguë grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grëse zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoos zho, guic zho, nanpaa zho pa min nac guielntseeb, pa mingaa nac guielwen. Rrie- quiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniala ne, sinque none gban new.

¹⁶ Zdzin tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeets zhlian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaas to xley Moisés, niats rac to, rzac to tose non lo Dios. ¹⁸ Nanwen to zha racladz Dios gban to, nanpaa to pa min wen sac pseed to xley me. ¹⁹ Min co masaque rzac to to cseed zha ne no lo ncow, grë

zha ngoopdoḷ. ²⁰ Masaque rzac to to rienṛaa zha cseed to grē zha ne peet gacḁ, to rienṛaa zha quixbiini to grē zha ne peet rienḁ; sac rzac to ne naṅ to ley, tose nac zha ne ndziibraa nixbiini, tose naṅ miṅe nacpaa diidzli.

²¹ Nana, tel scataa rien to zha cseed to stib miech, ḁpe nac dzigo rwide to miṅe ruṅ to?

Conque to name rnee lo miech cuand zho, ni rlozh ga toque quia-ban. ²² Rseed to miech rnee to, tib zha ne nole tsieel, nodne yquian-gob zho stib zha ne led tsieeld zho; ni rlozh ga toque noyuu miṅ co. Rnee to, rdziguiende to grē mdio, ni rio to rieban to yadoo ne zob grē mdio co.

²³ Rlozhd gacniats to rzac to quiayunnon to lē Dios ne naṅ to ley, ni naṅde to goṅ, lel quiaguṅnie to lē me ga, sac mbande to zigne nac ley. ²⁴ Miṅe noyunpaa to i ga goṅ raquiet lo Xtiidz Dios, zaatne rnee: “Por xtoḷ to, grē zha zit laa zho rneenē Dios.”

²⁵ Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grē zha zit ne ruṅbeyda. ²⁶ Nana, zha zit ne rioxco rban zigne nac xley me, ḁniacxe rieguiald dzigo guianṅziuu zho lo Dios? Saṅziuu me zho goṅ. ²⁷ Golgacnaṅ sca ganle, glole zha zit co goṅ guianṅziuu lo Dios, lēdle to ne naṅpaa to zha racladz Dios gban to, naṅpaa to miṅe psan Dios diidz ygaa to, ni rbande to zigne rnabey me.

²⁸ Golgacnaṅ sca ganle, led porne nacdse to zhin zha Israel, porne bio to xbey zho, laa to nziuuḷe lo Dios. ²⁹ Led scada goṅ, sinque zha ne nli dib zdoo rioxco miṅe rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grēse zha ne znu

nac, nziuu zho lo Dios, niicle telne rzac to peet nond zho.

3

¹ Nana, ḁpa lugar nadien ne ri-aanṅon zha Israel lo grēraa zha stib guiedz? ḁPa rquiin ne scataa rio zho bey? Zootle lēē lalaquew tel niaca miṅe niacd zho zha Israel. ² Per led scada, no pe nacne non zho. Sac goṅ, ible lo zho psan Dios xtiidz me mazd padzeela.

³ Nli ndal zho rond xtiidz me, per led miṅcod ctsēē me xtiidz me, miṅe bneele me lo zho. ⁴ Niicxe tel zharaa quiayunctal miech xtoḷ zho, sangue Dios ctsēē me xtiidz me. Zigne zhozneque lo Xtiidz me, zaatne rnee: “Miṅe rnee Dios, diidzli naca; niicle zha ne gacladz, guienḁ pe ncuaaṅe glisqui zho lo me.”

⁵ Sca nac Dios, gacxe waa rnee me grēse zha ne ruṅctal xtoḷ, rieguiald ygaa zho guielṅē ne cxeel me. Ga nagon, rlu ne miṅe nac diidzli, miṅ co ruṅ me. Nana, ḁpe ziaḁ ne nonguield miṅe ruṅ me ga? ⁶ Miṅe nonguiel ga goṅ ruṅ me, sac tel gdziguien me grē zha ne ruṅctal xtoḷ, ḁzha naczhe guielḁxtis ne dzigo guṅ me?

⁷ Nana, nogaa zho gnē, ḁper pe nacne glisqui Dios doḷ ne rdziuuṅ ne, ni tel por lēēw rlu ne diidzli nac miṅe ruṅ me? ⁸ Per telne sca naca, rriequia dzigo ib none guṅctal ne xtoḷ ne parne yquiaraa zdoo me ne. Ni nzian zha ne nobee xquielto naa, rnee zho ib miṅ co noseed naa miech. Ni zha ne sca rnee, ib ted-laad zho lo guielṅēdox ne rieguiald zho.

Grēse miech, ngoopdoḷ nac zho

⁹ Nana, ḁpe dzdieets ne dzigo ne nac ne zha Israel, nziuuraa ne lo grēraa miech stib guiedz? ḁLed scada goṅ! Niina blozh bzeet naa lo to, grēse ne ngoopdoḷ nac ne, zigtaa zha Israela, zigtagaa zha stib

guiedza. ¹⁰ Zigne zhubneeque lo Xtiidz Dios, zaatne rnee:

¡Guiend miech ne zienal_{paa} miñe racladz Dios!
¡Ni tib zho guiend!

¹¹ Guiend zha ne niini guic;
guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho;

niapse guiend_{ntseeb} zienal zho.
¡Guiend zha ne zienal_{miñe} racladz Dios!

¡Ni tib zho guiend!

¹³ Ro zhow,

masaque been_{cu}ent naca zig nac len_{grë} baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,
masaque naca zig nac xvenen grë meel_{dox};

¹⁴ niapse grë diidz dox, niapse grë diidznë rrieche ro zho.

¹⁵ Ni zhow,

masaque zombëzlew dien_{pa} tsiegut zho samiech zho;

¹⁶ loxaque guielnë, loxaque guielnzi rsañ zho zaatne rded zho.

¹⁷ Ib nañd zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guielnëdox ne ygaa grë zha ne runbey ley ni mband zho zigne naca, lel_{run} zho grëtaa guiend_{ntseeb} zig nac grë miñe goquiet nu. Ni niicle grëraa miech ne runbeyd ley, scaque ngoopdoñ_{pac} zho, ni ro zho guiend_{pe} guiab zho lo Dios. ²⁰ Golgañ sca ganle, grielod guiaanmbe ne lo Dios, niicle paraa yquia ne guñ ne miñe rnee ley; sinque par_{guien} ne ganle ne ngoopdoñ_{pac} nac ne, gane biaan ley.

Silaa Dios miech zeene gnalo zho me

²¹ Sañgue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne

pquiaa zha ne biadteed Xtiidz Dios padzeela, ga raquieta. ²² Grëse

miech tel_{chotaa} nac zho, tel_{petaa} been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdoñ_{pac} nac ne lo Dios, ni palal rdzieeld gdziñ ne lo xquielndzon me. ²⁴ Per niina laa

me blu ganle pa lotaa noxco me ne, gola zdoo me pxeel_{me} Jesús bdiizh grëse xtol_{ne}, laa ne biaanwen lo me. ²⁵ Laa me been_{miñ} co parne

glu run_{me} guieln_{wxtis}, sac niicle bdizhd ne xtol_{ne}, per pxeel_{me} me tib men_{ne} bzhee xchen bdiizha

xcuent ne, lëë men_{co} nac Jesús; gane niina grëse zha ne gnalo men_{co}, zuñ me zho perdon grëtaa doñ

ne pxecw me been zho. ²⁶ Ni tib doñ rapd me, ni scaque grë zha ne dib zdoo gnalo Jesús, sañmbe me

zho lo xtol_{zho}.

²⁷ Sca nagon_{psilaa} Dios ne lo doñ. ¿Cho nadien_{gacniats} ga? Ni tib choot gacd gacniats,

sac led por miñe bdziuund new, sinque por grëtaa miñe bded Jesús.

²⁸ Gocndion_{ne} sca ganle: Niapse por dib zdoo miech gliladz zho Jesús, laa Dios ycaania zho; nacda

por tso zho guñ zho miñe rnabey ley.

²⁹ Nana, ¿pe zha Israelse sca ycaania me? ¡Lëda gon! Grëse miech, sca ycaania me zho. ³⁰ Sac

gon_{tibeyse} ran_{Dios} ne grëse ne; zigtaa zha Israela, zigtagaa zha stib

guiedza, sañmbe me ne lo grë xtol_{ne}, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhow? Niinale ne znu dib

zdoo ne rliadz ne Jesús, rienraa ne pa rquiina.

4

Dib zdoos Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guielwen ne been mew? ¡Lêda! Telne scaw, nrieelo niacniats me (niicle ne nêz lo Dios ni palal rieguiald niacniats me). ³ Sac gon rnee lo Xtiidz Dios, ne dib zdoos me bliladz me Dios gane pcaania Dios me zig tib zha ne peet xtold.

⁴ Zig nac tib zha ne run dziin, dimi ne razh zho ible rieguiald zhow, rate zhow ga. ⁵ Sangue Dios zdoos me ral rcaania me miech, zha ne dib zdoos rnalo me, nacda por pe guielwen ne gun zho par guiab ne laa zho rieguiala. ⁶ Ye rey David bzeet guielbley ro ne rgaa zha ne sca rcaania Dios, ⁷ rêb David:

¡Wen zie zha ne run Dios perdon!
Niicle nroob guielntseeb ne been zho;
tel pe nactaa xtold zho, glisquidraa mew.

⁸ ¡Wen zie zho sac gunquizhdraa me zho grê xtold zho!

⁹ Nana, ¿pe loxaque grê zha ne nose bey zrieelo ygaa guielbley co, te ye grê zha ne noda ye? Nacda por bey, laa ne blozh bzeet ganle niapse ne dib zdoos Abraham bnalo me Dios, min co ne pcaania Dios me zig tib zha ne peet xtold; ¹⁰ sac gon gard pe bey ne tso me zeene pcaania Dios me. ¹¹ Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoos me bnalo me Dios. Mincoxe waa, Abraham nac dad lo grêse zha ne nod bey, ni dib zdoos zho rnalo zho Dios; ni scagaa Dios, rcaania me zho zig tib zha ne peet xtold. ¹² Ni meque nac dad lo grê zha ne no bey ni dib zdoos zho rnalo zho Dios, zigne bnalo me Dios zeene gard tso me bey co.

Zha goc mine bnee Dios lo Abraham

¹³ Psanle Dios diidz lo Abraham ne me guiaan nie guidzliu, grê me zha ne grieequiaraa lo xti me; guiabd ne togo porne been me mine nac xley zha Israela, sinque ne dib zdoos me bnalo me Dios. ¹⁴ Nana, tel niaca zha ne gunse mine nac ley, zha cose ygaa min co, rrieequia dzigo zhlêse ga bnalo Abraham Dios, niicle diidz ne psan Dios lo me ga, nondaquew. ¹⁵ Sac nac ley gon, zha ne gunda zigne naca, laa Dios csiaabzi zho; laa zatne guie ndgaa ley, gacd guiab zho cho noguiitsa.

¹⁶ Ne scacxe waa nac ley, gane niina lêse mine no gun ne nac dib zdoos ne gnalo ne Dios par ygaa ne mine psanle me diidz ga. Grêse ne ygaa min co, per nacdraaw dien cho zienal ley, cho zienaldgaaw, sac mine nonraa, dib zdoos ne gnalo ne Dios zigne bnalo Abraham me. Mincoxe waa, rrieequia Abraham nac pxoz ne grêse ne, ¹⁷ zigne rêb Dios lo Abraham: “Laa naa bzo luu, luu gac dad lo nzian dii miech.” ¡Lêe Dios co nagon bliladz Abraham, me rbeeban grê mengut, ni niicle haxta grê ncuaane guie nd, saa mew!

¹⁸ Ndaldox rêb Dios gac lo xti Abraham, ni bliladz Abraham mine rêb Dios ga. Niicle ne zootle led ncuaane gacda, per me dib zdoos me bliladz me ne zaca, ni scagaa bdzi dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsiel me Sar, nacd me wnaa ne gap mêed. ²⁰ Ib goc chopd guic me niab me bod nliid niac mine bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹ sac nanpaa me men nroob nac Dios zun me mine psan me diidz ga. ²² Ne sca nagon dib zdoos me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw

zhobnee zeena gacndion ne ²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne; ²⁵ men ne gut ga bdiizh me xtol ne, men ne brieaban ga, par glu me nli psanmbe me ne nez lo Dios.

5

Jesús rsanmbe miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, men ndzon ne rnabey ne. ² Sac por grëtaa mine bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

³ Ni scaquega nagon none gley ne zeene pe guielne ne nodzian ne; sac ndion ne ganle, ga cseed ne leb ne dziits so ne lo mine rililadz ne. ⁴ Ni zeene sca dziits so ne, zililadzraa ne dib zdoo ne; ni zeene dib zdoo ne rililadz ne, zacnanpaa ne ib zgaa ne mine rililadz ne. ⁵ Ni ndionpaa ne zgaa new, sac blu Dios rleynie me ne, pxeel me Espiritu Sant nacie ne.

⁶ Lëëtaaque zeene rdziieldraa miech zha gun zho par guiaanmbe zho lo dol, hor co laa Dios pxeel Jesús, biaad me gut me bdiizh me xtol ne nac ne miech ngoopdol.

⁷ Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha. ⁸ Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëed me Jesús, men co bleeladz xquielmban gut me xcuent ne.

⁹⁻¹⁰ Gotsaa gwi ne ganle, zha nactaa guielne ne bded Jesús psanmbe me ne lo xtol ne, psanwen me ne lo Dios; ni scaque nagon, ible me csilaa ne lo grëtaa guielnedox ne csiaab Dios ygaa grë miech ntseeb. Ne

nligaa, csaand me dzian ne guielne co; sac gon, tel scataa mine been me por ne zeene nac ne tib miech ngoopdol, zeene scataa ntseeb goc ne blëënie ne Dios, zpe lel na dzigo ne laa ne biaanwenle lo Dios, laa ne biaanle zig tib zha ne peet xtold? ¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacie biaan dol

¹² Znu gon nacie laa dol biaan: por mine been Adán bind me xtiidz Dios, min co nac ne biana. Ni por lëew pquiaqui laa guielgut bianaque, blozh ga grëse miech laa zho ret, sac grëse zho, tsod zha ne gunctald xtol. ¹³ Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guienpaa tib ley hor co nlu ne dola. ¹⁴ Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielne ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lëe men co nac Jesús. ¹⁶ Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtol ne, psanwen me ne lo Dios. ¹⁷ Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sangue niina ne biaad Jesús, zrieelo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon. ¹⁸ Sca nagon naca: por falt ne been Adán ga, grëse ne ne nac

ne miech laa ne biabzi, per zeene laa Jesús baaad, pquia zdo me ne masaque me bdiizh grése caxtigw ne riogua! ne ga, laa me psanwen ne lo Dios parne grielo ygaa ne tib guielmban ndzon. ¹⁹ Golgan ganle, porne bdiits Adán xtiidz Dios, grése ne ne nac miech laa ne goc zha ngoopdol; per scagaa, por bzoob Jesús grése xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac grè falt ne noyun miech lo Dios. Per niicle scataa nac grè dol co, per blu Dios ganle mazdraa rquia zdo me miech. ²¹ Masaque bnabey dol miech, px-eela zho nêz ne nitlo zho; sangue zeene laa Jesús baaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ðpe zdzieets ne dziuunctalraa ne xtol ne zeena tsoxcoraa me ne? ² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nêz lo dol.

³ Golgan ganle, zeene laa ne bzi-aab xnêz Jesús ni brobnis ne, rrieequia gut ne ga zigne gut me. ⁴ Zeene brobnis ne rrieequia bioliu ne ga, zigne bioliu Jesús. Ni zigne brieeban Jesús (por poder ndzon ne rap Dios), scaque ne rrieequia brieeban ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieeban me. ⁶ Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; ⁷ sac gon,

deque bnitlo grè mine goc ne glo, grielodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieeban Jesús, ni gdziñdraa dze guet me. Grielo-draa pe gun guielgut me.

¹⁰ Tibaque vuelte gut me bdiizh me xtol grése miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp beñ to i, tso to gun to grè ncuaane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grè guielntseeb; sinque golgan to ladznia Dios, ine golgun grè mine racladz me. Golguien ganle, laa to gutle lo grè dol, Diosle mbannie to niina; ¹⁴ zeena scagaa gnabey-draa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to baaadsilaa me to.

Nli nquialadz Dios ne, rnabey-draa ley ne. ¹⁵ Per nana, ðpe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaane gunctal xtol ne? ¡Lëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gochna to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladznia dol, laa to bgab lo Dios; zeena mine

rnabeyle me miñcole guñ to. ¹⁹Znu bzet naa grë miñ rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsañ to ladznia Dios, golban zigne rnabey me, zeena lozh guiaanmbe to zigne racladz me. ²⁰Zeene scataa ngadoo to lo dol, ib wbande to zigne rnabey me.

²¹¿Pe nadien needz dol lo to? Lëe gdib miñe ngaa to laa to nitlo. Zig nac niina, haxta rtoladz to zeene rsoladz to grë ncuaane been to hor co. ²²Sangue niina, ne laa to brieelle ladznia dol laa to ngab lo Dios, ible ziaanmbe to zigne racladz me ni zgaa to tib guielmban ne gdzind dze lozh.

²³Sac gon, zha ne runctal xtol, lëe gdib miñe tsieguial zho laa zho nitlo; sangue zha ne gbig lo Jesús, miñe ral zdoo Dios ygad me lo zho nac tib guielmban ne gdzindraa dze lozh.

7

¹Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

²Zig nac tib mgui ne rtsieel-
nia, rnabey ley ne mguise gbannie wnaa ne nac tsieel mgui. Per tel gzoob ne glo mgui guet, dzigo gac-
draa gnabey ley ne mguipaa gban-
nie wnaa co; telne gacladz zho ct-
sieelnia zho stib mgui, zaca. ³Nli nonguielda ga guñ wnaa ctsieel-
nia zho stib mgui laga bii zomban
tsieel zho; laa zeene gutle tsieel
zho, led dol draaw yguib zho stib zha
ne ctsieelnia zho.

⁴Bets, bzian, scadaa nagon
bzhaac to. Zeene sca gut Jesús,
rrieequia ye to gut ga gane niina
ngadoodraa to lo ley, niicle lëegaaw
grieelod gnabeya to. Jesús, men
ne brieeban ga, mele nac tsieel
cub to niina. Niinasi, zrieelole

gban to zigne racladz Dios; ⁵sac
glo (zeene scataa bdziunctal ne
xtol ne, bdziuun ne grëtaa ncuaane
nonguieldraa niicle ne ndionpaa
ne pe nac miñe zhoobnee lo ley no
dziuun ne), niapse grë ncuaane
nxeel ne zaatne nitlo ne, ncuaan
co bdziuun ne. ⁶Blactaa bgadoo ne
lo ley, sangue niina rrieequia gutle
ne nêz lo ley, laa ne mbanle zigne
rnabey Espiritu Sant.

Rca dol gac miñe rnabey ley

⁷Nana, ¿pe dzdieets ne dzigo por
leypaa rdziunctal ne xtol ne? ¡Coo,
led scada! Tel naa gon, ib niacnand
naa pe nac dol telne guien ley.
Niacnand naa ne dol ga gzoobladz
ne chen ben, telne niacnand naa
ne rnee lo ley: “Gzoobladzd luu
chen ben.” ⁸Zeene gocnan naa zha
nac ley, dzigoraa bien naa niapse
dol nac miñe noyun naa; sac zeene
guien ley, rlud pe nac dol.

⁹Glo zeene riend naa zhapaa nac
ley, tibaque rzaac naa ib peet dol
rapd naa; per zeene gocnan naa
zha nac ley, bien naa ne ib raguial
naa nitlo naa, sac dol quiayun naa.
¹⁰Nli laa ley biaan zeena guien ne
zha grieelo yгаа ne guielmban, per
lel bluw ne raguial naa nitlo naa
sac ngoopdol nac naa. ¹¹Ne nligaa
bdziitnie dol naa, miñe rsopaa ley
diidz nod guñ miech miñcopaa ben
naa; ni blozh ga, lëeque ley blu ne ib
raguial naa nitlo naa. ¹²Niicle ne
scaw, per Dios psana ni rquiin grë
miñe zhoobnee low.

¹³Nana dzdieets ne: conque telne
wen nac ley, ¿zha nac dzigo ne
lëepaaw rlu ne rioguial ne guet ne?
¡Coo, led scada! Sinque znu naca:
dol pteedquie ne ladznia guielgut.
Ga rlu ganle zha nactaa dol, sac gon
lëeque ley pquiin dol pteedquiew
ne lo guielgut. Ga blu ley ganle zha
ntseebtaa nac dol. ¹⁴Gotsaa gwi ne
ganle wen ley, led leyd rxin sinque
ne rxin; sacne rrieequia ngadoo
xcuerp ne lo dol.

15 Tel naa, rienḁ naa pe nacne znu rac naa, niicle ne racladzpaā naa guḁ naa ncuāane nonguiel per nēda, lel ncuāane rzoobladz naa miḁ co ruḁ naa. 16 Grē ncuāane ruḁ naa, now rienḁ naa nonguielḁ; haxta guic naa, zdoo naa, rien naa wen ley sinque naa quiaguits miḁe rnabeya. 17 Nana, niicle ne rien naa scaw per gacḁ pe guḁ naa, sac ngadoo xcuerp naa lo dol, masaque dol rcheep naa ruḁ naa ncuāane ndzinlid. 18 Rien naa miech ngoopdol nac naa, ni palal ncuāane ndzinli gacḁ guḁ naa; niicle ne racladz naa gac-wen naa, per rrieeleoda. 19 Zeene racladz naa guḁ naa ncuāane rquin, per rrieeleod guḁ naaw; laa zeene ni naa guḁdraa naa ncuāane ndzinlid, lel miḁcole ruḁ naa. 20 Ni ne znu lel grē ncuāane racladz naa, miḁ co ruḁ naa, gase rlu ne led naadse quiayun grē ncuāan co; sinque dol quianabey xcuerp naa ruḁ naaw. 21 Rien naa niicle ne racladzpaā naa guḁ naa ncuāane wen, per lel guielntseeb ruḁ naa. 22 Zdoo naa, guic naa, rleynie naa Xley Dios, racladz naa gban naa zigne rnabey me; 23 per dzigo rtse dol lo naa, rrieeleod guḁ naa ncuāane nonguiel. Masaque dol rnabey xcuerp naa, racladzda guḁ naa ncuāane rnabey Dios; sac ngadoo xcuerp naa lo dol.

24 ¡Probsaxe naa, znutaa nac xcuerp ngoopdol naa nu! ¿Cho samiech ne diēḁ grieele csilaa naa low; sac ncuāane gnitlo naa miḁ co mazdraa rdziladza?

25 ¡Xquizh Dios pxeel me Jesús bi-aadsilaa me ne lo dol!

¡Jesús nac meḁ ne psilaa naa!

(Znu nagon rzac naa: rien naa nonguiel guḁ naa miḁe nac Xley Dios, per xcuerp naa lel laaw zienal miḁe rnabey dol.)

8

None gban miech zigne racladz

Espíritu Sant

1 Laa ne gocndion nasca ganle, zha ne ngab lo Jesús ndziibdolḁdraa zho, 2 sac zha ne ngab xnēz me, laa Espiritu Sant psilaale zho lo dol, laa me psilaale zho ladznia guielgut, laa me bdeedle tib guielmban cub lo zho.

3 Wlaltaa ib brieelod ley nsi-laaw ne lo dol, gane mazd laa Dios pxeel Xpēed me biaadsilaa ne. Brieelod ley, sac grēse miech laa ne tsienal zho miḁe rnabey ley, mazdraa zienal zho ncuāane runctal xtol zho. Gane zeene pxeel Dios Xpēed me, goc me miech (lēeraasi ni tib dol beend me), meḁ co gut bdiizh grēse xtol ne, dzigo ga laa me psilaa ne ladznia dol.

4 Gacxe waa, niinasi zrieelo dziuḁ ne grē miḁe rnabey ley, per none gdeed ne diidz guional ne miḁe rnabey Espiritu Sant, ni lalnu gdeete ne diidz gac miḁe racladz xcuerp ne nu.

5 Grēse zha ne mban zigne racladz xcuerp ngoopdol zho, loxaque grē miḁ co rioxco zho; laa zha ne mban zigne racladz Espiritu Sant, miḁe rnabey Espiritu Sant rioxco zho.

6 Zha ne sca rioxco loxaque miḁe racladz xcuerp ngoopdol zho, nēz ne nitlo zho ga zie zho; sangue zha ne rioxco miḁe racladz Espiritu Sant, laa zho zie nēz ne ygaa zho tib guielmban; peet dzeb, peet zhgab ctsebdraa zho. 7 Ni stiba, zha ne rioxco loxaque miḁe racladz xcuerp ngoopdol zho, rlēenie zho Dios ga, sac nēd zho gban zho zigne rnabey xley me; ni niicle gacladzgaa zho, grieeleod zho. 8 Miḁcocxe waa, ib rzacd zdoo Dios grē ncuāane ruḁ zho.

9 Sangue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacie to. Nanle to ganle zha ne nacie Espiritu Sant, nlid xnēz Jesús

no zho. ¹⁰ Ni to ne nac to zha ne nole xnéz Jesús, ible zгаа to tib guieľmban ndzon, sac laa Dios psilaale to lo dol. Nli zig nac xcuerp to, ncuaane nitlo naca, sac por dol biaan sca no gaca; sangue zhiespírituw, nitloda. ¹¹ Dios blee-ban Jesús, ni scagaa telne nli nacie to zhiEspíritu me, meque cueeban to.

¹² Bets, bzian, nodne dziuun ne ncuaane racladz xcuerp ngoopdol ne, zig nac zeene pe nzëeb ne low. ¹³ Sac telne grë ncuaan co tsienal to, ible znitlo to; sangue telne gnab to gacnieň Espíritu Sant to csaan tow, dzigo ible zгаа to tib guieľmban. ¹⁴ Sac grëse zha ne zienal zigne racladz zhiEspíritu Dios, ga rlu ne nliپaa xpëed Dios nac zho.

¹⁵ Golguieň ganle, laa Dios bneedz zhiEspíritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz gnee ne lo me guiab ne: “iPapá yeen!” ¹⁶ Ni Espíritu coque runquieň ne ne nli xpëed me nac ne.

¹⁷ Nana ne laa ne nacle xpëed Dios, scagaa dzigo ye ne ible zгаа ne grëtaa ncuaane bdeed me lo Jesús.

Nli zгаа ne lo grë guieľndzon ne no Jesús ga, per scagaa none dzian ne grë guieľnë niina ne laa ne ngab lo me.

Guieľndzon ne naraa guiaad

¹⁸ Guieľnë ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdoo nac lo guieľndzon ne naraa dzian ne. ¹⁹ Zig nac grëtaa ncuaane bzaa Dios, masaque quiambëznëw gdziň dze zeene laa grë zha ne nac xpëed Dios ygaa lo guieľndzon co; ²⁰⁻²¹ sac gon, gal dze co laa guidzliu guiaanmbe lo grëtaa ncuaan paat rquiind, lo grëtaa guieľntseeb ne no low niina. Dios bdeed diidz biaan grë ncuaan co low, per zeene gal

dze co, zeene laa grë zha ne nac xpëed Dios laa lo grëtaa guieľntseeb, yew laaw laa.

²² Laga quiambëz grë ncuaan co gdziň dze co, masaque mban raca, rzaca zig rzac tib meň wnaa ne quiayal xpëed. ²³ Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zгаа ne grëtaa ncuaane gneedz me), mban rac ne quiambiaaz ne gdziň dze co, zeene laa Dios ctsëe xcuerp rii ne ni ycaania me ne zig xpëedpaa me.

²⁴ Ndion ne ible zbee Dios ne lo grëtaa ncuaane rac lo guidzliu rii, per nana laa ne quiambiaaz dzianpaa ne gaca. Tib ncuaane lëe ranle ne noyac, nod pe nacie yquiambëzraa new, ²⁵ per zeene quiambëz ne tib ncuaane naraa gac, dzigo nodne guieed ne, sinque ine tiblifique gac ne yquiambëz new.

²⁶ Ni scagaa zeene lëbdraa ne, rienndraa ne zha gun ne, Espíritu Sant nac meň ne gacnieň ne. Zig nac zeene gzodiidznie ne Dios, tel nesew nand ne zhapaa nonguieľ gnee ne lo Dios, dzigo Espíritu Sant runcnee ne grë diidz ne riennd ne zha nac. ²⁷ Ni Dios ne nac me meň ne nanpaa pe rza zdoo miech, rien me pe rnee Espíritu Sant, sac miňe racladz Dios gac miň co rnab me.

Tsod ncuaane yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grë miňe racladz me, grëse ncuaane rded zho, led lega rdete zhow, sinque no zaatne rquiina lo zho. ²⁹ Ni ndion ne ganle, zha ne nanle me ygab xnéz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac meň nroob. ³⁰ Ni grë zha co, laa me quiabedz zho, quiasilaa me zho lo dol, laa zho noyaanwen lo me;

zeena yгаа zho lo guieḷndzon ne no me.

³¹ ¡Zha nactaa ncuaaḅe lëe run Dios! Nana, teḷ scataa racnie Dios ne, ¿cho nadien grieelo lega pe gon ne? ³² Golgotsaa gwi ne ganḷe, haxta xpëed me bdeed me gut xcuent ne, grëse ne ne nac ne miech. Nana, ¿pe leḷ grë pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ¡choot rieguiald glisqui gnë lëda nodziun ne! Sac gon, Dioszhal psanḅbe ne lo dol.

³⁴ ¡Choot rieguiald ycaadzol ne! Sac gon laa Jesús gutle bdiizh me xtoḷ ne; per brieeban me, ni na laa me zob cue Dios zaatne rieguiald me nac me men non. Ga no me quianab me lo Dios por ne. ³⁵ ¡Tibaque rleynie Jesús ne! Zeene nodzian ne guieḷnë, zeene mban rac ne, zeene rtsidil miech ne, ib guiabd ne togo bod rleynied me ne. Niicle zeene guieḷndgaa pe gow ne, guieḷd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleynie me ne! ³⁶ Ni zig nac xcuent guieḷgut, laaw raquietaque lo Xtiidz Dios, zaatne rnee:

Grëse no ne nac no zha ne ngab lo luu,

tibaque noxtseeb no lo guieḷgut;
masaque rzac miech no zig rzac
zho grë mëcwxiil ne golle
guet.

³⁷ Niicxe peraa waa dieed ne, zdziun ne gan low ni palal csanwinda ne, sac Jesús nacie ne; ni rleyniedox Jesús ne.

³⁸ Nanween naa tsod ncuaaḅe yquiaaqui csaanladz Dios ne:

per ni guieḷgut,
per ni guieḷmban,
per ni anjl,
per ni menḅox,
per ni grë ncuaaḅe noyac niina,
grëgaa ncuaaḅe naraa gaca.

³⁹ Niicle grë ncuaaḅe no glaa zhan gbaaw,

niicle grë ncuaaḅe no guietraa zhan guidzliuw,

niicle grëragaa ncuaaḅe bzaa Diosa. ¡Ni tiba ycada, sac tibaque rleynie Dios ne! Ni laaw blule me ganḷe, zeene pxeel me Jesús (men ne rnabey ne), men ne gut bdiizh grëse xtoḷ ne.

9

Ible Dios bzooblo zha Israel

¹⁻³ Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganḷe rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, teḷne niaca por min co laa zho guien zha gbig zho lo Dios.

⁴ Blactaa quiayacnieḷ Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganḷe men ndzon nac me; biaan zho didz grë zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleynie zho me. Nzian grë ncuaaḅe bnee me gdeed me lo zho. ⁵ Lëe pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuaaḅe no, ni me rieguiald gacnon gzataa dze. Ible sca rieguiala.

⁶ Nana, no zho guiab godcaque grë mine bnee Dios ga yгаа zha Israel. Per led scada. Sinque lëe min co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷ Nacda ne lox- aque ziaad zho lo xti Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham. ⁸ Gase naganḷe rlu, zig nac

niina, grē zha ne ziaad lo xtiī Abraham, led grēd zho ngab lo Dios; sinque zha ne bzooblōle me zigne bzooblō me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mēēd lo zho.

¹⁰⁻¹¹ Ni scasaque xpēēd Isaac. Bdzin dze, zeēne laa Isaac ptsieel-
nia wnaa ne lē Rebec, dzigo gop Rebec tibnēz mēēdbgui. ¹² Bii zoney Rebec grop mēdyeen co, laa Dios bzooblōle win ne brieelē Jacob rēb me, ne ible Jacob gac zha non lo Esau, win ne glo gal. ¹³⁻¹⁵ Laaw zhubneeque lo Xtiidz Dios, zaatne znu rēb me: “Ible Jacob bzooblō naa beenlay naa, bzoblod naa Esau.” Gard gal grop mēēd co, per ni gard gacnañ win zha nac guielntseeb, zha nacgaa guielwen, laa me bzooblōle tib win. Ga nagon, blu Dios ne mese nac men ne rieguial rzooblō tel cho zha ne ygab lo me, nacda por pe ncuane noyūn zho.

Nana, ¿pe zdzieets ne guielntseeb ga sca run Dios? ¿Led guielntseebdal Tib vuelr rēb me lo Moisés: “Zha ne gacladz naa yquia zdoo naa, squia zdoo naa zho.” ¹⁶ Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho. ¹⁷ Gotsaa gwi ne ganle zha beenndip me zdoo rey Egipt. Lo Xtiidz me zhubnee zeēne rēb me lo rey co: “Ible laa naa bzo lūu nac lūu rey, lūu yguib glu naa poder ne rap naa, zeēna dib lo guidzliu guien miech ganle naa nac Dios.”

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me guñndip me zdoo, runndip me zdoo zho. ¹⁹ Nana, no zho gnē: “Telne scaw, ¿pe nac dzigo rlisqui Dios mine run miech, telmezhal rnabey zha nac zho tib tib zho?” ²⁰ Per nana, ¿cho nac ne par glisqui ne

mine run Dios? Zig nac tib guies beñ, niacxe zlisquiw lo men ne bzaaw, guiaba: “¿Pe nacne znu bzaa lūu naa?” ²¹ Led zha ne run dziin co, zrieelo gzaa zho tib guies zigne gacladztaa zho; tib lē beñ ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grē zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdzin dze co. ²³⁻²⁴ Grēgaa zha ne bzooblō me yгаа lo guielndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblō me ne, sac rquia zdoo me ne. ²⁵ Goşsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grē zha ne nacd zha Israel ygab zho lo me, zeēna gleynie me zho niicle ne rleynie me zho glo. ²⁶ Laa stib lugar bzeet Osé, zha bnee Dios lo zho, rēb me: “Ngabde to lo naa, per dzin dze ne laa to gac xpēēd naa, ne nac naa Dios nguiamban.”

²⁷ Laa Isá stib men ne biadteed xtiidz Dios padzeela, zeēne bzeet me zha Israel rēb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; ²⁸ sac ziaady-
oble gun Dios xquielwxtis me lo guidzliu, zigne bneele me.” ²⁹ Min co ga bzeet Isá mazd glo, rēb me: “Telne niaca mine yquiad zdoo Dios zha Israel, znitlo me zho grēse zho zigne bnitlo me zha Sodom ni zha Gomorr.”

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlal-
taa ib bioxcdod zho dien zha nsilaa

me zho lo dol. ³¹ Laa zha Israel, niicle ne rioxco zho run zho grē miñe rnabey ley parne csilaa me zho, per ib laad zho lo dol sca. ³² Laad zho, sac zienied guic zho gnalo zho Dios, rzac zho por grē ncuaañe gunse zho laa zho laa lo dol. Miñcocxe waa, zeene laa Jesús baaad, bzhaac zho me zig tib quie ne rriel ni ne riab ne liu. ³³ Lēē miñ co ga zhoobnee lo Xtiidz Dios, zaatne rnee:
Sxel naa tib men lo zha Israel,
me gac zig tib quie ne griel ni zho;
sangue zha ne dib zdoo gnalo me,
tsod dze ne tso zho guielñe, guiab
zho pe nacre bnalo zho me.

10

¹ Bets, bzian, ne nlipaa rzaac naa tebaa zha laa grēse zha Israel lo dol, tibaque rnab naa lo Dios guien zho gbig zho lo me, zeena laa zho lo grē xtol zho.

² Parga nli ran naa noxco zho gbig zho lo me; per rund zho miñe no gun zho. ³ Ib rienñd zho zdoo Dios ral rsilaa me miech lo dol, laa zho rzac por miñe gun zho laa me csilaa zho. Ib nēd zho gun zho miñe racladz Dios. ⁴ Sac gon, laa Dios racladz Jesús gnalo zho zeena guiaanmbe zho lo grēse xtol zho; sac Jesússe nac men ne brieelo been grēse miñe rnabey ley.

⁵ Bzeet Moisés rēb me, zha ne gnalo ley ne lēew csilaa zho, none gun zho grēse miñe rnabeya; ⁶ sangue zha ne gnalo Jesús ne me csilaa zho, nacda dien peraa gun zho. Nacda ncuaañe tso zho guiab zho, tebaa zha tsie zho lo me gbaa, gnab zho csilaa me zho (ncuaañe gacda ga, dzigo rrieequia racladz zho guiet me ga stib); ⁷ o guiaabгаа zho tsie zho zaatne noliu grē ngutoo, tsienab zho lo me csilaa me zho (ncuaañe gacdaque ga, ni stiba led ga no me, laa me brieebanle). ⁸ Rquiind paraa tsieguib zho csilaa me zho, zig rzac

zho zdoo zho, zig rzac zho ro zho, sca gax lo zho zo me quiambēz me csilaa me zho. Miñ co nac miñe noseed no miech, rnee no lo zho: ⁹ Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grē xtol zho. ¹⁰ Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac miñe riladz ne, dzigo scaania me ne. ¹¹ Rnee lo Xtiidz me: “Zha ne dib zdoo gliladz Jesús, quitnied me zho.”

¹² Grēse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grēse zho, ni grētaa ncuaañe rap me, zdeed mew lo zha ne gnaba lo me. ¹³ Rnee lo Xtiidz me: “Grēse zha ne gnab lo Dios csilaa me zho lo dol, ible silaa me zho.”

¹⁴⁻¹⁵ Nana, no zho gnē: ¿Per zha gnab zho lo me, ni runbeyd zho me? Nli gunbeyd zho me, tel niaca miñe gard cho cxeel zha ne tsienee Xtiidz me lo zho, parne gon zho cho nac me. Ni miñ co rzeet Isá, zeene rēb me: “¿Zha wentaa ziaad zha ne ziaadnie Xtiidz Ndzon Dios!”

¹⁶ Rgaaz Xtiidz Dios, per led grēd zho rzoobdiaga, zig rbiireque Isá, rnee me: “Dios, bui ganle choot nēd gliladz Xtiidz luu, miñe rne naa.”

¹⁷ Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnañ Xtiidz me. ¹⁹ No hor rne naa: ¿Pe ib rienñd zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rēb Dios laa me ycaania miech stib guiedz, zha ne ib peet rienñd; zeena tednē zdoo zha Israel, togo ziaa zho

biini. ²⁰ Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzëëb nia naa lo zho ni naa niacnie naa zho,

per pa nion zho xtidz naa, leḷ gocntseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgaṅ ganle, zha Israelacxe waa nac naa, zha xtii Benjamín, zha xtii Abraham nac naa; ² dzigo led psaanladzd Dios zho (nac zho zha ne padzeelale bzooblo me ygab lo me).

Golṣoladz ganle, zha rëb Dios lo Lí, meṅ ne biadteed xtiidz Dios padzeela, zeene bzodiidznie Lí Dios ³ grëtaa ncuaaṅ noyūṅ zha Israel, ptsil zho zaatne riegaṅ grë miech me, beet zho grë zha ne pxeel me noteed xtiidz me, ni laa zho quianaḷaque gut zho Lí. Rzac Lí guiēdraa zha ne ron xtiidz me, ⁴ dzigo hor co rëb me lo Lí: “Led tibd luu riaan, no zgadz mil zha ne gard yquiitgzhib lo Baal, naa bzooblo zho ygab zho lo naa.”

⁵ Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me. ⁶ Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nliḷ dzigo ne rquia zdoo me zho.

⁷ Znu nagon naca: Zha Israel ne bzooblome, zha cose guiaanwen lo me. Laa los demas zho, leḷ lozh gacndip zdoo zho, ⁸ zigne zhobneeque lo Xtiidz me, zaatne rnee: “Beenḷdip Dios zdoo zho, riēḷd zho zha gbig zho lo me; niicle ne zob lo zho, per rac zho zig rac zha ne ranḷ; niicle zob diag zho, per rac zho zig rac zha ne peet rond. Ni

scataque nac zho haxta lo nadze.”

⁹ Mincoque bzeet rey David, zeene rëb me:

Lëëque grë zhilni zho, lëëque grë ncuaaṅ row zho, gac zig len doo ne, len guieṅ ne tsiet-sobe zho;

zeena ygaa zho guieḷnë ne rieguial zho.

¹⁰ Guiaan zho zig tib zha ne roḷd lo, guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdoo, guiabde to togo laa zho bnitlolle ga. ¡Lëda! Sinqe laa me bdeed diidz sca goc zho, zeena gbig grë zha stib guiedz lo me csilaa me zho lo xtoḷ zho; ni tednëgaa zdoo zho gan zho laa me rcaania zha stib guiedz. ¹² Nana, telne scataa guieḷnzaac ne bgaa miech stib guiedz ne znu racndip zdoo zha Israel, ¿pe lelgue dzigo zeene laa zho gbiire guiaanwen lo Dios stib? ¡Zha naczhe grëraa guieḷnzaac ne ygaa miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Sca-gaa naa, dib zdoo naa rioxco naa ruṅ naaw, ¹⁴ zeena togo soobladz palal zha ladz naa ye zho squi gbig lo Dios csilaa me zho lo xtoḷ zho. ¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guieḷbley nrooba zeene laa me ycaania zha Israel stib! Sac gon, rriequia griebean zho ga.

¹⁶ Zigne pcaania Dios xmēṅol zha Israel bgab zho lo me, scaque-gaa scaania me xpëed zho; sac gon, zig nac tib zhan yag, zeene ndaan low miṅe naaza len liu, ndaanaque zhicwa. Scaque nagon, zeene bzooblo Dios xmēṅol zha Israel, yeḷe zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdzin dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guieInzaac co. ¹⁸ Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per rioguiäl now, gacxe waa no biaan xlugar zhicwa, mine brug ga.”

²⁰ ¡Golgap cuidad gon! Nli lëë biche zho, laa to biaan xlugar zho, porne bnéd zho nalo zho Dios zigne bien to rnalo to me; per golguien gacniatsde to. ²¹ Golgan ganle, nicxe zha name zhicwpaa yag co nac zho ni ptiche me zho, ¡pelel to dzigo!

²² Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios! ²⁴ Niicxe to na, nac to zig yag oliv dan, pquia zdoo me to pquiid me to zhicw yag oliv wen co, ¡pelel zha Israel dzigo yquiad zdoo me, gbiire yquiid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me

niina, per zeene laa grë miech stib guiedz blozh wbig lo me, ²⁶ hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga greee men ne cuee zha Israel lo xquieInntseeb zho.

²⁷ Dzigo laa Dios csilaa zho lo grëtaa xtol zho, zigne psanle me didz lo zho.

²⁸ Len dze rii rlëë zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleyne me zho, sac scale rëb me lo grë pxozgol zho. ²⁹ Me bzooblo zho, dzigo ible scaania me zho; sac gon, led yed me ctsëë xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel néd gon xtiidz me. Per zigne rquia zdoo me to niina, scaquegaa dzin dze ne yquia zdoo me zho. ³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa riocxo me miech! ¿Cho grieelo guien pe nac mine no guic me gun me, pe nacgaa gun mew? ³⁴ Zigne zhobneeque lo Xtiidz me, zaatne rnee: “¡Choot nand pe no guic Dios gun me! ¡Choot grieelod guiab lo me, znu znu been! ³⁵ Wlaltaa choot gard pe gdeed lo Dios, par guiab ne laa Dios zëëb.” ³⁶ ¡Peet gon nzëëbd Dios lo miech! Sac grëtaa ncuane no, me psana, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nacse to golsan to lадznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienal draa to grē ncuaañe ndzinlid ne noyac lo guidzliu rii, grēse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoo Dios noyūn naa dziin rii, nli-gaa laa naa rso diidz lo to, ndzinli golgac, ib glude to ncuaañe ni nacde to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian lē niaaw, ni tib tiba nose zaatne rquiina; scaque nagon nac grē zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grēse ne none gnalolsa ne grē zha ne nacgrē ne.

⁶ Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed xtiidz me,
none gnee zhow zigne csi-
aab mew guic zho;

⁷ zha ne pso me gun ncuaañe yquiin lo grēraa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Gandzede to grē ncuaañe ntseeb, niapse ncuaañe rquiin goltsienal. ¹⁰ Ine niowse golleynie grē zha ne nacgrē to, gacnguizhde to, quitniede to zho.

¹¹ Nguieel golgac, gacmbechde to, dib zdoo to goltoxico golgun mine nac xtsiin Dios.

¹² Nley golgac lo guielmban rii, golsoladz ganle zha nactaa grē ncuaañe no gneedz Dios lo to; golxecw lo grē guielnē ne gan to; tibaque golzodiidznie Dios.

¹³ Goltoxico xliaadz grē zha ne nacgrē to ngab to lo Dios; zaacse golcuēzlo zha ne ziaadted lidz to.

¹⁴ Grē zha ne rtsidil to, laa ne gdzibdee to zho, golnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnē, golgacnie zho lo xquielnē zho.

¹⁶ Gacniatsde to. Grē zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrē to.

¹⁷ Zha ne csacsi to, gunde to ne yeque to csacsi zho. Goltoxico wen golgac lo grēse miech. ¹⁸ Tlniede to samiech to, goltoxico tibaque wen golbannie zho. ¹⁹ Golguien, zha ne csacsi to, ib guiabde to ne tozhal ct-sire guielnē co, sinque golsana lадznia Dios, metaa nan zha gun me xquielwxtis me; zigne ziaad lo Xtidz me zeene rēb me: "Naa raguial gun guielwxtis, naa gunquizh miech tel pe nac dol ne zēēb zho. ²⁰ Gacxe waa, zha ne rlēē lo luu, zeene gan luu mban rac zho rcaabedz zho, mazd bdeed ncuaañe gow zho; gangaa luu mban rac zho rnab zhis zho, bdeed ncuaañe guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho."

²¹ Golguien sca, niapse guielwen goltsienal, zeena sca ycuēēz to lo

guielntseeb. Gdeete to diidz ne ye to gun guielntseeb.

13

Golgon mine rnabey wxtis

¹ Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rriequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. ³ Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to. ⁴ Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne yгаа to; sac gon, ible laa Dios bzo zho gun zho guielwxtis. ⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nëz lo Diosa ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelo gun zho tel pe nac dziin ne no gun zho. ⁷ Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸ Grë ncuane rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grële mine zhubnee lo Xley Dios ga quiayun zho. ⁹ Sac telne rleynie to samiech to zigne rleynie to to, nod pe nacne csacsi to zho; guiab to: laa to yquidie zho, laa to gut zho, laa to cuan zho, laa to tsonie tsieel zho,

gzoobladzгаа to grë ncuane quianie zho.

Gacxe waa, zha ne rleynie samiech zigne rleynie zho zho, grële mine zhubnee lo Xley Dios ga quiayun zho. ¹⁰ Zha ne rleynie samiech, rsacsidraa zho zho; ni min co rnabey Dios. Gacxe waa, grëse ne none gleynie ne samiech ne.

¹¹ Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lëdle zeene psilo rnalò ne me. ¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³ None ndzinli gban ne:

dziuund ne guielgonziu,
dziuund ne grë lni yozh,
yquiangobd ne zha ne led tsieeld ne,
dziuund ne grë guieelyozh ne racladz xcuerp ne,
dilnied ne samiech,
glëënie ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grë ncuane ndzinlid ne racladz xcuerp ne.

14

Gzeed zdoo to mine run zha ne nacgrë to

¹ Golcaania zha ne gard tsoguicpaa zha nac Xtiidz Dios. Telne no palal mine riladz to zhaa rzac zho, glisqueide tow lo zho. ² Gzoob ne, no to rzac peet nacda gow to grë lose guielwagw, laa zha ne na gard tsoguicpaa Xtiidz Dios, rzacgaa wena telne scuaan guizhyese gow zho; ³ ga nagon, ni stib ni stib nod pe nacne glisqui dien cho pe row, dien cho pe rowdгаа; sac gon grëse to, Dios bzooblo to ngab to

lo me. ⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lédgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleyne zho Dios, nogaa zho rnee zac tel pa dzetaa gleyne zho me. Per peet nacd ga, zac tib tib zho gunse zho mine rzac zho rdziladz me. ⁶ Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncueegaa ncuaane gow, wenaquew, totsaque run zhow par glu zho ne rleyne zho me, ni rdeed zho xquizh lo me.

⁷⁻⁸ Sca nagon naca, per led min cod dzieets ne dziuun ne mine gacladztaa ne. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdziñ ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹ Sac gon, tel Jesús gut me ni brieegan me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me. ¹¹ Zigne raquetaque lo Xtiidz me, zaatne rnee me:

Naa nac Dios mban, gneli naa lo to ganle:

grëse miech, ible squitsgzhib zho lo naa,

cueero zho ne nli naa nac Dios.

¹² Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrë to

¹³ Nana sca, zha ne sca rund grë mine run to, ible glisquidraa tow lo zho. Golguien, gunde to ncuaane rgobey to yquiaaqui guncal zho xtol zho, o csaangaa zho Xtiidz Dios. ¹⁴ Tel naa, nanpaa naa led dollda gow ne grë lose guielwagw; sac niicle Jesús scaque nac xtiidz me. Sangue zha ne rzac dollda, mazd gowd zhow; sac tel laa zho gowa, xtol zho ga guncal zho. ¹⁵ Zig rne naa ga led dollda, per telne xtsiinpaa row to tib ncuaane rquiaaqui rsan to zdoo stib zho, ga rlu to ne rleyniede to zho. ¿Golguien sca, gowde to ncuaane yquiaaqui sozit zho lo Dios! Sac gon, blactaa guielne ne bded Jesús psilaa me zho.

¹⁶ Ib gunde to grë ncuaane yquiaaqui gneenë miech to, niicle ne nanpaa to led dollda. ¹⁷ Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espiritu Sant); led tsod zho dien pe zac gow zho, pe zac guie zho, pegaa gacda. ¹⁸ Sca rdziladz Jesús, ni zha ne sca gban, zleyne Dios zho, niiclegaa grë miecha zleyne zho zho.

¹⁹ Goltsoxco sca, gunde to ncuaane codil to grë zha ne nacgrë to; zeena tipse gac to lozh tsoquic to zha racladz Dios gban to. ²⁰ Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csañ ne zdoo stib zho. ²¹ Mincocxe waa, mazd gowde to pe scuaan bëel, guiede to nziu, telne min co yquiaaqui guncal to xtol zho; ni tel pe grëraa ncuaane nan to tsod zdoo zho, gunde tow.

²² Niicle ncuaane nanpaa to dollda gun tow, niiclegaa nëz lo Diosa led dollda; per mazd gunde tow zeene zo

zha ne rzac doĵa. ĴWen zie zha ne sca niicle nanpaa zho dold nac miĵe guĵ zho, per ruĵd zhow, parne guĵctald zho xtoĵ zho!

²³ Sangue zha ne racchop guic rienĵd zho dien pe zow zho tib guielwagw, ni lozh ga row zhow, ruĵctald zho xtoĵ zho ga; sac beend zho mine rzac zho rdziladz Dios. Grĵse ncuaaĵe rzactaa zho wend ni guĵ zhow, xtoĵ zho ga guĵctald zho.

15

Golgacnie zha ne nacgrĵe to

¹⁻² Golguien sca, to ne nac to zha ne dziitsle zo lo Xtiidz Dios, golgacnie grĵe zha ne gard sodziits lo Xtiidz me. Golguĵ ncuaaĵe tso zdoo zho, ncuaaĵe yquiin lo zho, zeena lozh guien zho zha gnalo zho Dios; led tsode to guĵ to ncuaaĵe yquiinse lo to.

³ Golgaĵ ganle, niicle Jesuĵa bguibd me niac ncuaaĵe nquiin lo me. Zigne raquietaque lo Xtiidz Dios, zaatne rnee: "Grĵetaa diidznĵe ne rnee zha ne rlĵĵe lo Dios, grĵesew pcon zho me."

⁴ Grĵe miĵe raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lĵĵw rnee none nley gac ne, lĵĵw rnee guieete ne yquiambi-aaz ne yga ne grĵe miĵe bzeetle Dios. ⁵ Dios meĵ ne rneedz guielbley co, meĵ ne racniĵe ne guieete ne, me gacniĵe to niowse gbannie to grĵe zha ne nacgrĵe to. Golleynie zho zigne rleynie Jesus to, ⁶ zeena grĵe ne tipse gac ne dzioolnie ne Dios, Pxoĵ Jesus, meĵ ndzon ne rnabey ne.

Grĵe miech noyon Xtiidz Ndzon Jesus

⁷ Golguien sca, grĵe zha ne nacgrĵe to, golcaania zho zigne pcaania Jesus to. Sca golguĵ, zeena xoobnenraa lĵe Dios.

⁸ Golsoladz ganle, zeene biaad Jesus nroob ncuaaĵe been me lo zha Israel, me biaadguĵ grĵetaa

miĵe bzeetle Dios padzeela. Ga blu Jesus grĵe miĵe rnee Dios, ib ruĵ mew. ⁹ Ni golsoladz ganle, ye grĵe miech stib guiedz biaadsilaa me, gane niina grĵe zho roolnie Dios, ne scataa pquia zdoo me zho. Miĵ co raquiet lo Xtiidz me, zaatne rnee:

Zoolnie naa luu,
ni zlu naa lo grĵe zha stib guiedz ne
meĵ non nac luu.

¹⁰ Stib lugar rnee:

To ne nac to miech stib guiedz,
ĵine nley golgac grĵe to zha Israel!

¹¹ Ni no stib zaatne rnee:

Grĵe to ne nac to miech stib
guiedz,

ĵgolleynie Dios! ĴGolsannziuu lĵe me!

¹² Mincoque ga bzeet Isaĵ, zeene znu pquiaa me:

Zrieequia tib meĵ lo xtii Isai;
meĵ co gnabey lo grĵe miech stib
guiedz,

ni me gnalo zho grĵe zho.

¹³ Mincoxe waa, to ne nac to miech stib guiedz, rnab naa lo Dios (meĵ ne psanle diidz pe nac grĵe ncuaaĵe yga ne ga) gneedz me guielbley lo to, gacnie me to peet zhgab ctsebde to niina ne laa to riladzle me. Rnab naa lo me, gacniĵe Espĵritu Sant to ĵine gley to yquiambĵz to gac grĵe miĵe psanle me diidz ga.

¹⁴ Bets, bzian, nanle naa zha wen nac to, nacde to zha ne csan zdoo stib zho; rienle to zha racladz Dios gban to, rienle to zha cso to diidz lo grĵe zha ne nacgrĵe to; ¹⁵ per lo guits rii gon nzian ncuaaĵe rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa, laa me bzooblo naa noyūn naa xtsiĵn Jesus, none naa Xtiidz Ndzon me lo grĵe miech stib guiedz, zeena csanmbe Espĵritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacniĵe Jesus naa noyūn naa

dziin ne pso Dios naa. 18 Me noy-acnien naa none naa Xtiidz me lo grê zha stib guiedz, zeena gban zho zigne racladz me. Ni laa zho no-big lo me, sac ran zho grêse mine rne naa mban naaw zigne naca, 19 ni ran zho zha racnien Espiritu Sant naa run naa grê milagr, grê ncuane rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nêz xtan zha Ilir. Guiabde to togo rtix naa diidz. 20 Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me. 21 Laa naa zana zigne zhobnee lo Xtiidz Dios, zaatne rnee: “Grê zha ne waltaa gard gon cho nac me, zeene gan zho grêtaa ncuane run me, laa zho gunbey me.”

Racladz Pabl tsie Pabl Roma

22 Nzian vuelt gocladz naa nialgan naa to, per ib bdeetew diidz, sac laa naa bia grê dan co biaseed naa miech. 23 Izle ga na tibaque sca no guic naa, laa niina ne laa naa psiaa lo xtsin naa, nataa nagon ible zial naa. 24 Laa naa no ga Spañ, dzigo lëë nêzle ga teed naa Roma i guialgan naa to. Tib guielbleya lo naa guialquiabdiuuzh naa to, dzigo lozh ga siguiel to gun to xyudar naa grielo ga naa nêz Spañ.

25 Laa niina, laa naa no ga Jerusalén gasan naa tib gon lo grê zha bets, zha bzian ne no ga; 26 sac grê zha bets, zha bzian, ne no nêz Macedon, ni nêz Acay, laa zho bnediizd been lo zho palal dimi cxeel zho yquinn grê zha prob ne no nêz co. 27 Niapse zdoo zho gop top zho gon co, sac rzac zdoo zho grêtaa mine been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuane rgaa lo zho yquinn zha Jerusalén.

28 Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. 29 Rien naa noob guielnzaac ne gneedz Dios lo to zeene laa naa guial.

30 Bets, bzian, golguien ganle Jesús rnabey ne grê ne; ni rleynie ne zha ne nacgrê ne, sac Espiritu Sant nacnie ne. Gane niina, laa naa rnab lo to, golgotsaa gnab ne lo Dios gacnien me naa; 31 golnab lo me, csilaa me naa ladznia grê zha Israel ne gard guien cho nac Jesús. Golnab lo me, ine gley grê zha bets ne, zha bzian ne, ycaania zho gon ne gasan naa lo zho nu; 32 zeena ine nley no zdoo naa glanso naa lo to, ine gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca. 33 Ni me ne nac me men ne rbee miech lo grêse zhgab, lo grêse guielxtseeb, me gacnien to. Sca gaca.

16

Bdiuzh

1 Bets, bzian, len dze rii laa Feb, tib wnaa ne run xtsiin Dios guiedz Cencré, laa me guiaad nêz lo to i. 2 Laa naa rso diidz lo to, zeene glanso me i niowse golcaania me, golcaania me zigne rieguial ycaania ne zha ne ngab lo Dios. Golsiguiel goldeed grê ncuane yquinn me; sac gon, tel me ndal grê zha ne ziyacnie me lo xliaadz zho, haxta naa blactaa ziyacnie me naa.

3 Ni rnab naa lo to, golsiguiel goldeed zhibdiuzh naa lo grê zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziuun no xtsiin Jesús, 4 haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grêragaa zha zit ne nacgrê new, rzac zdoo zhow.

⁵ Ni scagaa, grë zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rso-ladz naa me; lëe me nac zha Asia ne glopaa bzëeb xnëz Jesús.

⁶ Goldeed zhibdiuzh naa lo Marí, blactaa noyūn me xtsiin Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguilb. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëe stib zha ne rdzieel xtidz naa ga; ⁹ lo Urban, rsoladz naa me, tipse bdziuu no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuuaane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne riladzle Jesús; ¹² lo Trifen, lo Trifós, ni lo Pérsida, gza men wnaa rii blactaa noyūn zho xtsiin Jesús.

¹³ Goldeed zhibdiuzh naa lo Ruf, zëeb xtiidz me lo grë zha ne nacgrë ne; goldeed zhibdiuzh naa lo xniala me ne, run naa cuent lëe stib xnia naa ga, blactaa pteedlo me naa. ¹⁴ Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne riladz Jesús nëz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho miñe ni nacdraa

Xtiidz Jesús; yquiaadiagde to zhiwseed zho.

¹⁸ Grë zha co, led xtsiindraa Jesús ga run zho, sinque laa zho noxco ncuuaane gdeed guxt xcuerp zho. Diidz nex, diidz ndooladz rnee zho; grë miech ne beelze pe riladz, znuse rquidie zho zho. ¹⁹ Sangue to, zëeb diidz ne ib rsaande to miñe nac Xtiidz Dios, zienal to miñe rnabey me.

Rley naa ron naa squitaa ngu-zobdiidz to. Racladz naa tibaque squi niini gac to, zeena guien to niapse ncuuaane yquuin gun to, ni lalnu tsoode to lo guientseeb. ²⁰ Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacniën to.

²¹ Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxel zhibdiuzh naa lo to i. Rleyne naa to, sac ye to ngab lo Jesús. ²³ Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne riladz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús men ne rnabey ne, me gacniën to grëse to. Sca gaca.)

²⁵ Laa naa rsan to ladznia Dios, me gacniën to lozh sodziits to lo Xtiidz me, miñe none naa lo miech. Haxta zeene gard tsaa guidzliu, znu no guic Dios csilaa me grë miech lo xtol zho, per choot gocnanda, naraa laaw bzhoobnen.

²⁶ Laa niina, nzian zaatne nogaaz Xtiidz me, zeena grëse zho guien Jesús none gnalo zho, ni miñe rnabey me miñ co no gun zho. Grë zha ne biadteed xtiidz Dios padzeela, bzeetle zho ne znu gaca,

ni ible Dios rnabey ne znu gaca.

²⁷ ¡Mese nac Dios, mese nac meñ ne
nlipaa rien! ¡Tibaque sca golgotsaa
dziuunnon ne me, grëse ne ne
nac ne zha ne ngab lo Jesús! Sca
rieguiaa.

Pabl

GUILTS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³ Dios men ne nac Pxoz ne, ni Jesús men ne rnabey ne, me gacnien to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grëtaa ncuane zineedz me lo to, niina ne laa to rliladz Jesús. ⁵ Sac gon porne rliladz to Jesús, blactaa ziyunlay me lo xquielmban to, noy-acnien me to quiayogucraa to zha nac zhiwseed me, rien to zha gnee tow lo miech. ⁶ Rlu zienal to mine nac Xtiidz Jesús, zigne binse tow, ⁷ gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziñ dze ne guiaad Jesús men ne rnabey ne. ⁸ Ni Dios nac men ne gacnien to tiblique gac to lo Xtiidz Jesús, zeena ni tib falt rapde to gal dze co. ⁹ Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nli-gaagolgon, zig nac zeene Jesússhal

noso diidz rii lo to. ¹¹ Sac gon në tib zhalidz Cloé lo naa nodillsa to i; ¹² no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rreeequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús. ¹³ Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵ Zeena tsod pe nacne guiab to xnëz naa ngab to, sac naa pchoobnis to. ¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga, ¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaal naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸ Min co nagon noxco naa, maase niicle no grë zha ne rzac ncuane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹ Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,
niicle rzac zho mazdraa zhooba guic zho,
ni lalnu yquiinda.

²⁰ Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed

zho ga lo zho zha csilaa Dios zho, chogaa nac Dios. Ga blu Dios ganle lega nacre grè guielrac ne no lo guidzliu rii. ²¹ ¡Diosse nac men ne rien! Bien me grieelod gunbey miech me por xquielrac zho, nacre bnabey me zha ne dib zdoo gliladz xtiidz me, zha co csilaa me; nicle ne rzhidznie miecha, rzac zho ncuaane paat rquiinda.

²² Zig nac grè zha Israel, grè zha Gres ncuaane paat rquiinda rzac zho. Grè zha Israel, racladz zho ganlo zho grè milagr nroob par glu ne diidzliw; laa zha Gres na zienalgaagaca zigne nac zhiwseed zho, sac laa zho zienal guielrac ne no lo guidzliu rii. ²³ Gacxe waa zeene rnee no lo zho Jesús men ne pquia lo cruz, men cose csilaa miech, rlèè zha Israel ron zhow; laa zha Gres, rzhidznie. ²⁴ Sangue ne, ne nac ne zha ne bredzle Dios bzèèb xnèz me, zigtaa zha Israela, zigtagaa grèraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵ Mine rzac miech paat rquiind ga been Dios, ni nand zho ndziibguicraa nac min co lo grè xquielrac zho; zha ne rzacgaa cholze cho men nsis ga sca gut lo cruz, ni nand zho lèè men co mazdraa ndip lo grèse miech guidzliu.

²⁶ Bets, bzian, golgan ganle lo grè to ne nac to zha ne ngab xnèz Dios, led grède to nac zha rien nèz lo miech, led grède to nac zha non, zha ne ziaadgaa lo grè dii ne nziuu lo zho. ²⁷ Per ib laa Dios nobedz grè zha ne rzac miech peet rien, grè zha ne rzac zho nac zha nsis, parne gunctoladz me grè zha ne rzac zho nac zha rac, zha non. ²⁸ Laa me nobedz grè zha ne sca rzac miech paat rquiin, zha ne rzac zho peet nond, parne guioog ro grè zha ne rzac zho nac zha non, zha nziuu. ²⁹ Ga rlu me ganle ni tib choot grieelod gacniats lo me. ³⁰ Golwi

ganle, niapse por me laa ne nacie Jesús, grè guielrac, grè guielrien ne rdziaap ne, Jesús bneedza, ni Jesús nac men ne psilaa ne lo grètaa xtol ne, men ne psanbe ne laa ne bziaab xnèz Dios. Dios bnabey sca goca. ³¹ Gacxe waa choot grieelod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grètaa ncuaane run me.”

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grè zha ne nac zha rac lo guidzliu rii; per blu Spiritu Sant ganle nacdada beelze pe wseed, ni blu ganle pa lotaa poder ne rap Dios. ⁵ Sca bne naa lo to, sac laa naa racladz zha ne gbig sèèb xnèz Dios, me gnalo zho, gnalod zho grè mine nac xquielrac miech.

⁶ Parga nli no zaatne rnee no grè diidz nroob, diidz ndzielguic, per laa min co rnee no lo grè zha ne rienraa zha nac Xtiidz Dios, ni nacdgaaw zigne nac grè xtiidz ndzielguic grèraa miech, grè diidz ne rleynie grè zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaane tibrded naca. ⁷ Grè diidz ne rnee no, ndzielguic naca, sac zhiwseed Diosa, lèè xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnand miecha padzeela, per nolew zeene

bzaa me guidzliu. ⁸ Grë miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nqua men ndzon ne nac Jesús ga lo cruz. ⁹ Zigne zhobneeque lo Xtíidz Dios, zaatne rnee:

Ncuaane wlaltaa gard guien miech,

nac grë mine quianiele Dios gdeed me lo grë zha ne nlipaa gbig lo me gleyne zho me.

Ncuaane choot gard gana, ncuaane choot gard gona.

¹⁰ Sangue no laa no ndionlew, sac pxeel me zhiEspíritu me blu lo no zha naca, men co nan grëse mine no guic me.

¹¹ Zig nacle tib miech, grielod gacnanpaa ne dien pe nac mine no guic zho, pe nacгаа mine rza zdoo zho, loxaque zhiespirituse zho nana; scaque Dios, loxaque zhiEspíritu me nan grëse mine no guic me gun me. ¹² Ni tel no, Espíritu co nacie no (nacnied no espíritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuaane nole guic Dios gneedz me lo ne. ¹³ Zeene rzeet no grë guielnzaac co, laa no rneew zigne rneedz zhiEspíritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspíritu mew, ni ible laaw nac par grë zha ne rioguicle zha racladz Espíritu co.

¹⁴ Grë zha ne nacnied zhiEspíritu Dios, cholze miech nac zho, grielod tsoguic zho zha nac grë mine rlu Espíritu co lo no. Rzac zho ncuaane paat rquiind naca, sac grielod guien zhow ne zhase. ¹⁵ Sangue zha ne rioguicle zha racladz Espíritu co, rien zho pe nac mine rlu me.

¹⁶ Ni nligaa zha guien zhow, zigne zhobneeque lo Xtíidz Dios,

zaatne rnee: “Choot grielod gacnan pe nac mine no guic Dios gun me, choot grielod glu lo me pe nac mine no gun me.” Per no, ndion now, sac grë ncuaane nan Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard grielo gne naa lo to zigne rne naa lo grë zha ne rioguicle zha nac mine racladz zhiEspíritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. ² Niapse ncuaane ligase ziseed naa to, laa ne cseed naa to ncuaane ndzielguic. Rrieequia nidzse nonedz naa quiaze to, laa ne gow to grë ncuaane row zha gol. Haxta ninagaa gard tsoguic to zha nac grë mine ndzielguic, ³ sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd glëëlsa to, rlozhd tillsa to. jLed squid gon no gac zha ne nole xnëz Dios! ⁴ Pe i na rrie bla to rnee: “Tel no xnëz Pabl no no”, rrieequigaa zla zha ne rnee: “Tel no xnëz Apol no no.” Gase rlu ganle zienalde to mine racladz Dios, sinque laa to zienal mine no guic to.

⁵ Nana, cho nac Pabl, chogaa nac Apol parne no yquiaaqui tsodil to? Nli no biadseed to Xtíidz Dios, per tib nguñdziin winse nac no lo me, bdziuun no mine rnabey me no. ⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. ⁷ Golwi sca ganle Diosse nac men non, sac me pchoob bni co, tel no peet ncuaane nroob bdziuund no, lëë gdib tib bloo bni liu, stib bgaala. ⁸ Zigtaa zha ne bloo bni liuw, zigtagaa zha ne bgaala, lal nac zho grop

zho; ni Diosse nac men ne gdeed mine rieguial zho tib tib zho por dziin ne been zho. ⁹ Tib ngundziin winse nac no lo Dios grop no Apol; laa to nac zig tib lë liu ne quiayan Dios, zig tib yu ne quiazaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuaa zhow, tsienal zho zigne nacse xcimienta ga, ¹¹ sac gon nod pe nacne csëeb zho stib cimient, tibaque cimient no, lëe cimient co nac Jesús.

¹² ¡Laa cimient co nole! Nana no zho gzaa yu co niapse guuib or, niapse guuib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa. ¹³ Zeene gdziñ dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa. ¹⁴ Zha ne pquiin ncuaañe rlëb lo gui, ib tedsod zgaa zho mine rieguial zho gdeed Dios lo zho; ¹⁵ laa zha ne pquiingaa grë ncuaañe znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnan ganle xyadoo Dios gon nac to, sacne zdoo to rbëz zhiEspíritu me. ¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸ Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nacpaa guielrac, guielrac ne rneedz Dios. ¹⁹ Sac gon grë guielrac ne no lo guidzliu rii, ncuaañe beelze naca nëz lo Dios. Zigne raquetaque lo Xtiidz me zaatne rnee: “Grë zha rac ne no lo guidzliu rii, lëeque lo grë

guielrac ne zienal zho, ga rlu Dios ganle paat rquiinda.” ²⁰ No stib zaatne rnee: “Nanle Dios grë zhgab ne nonie guic grë zha rac, ncuaañe paat rquiinda.” ²¹ Tsode to sca lozhd gacniats to dien cho xnëz miech guidzliu rii no to, golguien ganle grëtaa ncuaañe no, laa Dios psana par yquiina lo to. ²² Zig nac guidzliu, guielmban, guielgut, ladznia to now, niicle ncuaañe no niinaw, ncuaañe naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. ²³ Grëse to tibaque xnëz men ne no to, lëe men co nac Jesús, men ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ² Ni zha ne gon znu run tib dziin, ible none nguzobdiidz gac zho lo men ne rnabey zho. ³ Gacxe waa tel zha rzac to naa, tel zha rzacgaa grëraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa. ⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguial naa. ⁵ Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziuun no xtsiin me, dze co laa me gneedz mine rioguialpaa no tib tib no.

⁶ Bets, bzian, niina ne nozet naa no lo to nu grop no Apol, quiayunond naa naa, niicle

nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsode to lozhd dien cho non, chogaa nond. ⁷ Stiba, ¿cho nadien në lo to ne gunnon to to? Grë ncuaañe rap to, grë ncuaañe rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow? ⁸ Niats rac to, masaque rzac to grële zhiwseed Dios nañ to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso zho lo zha ne rnabey zho ret. ¹⁰ Ne znu quiaz-iuun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. ¹¹ Haxta lo nadze blactaa zatne retgbin no, zaatne retnis no, per ni lidz no, per ni lar ne dziaacw no guien, rdib rdzaag no rdzi-uun no dziin rdziniaa no ncuaañe rquiin no. ¹² Ni rlozh ga rrieeque miech rsacsi zho no. Rrieequia zha ne rdzibdee no, per rdziuun no gdzibdeequo no zho, sinque mazd rnab no lo Dios gunlay me zho; zha ne rtsidil no, rdziuuncasd no zho. ¹³ Rrieequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuaañe paat rquiindraa, zig rzac zho grë ncuaañe nole lo guizh.

¹⁴ Laa naa rzet grë min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle

rleynie naa to, rzaac naa to zig tib xpëed naa. ¹⁵ Niicle niaca mine ndal zha ne guiadseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rrieequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús. ¹⁶ Goltsoxco sca, golban zigne mban naa. ¹⁷ Ni ible mincopaa gon laa naa rxel Timoté ziaad lo to i, lëe stib xpëed naa i, ne nligaa rleynie naa me, tib zha nguzobdi-idz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxcoco naa mban naaw.

¹⁸ Rien naa no bla niats ne nac to i, rzac nlidraa guial naa lo to i stib. ¹⁹ Gacnañ zho ganle, gneedzse Dios diidz, ible laa naa none guialniob, dzigo bii dzian ne dien pe nli na nacie zho xpoder Dios, te loxaque rnee zho ye. ²⁰ Sac gon zha ne ngab xnëz Dios, grë mine rnee zho none glu nacie zho xpoder me, nacda loxaque diidzse. ²¹ ¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

5

Zha ne runctal xtol

¹ Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëeque xniala pchoob zho quiangob zho. ² ¡Yo na ne rzac to grële zhi-wseed Dios nañ to, gaxle zo to lo me! ¡Laa ne ctoladz to, laa ne tso to guien, cuee to zha qui lad to, lel no to rlozhd gacniats to!

³ Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguial gac zha co: ⁴ Grë to ne nac to zha ne ngab

lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵ Squi ndxie to grè to, golzonèz zha co, golcueegazh zho lo to i, tsie zho tsietsove zho ladznia mendox, ga tednè xcuerp zho guien zho ganle pe noyun zho; nand new togo zzhixcuuaa zho stib, zeena ycaania Jesús zho gal dze ne laa me gbiire guiaad.

⁶ iXlèse gon squitaa racniats to rzac to zha mbe nac to, ni randze to zha ne quiayun dolldox qui! iPe riende to telne glisquide to mine quiayun zho, ib tedsod zrieequiaraa zha ne squi gunctal xtol! ⁷ Zha ne squi nac, masaque nac zho zig nac grè guielguidzdox ne znuse rded; golcueegazh zho sca, zeena ine mbe gac to nèz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nèz lo Dios zig carner yeen ne rgogon zho lo me lni Pascw. ⁸ Golgotsaa gban ne zigne racladz Dios, grèse tel zha wban ne glo, grèse guielyozh, grèse guielntseeb ne bdziunun ne, none csaan new grèsew. Ndzinli sca golgac, goltsienal mine nac diidzli; none mbe gac to nèz lo Dios, zig guietxtil ne notsd ncobi.

⁹ Lo stib guits ne pxel naa lo to ga, laa naa psole diidz lo to ganle ctsieelsade to grè miech yozh ne ndzinlid mban. ¹⁰ Zeene sca pso naa diidz lo to, guiabde to togo naca parne ctsieelsadraa to grè zha ne gard gliladz Xtiidz Dios, zha ne rquiangob zha ne led tsieeld, grè zha ne zienal loxaque gunlo dimi, grè zha ne run guielgbaan, grègaa zha ne rnalo grè mdio. Led zha coda, sac laga mban ne lo guidzliu rii, ible zanlsa ne grè ne zho. ¹¹ Sinque zha ne bzet naa ga ctsieelsade to, nac zha ne nacle diidz xnèz Dios no zho, ni noque zho quiayunctal zho xtol

zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuuaane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nli-gaa zha ne sca nac, per ni tib guielwagw gowniede to zho. ¹² Tel grèraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow. ¹³ Sangue zha ne nacgrè ne, zeene noyun zho tib ncuuaane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rieguial glisqui tel pe nac ncuuaane nonguield run zha ne nacgrè to. Lèda i gon run to, zeene pe tib dil rap to, lèlèd zie to lo wxtis laa ne gbig to lo zha ne nacgrè to, zha csiooglo lo xtil to. ² iNiacxe nande to zha ne ngab xnèz Dios, zha co cobey zha nac xtol grèraa miech zeene gal dze ne laa Dios gnabeya? iPe nac dzigo grieelod tose csiooglo lo tel pe dil win ne rap to? ³ Haxta grè anjl name, ne gon cobey pe nac grè mine quiayun zho. Gacxe waa, grè dil ne rac lo guielmban rii, ne riogual cobey zha guiooglo low. ⁴ Sca gon gun to, led node to, rnadse pew laa to ziele lo wxtis. ⁵ iPe ni tib lè guielto guien lo to? Lo grè to, iNiacxe goon guien zha ne grielo gnee lo to, cuèz lo xtil to? ⁶ Nazdpaa rdziladz to dil, ipe i na lèèque zha ne nacgrè to quiadienie to, ni rlozh ga zieque to zienie to xtil to lo zha ne riladz Dios? ⁷ Pe riende to tib guieltodoxle i squi no to lèèque to quiadilisa. Mazd golxcw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrè to rsacsi to. ⁹ Nanle to ganle zha ne squi run guielntseeb, grieelod gdziñ zho zaatne rnabey Dios. Tsieniewguite guic to sca. Golsoladz ganle grèse zha ne run guielyozh:

zig nac zha ne rquiangob zha ne led tsieeld zho,

zig nac zha ne rquiangob zha ne nole tsieel,

zig nac zha ne nac mrazh,

zig nac zha ne rnalo grè mdio laa ne gnalo zho Dios,

ni tib zho grieelod gdziñ zaatne rnabey Dios. ¹⁰ Scaque:

zha ne nac ngbaan,

zha ne zienie guic loxaque dien zha gunlo dimi,

zha ne nac ngonziu,

zha ne rzhixcuaa diidzguizh,

zha ne rungüet miech par cuan zho zho;

ni tib zho ygaad guielnzaac co.

¹¹ Blalaa to bio lo grè dol co glo, sangue niina miech mbele nac to nêz lo Dios, laa Jesús ni Espiritu Sant psanle to zig tib zha ne peet xtold, laa me psanwenle to nêz lo Dios.

Gunctald zho xtol zho

¹² Nli ndal ncuaane zac gun ne, gunctalda xtol ne, niicle choot rcadgaaw, per led grèda rquiin. Tel naa, niicle no ncuaane zrieelo gun naa, per rund naaw; sac racladzd naa guien naaw, lozh ga lèew gnabey naa. ¹³ Zèeb diidz rnee zho: “Laa guielwagw biaan par gow miecha, scagaa zdoo zho laaw biaan par tsodzëw guielwagw.” Nli scaw, per guiabd ne togo por miñ co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdziñ dze ne gnitlo Diosa. Guielwagw ga na, sangue grè guielyozh nerun miech rquiangob zho zha ne led tsieeld zho, biaan ne par dziuun ne miñ co, sinque

laa ne biaan par gban ne zigne rdziladz Dios, sac me rnabey ne. ¹⁴ Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

¹⁵ Gulgacnan ganle, rrieequia lèe tiblè xcuerp Jesús nu gon nac ne tib tib ne. Nana, ipe nonguiela ga dzigo gdzieel tib lè xcuerp me ga xcuerp tib wnaa ro nêz? jNonguielda gon! ¹⁶ Sac gon zha ne raanie tib wnaa ro nêz, rrieequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui racgrop tib wnaa, tibaque miech rac zho ga grop zho.” ¹⁷ Scagaa zha ne rzèeb xnêz Jesús, tibaque rac zho grop zho me, zhiEspiritu me racnie zho.

¹⁸ Gacxe waa, gunde to guielyozh yquiangob to zha ne led tsieelde to. Lo grè dol ne no, miñ riise nac mine xcuerppaa miech rguitnie zho. Sac gon zha ne run guielyozh co, masaque rsanbeed zho zho ga. ¹⁹ Gulguien ganle, zha ne nole xnêz Dios, masaque zha nac zig tib yadoo zaatne rbêz Espiritu Sant, Espiritu ne rdeed Dios rbannie zho. Led nedraa rnabey xcuerp ne, ²⁰ Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuaane rnabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelniad ne. ² Per parne tsod pe yquiaaqui cho gun guielyozh, tsonie zho zha ne led tsieeld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsieel zho zigne rieguiala.

³ Zha ne ptsieelniale, zig nac mgui none gnee zho lo tsieel zho zeene racladz me, scaquegaa wnaa zeene racladz tsieel zho gnee lo zho none siguiel zho. ⁴ Sac gon wnaa ne rtsieelnia, led zhadraa rnabey xcuerp zho, sinque tsieel-le zho rnabeya; scaquegaa mgui zeene laa zho rtsieelnia, tsieel-le zho rnabey xcuerp zho. ⁵ Golguien sca, nicle mguiw nicle wnaaw nodne yca zho xcuerp zho lo tsieel zho. Laa telne rzacgaa zho none yquiind zho tsieel zho tib blalaa dze, sac rquiablazd zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsieel zho, sac gon zha ne grielod cxeew, nend ccheep mendox zho gon zho guielyozh.

⁶ Ne znu rne naa lo to, guiabde to nagon togo rne naa nopaa ctsieelnia to. ⁷ Tel naa, rzac naa wena tebaa grese to znu ctsieelniad, zigne nac naa; per na ncuane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho. ⁸ Zig nac gre zha ne bii tib, greгаа zha ne gutle tsieel, wena tebaa grielo scase guiaan zho, ⁹ per telne rien zho lebdcxcuerp zho, dzigo mazd ctsieelnia zho. Mazd wena ctsieelnia zho, ledle so zho tib zho ni tel rec rdzu zho.

¹⁰ Sangué zha ne ptsieelniale, laa naa rso diidz lo zho csaand zho tsieel zho, ni nacda xtudz naa, sinque ible sca rnabey Dios. ¹¹ Laa tel zha ne guiaabgaa csaan zho tsieel zho, zaca, per leeraasi grielodraa gbiire ctsieelnia zho, mazd mine naca telne zrieelow ycatsieel zho stib, o guiangaa zho tipse zho.

¹² Nu na ganle laa naa gnegaa chop lan xtudz naa lo zha ne led yed tsieel rliladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne

mbannie tib wnaa ne rliladz Xtiidz Dios, per telne rio guic wnaa gbannie wnaa zho, nodne csaan zho wnaa. ¹³ Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho. ¹⁴ Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed. ¹⁵ Nana, telne zhalgaa zha ne rliladz Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon zha ne rliladzle Xtiidz Dios, laa me bredz zho parne zaacse gban zho, bredzd me zho par tsodil zho; ¹⁶ stiba, nand zho dien pe zdzin dze ne gliladz tsieel zho Xtiidz Dios.

¹⁷ Mine naca tib tib to goltsoxco gon to mine rdziladz Dios. Zigtagaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene rliladz zho xtiidz me, none sca guiaan zho nicle telne rliladzle tsieel zho xtiidz me. Grese zha ne ngab lo me, diidz rii rso naa lo zho. ¹⁸ Zig nac gre zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodgaa bey co zeene rzëeb zho xnëz me, scaque nod pe nacne tsopaa zho bey co. ¹⁹ Mine mazdraa non lo me, gban zho zigne rdziladz me, guindraa ne dien cho no bey, chogaa nod.

²⁰ Zigne rneque naa ga, grese zha ne rzëeb xnëz Dios, tel zha nac zho zeene laa me bredz zho, scase none guiaan zho. ²¹ Zig nac zha ne nac ngundziin lo ben, peet tsienied guic zho guiab zho dien zha griee zho ladznia zha ne rnabey zho; per telne gdeeda diidz, zac tsoxco zho

dien zha griee zho lo zha co. ²² Zha ne sca nac ngundziin lo beñ zeene bzëëb zho xnëz Dios, guien zho ganle rriequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdgaa ngundziin lo beñ zeene bzëëb zho xnëz Dios, guien zho ganle tib ngundziinle nac zho lo Jesús niina, me rnabey zho. ²³ Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni toгаа, lo me none gun to dziin, gdeete to diidz lega gnabey miech to. ²⁴ Sca nasca gon bets gaca, tib tib to zigne nacse to zeene bzëëb to xnëz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guien tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. ²⁶ Grë ne ne nac ne zha ne riladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. ²⁷ Zha bgui ne na ptsieelniale-gaa, grielod gni naa guiaantib zho; sca mbannie zho tsiel zho; per tel zha ne gard ctsieelniaiw, mazd sobd guic zho ctsieelnia zho. ²⁸ Zha ne racladzpagaa ctsieelnia, zigtaa nguuiw zigtaa wnaaw, led dol d ga gun zho telne laa zho ctsieelnia; per gacnan zho ganle, zeene laa zho pcatsieel-le, ib tedsod nroob guielne ne gan zho por grë mine noyac len dze rii.

²⁹ Mine none guien to: zhisle nac dze ne so ne lo guidzliu rii, led nroob nac ngbidz ne grielo dziuun ne xtsiin Dios; gacxe waa, zha ne nole tsiel, mazd sac zho zho zig tib zha ne guien tsiel. ³⁰ Zha ne quianie dimiw, zha ne no guielbleya, zha ne nogaa guielnew,

gdeete zho diidz yca grë ncuuan co lo zho par gun zho xtsiin me. ³¹ Zha ne bienle runfalte grëtaa ncuane rquiin zho, gdeete zho diidz ctse grë ncuuan co lo zho, sac zigtaa guidzliuw, zigtaa grë ncuane no low, zdzin dze ne nitlow.

³² Mine racladz naa peet zhgab ctsed lo to. Golwi ganle, zha bgui ne tib, tiblque zienie guic zho run zho mine rdziladz Dios, mine nac xtsiin me. ³³ Laa zha ne no tsiel, grielodraa sca gac zho, sac laa guic zho zienie zha gbannie zho tsiel zho, zha grielo gun zho mine rdziladz me, min co rionieraa guic zho. ³⁴ Scaque grë men wnaa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsiel zho, dien zha grielo gun zho mine rdziladz tsiel zho, xco co rioraa zho.

³⁵ Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios. ³⁶ Zha ne quianie wnaa nguieg, telne rzac zho nonguielda ga scase ted lo xquielnguieg xpëed zho, sinque none ctsieelnia zho, peet nacda, led dol d ga ctsieelnia zho. ³⁷ Laa telne rzacgaa zho, wenraaw ctsieelniad xpëdwanaa zho, ible scale pquiabladz zho guiaan mëed, wenaque ga telne sca rzac zho. ³⁸ Wen ga gun zha ne sca gdeed diidz ctsieelnia xpëdwanaa, per mazdraa wen ga gun zha ne rzac mazd ctsieelniad xpëed.

³⁹ Nana, wnaa ne retgaa tsiel, nli zeene mban tsiel zho rnabey ley ne tsielse zho gbannie zho; per zeene laa tsiel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa. ⁴⁰ Per tel naa, rzac naa mazdraa wen gban zho telne tso-draa guic zho ctsieelnia zho stib;

sca nagon rzaac naa wena, ni led xtiidzde naaw sac rien naa led tibd naa, Espiritu Sant nacie naa.

8

Bëel ne rgogon zho lo mdio

¹ Stib wnaabdiidz ne run to ga, dien zha nac guielwagw ne rgogon zho lo grë mdio, pe zrieelo gdiioowa, te grieloda ye. Zootle na grële to nan min co; per no hor zeene squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dien zha gun zho parne tsoguicraa zho Xtiidz Dios. ² Zha ne rzac grëlew rac zho, ga rlu zho ganle peet riend zho. ³ Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, ðpe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegān miech led Diosd ga, tibaque men ne nac Dios no. ⁵ No zho rzac nziandox Dios, nziandox men rnabey no, no me no gbaa, no-gaa me no lo guidzliu, ⁶ sangue ne ndion ne ganle tibaque Dios no, lëe men co nac Pxoze ne, me psan grëtaa ncuaane no, me psan ne parne dziuunbey ne me. Ni scaquegaa, tibaque men ne rnabey ne, lëe me ga nac Jesús, me bzaa grëtaa ncuaane no, me nac men ne rneedz xquielmban ne. ⁷ Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiiin zho bëel ne rgogon zho lo mdio racchop guic zho, lëeque zha runctal xtol zho ga sca run zho. ⁸ Golguien sca, tel Dios rwid me dien cho pe row. Guiabd ne togo por gow ne o gowdga ne bëel co laa ne guianzuiu lo me.

⁹ Laa to nanle nasca, peet nacda yquiiin to guielwagw co, per sca-gaa golcobey adel min co yquiaaqui gunctal to xtol tib zha ne squi bii

racchop guic. ¹⁰ Sac gon, nenda tibiladz to zob to zaatne riegān grë miech mdio noquiiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho. ¹¹ Zha ne sca gun, niicle ne nli rien zho peet nacd ncuaane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz; ¹² gacxe waa, telne sca gun to por to yquiaaqui gun zho tib ncuaane rzac zho nonguield, lole Jesús ga quiayun to falt. ¹³ Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griel ni zho.

9

Mine rieguial zha ne run xtsiin Dios

¹ Zigne nagon zac gun to grë ncuaane wen ne racladz to, scaquegaa naa, zac gnab naa ncuaane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeene bialseed naa to, i rlu ganle me nacie naa.

² No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiayun naa. ³ Grë zha ne sca rzac nlid Dios pxeel naa, rzac zho peet raguiald naa, gacnan zho ganle: ⁴ jRaguial naaw gon! Ni grëragaa zha ne rdziuungza no xtsiin Dios, rioguial no gneedz to ncuaane yquiiin no, gneedz to zaatne gbiaaz no. ⁵ Tel naa, haxta raguial yquianie naa tib men wnaa ne gac tsieel naa, ine sënie naa me

zigne run grëraa zha ne rdziuungza no dziin rii, zig nac Pedr, zig nac-gaa grë zha bets men ne rnabey ne. ⁶ ¿Te loxaque grop no Bernabé naye znu zhaaque no dziuun no stib dziin, par gdziniaa no ncuaañe dioow no? ⁷ Golgan ganle, zig nac zha ne rzëeb lo xtsiin menguiib, ¿ni-acxe zhaa lo dziin ne rdziniaa zho ncuaañe row zho rio zho lo xtsiin menguiib? ¿Zha ne rangaa, niacxe rieguiald zho yquiin zho ncuaañe rac zaatne ran zho? ¿Zha ne na rangaa ma, niacxe rieguiald zho yquiin zho ma zigne racladz zho?

⁸ Guiabde to togo bod guicse naa riab mine rne naa nu, golgan ganle haxta lo ley ne psan Moisés ⁹ no tib zaatne rnee: “Zeeñe gunçun to xcon to dziin gzëeni ma mzion zhobxtil gacmbew, code to guixer ro ma, golsaan gow ma mine ygaa ro ma.” Golwi ganle zha rnee Dios, nana pe nan to ngonse rquia zdoo me. ¹⁰ Lëda gon, grëse ne rquia zdoo me ne. Ga rlu me ganle, zha ne run xtsiin me, ible rieguiald zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible rieguiald zho yquiin zhow. ¹¹ Tel no, rriequia nazho tib gon i bdziuun no biadseed no to Xtiidz Dios, ¿ni-acxe rioguiald no dzigo gneedz to ncuaañe yquiin no?

¹² Blalaa zha ne nale griin ri-aadted lo to i, rnabey zho to rdeed to ncuaañe rquiin zho, ¿pe lel no dzigo rioguiald gnaba lo to? Mazdraa gon rioguiald no gnab now, per haxta lo nadze gard dziuun no min co, notaa nan zha rdziniaa no ncuaañe rdioow no; zeena guiaand zdoo to, lozh ga laa to csaan mine nac Xtiidz Dios. ¹³ Led nanle to ganle, grë zha ne run dziin len xyadoo Dios, psan me diidz grë ncuaañe nac gon, ga xen zho pe yquiin zho, zig nac zha ne run dziin zaatne nac lo pcoog,

lo ncuaañe rielogon miech ga, ga rdioob ncuaañe row zho. ¹⁴ Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiin zho. ¹⁵ Per tel naa gon, wlaltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaid naa min co, sac rley naa znu quiyazhd naa quiyun naa xtsiin Jesús, mazd maase guetgbin naa, lëdle ctiche zho guielbley rii lo naa. ¹⁶ Niicle ne znu quiyazhd naa quiyun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw! ¹⁷ Noyund naaw par dien pe premio ygaa naa, sac zig rne naa ga Dios bzo naa, me rnabey naa quiyun naaw, masaque nacse naa zig tib ngundziin. ¹⁸ Par naa, lëele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaazho ncuaañe yquiin naa niicle ne raguial naa gnab naaw.

Tsoxco zho ygaa zho premio

¹⁹ Stiba mazdragaa wena, znu choot noneedzd ncuaañe yquiin naa, sac sca grielod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëeb zho xnëz Jesús. ²⁰ Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zienal xley zha Israel, niicle ne rnalodraa naa ley, per run naa grë ley ne zienal zho, zeena sca grielo yquiabladz zho sëeb zho xnëz Jesús. ²¹ Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuaañe rleyniedraa Dios run

naa. Laa naa run min co, zeena ye zho seeb xnéz Jesús. ²² Gré zha ne pense quiayacnan zha nac Xtiidz Dios, zeene no naa lo zho, rund naa gne naa gré ncuane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnan zho zha seeb zho xnéz Dios. ²³ Laa naa run min co, parne gdeeda diidz gnee naa Xtiidz Dios grése lo miech, ni scagaa, gley naa gan naa ye zho ygaa lo guielndzon ne zhobnee lo Xtiidz Dios.

²⁴ Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grése to goltsoxco xoon to zeena grése to ygaa tib premio. ²⁵ Gré zha ne sca rio tib lo wguir, par grielo gun zho gan rioxco zho ran zho xcuerp zho, rund zho ncuane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco ygaa ne tib premio ne gdzind dze nitlo. ²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaa-gaa puñet, rdeete zhow zaatne no ygaaw. ²⁷ Ni lalnu rdete naa diidz gac mine racladzta xcuerp naa, tibaque rnabey naaw parne guiena ncuane nonguiel min co none gūna, led gūnda ncuane racladztaaw. Laa naa run min co zeena gun naa gan, sac gon, guielto dox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

10

Nodne gleynie miech mdio

¹ Bets, bzian, golsoladz ganle zha bzhaac gré pxozgol ne zha ne sca bzênie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. ² Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

³ Grése zho gon milagr nroob ne been Dios, bnabey me bliaal guietxtil zhan gbaa bdeed me dow zho, ⁴ beencta me nis tib cho quie bdeed me go zho no zho dan bidz co. Lëele Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuua lo grétaa xli-aadz miech. ⁵ Niicle scataa gon Dios zho, per led gréd zho bioxco nion xtiidz me, nacne ndal zho bnitlo bioliuse zho dan co. ⁶ Gase na ganle gotsaa gwi ne zha bzhaac zho, zeena gzoobladzd ne dziuun ne gré ncuane ndzinlid ne been zho. ⁷ Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸ Gotsaa gwi ne ganle, pe guielne ne bgaa zho zeene briequia bla zho lega bionie wnaa, tib dzeque bnabey Dios gut galptson mil zho. iNi lalnu tsod guic to gun to min co! ⁹ Ib gunglëede to Dios, sac zha, zeene beungulëe zho me, bnabey me briequia gré meel pquiaa maw zho, ndal zho gut. ¹⁰ Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. ¹¹ Sca nagon bzhaac gré pxozgol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac

mбанpaa zho zigne racladz Dios, none nsin so zho zeena gund zho ncuuaane gunctal xtol zho. ¹³ Nli no ncuuaane rcheep ne gunctal ne xtol ne, per nacda ncuuaane griin rien. Pe zhidaa miech ne zieded lo min co. Tsod mine guiab ne ib lebd ne greee ne lo. Mine naca none gnalo ne Dios, sac tel me ib csaand me guiab ne tib lo ncuuaane glëbd ne greee ne; sca nac xtiidz me, ni mesi gon ctsëed me mine rnee me. Me nac men ne gacnieñ ne grieelo greee ne low.

¹⁴ Bets, bzian, golguien sca ib none csaan to grë mdio, gnalodraa tow. ¹⁵ Miech nixbiini nac to, grë mine rne naa lo to nu, nan to ganle ncuuaane rquiina. ¹⁶ Golwi ganle, zeene rdioow ne guietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me. ¹⁷ Niicle ne ndal nac ne, per ne tibaque guietxtil ne rdioow ne, min co gane tibaque cuerp nac ne grë ne, ni lëe xcuerp Jesús ga. ¹⁸ Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

¹⁹ Zha ne rnalogaa mdio, zeene row zho grë ncuuaane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰ Mine racladz naa guien to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëebde to lo grë zha ne quia-ownie mdio, zeena gacniede to mendox. ²¹ Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieque to, tsietow to zaatne rownie zho mendox. ²² iGunscaed to, gunglëede to Dios! iGolguien ganle, lebd ne dzian ne xquieiblëe me!

Zha gun zha ne rliadzle Jesús

²³ Zig rne naa ga: “Nli zac gun ne ncuuaane gacladztaa ne, per led grëda nonguiel.” Tel naa, zrieelo gun naa ncuuaane gacladztaa naa, per led grëda yquin par gun naa xyudar grëraa zha bets ne, lozh tsoguc zho Xtiidz Dios; ²⁴ sac gon, ib none dzioxco ne grëraa zha ne nacgrë ne. ²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to. ²⁶ Golguien ganle, Dios psan guidzliu, scagaa grëraa ncuuaane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoo to. ²⁸ Per telne grieequia tib zha ne gnë bëel ne biogon lo mdiow, gowde tow; zeena csande to zdoo zho. ²⁹ Niicle ne ndionpaa ne led dold ga gun to gow tow, per zha ne gana ga sadol zdoo zho.

Nana gnë to: “iPe nac dzigo por stib zho grielod gun naa mine racladz naa? ³⁰ Tel rded naa xquizh lo Dios zeene pe tib guielwagw ne rquiin naa, ipe nac dzigo por mine rzacse stib zho, grielod gow naaw?” ³¹ Golguien ganle, racda por zha cose; sac grëse ncuuaane dziuun ne, haxta ncuuaane dioow new, ncuuaane dio new, none zeene nodziuun new cxobnen ganle pa lotaa men nroob nac Dios. ³² Gotsaa guien ne sca ganle dziuund ne ncuuaane yquiaaqui csañ ne zdoo stib miech, zigtaa zha Israela, zha stib guiedza, zha ne nolegaa xnëz Dios. ³³ Tel naa, zanal naa ncuuaane gdziladz naa naase, sinque rioxco naa grëraa ncuuaane run naa, run naaw par gacnie naa grëse miech, zeena grieelo tso guic zho gnab zho lo Dios csilaa me zho lo xtol zho.

11

¹ Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxco to zienal to grè mine pseed naa to. ³ Per golsoladz ganle: grèse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. ⁶ Telne racladzdga zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grè zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. ⁸ Gotsaa gwi ne ganle, letxe xcuxtid wnaa waa biao mgui, sinque xcuxti mgui brie biao wnaa. ⁹ Stiba, zeene psan Dios wnaa, ib laa me psan zho par gacnie zho mgui. ¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grè anjl ne no gbaa zley zho gan zho min co.

¹¹ Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiinlsa zho; sac telne guiend wnaa guiend mgui, telne guiendgaa mgui guiend wnaa. ¹² Gotsaa gwi

ne ganle, zeene biao wnaa cho mgui brie dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. ¹³ ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguiela ye? ¹⁴ Golwi ganle ib no gdze guic wnaa, biaanle zho rroob guits guic zho parne ctsew lad guic zho; ¹⁵ tel zha, haxta rleynie zhow zeene scataa noola, sangue ne nac ne zha bgui, guieltow ga guiool guitsguic ne. ¹⁶ Tel nogaa zha ne rzac led scada, maase gnee zho. Per ible znu gon noseed no miech, ni grèragaa zha ne riladzle Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiaayunctal to xtol to. Mincosi nagon ni lalnu riod zdoo naaw. ¹⁸ Ziyon naa gzobtaa zeene rcaalsa to, pe na tsiegald tildiidz to, laa ne tipse gac to lel rlèelsa to. Ni rgobey naa nli scaw. ¹⁹ Rien naa masaque rzac to ible sca none gac to, parne glupaa cho nac zha ne non xtiidz, zeena guianzuiuu zho lo miech.

²⁰ Led zhixtseedraa Jesús i gon run to. ²¹ Sac ron naa zeene laa to row, masaque lèlèd rac to row to ncuaane zienie to, ib rwide to no zha ne rdzin ga quianied zho nroob ncuaane gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuaane row to. ²² ¿Mod guiend lidz to, ga sob to gow to, guie to haxta zaatne guieltaa to, led node to runctoladz to zha ne squi guiend pe yquiin? I gon rlu to rleyniede to grè zha ne no xnèz Dios. ¿Ni palal gon rdziguend naa ncuaane noyun to i!

²³ Gol̄soladz gan̄le zha nac ne laa xtsee rii biaan, Jesús psan̄ diidz gaca, sca gocnan̄ naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xp̄eēdsuel me, bzhen̄ me tib quietxtil, bdeed me xquizh lo Dios; ²⁴ blozhse bdeed me xquizh, nzian lē been̄ me quietxtil co, bdeed mew lo zho rēb me: “Gol̄quiina, rriequia lēē xcuerp naa nū, sac gon̄ znu gon̄ zho xcuerp naa parne csilaa naa to grē to. Gol̄gun̄ xtsee rii, parne glu to gan̄le tibaque rsoladz to naa.”

²⁵ Blozh ga, scaque bzhen̄ me tib cop no vin, rēb me lo zho: “Lēē stib trat cub nu gon̄ riaan̄ Dios grē me miech, rriequia xchen naa nu nac vin rii, ren ne tso sell trat co par glu nona. Gzataa zeene znu guie to vin, gol̄soladz gan̄le zha naca.”

²⁶ Gol̄guien̄ sca, zeene gun̄taa to xtsee co zaacse gol̄guna, sac gon̄, ga quiaxobnen̄ to lo miech Jesús nac men̄ ne gut xcuert to, psilaa me to. Tibaque none gon̄ to xtsee co, haxta gdziñ dze ne laa me guidaad stib.

²⁷ Gacxe waa, zha ne rieniewguit guic rquiind zho xtsee co zigne no yquiu zhow, dol̄ nroob ga run̄ zho, xcuerp Jesús ga, xchen me ga no-guitnie zho. ²⁸ Zeene gon̄ to xtsee co, none wen wen sob to gan̄le zha naca, pe nacre laaw rac, dzigo lozh ga zac yquiu tow. ²⁹ Sac gon̄ zha ne lega gow quietxtil co, lega guie zho vin co, sac zhow zig beelze pe xtsee; rriequia guiel̄nē ne ygaa zho ga gow zho, guiel̄nē co ga guie zho. ³⁰ Min̄cocxe waa, blactaa zha ne nacgrē to i quiayaan̄ nsis, no-gaa zho rzacnēle, haxta nzian zho gutle. ³¹ Tel̄ne niaca min̄e wen wen gwi ne gan̄le zha nac xtsee co, tsod pe nacre pe guiel̄nē ne cxeel̄ Dios dzian̄ ne. ³² Ni zeene scagaa rteed me ne tib caxtigw, laaw run̄ me parne tsa ne biini gbiire gbig ne lo me, zeena led yed ne nitlo gal̄

dze ne nitlo grēraa miech ne zianal̄ ncuaane lo guidzliu rii. ³³ Bets, bzian, gol̄guien̄ sca zeene ycaalsa to gon̄ to xtsee co, gol̄cuēz grēraa zha ne nacgrē to dzigo tipse gol̄silo gol̄quiina. ³⁴ Tel̄ zha ne rien̄gaa lēbd zho lozh gdziñ grēraa zha ne nacgrē zho, mazd gowgazh zho lidz zho, zeena yguibd zho ygaa zho guiel̄nē co.

No spalal min̄e racladz naa gacnan̄ to, per naa zeene guidā naa nēz qui dzigo gne naaw lo to.

12

Guiel̄biini ne rdeed Esp̄ritu Sant

¹ Bets, bzian, nugaa na gan̄le laa naa gzet zha nac guiel̄biini ne rneedz Esp̄ritu Sant, sac racladz naa wen wen guien̄ to zha naca. ² Rsoladz to gan̄le zeene gard gliladz to Xtiidz Dios, nēzrii nēzrec bio to güeygan̄ to stib stib grē mdio, ncuaane ni tib lan̄ diidz rneed; sangue Dios ne rliladz to niina, led scad nac me. ³ Per nsin gol̄so dien̄ cho nac zha ne noteedpaa xtiidz me, sac nzian zha ne rnee xtiidz Esp̄ritu Sant noteed zho lo miech, per tel̄ rzo zho rdzibdee zho Jesús, ga rlu rquidie zho. Sac zha ne nli nacie Esp̄ritu Sant, rdzibdeed zho Jesús, sinque rlu zho ne me rnabey zho, ni haxta dib zdo zho rnee zhow.

⁴ Tib tib zha ne rliladz Jesús, zhaase zhaase nac guiel̄biini ne rgaa zho, per tibaque men̄ ne rdeeda, lēē men̄ co nac Esp̄ritu Sant. ⁵ Nzian mod zrieelo dziuun̄ ne dziin lo Jesús, per grēse ne me rnabey ne. ⁶ Tib tib ne zhaase zhaase mod ne rlu Dios nacie me ne, per grēse ne me nac men̄ ne rlu zha dziuun̄ ne xtsiin̄ me.

⁷ Guiel̄biini ne rneedz Esp̄ritu Sant lo ne tib tib ne, laaw rneedz me parne dziuun̄lsa ne xyudar grē zha ne nacgrē ne gacndion̄raa ne zha racladz Dios.

8 No lo zho rdeed me guielbiini rien zho zha cso zho diidz lo miech, no lo zho rdeed me guielbiini rseed zho grë ncuaane ngañ ni rlu zhow lo miech.

9 No lo zho rdeed me guielbiini dib zdoo zho rnalo zho Dios, niicle ncuaane mazdraa ngañ rnab zho lo me, raça.

No lo zho rdeed me guielbiini zeene rnab zho lo Dios, riac grë men rzacnë.

10 No lo zho rdeed me guielbiini rnab zho lo Dios rac grë milagr,

no lo zho rdeed me guielbiini rteed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guielbiini rnee zho stib diidz ne gard cseed zho,

no lo zho rdeed me guielbiini rien zho pe rnee zha ne rnee diidz co, dzigo rnee zhow.

11 Grëse guielbiini, Espiritu Sant rdeeda, ni me nan pa mine rneedz me lo ne tib tib ne. 12 Lo grëse ne ne nac ne zha ne no xnëz Jesús, rriequia xcuerp me nac ne. Tel cuerp, niicle ne nzian part niaaw, per tibaque naca. 13 Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben, nogaa zho zonlaa, per grëse ne tibaque Espiritu ne nacie ne, sac tibaque Espiritu bгаа ne zeene brobnis ne.

14 Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. 15 Gacxe waa telne niaca mine rnee ni ne, grielod guiaba porne nacda nia ne, nacda xcuerp ne. 16 Scaque diag ne, grielod guiaba porne nacda bziaalo ne led yedraaw nac xcuerp ne. 17 Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipseгаа xcuerp ne niaa diag ne, ¿zha gzoobzhi ne?

18 Lëezhe wen led scad psan Dios xcuerp ne, sinque grëse part ne niaaw bzaa mew zigne gocladz me, psanse mew zaatne rquiina tib tiba. 19 Sac telne tipse niaa grëse part ne nac xcuerp ne, ¿zhazhe rlu ncuaan co! 20 Gocda sca, sinque zhaase zhaase nac tib tib part co, per grësew tibaque cuerp naca. 21 Gacxe waa grielod guiab bziaalo ne lo nia ne: “Ib rquiind naa luu”; guiaabгаа guic ne lo ni ne: “Ni lalnu rquiind naa to.” 22 Grëse part ne niaa xcuerp ne nose zaatne rquiina, haxta mine mazdraa nda lëe min co rquiinraa.

23 Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcoraa ne rdze; 24 sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. 25 Sca niaa xcuerp ne, grëse part ne niaaw rquiinlsaw xcompañera; led yeda rtsolsa. 26 Golwi ganle, zeene në tib part xcuerp ne, grëse part ne niaaraaw zienie në co; scaqueгаа zeene rdioon tib part co grësew zienie guielbley co.

27 Laa naa rne min rii lo to, sac racladz naa guien to sca none tipse gac to. Golguien ganle xcuerp Jesús i nac to grë to, tib tib part ne niaa cuerp co i nac to, rquiinlsa to zha ne nacgrë to. 28 Ni zigne sca tib tib part ne niaa cuerp nose zaatne rquiina, scaqueгаа grëse zha ne no xnëz me, bzose Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho rnab lo me rac grë milagr nroob,
no zho rnab lo me riac men rzacnë,
no zho rioxco run xyudar grë miech,
no zho rzo rac zho zha rnabey,

nogaa zho rnee grë diidz ne gard cseed zho.

²⁹ Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr. ³⁰ Niicle psodgaa me zho grëse zho gnab guiac men rzacnë, grëse zho gnee stib diidz, grësegaa zho gnee zha nac grë diidz co. ³¹ Zhaase zhaase nac guielbiini ne rgaa tib tib zha ne no xnëz me, per goltsoxco ygaa to guielbiini ne mazdraa rquuin.

Sca nagon naca, per golquiaadiaga ganle, nu laa naa gzet lo to stib minë mazdraa non lo grë guielbiini rii.

13

Guiewleynie

¹ Minë mazdraa rquuin gon nac ne gleynie ne samiech ne. Tel niaca minë bgaa naa guielbiini rne naa grë lose diidz ne rnee miech, haxta grë diidz ne rnee xanjl Dios rne naa, ni tel rleynied naa samiech naa, zpa dien rquuin rac naa grëtaa diidz co? Rrieequia nac naa ga zig tib lë guuib ne loxaque rzedz.

² Tel niaca minë rteed naa xtiidz Dios lo miech, rien naa pe nac minë naraa cxobnen me, grëse wseed ne no rien naa, ni rleynied naa samiech naa, jpaat rquiinda! Tel dib zdoogaa naa rnalo naa Dios, haxta ncuane mazdraa ngan rnab naa run mew, ni rleynied naa samiech naa, jpeet nonda!

³ Tel quiizgaa naa grë ncuane quianie naa lo grë zha ne guiend pe yquuin, haxta gded naa naa tsec naa, per tel rleynied naa samiech naa, jzhlëse ga gun naa min co!

⁴ Sac gon zha ne nli mban zigne nac guiewleynie co: rieednied zho samiech zho, wen rac zho lo samiech zho, racnëd zdoos zho, niicle ran zho wenraa noded stib miech lo zho, rund zho ne lëëque zha gunnon zho,

racniatsd zho lo samiech zho,

⁵ rund zho ncuane coguieinë zho, gunglëëgaa zho samiech zho, zienald zho ne tebaa lose zho yquuin grë pe cos,

nacd zho zha ne lega zolëë, rapguieinëd zho samiech zho,

⁶ ni lalnu riod zdoos zho minë run zha ne rsacsi samiech, minë rleynie zho nac diidzli.

⁷ Zha ne nli rleynie samiech, ni lalnu peet grieelod yca gleynie zho zho; rquiaadiag zho minë rnee zha co, rzhidznied zho zho; tibaque rquiabladz zho wen greequia zho, rsaand zho zho, tibaque racnie zho zho.

⁸ Zdzin dze yquindraa cho cteed xtiidz Dios lo miech, yquindraa gnee zho stib diidz, yquindraa grë guielrac, sangue guiewleynie gdzind dze ne nitlow. ⁹ Niicle ne nogaa ne guielbiini ne rneedz Espiritu Sant, niicle no zha ne rien zha gnee zho Xtiidz Dios lo miech, per palase nac ncuane rien ne niina. ¹⁰ Sangue gal dze ne laa Dios lozh gzhixcuuaa ne zigne no gac ne, grëse guielbiini ne rdziaap ne niina, paat yquindraaw.

¹¹ Masaque nac ne niina zig tib mëëdlas. Tel naa, zeene goc naa mëëdlas grëse ncuane bne naa, grëse ncuane bien naa, grëse ncuane pseed naa, grëse ncuane co ben naaw zigne run grëraa mëëdlas. Per zeene laa naa broob, laa naa baa biini, grëse ncuane co laa naa bienpaa zha naca; laa guielmëëdlas co bded. ¹² Scadaa nagon rziaac ne niina, palase rien ne zha nac Dios, rrieequia rdzianse ne me niina zigne ran ne zhimlë ne lo beelze pe tib lë vidr; per dzdzin dze laa ne dzianlo me zigne nacpaa me. Palase ndion ne niina zha nac me, palase rsilo rdzian ne me, per gal dze co laa ne dziuunbeypaa me zigne runbey me ne niina, nappaa me zha nac zdoos ne tib tib ne.

¹³ Golgacnan sca ganle, grë guielbiini co zdziñ dze ne yquindraaw, sangue ne znu: dib zdoo ne rnalò ne Dios, noniepaa guic ne zac minè rnee me, ni rleynie ne samiech ne, lozhda. Per lo gza tsona nagon, guielwleynie co nac minè gdziñd dze ne gdzëe.

14

Zha ne rnee stib diidz

¹ Laa to nanle pa min nac minè mazdraa non, jgolleynie samiech to sca! Per scagaa golnab yгаа to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, golnab yгаа to min co zeena sca grieelo cseed to miech xtiidz me.

² Sac tel zha ne rgaa guielbiini rnee zho stib diidz, zeene rnee zho diidz co choot riend dien pew, sac lo Dios ga rnee zho. Tel pe nac minè rnee zho ga, Espiritu Sant rsiaaba guic zho, per choot racnand dien zha naca. ³ Sangue zha ne rgaa guielbiini rteed zho xtiidz Dios lo miech, minè rnee zho ga rquiina par tsoguicraa miech zha racladz me, par guien zho pe nonguieł gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guielbiini co, sac zhase rioguicraa zha racladz Dios; sangue zha ne rteed xtiidz me, diidz ne rnee zho rquiina lo grëraa zha ne no xnëz me, grëse zho rioguicraa zha racladz me. ⁵ Wena tebaa grëse to yгаа guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac min co mazdraa rquiin, lëdle gnee to stib diidz. Zacaquegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grëraa zha ne no xnëz me. ⁶ Bets, bzian, to gase nadien, tel niaca minè glanso naa lo to i csilo naa gne naa stib diidz, zpa dien yquiina lo to? Per tel

glanso naa, ine csilo naa clar gne naa lo to pe nac minè zinee Dios lo naa, pe nac grë minè rien naa, pe nac minè ziaadyob gac, zha nac grë minè zhobnee lo Xtiidz Dios, led grëse min co zien to zha naca, ni squiina lo to grëse to.

⁷ Haxta grë ncuaañe rool miech, zig nac bzie zig nacgaa vihuel, tel csilo zha ne noyool a tel zhataa gool zhow, z zha dien guien miech pa di noyool zho? ⁸ Zig nacgaa zha ne rcuedz cornet lo menguiib, telne tel zhataa ycuedz zhow, z zha dien gacnan menguiib pe nac vis ne quiyun zho? ⁹ Scadaa nagon run to zeene rnee to stib diidz lo miech, z zha nadien guien zho pe nonee to? Rriequia lo mese ga rnee to. ¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. ¹¹ Telne guiaad tib zho lo naa csilo zho gnee zho, ni riend naa pe quianee zho, grieelod guien naa pe racladz zho, guienгаа zho zha rzaac naa.

¹² Nana sca, zha ne rquiabladz yгаа guielbiini ne rneedz Espiritu Sant, gnab zho yгаа zho minè grieelo yquini lo grëraa zha ne nacgrë zho, zeena grë zho tsoguic zha racladz Dios gban zho. ¹³ Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech; ¹⁴ sac zha ne sca rnee stib diidz, tel so zho gnab zho lo Dios, riend zho pe nonab zho, lox- aque zhiespirituse zho quianee ga. ¹⁵ Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, minè riengaa grëraa miech. ¹⁶ Sac gon tel stib diidz nonee ne noyoolnie ne Dios, nodeed ne xquizh lo me, z zha dien yquiab grëraa zha ne ndxie ni riend zho pe rnee ne? ¹⁷ Niicle ne ndzon sca nodeed ne xquizh lo Dios, per

zha ne noquiaadiaga ga, paat yqui-
inda lo zho.

¹⁸ Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, ¹⁹ per zeene zo naa zaatne ndxie grê zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, lëdle so naa gne naa tsii mil diidz, ncuaane ni tib choot guiend.

²⁰ Bets, bzian, golguien sca golsaan guielmëedlas qui. Zaccagaac gac to mëedlas per nêz lo guielntseeba, sangue xpensar to golgac zig zha ne biao biinile.

²¹ Gotsaa gwi ne ganle zha nac stib diidz. Zhubnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guiend zhow. ²² Gase naganle rlu rquiind stib diidz co par grê zha ne rnalole Dios, sinque laaw rquiin parne grê zha ne nod xnêz me gan zho ganle nli no me. Zha ne nole xnêz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me. ²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëetaa mine guiab zho rzhinle guic to sca rac to. ²⁴ Laa telne grêse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta ziaa zho biini zien zho ne nli tib miech ngoopdol nac zho. ²⁵ Zigse quianee to laa zdoos zho lozh yguudz, laa zho ted yquiitsgzhib zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zig-taa zha ne goola, zha ne cteed xtiidz Diosa, zha ne gnee stib diidz, zha ne gneegaa zha nac diidz co, none tsienie guic zho mine gun zho ga laaw yquiin parne tsoguicraa los demas zho zha racladz Dios gban zho. ²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. ²⁸ Laa telne guiend zha ne grielo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëetaque nonee tib zho, ni csiaab Dios guic stib zho gnee, dzigo none cuëz zha ne quianeele ga zeena grielo gnee zha co. ³¹ Sca none gaca, none tibga tibga zho gnee, zeena grêse zha ne ndxie grielo gon zho dien pew, parne cseed zho, ni gacnguieelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdzin hor ne gnee zho. ³³ Sac tel Dios, rdziladzd me guiots gnaaz pe cos, rdziladzd me ncuaane nzhiitni. Mine rdziladz me zaacse gac tib cos, ni scagaa run grëraa zha ne no xnêz me.

³⁴ Ni stiba, zeene sca rcaalsa to, racladz naa guien grê men wnaa dzese sob zho. Nodne so zho ye zho gnee, sac gon mgui rnabey zigne zhobneeque lo Xtiidz Dios.

³⁵ Ncuaane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëepaaze wnaa gnee zaatne rcaalsa to rquiaadiag to Xtiidz Dios.

³⁶ Zaacse sca golgac, golguien ganle grielod gun to mine notaa guic to, sac gon led loxaque todse nac zha

ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne rapгаа pe stib guielbiini ne rneedz Espiritu Sant, zha co gunbey ganle nli mine rnabey mew. ³⁸ Zha ne gliladzdgaa, maase gliladz zhow.

³⁹ Sca nagon naca. Goltsoxco sca yгаа to guielbiini teed to xtiidz Dios lo miech, zeena gacnan zho zha racladz Dios gban zho; per scaгаа, ib ycade to tel cho zha ne rnee stib diidz. ⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

15

Brieaban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa riladz tow. ² Lëew rlu zha grieelo ycaania Dios to, totsaque nli dib zdo to bliladz tow, ni bii lëegaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios. ⁴ Gocnan to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios. ⁵ Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. ⁶ Güey me güeyted me zaatne ndxie ndziibsrää gaay gayoo zha ne nole xnëz me, grëse zho gon me; ndal zha co bii mban niina. ⁷ Bded ga gonaque Santiagw me, ni biire güey me lo zha ne bzënie me ga stib; ⁸ goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed

ne rzamëed, ⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne gloopaa bzëeb xnëz Dios. ¹⁰ Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo mine noyun grëraa poxtl; per rned naa togo naase quiaayuna, sinque me noyacie naa rrieelo noyun naaw.

¹¹ Laa naa rzet min rii, per nacda par glu dien cho nroobraa noyun xtsiin me, sac mine mazdraa non nac ne noseed no miech Xtiidz me; lëew biadseed no to, ni bliladzdgaa tow.

¹² Nana sca, racladz naa gnë to dien zha nacne no bla to i rnee nlid grieaban mengut; led wen wen name gocnan to brieaban Jesús. ¹³ Telne rnee to nlid grieelo grieaban mengut, rrieequia gon rnee to ga nlid brieaban Jesús. ¹⁴ Nana telne brieaband me, paat rquiind mine dzigo noseed no miech nu, zhlëse znu noteed-xtse ne rnalo ne Dios. ¹⁵⁻¹⁶ Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieaband mengut, ye Jesús dzigo bii noliu me niina. ¹⁷ Stiba, telne nlid brieaban me, zhlëse dzigo rnalo to me ycaania me to; telne nlid brieaban me, scase bii zëeb to grë xtol to. ¹⁸ Grë zha ne bliladz me, zha ne nacle mengut niina, lëe bnitlole zho ga dzigo. ¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnan to sca ganle, jbrieaban Jesús! Me nac men ne gloopaa brieaban lo grëraa miech guizhiu ne grieaban. ²¹ Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús biaad, por mine been me grëse mengut laa

zho none grieëban. ²² Zigne grëse miech ret porne ziaad zho lo xti Adán, scaquegaa grëse zha ne gbig lo Jesús, zгаа zho tib guielmban ndzon. ²³ Ible sca none gaca, ndion ne ganle laa Jesús brieëbanle, ni zeene laa me guiaad, grë zha ne no xnëz me laa zho grieëban. ²⁴ Gal dze co laa me lozh gnitlo mendox ni grëraa ma ne nacie ma, dzigo laa me csañ grëse miech ne no xnëz me ladznia Dios men ne nac Pxož me; dze cotaa nagon laa Dios guñ guielwxtis. ²⁵⁻²⁶ Sac ible Jesús nonabey haxta gdziñ dze co, zeene laa me gnitlo grëse meyožh ne rlëë lo me; zig nac guielgut, lëëw nac miñe lultm gnitlo me. ²⁷ Zigne zhobneeque lo Xtiidz Dios, ladznia me biaan grëtaa ncuaane no; per guiabd ne togo ye Dios no ladznia me, sac gon Dios nac men ne bdeeda lo me. ²⁸ Gacxe waa, zeene gal dze ne laa me sca lozh gnitlo grë zha ne rlëë lo me, Pxož me nac men ne gnabey lo me; sac gon men co gocnie me been me gan, ni men co nac men ne rnabey.

²⁹ Nana, ne rnee to i nlid rrieëban mengut, ¿pe nac dzigo no zha ne rrobnis xcuent zha ne gutle? ³⁰ Telne niaca miñe nlid grieëban mengut, ¿pe nac nadien znu gzataa dze quiabeeladz no no lo grë guielxtseeb? ³¹ Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, miñe rnee naa nu diidzliw. ³² Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Telne nlid grieëban mengut, zhlëse dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “¿Golgotsaa dioow ne, golgotsaa dio ne, benque guielgutse quiambiaaz ne!”

³³ Per lëda ga gon. Zha ne zianl min co, ib yquiaadiagde to xtiidz

zho, zeena gacde to zigne nac zho; zigne zëëbaque diidz: “Telne ndzinlid miech ne ctsieelsa luu, dzziñ dze ne gac luu zigne nac zho.” ³⁴ Golquix biini sca, gunctaldraa to xtol to; pe rtoladzde to, golwi ganle no bla to i gard sëeb xnëz Jesús, haxta ni riend zho zhapaa nac Dios.

Zha grieëban mengut

³⁵ Nana, no to gnë: “¿Per zha grieëban mengut? ¿Zhazhe nac cuerp ne grieëbannie zho?” ³⁶ ¿Aque nxen wnabdiidz co! ¿Pe rande to zig nac grë midz ne rio liu rac bni, rlozhse rnitlo midz co dzigo laa guizh ne naca g rlan? ³⁷ Tel rnee to zha nac cuerp ne grieëbannie zho, golwi ganle zig nac zhobxtil, zig nac grëragaa midz, ¿pe niacxe zigne nacsew riow liu, scasaque naca rlana? Led zeene laaw rlan, guizhle naca. ³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan. ³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle mag-aaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. ⁴⁰ Grë anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹ Gotsaa gwi ne ganle, zig nac xbiini ngbidz zhaa naca lo xbiini mëë, lo xbiini-gaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna. ⁴² Scadaa nagon, zhaa rlu cuerp ne rap miech niina, ni zhaa-gaa glu miñe ygaa zho zeene laa zho grieëban. Cuerp ne rdziaap ne niina, ncuaane tib rded naca, sangue cuerp ne grieëbannie ne gal

dze co, led yedraa miñ co nitlo. ⁴³ Mban nac cuerp rii, sac rzacnëw, reta; sangue cuerp ne grieebannie ne, tib cuerp ne gdzind dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴ Cuerp ne rdziaap ne niina, tib cuerp ngoopdoł naca, sangue cuerp ne grieebannie ne, miñ co gac tib cuerp ne gban zigne racladzpaa Dios. Sac zigne znu no cuerp ne rquiin lo guielmban rii, scaquegaa no miñe yquiin stib lo guielmban ne gneedz Dios.

⁴⁵ Gołsoladz ganle, rnee lo Xtiidz Dios Adán goc miech ne gloopaa biaan ni Dios nac meñ ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. ⁴⁶ Scaque nagon, glo rgaa ne cuerp ngoopdoł ne rdziaap ne niina, dzigoraa ygaa ne cuerp ne gban zigne racladzpaa Dios. ⁴⁷ Gotsaa gwi ne ganle, zeene biaan Adán yudiese bzaa Dios me; sangue Jesús, meñ gbaa nac me. ⁴⁸ Grëse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gapple tib cuerp zigne nac xcuerp me. ⁴⁹ Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús. ⁵⁰ Gołgacnan sca ganle, cuerp ne rdziaap ne lo guidzliu rii, grieelod gdziña zaatne rnabey Dios; sac rdziñ dze ne rnitlow, grieelod gaca tib cuerp ne guete.

⁵¹ Wen wen gołzoobdiag miñe gne naa lo to nu ganle, wlałtaa choot gard gacnaña: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stseë Dios xcuerp ne. ⁵² Znuse gac miñ co zig nacse zeene riab tib belye; læë miñ co gac lultm vuelt ne ycuedz xanjł Dios zhitrompet zho. Zeene sedz trompet co, hor co grëse zha gut, laa zho grie-

bannie tib cuerp ne gdzindraa dze nitlo; scagaa grë zha ne bii zomban, hor co laa xcuerp zho gdzëë. ¡Grëse ne dziaap tib cuerp cub! ⁵³ Ible sca none gaca, ib none gdzëë xcuerp ne gaca tib cuerp ne xiñd, tib cuerp ne gdzindraa dze nitlo. ⁵⁴ Zeene gac miñ co, ga grieequia miñe raquiet lo Xtiidz Dios zaatne rnee: “Nasi laa guielgut bnitlo, guielmbanle nac miñe rnabey. ⁵⁵ Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?” ⁵⁶ Grieelodraa pe guñ guielgut ne hor co, sac led yedraa hor co tso doł, led yedraa hor co gnabey ley; sac por doł gane rrieelo rsacsi guielgut ne niina, ni por ley rlu pe nac xtoł ne. ⁵⁷ ¡Xquizh xquielnzaac Dios pxeel me Jesús, sac gon por Jesús zrieelo grie ne ladznia guielgut!

⁵⁸ Bets, bzian, ne nac to zha ne rleynie naa, gołguien sca tibaque dziits gołso lo Xtiidz Dios; zig zie dze gołsoxcora gołguñ xtsiin me, benque nanle to ganle, grëse xtsiin me miñe rdziuuñ ne nacda ncuane zhlëse.

16

Gon ne guey Jerusalén

¹ Laa zig nac gon ne noyaclo guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

² Tel palal run to gan tib len zhmal, lo co gołcob miñe ral zdoo to gdeed to gac gon co; gzobse dze gołtsiesana lo zha ne noyunlow. Adeł na ganle haxta glansoraa naa i, dzigoraa no to dien zha topa. ³ Ni gołzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; ⁴ ni tel rquiinpa-gaa ye naa ga, dzigo na maase ga naa ganie naa zho.

⁵ Len dze rii no guic naa gateed naa nëz Macedon, dzigo gale grie

naa glanso naa lo to i. ⁶ Nend zbëz naa lo to i palal dze, togo iguegaa teed naa len më näl ne ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co. ⁷ Telne zneedz Dios diidz cuëz naa lo to grë len dze co, zbëz naa, sac racladzd naa tib gualteed naa lo to i. ⁸⁻⁹ Niina ne no naa Efës nu, len dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted lni Pentecostés. Nligaa ndal zha ne no liaadz co, per scagaa ndal aque zha ne rtsidila.

¹⁰ Nacle diidz laa Timoté guiaad i; tel nan d new naraa guiaad me, gol siguiel zeene glanso me zaacse golcaania me, zaacse golcuëzlo me, zeena tsonley zdoo me; golgan ganle, ye me quiayun xtsiin men ne rnabey ne. ¹¹ Golguien csa nwinde to me, sinque golgap me respet; zeena zeene glanso me lo naa nëz rii ine nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadna raa zhits me.

¹² Sangue bets ne Apol, blactaa bnaab naa lo me niaadgza me zha ne ziaad i niaadgan me to, per rzac me grieloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque golnalo Dios. Ib ctsëede to xtiidz to, tibaque golto xco tsienal to mine rnabey me. ¹⁴ Ncuanea guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús. ¹⁷ Rley naa gon

zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa. ¹⁸ Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

¹⁹ Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel bdiuzh lo to. ²⁰ Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

²¹ Nu laa naa cso schop lan xtidz naa lo to, ni golwi ganle naazhal yquiaw: ²² Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me! ²³ Mese nac men ne gacnien to, me nac men ne no zhixco to, sac ne nligaa rleynie me to.

²⁴ Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca!

Pabl

BROP GUILTS NE PXEEĽ PABL LO ZHA CORINT

¡Diuzh to grēse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grēse to ne nac to zha ne ngab xnēz Dios; zigtaa tow, zigtaa grēragaa zha ne no dib nēz Gres iw.

² Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebbe to.

³ Bets, bzian, golgotsaa gwi ne ganle, jzha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne ⁴ lo grētaa guielnē ne rdieed ne. Ni laa me rchoobladz zdoo ne gon, zeena scagaa grēraa zha ne rdzian ne no guielnē, mban rac zho, guio ne guiochoobladz ne zdoo zho zigne rchoobladzaque me zdoo ne.

⁵ Zig nac niina, nroob guielnē ne nodieed no loxaque ne rililad no Jesús, per scaquegaa ib rsaand me no tibaque nochoobladz me zdoo no. ⁶⁻⁷ Laa no nodzian grē guielnē rii, sacne noxco no nonee no lo miech zha laa zho lo dol, parne scagaa grieelo choobladz no zdoo to. Lo grē guielnē rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdzin dze ne laa to gan grē guielnē ne nodzian no nu niina. Ni me gon nac men ne gacniē to glēb to gan tow.

⁸ Bets, bzian, tel niaca mine nian to ganle zha nactaa grē guielnē nroob ne bdieed ne zeene no no nēz Asia. Ne nligaa nroob psacsi

zho no, ncuane lēbdraa no lo grē guielnē co, tibaque rdzieets no bod gataa niet no. ⁹ Masaque bzhaac no len dze co zig rzac tib zha ne nole guet, laa zho quiambēzse gal hor ne guet zho. Garaa bdzion no peet grieelod dziuun no ne nose, sinque Dios none gnalo no, mese zac csilaa no lo grētaa guielnē; sac tel me, haxta men gut rbeeban me.

¹⁰ Ni nligaa blee me no lo guielnē co, bla me no lo guielgut co; ni ndion no scaque zla me no lo grēraa guielxtseeb ne dzian no, ¹¹ totsaque gacnie to no tibaque gnab to lo me gacniē me no. Zeena, tibaque gac ne grēse ne gdeed ne xquizh lo me.

¹² Rley no sacne rien no choot no quidied miech, ndzinli mban no, zigtaa zeene zo no lo tow, zigtaa zeene zogaa no lo grēraa miecha. Per guiabd ne togo por niini now, sinque ne nquialadz Dios no gane quaiyacniē me no znu mban no. ¹³ Grē mine rnee no lo guits ne zixeel no lo to, niapse diidzliw, ni mine rgobey no grieelo guien to min co rquiaa no; gane racladz naa gdzin dze ne guien tow. ¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guidaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nēz Macedon. Ni zeene mbire naa nēz co, nialteedaque naa lo to i stib; zeena niac chop vult ne nionley zdoo to. Lozh ga, ine niowse nzonēz to naa nia naa nēz Judé. ¹⁷ Ni pasēe naa nial. Per guiabde to togo bod notiblid guic naa zeene sca bne naa, o nacgaa naa zig nac grē zha ne laglaase rnee tib diidz, laa len zdoo zho nanpaa zho gund zhow. ¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgan ganle, zigtaa naaw, zigtaa Silvana, zigtagaa Timotéw, no

biadseed to cho nac Jesús, meñ nae nac Xpëed Dios; ni zig nac Jesús, rquidied me. Grëse mine rnee me run mew, ²⁰ ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa meñ nroob nac me. ²¹ Ni lëë Dios co gon nozhixcuaa lo xquielmban ne, laa ne ngab xnëz Jesús niina; me bzooblo no noonee no Xtiidz me. ²² Haxta pxeel me Espiritu Sant zdoo ne, rrieequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bneelee me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladzd naa loxaque guialquiago naa to i, lozh ga mban gac to. ²⁴ Guiabde to sca togo bod racladzd no guiaad no. Nli rquiindraa to guidanee no lo to zha gliladz to Dios, sac dib zdoole to rliladz to me; per laa no racladz ine guiaadlonley no zdoo to i. Golguien sca, min co racladz no, racladzd no guiaadloguielnë no to.

2

¹ Min co nagon bend naa ne nial naa, ² sac nonguielda ga coguielnë naa to, ni to nac zha ne rgonley zdoo naa. ³ Ne racladzdaxe naa min co waa, gane pxel naa tib guits co lo to glo, zeena nzhixcuaale lo guielto ne nobee to i, zeene laa naa nlanso. Sac tel lega nlanse naa, laa ne ndzio ne guielbley, lel guielnë ndzio ne. Ni nan to ganle, tipse nac guielbley ne rdziaap ne; ¿niacxe zrieelo nley gac to telne ran to mban rac naa?

⁴ Tel gan to ganle zeene pxel naa guits co, jne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguielnë naa to; sinque laaw

pxel naa, zeena xixcuaaniob lo ncuaane ndzinlid ne noyac i; ni laa naa ben min co sacne rquia zdoo naa to. ⁵ Zeene bin naa zha nac dol ne noyun zha co i, zig rne naa ga: bio naa guielnë; per rien naa mazdraa nroob bio to guielnë. ⁶ Nana gon, ne squi laa to pteedle zho tib caxtigw, jleëlew ga na! ⁷ Golguiaanladz mine been zho ga, golneewen lo zho stib, golchoobladz zdoo zho zeena gacmband zho. Sac telne csaanladz to zho, nend scase lozh guiuu zho lo xquielnë zho. ⁸ Rnab naa lo to, golleynie zho stib, zigne rleynieque to zho glo.

⁹ Ni stiba, laa naa pxel guits co lo to, zeena dien pe zon to didz gun to mine rne naa lo to ga. ¹⁰ Golguiaanladz mine been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to; ¹¹ ni scagaa gleyd mendox gungüet ma ne. Led nanle to ganle, zombëzle ma dien zha gnitnëz ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdzin naa ga, ne nligaa bneedz Dios diidz niun naa xtsiin me ga. ¹³ Nac diidz ga ndzieelo naa bets ne Tit, per zeene gon naa bdzind me, biotiblidraa guic naa. Nacne brieque naa ga bia naa nëz xtan zha Macedon, biaguib naa me.

¹⁴ Per, jxquizh xquielnzaac Dios! Sac zaatne ziotaa no, Jesús ner lo no, me rlu ganle rdziuuñ no gan lo grëtaa ncuaane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzëbxlaa tib ncuaane nex rlaa. ¹⁵ Haxta no, masaque nac no lo Dios zig tib ncuaane sca nex rlaa; sca nac no lo me sacne laa no ngable lo Jesús. Nëzrii nëzrec nex zëbxlaa gox co, zigtaa lo grë

zha ne ngable xnèz Diosa, zigtagaa lo grè zha ne zie nèz ne nitlow. ¹⁶ Par grè zha ne nole nèz ne nitlo, masaque rzac zho no zig tib gox ne nguïd rlaa, haxta rsoladz zho pe nac guielgut ne quiambèz zho; sangue grè zha ne nole xnèz Dios, rzac zho no zig tib gox nex ne runcsoladz zho guielmban ndzon ne no yгаа zho. ¡Ni led chold zha ne gon grieelo gun dziin rii! ¹⁷ Nu rquiin zha ne dib zdoo rquiablaz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho runa par cuee zho dimi.

3

¹ Nana ne znu rne naa, guiab to bod yeque no rdziuun zig run zha ne sca rquidie ga, lèëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziuunnon no no, niicle peet diidz rquiindgaa no. ² Led yed no rquiin pe diidz ne dzeey no, to rlu cho nac no. Grèse miech ne gan zha notsëë Dios lo xquielmban to, gase gunbey zho no, ga glu pe nac dziin ne rdziuun no. ³ Gane rrieequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindgaa me pe lo guits ne nquiaa mew, sinque laa me pquiaaw zdoo to.

⁴ Ni ndionpaa no nli scaw, sac Dios zhal rluw, ne nac no zha ne ngab lo Jesús. ⁵ Per guiabd ne togo nose rrieelo rdziuun grè mine rdziuun no, led scada, Dios nac men ne racnien no rdziuun now; ⁶ sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho mine rnabey ley,

sinque laa no noseed zho guien zho tsienal zho mine rnabey Espíritu Sant. Sac tel leya, lèë gdib rnabeya guet grèse miech ngoopdol; sangue Espiritu Sant, laa me rlu zha yгаа zho tib guielmban ndzon.

⁷ Golsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grè zha ngoopdol. Biinidoo ne biaan lo Moisés dze co, haxta lèbd lo zha Israel gwi zho lo me, per dzega dzega biuu biini co. ⁸ Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, ¡mazdraa gon nroob nac guielndzon rii! ⁹ Sac gon, tel scataa blu xquielndzon Dios zeene biaan guet grè zha ngoopdol; mazdraa dzigo nroob nac guielndzon ne rlu niina. ¹⁰ Ne nligaa, palase ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. ¹¹ Ni stiba, bza dze ne been ley co dziin; sangue xtiidz cub me, gdziind dze ne gdzëëw. Gacxe waa, mazdraa nac biini ne ziaadniew.

¹² Ni ne ndionaxe no waa gdziind dze ne gdzëëw, gane tiblque laa no noneew lo miech; ¹³ rdziuund no zig been Moisés. Sac tel Moisés, pquia tib lè lar lo me dzigo gond zha Israel zha bnitlo biini ne biaan lo me ga. ¹⁴ Ni rrieequia ye lo grè zha Israel ga sca bdze, gacxe waa, haxta lo nadze riend zho zha zhobnee lo Xtiidz Dios, mine psan me padzeela. Ible riend zho ne bdedle dze ne pquiin diidz gol co, Jesúsle none gliladz zho niina. Me nac men ne cxal lo zho. ¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoo zho.

¹⁶ Per tel zha ne csaan grè guielntseeb, dib zdoo zho guien zho cho nac Jesús, ible zlit me lar co lo zho; ¹⁷ sac gon, miech

ne naciele zhiEspíritu me, led yedraa zho ngadoo lo ley gol co. Ni ndion ne ganle, meque ga nac Espiritu. ¹⁸ Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuaane nacdraa Xtiidz me. Me zobwi ganle niapse diidzli rnee no, niicle grëgaa zha ne rdziuunbey no, nan zho rquidieed no.

³ No grë zha ne ib nëd tsoguc zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho. ⁴ Nëd zho gliladz zhow, sac ible mendox (ma ne nonabey lo guidzliu rii) noyuñ ncow xquielrien zho; gane rienñ zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

⁵ Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me. ⁶ Ne nligaa tib ngundziin winse nac no! Golwi ganle Dioszhal, men ne bnabey biaan biini ne rziini guidzliu, me bdixbiini guic no bien no xquielndzon me ga biaadlu Jesús.

Rsaand Dios zha ne dib zdoornalo me

⁷ Ne nlipaa, lega nacse no zig nac tib guies yu ne notsow grëtaa ncuaane ndzon ne zieneedz Dios lo no. Gase na ganle rlu, Dios natchena grësew, peet nond no loxaque nose.

⁸ Me nacie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd. ⁹ Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. ¹⁰ Zaatne ziotaa no, quianañ miech gut zho no, zigne beenaque zho Jesús; per me rsilaa no ladznia zho. Ga rlu ganle ne men mban nac me, ni me nacie no. ¹¹ Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no. ¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to. ¹³ Niicle nagon ne znutaa noxtseeb no, per ndionpaa no me quianap no, gane rdziebd no noseed no miech Xtiidz me; zig zhobneeque lo Xtiidz me, zaatne rnee: "Bliladz naa mine rnee me, gane rne naaw." ¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziinne Jesús ne lo me.

¹⁵ Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me. ¹⁶ Mincocxe waa, ib choot riablod. Nli zigse zie dze laa no bii noyoxraa, sangue zhiEspiritu no, zigse zie dze laaw racncubraa, laaw riaanmberaa nëz lo Dios. ¹⁷ Ni

stiba, niicle ne znutaa nodzian no grë guielnë rii, per ncuaañe tib rded naca, led ncuaañe rnada; sac gon, zeene laa no lozh dieed grë min rii, mazdraa nroob nac lo guielndzon ne ygaa no, ni mincosi gdzindraa dze lozha. ¹⁸ Gacxe waa, choot rdziuuncasd grë ncuaañe quiadzian no lo guidzliu rii, sinque laa guic no nonie ygaa no grëtaa guielbley ne no gbaa. Sac grë ncuaañe ran ne niina, ncuaañe tib rded naca; sangue grë ncuaañe gard dzian ne ga, led yedraa min co nitlo.

5

¹ Ni ndion ne ganle, zeene laa xcuerp rii ne nitlo, laa Dios gneedz stib minë gdzindraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne gbaa. ² ¡Blaactaa guielnë ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co. ³ Sac gon, led niapdse espíritu gdziñ ga, sinque none gapa cuerp. ⁴ Ne nligaa, niina ne mbannie ne cuerp rii, zeene në nodieed ne, rziaac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guielmban ndzon co. Sca rziaac ne, sac choot rdziladz guet. ⁵ Dioszhal bzo ne ygaa ne min co, ni ible zaca, sac gon laa me pxeelle Espíritu Sant nacnie ne.

⁶ Tel no, min co nagon quiambiaaz no; ndionle no laga mbannie no cuerp rii, grielod ygaa no min co, grielod gdziñ no zaatne no Jesús. ⁷ Nli rdziand now niina, per dib zdoo no rliladz no ib laaw none gac. ⁸ Gacxe waa, haxta nley rac zdoo no quiambiaaz no gdziñ dze

co; rziaac no tebaa laa no brieel len cuerp rii, zeena guiobannie no Jesús. ⁹ Min co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziñ no lo mew. ¹⁰ Sac gon, grëse ne zdziñ dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga ygaa ne minë guiogual ne tib tib ne.

¹¹ Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

Zaacse golgac lo Dios

¹² Grë minë blozh bne naa nu, zig bnele naa ga: nacda par dziuunnon no no. Laa no rnee grë min rii, zeena guienpaa to ganle cho nac no; ni scagaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho. ¹³ Nligaa, dib zdoo no noxco no xtsiñ Dios, laa miech masaque rzac zho riotsle guic no. Nana niicle tel riotsgaaw, per xtsiñ Dios nodziun no. Sangue no, ndionpaa no riotsd guic no; laa no rdziun grë min rii, sacne noxco no cseed to Xtiidz me. ¹⁴ Laa no nodziun dziin rii, sacne rleynie no Jesús, maase tel zhataa rzac miecha.

Ndionpaa no Jesús bgaa guielgut ne niogual ne; scaquegaa, ndion no niina ne laa no bziaab xnëz me, rrieequia gutle no lo grëtaa ncuaañe ndzinlid ne bdziun no glo. ¹⁵ Gacxe nagon waa, grëse zha ne rzëëb xnëz me, nodraa gban zho zigne notaa guic zho, sinque laa zho none tsoxg gban zho zigne rdziladz me; guien zho ganle, me gut bdiizh me xtol zho (ni brieeban

me), par yгаа zho tib guielmban ndzon ne gdziṅd dze lozh.

¹⁶ Gotsaa guien sca, zha ne nole xnēz Dios, ziaacd ne zho zig rzac grēraa miech zho, rzac zho peet nond zho. Teḷ naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me. ¹⁷ Sac goṅ, grēse zha ne ne nlipaa dib zdoo rliḷadz Jesús, stible miech nac zho. Grēse teḷ zha goc zho glo, laa miṅ co bdedle. ¡Ncube nac lo xquielmban zho! ¹⁸ Ni loxaque Diosse goṅ zrieelo sca guṅncub miech. Sac goṅ, me pxeel Xpēed me Jesús biaadtizh grēse xtoḷ ne, laa ne biaanwen lo me. Ni scagaa niina, me bzo no znu quiaseed no miech, zeena gacnaṅ zho zha grieelo guiaanwen zho lo me. ¹⁹ Znu goṅ naca: Laa Dios nodeed diidz niina guiaanwen miech lo me, guṅquizhd me zho teḷ pe nactaa xtoḷ zho, totsaque gliladz zho cho nac Jesús. Miṅ rii nagon bzo me no nonee no lo miech. ²⁰ Golgaṅ sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rrieequia goṅ Dioszhal rso diidz rii lo to. ²¹ Sac goṅ, Dios bzo Jesús bgaadz me grēse xtoḷ ne, niicle ne ni tib doḷ rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grēse xtoḷ ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingunḷziin me laa no rso diidz lo to: golguien golgon miṅ nonee me lo to niina. ² Lo Xtiidz me, no tib zaatne znu zhobnee:

Lēetse leṅ dze ne nosilaa naa miech, laa to bñab gacnie naa to.

Lēetse leṅ dze ne rdeeda diidz gac miṅe quiambēz to, laa grē xliaadz to blanso lo naa.

¡Ni lēē dze co nu nagon bdziṅ! ¡Nadzegazh quiambēz me gbig miech lo me, zeena csilaa me zho!

³ Dziin rii quiadziuuṅ no, choot quiadziuuṅctald xtoḷ miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenē zho Dios. ⁴ Zigtaa ncuaane rdziuuṅ now, zigtaa grēgaa ncuaane nodieed now, rlu no ganle ne nli xtsiṅ me nodziuuṅ no. Teḷ pe nactaa grē guielnē ne nodieed no, teḷ pe nactaa grē xliaadz no, niicle no zaatne rsacsi miech no, per choot rietede. ⁵ Blactaa zaatne rguṅ zho no, zaatne rsioogyu zho no, zaatne rree zho ndal zho racntseeb zho lo no. Blactaa rdib rdzaag no rdziuuṅ no dziin, no zaatne rree zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rietede, wen wen rdziuuṅbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo zho, zilu no ganle pa lotaa racnie Espiritu Sant no.

⁷ Niapse miṅe nac diidzli miṅ co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuuṅ no dziin.

⁸ Choot rsaand miṅe pso Dios no nodziuuṅ no, maase niicle miṅe runṅaa miech no. No zaatne runnon zho no, nogaa zaatne rzhidznie zho no; no zaatne rneenē zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech. ⁹ Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard

guet. ¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guielnzaac ne rgaa miech zeene rnee no lo zho. Rdziaapd no grë ncuaane rap grëraa miech, per ncuaane rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleynie no to. ¹² Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie to no. ¹³ Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, golsiguie! zaacse golgac!

Zhaa nac biini lo guielcow

¹⁴ Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. ¹⁵ Sac gon, tel Jesús, ¿niacxe tipse nac me grë me mendox? Scaquegaa grë zha ne nole xnëz mew, grielod tipse gac zho grë zho zha ne no lo dol. ¹⁶ Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtuidz me zaatne rnee: Na gbannie naa to, ine sënie naa to. Naa gliladz to, ni scagaa to, lo naa ygab to.

¹⁷ Gacxe waa, rbiire me rnee me: ¡Golriee lad grë zha qui, golbiche lo zho! Gunde to grë ncuaane ndzinlid ne run zho, golbig lo naa, naa ycaania to.

¹⁸ Naa gac Pxoz to grëse to, scagaa to, laa to gac xpëed naa. Lëe xtiidz men ne rnabey to nu.

7

¹ Bets, bzian, gotsaa gwi ne ganle zha nactaa ncuaane psan Dios didz ygaa ne. Gacxe waa, golgotsaa

lozh griee ne lo grë zhgab yozh, lo grë ncuaane ndzinlid ne runctal xtol ne. None zigse zie dze dzioxcorraa ne gban ne zigne rdziladz me.

² Ne nligaa, zaacse golgac golcaania no stib. Tel pe guielné ne noded to, tel zha rzac to, to bguiba; zig nac no, choot noquidiede to, choot nosacs side to. ³ Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to. ⁴ Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guielbley zdoo naa; haxta riats naa ne runbey naa to.

⁵ Wlal ne blanso no Macedon nu, ni tib lë notiblid guic no; lala noxtseeb no lo grë zha ne quianal no, lala nonieque to guic no dien yo to. ⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, ⁷ blansonie me diidz zaacse pcaania to me. Per nli rley no bdzion ndzinlile mban to, në me bio to guielné grë len dze ne bded ga, ni në me nonie no guic to, quiambëz to tebaa zha gan niob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgoguelnëw to, sangue niina racmbandraa zdoo naa; sac rien naa niicle ne bio to guielné tib bla dze, per na laa ncuaan co bdedle. ⁹ Gacxe waa rley naa niina, per guiabde to togo rley naa bio to guielné, sinque rley naa gon naa laa to wbiire wbig lo Dios por guielné ne bio to ga. Ni sca nagon racladz Dios gun grë zha ne ngab xnëz me zeene runctal zho xtol zho, gane rienpaa naa led psacsid no to ga. ¹⁰ Zeene Dios rdeed diidz sca rio miech guielné, lo guielné co laa zho rbig lo me rsanme me zho lo xtol zho; rsaan zho tel pe nac ncuaane

ndzinlid ne noyũn zho. Zha ne sca rac-wen lo Dios, nodne gacmban zho guiab zho pe nacte bded zho guielnẽ co. Laa grẽraa guielnẽ ne ran miech, zig nac zha ne nod xnẽz Dios, loxaque rlozh runmbana zho, laa zho bii zie nẽz ne nitlo zho. ¹¹ Golgan ganle, pa lotaa bzhixcuaa to niina ne bio to guielnẽ co. Haxta biao to biini, bioxco to blee to zha co lo dol ne quiayũn zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, gũeyniew guic to ni wbinladz to; gondzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquish to zho mine been zho ga. Wen ne sca been to, ga blu to ganle rdziguiende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no pxeela sac tibaque noxco no zaacse gac to. ¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grẽse to zaacse blẽzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina. ¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. ¹⁵ Rleynie me to, rzac zdoo me zeene rsoladz me grẽse to ndooladz goc to pcaania to me, ni bin to diidz been to mine bnabey me to. ¹⁶ ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

8

Dib zdoo to goldeed gon

¹ Bets, bzian, laa no gzodiidz lo to ganle pa lotaa quiayacnien Dios grẽ zha ne ngab lo Jesús nẽz Macedon nu. ² Nli nroob grẽ guielnẽ ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuaaane rap zho, per nroob gon ne beenlo zho. ³ Laa naa rnew lo to, sac naazhal gona. Ne nligaa, dib zdoo zho bleeladz zho grẽ ncuaaane bloogon zho; ncuaaane rgaataa lo zho laa zho bdeeda. ⁴ Dzigo bnab zho lo no gdeed no diidz ye xgon zho guey lo grẽ zha ne nacgrẽ ne, zha ne guien pe yquini. ⁵ Ni lẽdsew ga, bzee zdoo no zeene bdzion no blozhse psan zho zho ladznia Dios, laa zho wbig lo no nẽ zho, mine csiaabtaa Dios guic no gnabey no zho, zun zhow. Ni lalnu gon gũeynied guic no gun zho grẽtaa min rii.

⁶ Niina ne bdzion no znutaa biabgan zho nẽz rii noyũnlo zho gon rii, nacte rdzieets no lo Tit siguiel me guiaad me nẽz lo to i stib; zeena lozh gunlo to gon ne bnabeyle me to i quiayũnlo to. ⁷ Rdziunbey no to; dib zdoo to rnalo to Dios, zha niini nac to, rien to zha gnee to Xtuidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

⁸ Laa naa bzet lo to nu zha been zha Macedon, per guiabde to bod nonabey naa to scapaa gun to. Sinque laa naa bzeta lo to, zeena gacnac to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grẽraa zha ne nacgrẽ ne, led loxaque diidzsew. ⁹ Golwi ganle, zig nac Jesús pa lotaa noxco me ne. Niicle ne me nacchen grẽtaa ncuaaane no, per bdeed me diidz goc me zig tib zha ne peet rapd; ga bgaa ne grẽtaa guielnzaac ne rap me. Laa me been min co sacne rleynie me ne.

¹⁰ Wena, tebaa tsoxco to lozh gunlo to gon qui. Gol̄soladz ganle, topaa psilo bleebey gac̄low wdibiz ga, ine nguieel rac to psilo to. ¹¹ Nana sca, zigne psilo to hor co, scaquegaa niina nguieel gol̄gac gol̄sial̄ lo dziin co. Gol̄quiabladz tel̄ palaltaa ncuaane rgaa lo to tib tib to, dib zdoo to gol̄deeda; ¹² sac zeene dib zdoo miech r̄quiabladz zho cogan zho, tel̄ palaltaa mine yгаа lo zho, scaania Diosa. Nanle me palal ncuaane rgaa lo tib tib miech, gnabd me ncuaane ni quianied zho.

¹³ Sac nacda ne ygad to gr̄ese ncuaane rap to lo stib zho, lozh ga guiaan̄mban to; laa zha yquianie gr̄esew. ¹⁴ Led scada. Laa min̄ rii rac, zeena gr̄ese ne lalga ncuaane yquianie ne. Niina ne rgaaw lo to, gol̄deed palala yquiin gr̄e zha ne rapd nrooba; dzingaa dze na pe gunfalt lo to, dzigo laa zho gneedz tel̄ pe nacгаа ncuaane quianiede to. Sca none dziun̄lsa ne xyudar zha ne nacgr̄e ne, zeena zig rne naa ga: lalga ncuaane yquianie ne. ¹⁵ Gol̄soladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. ¹⁷ Zeene bnaab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib. ¹⁸ N̄ez rii, no tib bets ne, nroob yudar quiayun̄ me no-gaaz Xtiidz Dios lo miech; zaatne rcaalsataa zha ne no xn̄ez Dios nu, gr̄ese zho run̄bey me, tib men̄ nziuu nac me lo zho. Me gacgrop Tit, niina ne laa no cxeel Tit lo to i; ¹⁹ ni meque bzooblo zho, s̄enal̄ zhits no zeene guiosāna, sac ne nligaa dib zdoo

no noxco no zha gac xyudar gr̄e zha ne guiēnd pe yquiin. Nu rlu ganle pa lotaa men̄ nroob nac Dios, sac me quiayacniēn ne ne laa dziin rii noyac. ²⁰ Gza no bets co guio, zeena gzadold zdoo miech guiab zho nend zha lega zhieen̄ no palal gon rii, sac gon̄ nligaa nroob naca. ²¹ Dios zobwi ganle mbe lo no, ni racladz no ye miech gan̄ zho ganle ne nli zha legal nac no. Min̄ co nagon̄, nacne sca guio no gza no.

²² Rdziun̄bey no stib bets ne nu, rdzian̄ no nli dib zdoo me rleynie me Dios. Niina ne laa grop zha co guiaad i, ye me guiaadnal̄ zhits zho. Rley me ne laa me guiaadgan̄ to i, sac ziyon me ye to noxco gacnie to zha ne nacgr̄e ne.

²³ Tel̄ nan̄d new cho gnabdiidz lo to dien̄ cho nac Tit, gol̄guiab lo zho tipse nac no grop no me, xyudar naa noyun̄ me quiaseed no to. Ni tel̄ gnabdiidz zho cho nac schop zha ne ziaadnal̄ zhits me i, dzigo gol̄guiab gr̄e zha ne ne no n̄ez rii pxeel̄ zho, dib zdoo zho noxco zho mban zho zigne rdziladz Dios. ²⁴ Gol̄guien̄ sca, gza zho zigne ziaad zho lo to i, niowse gol̄cūezlo zho. Gollu ganle ne nli dib zdoo to rleynie to zho, zigne rleynieque to naa; zeena gacnan̄ gr̄eraa zha ne nacgr̄e ne nli mine rnee no zeene rzodiidz no lo zho zha nac to.

9

¹ Nanle naa, r̄quiindpaa gni naa lo to zha gdeed to gon ne gaclo nu gac xyudar gr̄eraa zha ne nacgr̄e ne, sac laa to noyun̄lolew. ² Run̄bey naa to, nanle naa ible r̄quiabladz to gun̄ to xyudar zho, gacxe waa rley naa rzodiidz naa lo zha ne no n̄ez Macedon nu, rne naa lo zho: wdibizlaa psilo to n̄ez Acay i quiayun̄lo to gon co. Min̄cocxe waa, zeene bin zhow, nzian zho p̄quiabladz laa zho bdeeda. ³ Per laa no rxeel̄ gza bets rii ziaad i, ziaadgun̄c̄soladz zho to lozh gun̄lo

nioḅ tow; zeena glu ganle led lega rneed no zha nac to. ⁴ Sac gon guielto ga grieequia naa lo zha rii, tel̄ guialnie naa bla zho i, ni gan zho peet gard gaclo. Nli ziaaḅ naa guielto, per mazdraa gon nac guielto ne guiaan to. ⁵ Min co nagon, ni naa mazd cxel̄ naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel̄ pe nac ncuaaḅe cogon to, dib zdoo to goldeeda. Golguien zha cogon to. ⁶ Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. ⁷ Tib tib to sca, golcobey palal ncuaaḅe gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaaḅe rgogon zho, rleynie Dios zho. ⁸ Ni me ne nac me men̄ ne rrieelo rneedz grese ncuaaḅe rquiin, me nac men̄ ne gneedz grētaa ncuaaḅe yquiin to; ni haxta ziaaḅ mine gdeed to gac xyudar grēraa zha ne nacgrē ne. ⁹ Zigne raquetaque lo Xtiidz me, zaafne rnee:

Zha ne nguzobdiidz lo Dios, dib zdoo zho rgad zho ncuaaḅe rap zho lo grē zha ne guiend̄ pe yquiin; ni scagaa sēēb diidz ne miech wen nac zho.

¹⁰ Dios gunlay ncuaaḅe quianie to, ygaaw gdeed to, ni scagaa me gacnien̄ to nroobraa guielnzaac ne yгаа to. Golwi ganle, zha runlay me zha ne ran: Me psan̄ grēse lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

¹¹ Ne nligaa, Dios nac men̄ ne gunnroob ncuaaḅe quianie to, zeena scagaa nrooba cogon to. Golguien̄ ganle, zeene laa no guiosana lo grē zha ne yquiina

ga, blactaa gley zho gdeed zho xquizh lo Dios. ¹² Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiablazd zho dib zdoo zho gdeed zho xquizh lo Dios. ¹³ Zley zho gan zho grētaa ncuaaḅe cxeel̄ to yquiin zho; ni zleynie zho Dios gan zho ron to mine rnabey Xtiidz Jesús. ¹⁴ Haxta dib zdoo zho gnab zho gacnien̄ Dios to, por grētaa guielnzaac ne gdeed me ga yгаа zho.

¹⁵ ¡Xquizh xquielnzaac Dios, sac gon tel̄ me nroobraa nac guielnzaac ne bneedz me lo ne! ¡Gotsaa gwi ne ganle, haxta Xpēed me bleeladz me!

10

Rieguial̄ gnabey Pabl lo zha Corint

¹ Ziyon naa rnee zho i, zeene zose naa zit nguieex rzē xtidz naa rxel̄ naa; laa zeene zo naa lo to, rdziel̄ naa pe gne naa. Sangue tel̄ naa, tibaque nac naa, ndooladz rac naa lo to, niicle zeen̄ tel̄ pe diidz ne rso-gaa naa, ndooladz rne naaw; zig gun̄ Jesús, tel̄ niaca mine mezhald̄ gnee lo to. ² ¡Tebaa gdziind̄ dze pe yquiaaqui glu naa xquieldox naa lo to! Zha ne squi rzac lalaque nac no grē no grēraa miech, rnee zho mine run̄ miech, mincoque rdziuun̄ no, ¡tebaa siguiel̄ zho zaacse gac zho, sac racladzd naa til̄nie naa zho!

³ Nli miechse nac no, per ib zionald̄ no gacndaan no zigne racndaan grēraa miech guidzliu. ⁴ Sac tel̄ no, choot rnalod grē guiib las ne rnalo zho, sinque laa no rnalo poder ro ne rap Dios; mincosi zrieelo gnitlo grētaa guielntseeb ne racladz mendox gac. ⁵ Con poder rii, zrieelo csioog no ro zha ne squitaa lega rnee, zha ne racndaan nēd zho gacnan̄ miech cho nac Dios. Grē zha ne racntseeb lo Dios, con poder rii zrieelo co no

guic zho gbiire gbig zho lo me, gac zho tib miech nguzobdiidz lo Jesús. ⁶ Ni poder co yquini no gnee no lo to lozh guien to gban to zigne racladz Jesús; lozh ga, grëragaa zha ne racntseeb, lëëquew yquini no par gacnan zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nan d zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa. ⁸ Nana no to guiab guielniatsle nu, sac rlu naa ne naa rnabey lo to. Per nacda guielniats, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nëz ne nitlo to. ⁹ Golgacnan sca ganle Dios bzo naa, guiabde to togo lega rnese naa par ctseb naa to. ¹⁰ Sac nanle naa no zha ne rnee i: “Gonde to mine rnee men qui. Loxaque lo guits ne rxeel me squitaa ndox rzë xtiidz me, per loxaque diidza. ¡Zeene zo me lo ne, tib zha yozhsew, per ni rien d me zha gnee me!” ¹¹ Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guielnxen ga, sac gon lëëque zha runnon zho. ¹³ ¡Tel no, choot rdziunniatsd no ncuane ni nacd no! Ni zeene rnee no cho nac no, per mine bzo Dios no nodziun no min co rnee no; ni mecxe waa bzo no quiaseed no to.

¹⁴ Ible riogual ne no gnabey lo to, sac gon no glopaa biaad i biadseed no to zha nac Xtiidz Ndzon Jesús; choot noziaabd zaatne rioguald no. ¹⁵ Stiba, rdziladzd no gdaannie no xtsiin stib miech. Laa no bii cseed to lozh tsoguic to zha nac Xtiidz Dios, zeena haxta yele to gun xyudar no ygaazraa Xtiidz

me. ¹⁶ Dzigosi nagon laa no guio grëraa guiedz ne ndxie dib nëz qui, guioseed no zho gacnan zho zha laa zho lo dol; per zig rneque naa ga, guiosiaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: “Zha ne zienie guic xoobnen lë zho por dziin ne run zho, mazd tsoxco zho xoobnen lë Dios.” ¹⁸ Sac paat rquiinda ne lëëque ne gunnon ne, mine mazdraa rquiin nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, ¡golxecw yquiaadiag to mine gne naa nu, niicle tel no mine rzac to rquiind!

² Golgacnan ganle, zigne rzac Dios to scaque rzaac naa to, ib racladz naa cho guiaadquidie to. Mine racladz naa Jesússe gleynie to, zig run wnaa nguiég ne no xtiidz ct-sieelnia. Sac tel wnaa nguiéga, mgui ne no xtiidz zho mgui cose rleynie zho, haxta rdzin dze ne rtsieelnia zho. ³ Sca none grieequia to lo me; per rdzieeb naa gon nend zha yguib mendox yquuil ma to, gondraa to mine rnabey Dios, dzigo laa to gac zig rac grëraa miech ndzinlid. Sac gon tel Ev, sca pquuil ma Ev.

⁴ Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetgaa zho espíritu, per rzeete zho me zigne biadseed no to; rnee-gaa zho zha laa miech lo dol, per nacda zigne pseedle to glo. ⁵ Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrielo glu naa lo zho ganle peet rien d zho. ⁶ Nend nli gacd naa gne naa zigne rneetaa zho, per zeene rne naa

rieynaa naa ne diidzli none naa; ni ziyanaalega tow ganle.

⁷ Rzaac naa lēda ga beñ naa, zeene bial naa bialseed naa to Xti-idz Dios; sac rsoledz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina. ⁸ To rieguial needz ncuaane nquiin naa, na leñ grē zha ne nole xnēz Jesús len dze co, zha co pxeel ncuaane pquiin naa, rriequia bla naa xtimi zho ga. ⁹ Niicle bdziñ dze ne peet guienraa lo naa, per ni tib lo to ib psodziind naa; lēētaque len dze co biaad bla zha bets ne zha ne ziaad nēz Macedon, zha co biaadnie ncuaane pquiin naa. Ib peet bnabd naa lo to hor co, ni gdziñdga dze ne pe gnab naa. ¹⁰ Ni golgacnañ ganle, ib tedsod sodiizd naa grē miñ rii dib nēz Gres i. Ible zun naaw, led yed naa rquidie, sac gon runbey naa zha nac Xti-idz Jesús. ¹¹ Per guiabde to togo rlēenie naa to, racladz naa csañ naa to guielto; sac Dios zobwi ganle rleynie naa to. ¹² Golgacnañ sca led scada, sinque laa naa gun miñ co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiazduun now. ¹³ Sangue no, ndion no nliid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

¹⁴ Ni led ncuaane gzeed zdoo ne ga. Sac ible sca run mendox, no hor rzēēb ma rded ma zig tib xmandad Dios. ¹⁵ Gacxe waa, jzha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per zdziñ dze ne laa zho ygaa guielnēdox ne tsieguial zho, zaatne tsietizh zho grētaa miñe noyun zho i.

Blactaa ncuaane zadeed naa

¹⁶ Laa naa rnab lo to nu stib, golquiaadiag miñe gne naa, niicle tel rzē xtidz naa zig rzē xtiidz zha

ne rzhinle guic. Nli lega niats gne naa, per golxecw gon tow, sac laa naa gunnon naa zig run grē zha qui. ¹⁷ Led Jesús rnabey znu gne naa, sinque masaque laa naa gun miñ rii, zig run tib zha ne riotsle guic. ¹⁸ Tel squitaa niats rac zha qui lēēque lēē zho runnon zho, lozhd gool zho lo to dien pe nac ncuaane noyun zho; golquiaadiaggaa miñe gne naa nu na ganle:

¹⁹ Conque rzac to name nixbini to, jzha nac dzigo rdeed to diidz rquiaadiag to ncuaane rnee grē zha yozh qui? ²⁰ jPe ib riende to ganle quianabeyzhoole zho to i, quiasacsi zho to, quiaquidie zho to, quiala zho grē ncuaane rap to, quiasanwin zho to, ya zig zgap zho lo to? ²¹ jHaxta rtoladz naa gon, sac laa ne naa squi nabey to leñ zhale squitaa no!

Grē ncuaane riats zho i nac zho, ye naa zrieelo sca gunniats naa naa (znu nagon rac zha ne rzhin guic). ²² jTelne riats zho rnee zho zha Israel nac zho? Yecxe naa waa zha Israel nac naa. jTelne rnee zho lo dii ne bzooblo Dios ga ziaad zho? Ye naa lo dii co zial naa. jTelne rnee zho Abraham nac xmengol zho? Men cocxe waa nac xmengol naa. ²³ jTelne niats rac zho rnee zho xtsiin Jesús quiayun zho? Gacnañ zho ganle, naasi xtsiinpaame quiayun naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguuib, blactaa zineedz dooguid zho naa, blactaa zaatne zadedlaa naa lo guielgut. ²⁴ Gaayle vult zisacsi zhiwxtis zha Israel naa, galptsibguieega nia dooguid bneedz zho naa. ²⁵ Tsonle vult zineedzyag zho naa, stib vult bneedzquie zho naa. Tsonle vult zadzieelo naa rdedquie barcw ne no naa len nisdoo; tib vult, tib dze tib guieel bzhoobse naa lo nisdoo. ²⁶ Pa lotaa grē dan ne ziya naa. Nzian vult ne bdedlaa naa niet naa: zaatne

bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoow, zigtagaa lo grë zha ne laglaase rquiaalo rliladz Jesúsa. ²⁷ Blactaa rdib rdzaag naa run naa dziin, blactaa guieel ni niip raaguiesd naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guieñd lar ne piix naa. ²⁸ Ni zhaaque tibaque nonie guic naa dieñ yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtídz Dios. ²⁹ Zeene ron naa cho tib to racladz guiaañ zdoow, mban rac naa zeene rrieelod gane naa lo zho; zeene rongaa naa cho tib to quiaayunctal xtol stib zho, ni rrieelod galisqui naaw lo zho, scaque mban rac zdoow naa.

³⁰ Grë mine bne naa nu, nacda guieñniats; telne rieguialpaa gunniats naa naa, mazd gzet naa grë mine rlu ganle peet gacd gun naa naase. ³¹⁻³³ Zig bzhaac naa tib vuilt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxoz Jesús, men ne rieguial dziuunnon ne gzataa dze, me zobwi ganle didzli rne naa.

Racniatsd Pabl

¹ Nanle naa nonguielda lëëque ne gunniats ne, per laa naa sodiidz lo to ganle zha nac grë ncuane zinabey Dios zilulo lo naa, ni grëгаа mine zinee me lo naa.

²⁻³ Niina rac tsiida iz ga blis Dios naa güeynie me naa gbaa. Nan naa dieñ pe dib znu naa bia naa, te zhiespírituse naa ye güeynie me; loxaque mese nan dieñ zha güeynie me naa. Loxaque mine bien naa ne laa naa bia lugar ndzon co, ⁴ ga bin naa grë diidz ndzon ne wlaataa gard gon miech, ncuane guieñd zho zha naca, ni nodgaa diidzbey gne naaw. ⁵ Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë mine rlu ganle peet gacd gun naa naase. ⁶ Ni telgacladzgaa naa gunniats naa naa por mine blozh bzet naa nu, led guieñxend ga gun naa; sac mine nlipaa goca. Per rund naa min co, sac laa naa racladz tozhal guieñ cho nac naa, benque ran to ganle zha mban naa, rangaa to zha rne naa.

⁷ Ne nligaa ndzondoo nac grë ncuane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psañwin naa, binaan tib yoob xcuerp naa zig nac zeene pe tib guiets nroob ne niaaz naa. ⁸ Tsonle vuilt zinab naa lo Dios ctiche me yoob rii; ⁹ biontaa vuilt nè me lo naa: “Bui ganle laa naa nacniele luu, ni min co nac mine rquiinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacnie zho.” Min co nagon rley naa, sac ne znu nsis rac naa, grëse miech zeene ran zho grëtaa ncuane rrieelo run naa, rien zho nli Jesús nacnie naa. ¹⁰ Ne nligaa rley naa, sac niicle ne

miech gzhē gzhēle rac naa, niicle nroob guielnē ne nodeed naa, niicle rbidzgo miech lo naa, rtsidil zho naa, no hor guieṇd pe yquii naa, per rley naa sac laaw nodeed naa porne no naa xnēz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacie naa.

¹¹ Nligaa lega guieln xenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to. Nli nacd naa cho zha non, per tsod ncuane csaṇwin grē zha qui naa, niicle ne squitaa rzac zho zha rien nac zho, niicle ne rnee zho Dios pxeel zho. ¹² Golsoladz ganle, zeene bialseed naa to i, blu naa lo to ne nli Dios pxeel naa nteed naa Xtiidz me, blactaa grē ncuane bneedz Dios diidz blu naa lo to, blactaa grē milagr, blactaa grē ncuane bzee zdoo to gon to. Biod dze ne nieednie naa to. ¹³ Lēese mine bend naa lo to i, nacie nab naa needz to pe nquii naa; sac grēraa zaatne ziyaseed naa miech, zha rneedz ncuane rquii naa. iGolgun dispensar telne rbinladz guic to min co!

Nonie zha Corint guic Pabl

¹⁴ Laa naa nozhixcuaale par guialgan naa to stib. Nu gac tson vuel guial naa lo to i; ni scauegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rrieequia gon mēed nac to lo naa; ni ndion ne ganle, led mēete riegual gdeed ncuane yquii dad, sinque dad none gdeed ncuane yquii mēed.

¹⁵ Ne nligaa, tib guielbleya lo naa quiateedlo naa to, laa naa noxco guien to zaacse gban to, zeena gdziṇ to zaatne gneedz Dios cuēz to. Xco co no naa, ib rquiad zdoo

naa lozh grē ncuane rap naa, o lozhgaa naa lo xco co; maase niicle squi zootne laa ne rleynieraa naa to, lel nozozit to lo naa.

¹⁶ Nanle naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne rienṇd ne quiaban me ne.”

¹⁷ Nana, zig nac zha ne zixel naa ziyaadgan to i, ipe niacxe biaadban zho to? iPe niacxe biaadquidie zho to? ¹⁸ Naa quia bnaab naa favor lo Tit biaad me i, ni pxel naa stib zha bets ne biaadgrop me. iPe no pe bnaab zho lo to? Golgacnaṇ ganle nodziuuṇd no min co, sac zigtaa naaw, zigtagaa mew, dib zdoo no nodziuuṇd no dziin rii, choot noquidied miech.

¹⁹ Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grē mine none naa lo to nu, laaw rne naa sacne racladz naa lozh tsoṅguic to gban to zigne nac Xtiidz Dios. ²⁰ Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne nē rac zdoo dien cho stib noded, zha ne nozhixcuaa diidzguizh, zha ne quianeenē, zha ne quiaayacniats; nend haxta chop tson diile nac to. ²¹ Tel gan naa sca rac to, mbe gon stoladznie naa to ni haxta siaabguielnē to naa; sac nanle naa ni lalnu rdziladzd Dios grē min co. Zig nac grē zha ne squi padzeelale quiaayunctal xtol ni rsaand zho grētaa guielyozh, grētaa ncuane ndzinlid ne bii quiaayun zho, mbe gon sigoon zho naa.

13

Rso Pabl diidz

¹ Niina nagon ne gac tson vuel guialgan naa to, tel pe nactaa falt ne cho quiaayun i, guiaannda scase.

Zigne rnee lo Xtiidz Dios: Tel no chop zho, tsonгаа zha ne nanpaa zha nac falt co, zha ne beeņa ga ib none laa zho quizh xfalt zho. Nu rac bion vuelte ne rso naa diidz rii lo to. ² Laaw nile naa lo to lultm vuelte ne bialgaņ naa to, ni niina laaw rneque naa stib: Grēse zha ne quiayunctal xtol i, zigtaa zha ne padzeelale squi no, zigtagaa zha ne wriin psilow, gacnaņ zho ganle zeene laa naa glanso i, grēse miņe quiayun zho ib tedlaad zho, laa naa gunquizh zhow zigne rieguiaļ zho.

³ Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. ⁴ Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zгаа no tib guielmban ndzon, sacne me nacie no; ni zrieelo gnabey no to sacne rdziaap no xpoder me.

⁵ Nana sca, tozhal golcobey dien zha mban to. Wen wen golcobey dien pe nli dib zdoo to rliladz to Jesús. ¿Pe nli mban to zig none gban zha ne rliladz me? ¿Pe zig zie dze rienraa to ne me nacie to, me rnabey lo to? ¿Te loxaque didzse ye nac ne laa to rliladz me? ⁶ Sangue no gon, wen wen ndion no zha mban no, ndionpaa no ne lo Jesús ngab no.

⁷ Tibaque rnab no lo Dios cxobnia me guic to zaacse gban to. Ni guiabde to togo par guianziuu no lo miech gane noxcopaa no zaacse gac to; sinque laa no rdzi-uuna parne gban to zigne rieguiaļ gban zha ne nli no xnēz Dios. Miņ co nagon noxcoco no, niicle tel rzac to lēda nu quiadziuu no. ⁸ Sac tel no, laa no zional gac to miech wen, zha ne zienal miņe nac didzli; choot ziaate par lega gactox no lo to. ⁹ Gacxe waa, tib

guielbley nroob ga lo no, telne zhal to znuse xixcuaa to, gac to zha ne nlipaa dib zdoo rleyne Dios; laa ne yquiambēz to guiaadlisqui no grēncuaane noyun to. Laa no racladz gdzin dze ne gac to zigne rdziladz Dios, ni miņcogaa quianab no lo me.

¹⁰ Laa naa rso diidz rii lo to lo guits ne rxel naa nu, sacne racladz naa gactox naa lo to zeene laa naa glanso i. Nli Dios bzo naa rnabey naa lo to, ni miņe racladzpaa naa nacne lozh tsoguic to zhiwseed me; ib racladz naa yquiaago naa to.

¹¹ Nu ne laa naa csiaaļ lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoo zho; iņe niowse golban, tipse golgac. Sca-gaa Dios zleyne me to, ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrē to golquiaabdiuzh zho, iņe golxen nia zho. Grēse zha bets ne, zha bzian ne, zha ne rliladz Jesús nēz rii; laa zho rxeel bdiuzh lo to. Golcaania zhibdiuzh zho.

¹⁴ ¡Dios sca guiaannie to! Iņe nley golgac, golgan ganle pa lotaa rleyne me to. Peet tsienied guic to, Jesús nac men ne noxcoco grē zhizhgab to; ni scagaa Espiritu Sant gacniņ to tibaque tipse gac to.

Pabl

GUITS NE PXEEL PABL LO ZHA GALÁS

¡Diuzh to grëse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoz me, men ne bleeban me.

² Laa naa rxel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to. ³ Dios men ne nac Pxoz ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to. ⁴ Jesús bdeed xquielmban bdiizh me xtol ne, psilaa me no lo grëtaa guielntseeb ne no lo guidzliu rii, laaw been me zigne gocladzse Dios men ne nac Pxoz me. ⁵ ¡Gotsaa dziuunnon ne Dios sca, ni gdzind dze ne csaan ne dziuunnon ne me! Sca rieguiała.

⁶ Rzee zdoo naa gon ne gardle gac nroob dze ga, laa to bzoztile lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne rliladz to niina, masaque rzac to na mincogaa csilaa to lo dol. ⁷ Per guien draa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsëe zho mine nac Xtiidz Ndzon Jesús.

⁸ Grëse zha ne guiaadnie stiblo wseed mine pseete no to, ni gnë zho lëe min co csilaa to lo dol; zha ne sca gon, miech ndziibdeele ga nac zho. Tel chotaa sca gon, nicle tel naazhala, tib anjl ne guietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guidaeed to stiblo wseed mine pseete no to, ni gnë zho lëe min co

csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guianenziuu naa lo miech gane znu rne naa; per golgacnan ganle, quiaguibd naa guianenziuu naa lo miech, sinque laa naa noxco gon naa mine rnabey Dios. ¡Sac telne lel ncuane gleynie miech noxco naa, nlid dzigo xtsiin Jesús ga noyun naa!

Jesús pxeel Pabl gnee Pabl Xtiidz me

¹¹ Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech biaba. ¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grë mine ben naa zeene bii no naa lo zhiwseed zha Israel; ptsidil naa grë miech ne no xnëz Jesús, blëenie naa zho, pquianal naa nloozh naa zho. ¹⁴ Bzhoob diidz ne naa nac zha ne pseedraa lo grë menladz naa, zha ne tipse biagrëe naa scuel; naa nac zha ne neer lo zho, sac naa run grëse mine rnabey zhiwseed zha Israel, ni naa rioxcoraa run grëse mine been grë pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblöle naa gunbey naa Xpëed me; laa me bleextsole naa, niapse porne nquialadz me naa. Zeene bdzin dze co ¹⁶ laa me blu me lo naa, bzo me naa ga naa zaatne ndxie grë miech ne nacdreaa zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa, ¹⁷ ni niicle biadgaa naa Jerusalén, nianabdiidz naa lo grë zha ne pxeelle me nonee Xtiidz me; sinque laa naa bia nëz Arab, wbirole naa nëz co, dzigoraa bdziin naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa

Pedr; bléz naa lo me ga tsiin ng-bidz. ¹⁹ Gaque beenbey naa Jacob bets Jesús, laa gréeraa zha ne pxeel Jesús noyūn xtsiin me, ni tib zho gond naa. ²⁰ Dios zobwi ganle didzli nac grē miñe rne naa nu, led lega rned naaw.

²¹ Zeene brie naa ga, laa naa bia nēz Siria ni nēz Cilis. ²² Grē zha Judé zha ne nole xnēz Jesús, gard gunbey zho naa len dze co. ²³ Diidz ronse zho rnee zla zha ne nacgrē zho: “Meñ ne scataa pquianañ ne, yele me noseed miech Xtiidz Dios, ni glo scataa gocladz me nitlo mew.” ²⁴ Dzigo rley zho, rdeed zho xquizh lo Dios ne yele naa riladz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grē no zha ne zo rnabey lo grē zha ne no xnēz Jesús ga, bzodiidz naa lo zho zha noseed naa grē zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni miñe quiayungaa naa. ³ Ni nligaa bley zho bin zhow.

Niicle ne led zha Israeld nac Tit, per nbabeyd zho niopaa Tit bey ne rio grē zha Israel. ⁴ Per lo zha ne zioobga no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho riladz Jesús, per nlida; ib blud zho cho nac zho, ngueets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuun no miñe rnabey ley. ⁵ Per ni palal bdeete no diidz niac miñe rnee zho, laa no racladz guaannie to Xtiidz Ndzon

Jesús miñe rlu zha laa miech lo dol, sac miñ co nac diidzli.

⁶ Grē zha non ne zo rnabey lo grē zha ne no xnēz Jesús ga (zha non guiab ne, per ndion ne ganle grēse ne tibaque nac ne nēz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnañ ganle ne ib Dios bzoo naa gun naa xtsiin me, gaseed naa grē zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios meñ ne bzo Pedr quiaseed Pedr zha Israel, lëëque me bzo naa quiaseed naa grē zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grē zha ne riladz Jesús ga, laa zho bien ne ible naa bgaa guieñzaac rii, bneedz Dios dziin rii lo naa. Dzigo rley zho haxta bzheñ zho nia no grop no Bernabé, laa no biaan diidz ne zha tsieseed zha Israel, laa no guioseed grē zha ne nacd zha Israel. ¹⁰ Lëëse miñe pso zho diidz lo no, dzioxco no dziuun no xyudar grē zha ne guien pe yquiin; ni nligaa ib nonguiel miñ co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr, sac ncuaane ndzinlidraa quiayun Pedr. ¹² Glo, grēse zha ne nacd zha Israel zha ne riladzle Jesús, rzënie Pedr zho, tipse rbenie Pedr zho zeene laa zha row; ni blozh ga, zeene laa bla zha ne pxeel Jacob bdziñ ga, pasëraa Pedr sca tipse niownie zho, laa Pedr bzozit lo zho. Rdzieb Pedr zha ne bdziñ ga, sac lëë zha co racladz, grēse zha zit ne rzëeb xnēz Jesús ib none tso zho bey ne rio zha Israel. ¹³ Grē zha Israel ne nole xnēz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeene gon

naa sca zienaldraa zho zigne nac-paa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: "Luu-gase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grë zha ne nacd zha Israel, gban zho zigne nac zhiwseed zha Israel?"

Zha rlaa miech lo dol

¹⁵ Golquiaadiaga ganle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë mine nac xley zha Israel. ¹⁶ Sañgue niina laa no ndion ganle, niicle mazdraa gun miech mine nac ley grieelod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no riladz no Jesús, nacda porne dziuun no mine nac ley. Sac gon niicle zha ne tsoxcoraa gun zho grë mine nac ley, grieelod guiaanwen zho lo Dios.

¹⁷ Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuunctal no porne riladz no Jesús, per, ¡led scada gon! ¹⁸ Mazd dol ga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naa que no lozhd tsoxco gun grë mine nac ley. ¹⁹ Sac tel naa, ib brieelod niun naa grë mine rnabey ley, ni zha ne rgui-its ley gon ib none guet zho; gane niina masaque rrieequia laa naa gutle. Niina ne laa Jesús gut por grë xtol naa, rrieequia ye naa gutnie me ga, zeena grieeelo gun naa mine rnabey Dios. ²⁰ Led naadraa nu znu mban, Jesúsle nu mbannie naa, ni guielmban ne mban naa niina, lëe min rii bneedz Dios lo naa

porne riladz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa. ²¹ Nana, telne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo biaadguet Jesús. Golgacnañ sca ganle, Jesússe nac men ne csañwen ne lo Dios, gacxe waa nonguelda ga csañ ne me tblad, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaa nxen to nac to zha Galás! ¿Pe goc to, cho biaadgungüet guic to squi rac to? Pe led zeene biadseed no to, wen wen gognañ to cho nac Jesús, ni zha nacne sca beet miech me lo cruz. ² Zhal to golcobey dien, ¿pe ne been to grë mine nac xley zha Israel, laa to bgaa guielbiini chen Espíritu Sant, te ne bliladz to Xtiidz Dios a ye? ³ Pa lotaa gon rdziñ lo xquielnxen to i, conque laa to gonle ganle ne niapse por guielbiini chen Espíritu Sant laa to psilo mban tib guielmban cub, ni na nanaque to tsienal to ley. ⁴ Pe nlipaa rnee to, ¿pe lega scase nazho gon to grë guielné ne pteed miech to, zeene psilo bliladz to Xtiidz Jesús? ⁵ ¡Golzhixcuua guic to! Golguien ganle, laa Dios bneedz zhiEspíritu me lo to, ni laa me noyun grë milagr lo to, per nacda porne run to mine rnabey ley, sinque porne dib zdoo to riladz to Xtiidz mew, mine biadseed no to.

⁶ Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtol. ⁷ Golgacnañ sca ganle, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëedpaa Abraham. ⁸ Ni mine nodziañ ne niina, ib lo Xtiidzle Dios zhozneew, zeene bnee me ne grëse miech ne nacd zha Israel,

silaa me zho telne dib zdoos zho gliladz zho me. Lëe min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdoos gliladz naa zigne rliladz luu naa, zunlay naa zho.”⁹ Gane grëse zha ne dib zdoos rliladz Jesús, runlay me zho zigne beenlayaque me Abraham, zeene laa Abraham bliladz me dib zdoos Abraham.

¹⁰ Sangue zha ne rnalo ley ne lëew csilaa zho, laa zho noyac ndzi-ibdeele ga, sac lo Xtiidz Dios no tib zaatne rnee: “Ndziibdee grë zha ne grielod gun grëse zigne nac ley.” jNi tsod zha ne gon grielo gun grëse mine rnabey ley!

¹¹ Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhobneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoos zho gliladz zho me; ni zha co yгаа tib guielmban ndzon.”¹² Led yed ley rnab dien cho dib zdoos gliladz; sinque rneew: “Zha ne racladz gban, none gun zho grëse mine rnabey ley.”

¹³ Min co nagon, grëse ne nac ne miech laa ne biabdee, sac brielod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe grë dee ne nac ne ga bi me zeene sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquiangaa zho tib lo yag.”¹⁴ Ni por mine sca bded Jesús ga, min co niina grëse miech ne nacd zha Israel, zac yгаа zho grëse guielnzaac ne bzeet Dios lo Abraham ga; ni nicle tib tibгаа zha ne ngab lo mew, scaania zho Espiritu Sant, Espiritu ne rëb me cxeel me lo grë zha ne dib zdoos gliladz me.

Zha ne nlipaa nac xpëed Abraham

¹⁵ Bets, bzian, laa naa gzet ncuaañe rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëe trat co.¹⁶ Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xti Abraham. Raquiete nzian zho, rëbd me: “grë zha xti Abraham”, sinque tibaque men ne bzeet me, ni lëe men co ga nac Jesús.

¹⁷ Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoos gliladz me; ni ible laa xtiidz co me biaan zig tib trat ne quia lë me lo. Min co nagon, grielod ctsëe ley trat co; zig nac ley, blozhle tap gayoo galptsii iz biaan xtiidz co me zeene laa ley bиаad.¹⁸ Nana, telne por gun ne mine rnabey ley, laa ne yгаа grë guielnzaac ne bzeet Dios lo zhitrat me gdeed me por tib men ne grieequia lo xti Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xti Abraham, laa me gneedz guielnzaac co lo ne.

¹⁹ Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdzin dze ne laa men ne briequia lo xti Abraham ga bиаad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanj Dios pxeel me bdeeda lo Moisés, dzigo Moisésle psaña lo menguedz Israel.²⁰ Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhai biadneew lo Abraham.

¿Pa rquiin ley?

21-22 Nana gnë to: “¿Zig gocladz dzigo lëë nsiooglo xley Moisés lo trat ne been Dios ga?” ¡Led scada! Sac grieelod ygaa ne guielmban ndzon ne gdziñd dze lozh ga, telne gnalo ne ley; ib grieelod ley csañwena ne nëz lo Dios. Telne niaca mine nrieelo ley nsilaaw miech lo dol, nod pe nacne dzigo nxeel Dios Xpëed me, biaad me biadbee me miech ladznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

23 Zeene gard guiaad Jesús ga, laa ley co pquiin pquiianapa ne zigne rquiianap wxtis zha ne nioogyu, laga bdziñ dze ne laa me biaad. 24 Zig tib ngudziaan ne rianañnie mëédwin, sca pquiin ley co lo ne, pseeda ne zha gban ne, ni gacnan ne cho nac Jesús, men ne csilaa ne lo dol zeene dib zdoo ne gliladz ne me. 25 Sangue niina ne laa Jesús biaadle, led ley codraa gnabey ne, ni niicle rquiindragaa pe cseeda ne. 26 Gacxe waa, tel to xpëedle Dios nac to porne dib zdoo to rliladz to Jesús, 27 ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienal gban zho zig racladz me. 28 Mincocxe nagon waa, grëse ne tibaque nac ne niina, guiendraa ne goon cho nac zha Israel, cho nacгаа zha zit; dien cho nac ngundziin, cho nacгаа zha ne rnabey; goon dien cho nonraa pe mguiw te wnaaw ye; sac grëse zha ne naciele Jesús, tibaque nac zho grë zho. 29 Ga nagon, telne ngable to lo Jesús, dzigosi nli zha xtií Abraham nac to, ni zgaa to grë guielnzaac ne bzeet Dios zeene psan me xtiidz me lo Abraham.

4*Zha ne nac xpëed Dios*

1 Golgona ganle, nligaa tib mëédwin lëë, niicle guiaañnie win ncuaañe rap pxoz win, per lega nacse win zig tib ngundziin win ne run xtsiin pxoz win. Niicle chen win grë ncuaañ co, per grieelod win gnabey wina. 2 Laa win riaan ladznia zha ne ran win, zha ne rseed win dien pe nac ncuaañe gun win, laga gdziñ dze ne laa win zacle ycaania ncuaañe psan pxoz win.

3 Scadaa nagon bzhiaac ne glo zeene gard guiaad Jesús, rrieequia masaque ngadoo ne lo grë ley co, ni lo grëraa ncuaañe rac lo guidzliu rii. 4 Laa zeene bdziñ dze ne laa Dios pxeel Xpëed me Jesús lo guidzliu (tib wnaa bded por xniaa me, bzoob me diidz been me grëse zigne rnabey xley zha Israel), 5 laa me biaadsilaa ne, biadbee me ne ladznia ley co, bdiizh me grë xtol ne, zeena ycaania Dios ne gac ne mëéd lo Dios. 6 Ni parne glu ganle ne nli xpëedle Dios nac ne, pxeel Dios zhiEspíritu Xpëed me blëz zdoo ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoz ne nac me.

7 Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne ygaa grë guielnzaac ne rap Dios.

Rnee Pabl rnabeydraa ley

8 Bets, bzian, golsoladz ganle, zeene bii gard gunbey to men ne nacpaa Dios, masaque rrieequia ngadoo to lo ncuaañe nac zhimdio to hor co, rdib rdzag to run to grë mine rzac to rdziladz grë mdio co. 9 Nana, laa to runbeyle Dios, mazd gni naa ganle ledaa Dios runbeyle to, ¿pe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladznia grë ncuaañe paat rquiind co, gnabeya to? 10 Rquia to gon run to grë lni, dien pa mëé ndzonraa, dien pa dze nac dze ndaraa, pa iz nac iz ne

ndaraa, dien pa dze zac pe gow to, pa dzeegaa gacda. ¹¹ ¡Rdziebnie naa to gon! ¡Pe nlipaa zhlëse bialseed naa to, ne squi laa to racladz csaan mine bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zana!draa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. ¹³ Led rsoladz to ganle, rzacne naa len dze ne psilo pseed naa to zha laa to lo dol; min co nacne nzianlaa dze blëz naa lo to i. ¹⁴ Niicle ne sca rzacne naa, gondze to naa; laa ne mbix zdoo to nian to xquielguidz naa, znu pquia zdoo to naa, rley to blëzlo to naa pale cho xanj! Dios o Jesús gaa, tel niaca mine mezh!al niaadseed to. ¹⁵ ¡Ne nlipagaa rleydox to len dze co! Tel niaca mine niac mbee to bziaalo to, zootle zig mbee tow ngad tow lo naa. ¿Yo grë guielbley co na? ¿Yo ne scataa rleynie to naa len dze co? ¹⁶ Nana, pe rëb to rlëe naa lo to ne znu rne naa mine nacpaa diidzli. ¡Lëda gon!

¹⁷ Golquiaadiaga ganle, grë zha ne gon squi ziadseed to i niina, nli laa zho noxco to per zhaa ncuaane no guic zho. Laa zho racladz tebaa zha guiaanladz to naa, csaan to grë mine bialseed naa to, zeena gbig to lo zho. ¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. ¹⁹ ¡Xin, ne nlipagaa gon rdedne naa ran naa squi rac to! Msaque nac guielne rii lo naa niina, zig tib yoob ne rquia grë men wnaa ne gap mëed. Ni lëe nole naa guielne rii nu nagon, haxta gdziñ dze ne gan naa laa to wbiire wbig lo Jesús stib. ²⁰ Tebaa niaca mine grieelo guialzhaal naa lo to i niina, zeena gan naa zha no to, dzigo dien zha gnegaa naa lo to;

per na ne znu zit zo naa, nan! naa dien pe nacraa ncuaane noy! to.

²¹ Zha ne racladz gnabey xley zha Israel zho, racladz naa gnë zho dien, ¿pe ib riend zho zha zhobnee lo guits ne ziaad Xtiidz Dios ²² zaatne raquiet xingan Abraham? Rnew: Chop xingan Abraham, tib mëed co gop wnaa ne nac ngundziin lidz me, laa stib mëed gop wnaa ne nacpaa tsiel me. ²³ Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsiel me ga, laa win gol porne ib Dios rëb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladznia trat co no zho. ²⁵ Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie len dze rii, sac tel grë menguiedz Jerusalén, masaque ngundziin nac zho lo ley. ²⁶ Sangue wnaa ne gocpaa tsiel Abraham ga, rrieequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëe xniaa ne ga nac wnaa co. ²⁷ Lëe Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brieelod niap mëed, bley niina; nguieel goc, nguiedz broptsie lo guielbley qui, luu ne bdziñ dze niacnan luu zha nac yoob mëed. Sac gon ndalraa xpëed wnaa ne brieelod niap mëed,

lëdle grë xpëed wnaa ne gop mëed.

²⁸ Bets, bzian, golgacnan sca ganle, laa ne nacle niina zig Isaac, xpëed tsielpaa Abraham, wnaa ne gacd yquianie mëed ga; sac tel Isaac, ib Dios psan diidz ne

laa Isaac gac mēēd lo Abraham.
 29 Ni zigne sca blēēnie xpēēd
 wnaa ngundziin co Isaac, mēēd
 ne Dioszhal psan diidz gal ga;
 scasaque niina, no zha ne rlēē
 ran zho zionald ne mine rnabey
 ley, sinque laa ne zional dib zdoo
 ne riladz ne Jesús. 30 Ni nana,
 led lo Xtiidzaque Dios zhobnee
 ganle zha rēb Dios lo Abraham,
 rēb me: “Wnaa ne nac ngundziin
 lo luu i, bzonēz me grop xpēēd
 me, nonguield ne ye mēēd qui
 guiaañnie ncuaañe csañ luu lo
 xpēēd tsieel luu.” 31 Gacxe nagon
 waa, tel ne nacd ne zig xpēēd wnaa
 ngundziin co, sinque laa ne nac zig
 xpēēd tsieelpaa Abraham.

5

Dziits golso

1 Peet lo ngadoodraa ne niina,
 sac gon laa Jesús biaadsilaale ne,
 sinque to none dziits so zeena
 ygadoode to lo xley zha Israel.
 2 Naa nac Pabl, ni naazhal rne lo
 to nu. Golgona sca ganle, telne laa
 to gdeed diidz tso to xbey zha Is-
 rael, nacdiedraa to Jesús ga dzigo.
 3 Ni laaw gneque naa lo to nu stib,
 grēse zha bgui ne rio bey co, ib
 none gun zho grēse zigne rnabey
 ley co. 4 Zha ne rzac por gun zho
 grē mine rnabey xley zha Israel,
 min co laa Dios csilaa zho lo dol,
 gacnañ zho ganle, lel nozozit zho
 lo Jesús ga; ygaad zho guielnzaac ne
 ygaa zha ne gnalo Jesús. 5 Sangue
 tel no, ndionpaa no silaa Dios no
 lo dol, sacne dib zdoo no riladz
 no Jesús ni nacie Espiritu Sant no.
 6 Sac zha ne nli nole xnēz Jesús, peet
 liaadz nodraa zho bey ne rio zha
 Israel. Mine noxcoraa zho nac ne
 dib zdoo zho gliladz zho Jesús, ni
 scagaa grieelo gleynie zho samiech
 zho.

7 ¡Ese tow nli! ¿Pex goc to waa?
 Zaacse name rac to zeene psilo to
 bliladz to mine nac diidzli. ¿Cho
 pquuil to ne nēdraa to tsienal tow?

8 Mine squi nonie guic to i niina,
 led zhiwseete Dios i, men ne bredz
 to gree to ladznia ley. 9 Golguien
 sca, adel ye to sac zig rēb diidz ne
 rnee: “Niipaxe ncobi waa runcsibe
 ncob quietxtil.” 10 Per nanpaa naa,
 ible men ndzon ne rnabey ne men
 co gacnie to, zeena csaande to mine
 nac diidzli; ni zha ne squi racladz
 gungüet to, tel chotaa nac zho ib
 tedsod siaabzi Dios zho.

11 Bets, sangue naa tel niaca mine
 nli ye naa quianabey tso grē zha
 ne riladz Jesús xbey zha Israel
 zig quianee zha qui, bod goonzhe
 ni ctsidildraa zha Israel naa dzigo,
 glēēdraa zho zig rlēētaa zho niina
 zeene ron zho rne naa zha nacne
 baaadguet Jesús lo cruz. 12 Zha ne
 squi ziaadnabey tsopaa to bey ne
 rio zha bgui nēz Israel, jtebaa mazd
 ladaque zho yga zho, niicxe gdib
 nacsē zho waa cueniaal zho, led
 tsod zho noyunneed zho to! 13 Bets,
 golguien ganle ne ygadoodraaxe to
 lo ley waa, min co nacne biaadsilaa
 Jesús to. Per guiabde to togo ne laa
 me psilaale to, laa to gun ncuaañe
 guiaabtaa guic to. Gunscade to,
 sinque tib tib to golleynie samiech
 to, ine golgun ncuaañe rquiin grē
 zha ne nacgrē to; 14 sac niina tot-
 saque gban to zigne rnabey Dios
 nu: “Bleynie samiech luu zigne
 rleynieque luu luu”; lēēle grē mine
 nac ley ga gun to. 15 Per tel laa
 ne gleynie to zha ne nacgrē to, lel
 dil no to, zig run grē ma ne lēēque
 ma noquiaalaylsa, lēēque ma noy-
 owlsa; dzigo lēēque to gnitlo to ga.
 ¡Gunscade to!

Zha ne lega mbanse

16 Gacxe, laa naa rnab lo to:
 Goltsoxco golban zigne racladz
 Espiritu Sant, ni me gacnien to;
 led tsoode to dien zha gun to
 grē ncuaañe ndzinlid ne racladz
 xcuerp to. 17 Sac gon grēse ncuaañ
 co, rleynied Espiritu Santa. Laa
 xcuerp ne run ncuaañe racladz

Espíritu Sant, ni ncuaañe racladz-gaa Espíritu Sant néd xcuerp ne gac miñ co. Guñde to miñe racladz xcuerp to sca. ¹⁸ Telne gban to zigine rnabey Espíritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca ruñ grè ncuaañe ndzinlid, ib paat nguetsd zho:

rionie zho zha ne led tsieeld zho, ruñ zho grè ncuaañe ndzinlid ne racladztāa xcuerp zho,

²⁰ riegāñ zho grè mdio, rnab zho pe sac samiech zho, rlēēnie zho samiech zho,

rdilnie zho samiech zho, rzac zho adel cho glale tsieel zho, rnadse pew laa zho rlēēle,

runctil zho miech, rguib zho rtso miech, rbeextso zho dien cho zha ne gacnie zho,

²¹ nē rac zdoo zho rañ zho ncuaañe quānie stib miech, rzudz zho,

rcaalsa zho zaatne loxaque rowcho zho, ni ruñ zho grè guielyozh.

Grè ncuaañ co ruñ zho ni grēragaa ncuaañe ndzinlid ne sca nac. Laa naa rbire rso diidz lo to, guñde to grè ncuaañ co; sac gon grēse miech ngoopdol ne sca rban, grieelod gdziñ zho zaatne rnabey Dios.

²² Sangue zha ne zienal miñe racladz Espíritu Sant, znu nac zha co:

rleynie zho samiech zho, tibaque nguieel rac zho, peet dzeb nonied guic zho, rxecw zho, rievedniobd zho, niowse rnee zho lo samiech zho, niapse ncuaañ wen ruñ zho lo samiech zho,

ruñ zho miñe rnee zho guñ zho,

²³ miech ndooladz nac zho, zha rnabey xcuerp zho.

Ni telne gban ne zigne nac grēse miñ rii, ni tib ley noguitsd ne ga. ²⁴ Grēse miech ne nli xnēzle

Jesús no, zieniedraa guic zho guñ zho grè ncuaañe ndzinlid ne bzoobladz zho padzeela, grè ncuaañe ndzinlid ne racladznē xcuerp zho, sac rien zho paat rquiind ncuaañ co lo zho. ²⁵ Gacxe nagon waa, telne nli mbannie ne guielmban ne rneedz Espíritu Sant, golgotsaa dzion ne miñe rnabey me. ²⁶ Dzigosi gacniatsdraa ne lo samiech ne, tsienaldraa ne dien cho glaaraa guiaañ, tso ne nē gac zdoo ne gañ ne grè ncuaañe rap zho, ncuaañe racgaa zho.

6

None gacnie ne samiech ne

¹ Bets, bzian, telne gañ to laa cho tib zha ne nacgrē to noyuñ pe tib dol, dzigo to ne nac to zha ne nlipaa zienal miñe rnabey Espíritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. ² Zeene rañ to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lēēque zha noguitnie zho ga. ⁴ Tib tib to, wen wen golguieñ dien pe quiayuñ to, telne ncuaañe ndzinliw ine golley, per tso de to glēē zdoo to gañ to miñe ruñ stib zho. ⁵ Sac tib tib ne, psose Dios ne pe nac xtsiin me miñe guñ ne.

⁶ Grē zha ne noseed Xtiidz Dios, ib none ncuaañe rgaataa lo zho gdeed zhow yquuin zha ne noluw lo zho.

⁷ Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac miñe ruñ ne mincoque ctsire me lo ne.

⁸ Zha ne ruñ grè ncuaañe ndzinlid, lēē miñe cueequia zho ga laa zho nitlo. Laa zha ne guñ grē miñe rnabey Espíritu Sant, lēē miñe ygaa zho ga nac tib guielmban ndzon ne

gdziñd dze lozh. ⁹ Gacxe nagon waa, tibaque gotsaa dzioxco ne dziuun ne ncuaane ndzinli, ncuaane rquiin, guieete ne; sac telne sca tibaque dzioxco new, zeene gal dze co laa ne ygaa mine guiogual ne. ¹⁰ Zeene gdeedtaaw diidz sca, golgotsaa dzioxco ne dziuun ne xyudar grese samiech ne, ni nana zeene zha ne noque xnëz Dios nac zho, mazdraa rieguial dziuun ne xyudar zho.

Rso Pabl diidz

¹¹ ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! ¹² Grë zha ne gon squi racladz tsopaa to bey ne rio zha Israel, laa zho ruña zeena glëenied miech zho, zigne rlëenie zho grë zha ne rseed miech ne ib laa Jesús gut lo cruz, psilaa me grese miech lo dol.

¹³ Nana, niicxe grë zha ne nole bey co, rundaque zho grë mine rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey. ¹⁴ Sangue tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grë mine bded Jesús ga, grëtaa ncuaane no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

¹⁶ Grëse to ne nac to zha ne zienal diidz ne rso naa nu, Dios yquia zdoo to, ni me gacniën to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnan sca ganle, ib racladzdraa naa gon pe yquiaaqui gbiire gaquiet mine bnele naa lo to nu; sac tel naa, grëtaa mdel ne no xcuerp naa nu,

lëëlew nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grë zhzhgab to. Sca gaca.

Pabl

GUITS NE PXEEL PABL LO ZHA EFÉS

¡Diuzh to grëse to!

¹ Naa nac Pabl, tib zha ne pxeel Jesús nonee Xtíidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tibleque laa to rililadz Jesús. ² Dios men ne nac Pxoze ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacnieñ to ctsebd grë pe zhgab to.

³ ¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús. ⁴ Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtold, zha ne gban zigne racladz me. ⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

⁶ Minocoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, bi-aadgunlay me. ⁷ Ne nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co. ⁸ Ni led loxaque mincodse, sinque haxta bneedz me guielrien lo ne, bdixbiini me ne, ⁹ ni bneedz me diidz gocndion ne pe nac mine no zdoo me, mine mese nan, mine nole me gun. ¹⁰ Sac niina laa ne ndionle: Grëse ncuaañe no gbaa, ncuaañe no guidzliu, tibaque gaca

grëw ni Jesús gnabeya grësew; sca gaca zeene laa dze co gdziñ.

¹¹ Grëse ncuaañe bnabeyle Dios no gac, run mew zigne racladz me. Gotsaa gwi ne ganle, glöle bzooblo me ne yгаа ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹² Ni laa me bzooblo ne, zeena ne ne nac ne zha ne gloopaa psilo bnalo Jesús, cxobnen ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu löle me ngab to; zigne bneelee me glo. ¹⁴ Ne znu pxeel me Espíritu Sant nacie ne, ga rlu ganle ib nli zgaa ne grë mine bneelee me gdeed me lo grë zha ne ngab lo me, ni lëe min co yгаа ne zeene gal dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

Rnab Pabl guielbiini lo Dios

¹⁵ Zeene gocnan naa ne nlipaa dib zdoo to rililadz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷ rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne. ¹⁸ Rnab naa lo me quixbiini me guic to, guien to ganle zha nactaa grë ncuaañe yгаа to ne laa me bredz to, guien to ganle zha ndzontaa, zha nontaa ncuaañe gdeed me lo grëse miech ne ngab lo me, ¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me ²⁰ zeene bleeban me Jesús bzoob me me cue me gbaa, zaatne riegual sob me

ne nac me men r nabey, ²¹ bzo me me, me r nabey lo grèse zha ne r nabey, lo grèse zha ne non, ni lo grèragaa ncuaañe no; niicle niinaw, niicle len dze ne naragaa guiaada. ²² Grèse ncuaañe notaa, laa Dios psana ladznia me, ni bzo Dios me me r nabey lo grèse zha ne no xnèz me. ²³ Sac grèse zha ne no xnèz me r rreequia xcuerp me ga nac zho, gacxe waa grèse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grètaa ncuaañe no ladznia me now.

2

Ne noxco Dios miech gane psilaa me zho

¹ Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol to, masaque nac to lo Dios hor co zig tib zha ne gutle, ² laa to güeynal niapse grè ncuaañe ndzinlid ne rac lo guidzliu rii, been to grè miñe r nabey ma ne r nabey lo mendox, ma ne r cheep grè zha ne ib néd gon xtiidz Dios.

³ Grèse ne sca wban ne glo, bional ne ncuaañe ndzinlid ne bzoobladztaa ne, bdziuuñ ne ncuaañe bdeedtaa guxt xcuerp ngoopdol ne, ncuaañe biaabtaa guic ne. Ni ne scataa nac ne, ib bioguañ ngaa ne lo guielndox ne cxeel Dios, lo guielnè ne noxtseeb grèraa miech niina. ⁴ Per ne nquialadz Dios ne nac ne miech, gane pquia zdoo me ne, ⁵ ni niicle ne rreequia men gutle nac ne ne scataa quiadziuuñ ne grè dol co, per bleeban me ne; lèe miñ co ga been me zeene bleeban me Jesús. Laa me psilaa ne lo guielgut co, niapse por mezhall noxco ne! ⁶ Laa me bleeban ne, zeena yгаа ne guiosiobnie ne Jesús zaatne gnabey Jesús. ⁷ Zigtaa len dze riiw, zigtagaa len dze ne ziaadraaw, ga gan miech ganle pa lotaa nquialadz

me ne, pa lotaa wen me lo ne, sac pxeel me Jesús biaadsilaa ne. ⁸ Golsoladz ganle, ne wen me mezhall noxco guiaanwen miech lo me, gane rsilaa me ne lo dol zeene laa ne riladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, ⁹ racda ne por pe guielwen ne gun zho; zeena gdaannied zho guielwen ne run zho. ¹⁰ Dios nac men ne psan ne, ni niina ne laa ne bziaab xnèz Jesús, laa me bredz ne dziuuñ ne grè guielwen ne racladz me, miñe bzooblode me ne dziuuñ ne.

Grèse zha ne ngab lo Jesús, tipse nac zho

¹¹ Golsoladz ganle miech ngoopdol, miech ne ngabd lo Dios, miech beed, sca lè to lo grè zha Israel glo (sac zha, ne rio zho bey zigne r nabey xley zho, rzac zho miech wen, miech mbe nac zho, zha nac zha ne ngabpaa lo Dios). ¹² Len dze co gard ygab to lo Jesús, gard gac to tipse grè to zha Israel, led yede to no lo trat ne biaan Dios grè me zha Israel, nande to grè diidz ne psan me lo zho. Lega laa to mbanse, runbeyde to Dios, ni tib guielnzaac quiambèzde to yгаа to. ¹³ Sangue niina ne laa to bzèeb xnèz Jesús porne bzheie xchen me psanmbe me to, laa to ngable lo Dios.

¹⁴ Jesús nac men ne psanwen ne grè ne, ptiche me grètaa ncuaañe pca zaace ndzianlsa ne; zigtaa zha Israela, zigtagaa zha zita, tibaque been me ne lo me niina. ¹⁵⁻¹⁶ Zeene pquia me lo cruz, gataa ptiche me grè ley ne zianal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grè zho, ni psanwen me zho nèz lo Dios.

¹⁷ Jesús nac men ne biaadnie Xtiidz Ndzon me lo ne grëse ne, gocndion ne zha guiaanwen ne nêz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. ¹⁸ Gane niina, niicle zha Israela, niicle zha zita, zrieelo ygab zho lo Dios men ne nac PxoZ ne, zeene laa Espíritu Sant gunquien zho none gbig zho lo me. ¹⁹ Gacxe waa, tel to nacdraa to menzit niina, lole Dios ngab to, lal non to, lal nac to grë to grëraa zha ne ngab lo me. ²⁰ Golguien ganle, grëse ne niina gzoob ne nac ne zig tib yu ne noyaa, yu ne psilo grë zha ne pxeel Dios nonee xtiidz me lo miech niina, grë zha ne pxeelgaa me pteed xtiidz me lo miech padzeela, ni Jesús nac quie ne naaz yu co. ²¹ Grëse zha ne ziena miñe rnabey me, rrieequia nosoquiaraa zho yu co ga, haxta guirew gaca tib yadoo ne nlipaa mbe nêz lo Dios. ²² Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbëz Espíritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, miñ co gane znu nioogyu naa nu. ² Nanlaxe to ganle ne wen Dios, laa me bzo naa gun naa dziin rii cseed naa grë menzit. ³ Laa me blu lo naa zha nac grë ncuaane no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii. ⁴ Zeene glab tow i, dzigo guien to ganle ne nli nan naa zha nac grë miñe gun Jesús, miñe mese nan. ⁵ Wlaltaa choot miech gocnanda, laa niina laa Dios pxeel zhiEspíritu me bneedz guielbiini lo no gocndion now, zigtaa no ne nac no zha

ne pxeel me nonee xtiidz me, zigtagaa grë zha ne pxeel me noteed xtiidz me. ⁶ Ni znu naca: grëse zha zit, zgaa zho guielnzaac ne reb Dios gdeed me lo grë zha ne ngab lo me, tibaque nac guielnzaac ne yгаа zho grë zho zha Israel. Niicle zha Israela, niicle zha zita, laa Dios quiambëz gdeed me guielnzaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho miñe blozh bzet naa nu, me nacie naa, me rneedz grëtaa poder ne rap me parne grieeelo gun naa dziin rii. ⁸ ¡Ncuaane gzee zdoo new! Golwi ganle, naa nac tib zha ne mazdraa peet nond lo grë zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grë zha zit, zeena gacnan zho ganle pe zhistaa grë guielnzaac ne gdeed Jesús lo zho. ⁹ Gne naa lo zho gacnan zho ganle zha nactaa grë miñe no guic Dios gun me, miñe wlaltaa choot gard gacnan; Dios, men ne bzaa grëse ncuaane no. ¹⁰ Nana gnë to: “¿Pe nacte sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguictaa Dios. ¹¹ Sca nac miñe no guic me padzeela, ni zeene laa me pxeel Jesús laaw goc. ¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. ¹³ Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

14-15 Zeene rsoladz naa grëtaa minë no guic Dios guñ me, ni minë beenlegaa me (me ne nac me Dad lo grëse zha ne ngab lo me, niicle lo guidzliu nuw, niicle gbaagaaw); rded naa xquizh lo me. 16 Ni ne squitaa ndzon, ne squitaa ncuaane lozhd nac grëtaa guieInzaac ne rap me, laa naa rnab lo me cxeel me zhiEspiritu me gneedz xfuers to dziits so to. 17 Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to. 18 Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuaane grielo ctiix ne, guiab ne lalnuw. 19 Niicle ne znu nacda ncuaane grielo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.

20 Ni Diosi gon ne nac me men ne ndzon, mazdraa ncuaane grielo gneedz me lo ne, lëdle minë riab guic ne rnab ne lo me; ni ncuaane gaca gon, sac me nacie ne. 21 Grëse ne ne nac ne zha ne no xnëz Jesús, itibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne rliladz Jesús

1 Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to. 2 Golgac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho. 3 Wenle na ndxie to niina, ni Espiritu Sant nac men ne gacnie to; zeena tibaque squi tipse gac to. 4 Sac gon tibaque

cuerp nac ne grë ne, tibaque Espiritu nacie ne, ni tibaque nac minë ndion ne gneedz Dios lo ne, ne laa me bredz ne. 5 Tibaque men ndzon ne rnabey ne, tibaque men ne rliladz ne, tibaque wrobnis ne no par grë ne ne dib zdoo ne rliladz ne me; 6 tibaque Dios no, me nac Pxoz ne grëse ne, me nac men nroob ne zo lo ne, me racnie ne grëse ne, ni me nacie ne.

7 Tipse nac ne, per tib tib ne psose Jesús ne pe nac dziin ne grielo dziuun ne lo me, zigne gola zdoo me. 8 Min rii ga raquiet zaatne znu zhoobnee lo guits ne ziaad Xtiidz Dios:

Blozhse psanwin me grëse zha ne rlëë ran me,

laa me biire zey gbaa stib;

ni psose me tib tib miech pe nac dziin ne grielo guñ zho lo me.

9 Golgotsaa gwi ne ganle, Jesús raquiet nu, rneew "biire zey me gbaa stib", ga rlu ganle tib men ne biet gbaaw biaad me lo guidzliu.

10 Sac me biet gbaa, ni biire zey me gbaa stib, zeena glu ganle tel pa lotaa zrieelo gdziñ me. 11 Ni mezhal rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,

zha ne rxeel me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rteedlo grë zha ne ngab lo me, ni

zha ne rseed zho zha nac Xtiidz Ndzon me.

12 Laa me run min co, sac laa me racladz grëse zha ne ngab lo me lozh xixcuaa lo xquielmban zho, zeena guien zho zha guñ zho xtsiin me; 13 haxta gdziñ dze ne tibaque minë gliladz ne grë ne, grëse ne dziuunbepaa ne men ne nac Xpëed Dios. Laa ne lozh sodziits, haxta gac ne zig me.

14 Gacdraa ne zig chol cho mëedlas ne beelze pe rliladz; niicxe

guiaad grē zha ne guiaadnie stib wseed, zha ndzinlid ne zombēz loxaque dien zha gdeeda diidz yquidiē zho miech; yquidied zho ne. ¹⁵ Sinque guionaḽ ne miṇe nac diidzli, iṇe gleynie ne samiech ne, tibaque laa ne guionaḽ zigne nac Jesús, meṇ ne rnabey lo ne grē ne ne ngab ne lo me (rrieequia xcuerp me nac ne, me nac guic cuerp co). ¹⁶ Ni ne me nac meṇ ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeṇa xixcuaraa lo xquielmban ne, ni lozh guieṇ ne zha gleynieraa ne samiech ne.

Guielmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeṇe meṇ ndzon ne rnabey ne rneew lo to: gbandraa to zigne mban grēraa miech ne zozit lo Dios, grē zha ne mban zigne notaa guic; ¹⁸ sac tel zha, ncow nac guic zho. Gard yгаа zho guielmban ndzon ne rdeed Dios, naṇd zho zha nac guielmban co sacne ndip zdoo zho. ¹⁹ Laa zho gocnadle, niapse lo grē ncuaaṇe ndzinlid no zho, ib rgobeyd zho run zho grētaa guielyozh ne no. ²⁰ Saṅgue to goṇ, ne nac to zha ne no xnēz Jesús niina, led miṇcod noseed to; ²¹ telne nli noquiaadiag to gaṇle cho nac me, telne nli rien to zhiwseed me miṇe rlu gaṇle zha nac diidzli.

²² Miech yozh ne goc to glo, grētaa ncuaaṇe ndzinlid, grētaa guielyozh ne gocladztaa xcuerp to been to, iḡolsaana! ²³ None gdzēē lo xquielmban to, zigtaa grē miṇe no zdoo to, zigtagaa grē miṇe rza guic to, ²⁴ golgac tib miech cub, zaacse goḷban, ndzinli golgac; zeṇa glu gaṇle ne nli beenncuble me to zigne racladz me.

²⁵ Golguieṇ sca, yquidiedraa to samiech to, sinque niapse miṇe nac diidzli golnee, sac goṇ tel ne pe

nacne yquidielsa ne ni tibaque nac ne grē ne.

²⁶ Telne glēē to, code to guielblēē co zdoo to dib dze, sac goṇ doḷ ga. ²⁷ Gunde to miṇe racladz meṇdox.

²⁸ Zha ne goc ngbaan lēē, cuandraa zho, sinque gun zho dziin gdziniaa zho ncuaaṇe yquiiin zho, zeṇa scagaa grieelo gun zho xyudar zha ne guieṇd pe yquiiin.

²⁹ Gneede to diidznē, sinque diidz ne ndzinli, diidz ne yquiiin golnee, zeṇa zha ne gona iṇe cchoobladz zdoo zho, iṇe yquiiina lo zho. ³⁰ Golguieṇ, gunde to ncuaaṇe coguieḽnē to Espiritu Sant. Golgaṇ gaṇle laa Dios pxeel me, nac me zig tib bey ne glu gaṇle ne nli lo Dios ngab to, gaḷ dze ne laa me lozhpaa csilaa grē zha ne ngab lo me. ³¹ None csaan to:

guielṇialadz, tso to gow gzhiizh zdoo to;

glēēdraa to,
sobzhiandraa to,
coredzdraa to,
gacntseebdraa to, ni
grēragaa guielṇtseeb ne no, gunde tow.

³² Sinque none:
wen gac to lo samiech to,
golquia zdoo samiech to,
golgun samiech to perdon, zigne
beenaque Dios to perdon
zeṇe laa to beenbey Jesús.

5

None glu cho nac zha ne ngab lo Dios

¹ To ne laa to nacle xpēēd Dios ni nquialadz me to, golṭsoxco gac to zig me. ² Zaacse goḷban, golḷeynie samiech to zigne rleynie Jesús to, sac goṇ tel me, haxta bleeladz me me gut me xcuent ne, gut me biogon me lo Dios psanṇbe me ne lo xtoḷ ne, me goc tib gon ne pcaania Dios.

³ Golguieṇ sca, none glu to ne nli xnēz Dios no to;

gunde to grē guiel_yozh ne run grē zha ne zienal_d zigne nacpaa guiel_tsieel,

gunde to grē ncuaa_ne yozh ne run miech ndzinlid,

gunde to grē ncuaa_ne run grē zha ne zienal_d loxaque dien zha gunlo dimi.

Gunde to grē ncuaa_n co, per ni gzodiidzde tow.

⁴ Gneede to grē diidzguidz, gneede to grē diidz ne paat rquiind,

gneede to grē diidz ro nēz; sac gon rdzieeldraa gnee to grē ncuaa_n co; sinque Dios golgoolnie, goldeed xquizh lo me.

⁵ Nanle to ganle, grēse: zha ne zienal_ddraa zigne nac guiel_tsieel, zha ndzinlid ne run grēraa guiel_yozh,

zha ne mbidz (zha ne rleynieraa dimi, laa ne gleynie zho Dios);

ni tib zho grieelod gdzi_n zaatne rnabey Jesús grop me Dios.

⁶ Gdeete to diidz lo zha ne gacladz yquidie to gnē zho peet nacd grē min co, sac gon, grēcxe min co waa run grē zha ne nēd gon xtiidz Dios, lozh ga, lēē mine tsieguial_d zho laa zho yгаа lo guielzi ne csiaab me. ⁷ Golguien sca, yquiaadiagde to xtiidz grē zha ne sca rnee, per ni ctsieelsade to zho.

⁸ Nli, ¿lēē?, ndzinlid wban to glo, rrieequia lo ncow ga bio to, gocnie to mendox; sa_ngue niina ne laa to nacie Jesús men ne nac biini, rrieequia lo biinile no to. Golguiena sca, zaacse golban, ⁹ sac niina ne laa to nole lo biini, none gac to:

tib miech wen,
tib miech ne zienal_d gac mine nac diidzli,

tib miech ne rnee diidzli.
¹⁰ Goltsoxco guien to zha racladz Dios gban to. ¹¹ Gandzede to grē ncuaa_ne ndzinlid ne run grē zha ne no lo ncow, sinque gollisquiw;

¹² sac grē ncuaa_ne run zho ngueets zhliaan, haxta ncuaa_ne ctoladz ne gnee new. ¹³ Grēse zha ne gbig lo biini co, zien zho ganle zha nactaa grē ncuaa_ne yozh ne noyun zho; sac gon telne biiniw, tsod ncuaa_ne guianngueets low. ¹⁴ No tib zaatne znu zhobnee lo Xtiidz Dios, rneew: Luu ne tibaque guieel no luu, blee mcaal lo luu;

brieelad grē zha ne squi nole ladz-nia guielgut, zeena gban luu lo biini ne nac Jesús.

¹⁵ Golguien sca:

Miech nixbiini golgac, ndzinli golban; gbande to zig chol cho grē miech nxen ne run mine notaa guic.

¹⁶ Cteed zhlēde to xtse to lo ncuaa_ne paat rquiind, niicle ne niapse grē min co zienal grēraa miech len dze ri.

¹⁷ Gunde to ncuaa_ne paat rquiind ne rza guic to, sinque golguien dien pa minpaa racladz Dios gun to, dzigo goltsoxco min co golgun.

¹⁸ Gzudzde to, sac gon lo guielgonziu run miech ncuaa_ne nonguieldraa; sinque mazd golnab gneedzraa Espiritu Sant guielbiini lo to, zeena ine:

¹⁹ gool to grē salm, grē himno, grē cant ne csiaab Espiritu Sant guic to; dib zdoo to golgoolnie men ndzon ne rnabey.

²⁰ Goldeed xquizh lo Dios men ne nac Pxoz ne, por grētaa ncuaa_ne ran to, ncuaa_ne rded to; golguien ganle lo Jesús ngab to.

Zha none gban zha ne riladz Jesús

²¹ To ne nac to zha ne ngable lo Jesús, tib tib to golgon mine rnee zha ne nacgrē to, zeena glu ganle me nac men non lo to.

²² To ne nac to men wnaa ne ptsieelniale, golgon xtiidz tsieel to, zigne rioxcoque to ron to mine nac xtiidz men ndzon ne rnabey. ²³ Sac ible tsieel to nac men ne no gnabey lo to, zigne Jesús rnabey lo grē zha

ne no xnëz me (ni me psilaa zho lo dol, laa zho nac zig xcuerp me).²⁴ Ni zigne sca ron zho xtiidz me, scaque none gon to miñe rnabey tsiel to to.

²⁵ Togaa ne nac to zha bgui ne ptsieelniale, golleynie tsiel to, zigne rleyne Jesús zha ne no xnëz me. Tel me haxta bleeladz me xquielmban me,²⁶ blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho;²⁷ zeena gal dze ne laa me ycaania zho, laa zho nacle miech ne rieguial gdzin lo guielndzon ne no me, ni tib dol rap-draa zho, miech mbele nac zho, zig tib lë lar nquitsbie ne ni tib pxud neyd.²⁸ Sca nagon none gun mgui, none gantsi zho tsiel zho zigne rañtsi zho xcuerp zho. Mgui ne rañtsi tsiel, rrieequia xcuerp zho ga rañtsi zho;²⁹ sac gon, tsod tib zha ne lëë zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me,³⁰ sac nac zho zig xcuerp me. Ni lëë tib lë cuerp co nu nac në.

³¹ Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: “Ib none griezhaa mgui lo pxoz zho, lo xniaa zho, zeena gbannie zho tsiel zho gac zho zig tibaque miech grop zho.”

³² Rgobey naa ngañ tsoguic to zha nacle chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëë xcuerp Jesús ga.³³ Miñe racladzpaa naa csoladz to nu: to ne nac to men bgui, none gleyne to tsiel to zigne rleyneque to xcuerp to; ni niicle togaa ne nac to men wnaa, none gon to xtiidz tsiel to, cuede to xquielto zho.

6

¹ To ne nac to mëëd, golgon xtiidz pxoz to, xtiidz xniaa to, sac

sca nonguiela, ni scagaa glu ne nli rleyne to Dios.² Golgan ganle, lo grë xley Dios no tib miñe znu rnee: “Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii.” Ni lëëw glopaa rnee ganle pe nac miñe yгаа zha ne gun miñe rnabeya,³ sac rneew, niowse gac lo xquielmban zho, ni nroob dze ne gban zho lo guidzliu rii.

⁴ Togaa ne nac to men nguzan, gunde to ncuane yquiaaguieñe to xpëed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵ To ne nac to zha ne ngadoo ladznia ben, golgon xtiidz men ne rnabey to. Golguien zha rnabey to, dib zdoo to, goltoxico golgun xtsiin zho, zig nac zeene xtsiin Jesús ga noyun to.⁶⁻⁷ Gunde to ne loxaque zeene zose zho lo to, dzigose yquiaalo to gun to dziin zeena guianzuiu to lo zho, sinque ine nguieel golgac golgun xtsiin zho, zig nac zeene xtsiin Jesús ga quia to, ine dib zdoo to quiayun to miñe racladz Dios.⁸ Benque nanle to, zigtaa zha ne ngadoo ladznia bena, zigtagaa zha ne rnabeya, zdeedse Dios miñe tsieguial zho tib tib zho tel pe nac ncuane wen ne noyun zho.

⁹ Togaa ne nac to zha ne rnabey, niowse golgac lo zha ne quia xtsiin to, gacntseebde to lo zho. Golguien ganle, zigne rzacaque zho, scaque rzac to, no tib men ne rnabey to grë to, lëë me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne riladz Jesús

¹⁰ Bets, bzian, nu ne laa naa csiaalle, laa naa rnab lo to gon tibaque gonalo Dios; golgan ganle, con grëtaa guielrnabey ne rap me, me gneedz grë lose fuerz lo to.

¹¹ Zig nac grë men^guiib, ible no grë ncuaaⁿe rquiin zho zeⁿe laa zho rie lo dil, scaque to niina nagon, gol^quiin grë lose fuerz ne bneedz Dios lo to, zeⁿa glëbd men^dox gung^üet ma to. ¹² Golgan gan^le, led^xe miech guidzliud waa nodilⁿie ne, sinque laa ne nodilⁿie grë me yozh ne quianzë zhan gbaa, ma ne quianabey grë^taa guielⁿtseeb ne rac lo guidzliu rii. ¹³ Gane nagon none yquiin to grëse lo fuerz ne zineedzle Dios lo to, zeⁿa guiablode to zeⁿe laa grë me ntseeb co csilo ygaal^l to; ni scagaa, zeⁿe laa ma biablo, tibaque dziits so to grë to.

¹⁴ Dziits sca gol^so:

Dziits gol^so lo miⁿe nac diidzli, zigne dziits dziits rzhidoo len men^guiib zeⁿe laa zho tsie lo dil.

Golgun miⁿe nonguiel^l zeⁿa ctse to lo men^dox, zigne rtse ncuaaⁿe racw men^guiib lo grë ncuaaⁿe gnitlo zho.

¹⁵ Nsin gol^so zeⁿe laa to tsienee Xtiidz Dios lo miech gacnan^l zho zha guiaanⁿwen zho lo me, zigne nsinle zo men^guiib zeⁿe laa zho no tsie lo dil.

¹⁶ Guiaanⁿladzde to, golⁿalo Dios, zeⁿa peet grieelod gun^l grë me yozh co to, zigne rnalo men^guiib guiiblag ne rsaac zho lo zha ne nodilⁿie zho.

¹⁷ Gol^soladz gan^le laa Dios psi^llaale to lo guiel^gut, gol^ssaca zigne rzac men^guiib pchog guiib ne rzob guic zho, rsilaaw zho lo guiel^gut. Ni gol^sac Xtiidz Dios miⁿe rneedz Espiritu Sant lo to, zigne rzac men^guiib xquiib zho.

¹⁸ Nsin sca gol^so, guiablode to. Tibaque gol^zodiidznie Dios. Golⁿab lo me miⁿe rsiaab Espiritu Sant guic to, golⁿab gacniⁿ me grëse zha ne ngab lo me; ni ¹⁹ golⁿab lo me gacniⁿ me naa, csiaab me guic naa pe nac miⁿe gne naa, peet dzeb tsod lo naa gne naaw lo miech; zeⁿa gacnan^l zho gan^le, zha nac Diidz

Ndzon ne rnee zha laa miech lo dol, miⁿe choot gocnan^d glo.

²⁰ Ib me bzo naa cteed naa xtiidz rii me lo grë zha zit, ni min^cocxe waa rquiaqui znu no grë guiib rii nia naa, ngoguiu zho naa nu. Golⁿab lo me gacniⁿ me naa, gdzieebd naa gne naa gan^le cho nac me. ¡Nsin sca gol^so!

²¹ Laa naa rxel^l Tic lo to, me nac tib menⁿ nziuu lo naa, dib zdoo me laa me quiayunⁿ xyudar naa lo xtsiinⁿ menⁿ ndzon ne rnabey ne. Me guiaadnie diidz lo to gan^le zha rac naa, zha no naa nu. ²² Min^copaa ziaad me i, ziaadnie me diidz zha no no nëz rii, zeⁿa in^e gley to tsox^ccoraa to miⁿe riladz to.

²³ Rnab naa lo Dios menⁿ ne nac Pxo^z ne, ni lo Jesús menⁿ ndzon ne rnabey, me gacniⁿ to peet zhgab ctsebd^e to, in^e tibaque gliladz to me, in^e gleyⁿie to samiech to. ²⁴ Me gun^lay to, grëse to ne nac to zha ne nlipaa dib zdoo rleyⁿie Jesús.

Pabl

GUITS NE PXEEL PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios; ⁴ ni zeene rzodiidnie naa me, rley naa gon rnab naa lo me gacnie me to; ⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. ⁶ Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguiala sac ne nligaa rleynie naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. ⁸ Dios nan ganle pa lotaa nonie to guic naa, rquiane zdoonaa to, zigne rzacaque Jesús ne.

⁹ Rnab naa lo Dios gacnie me to, zig zie dze gleynieraa to samiech to, tsabiiniraa to, ¹⁰ zeena guien to cue to niapse grë ncuane ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús; ¹¹ zaacse gban to. Ga glu to ganle lëe min co

blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuëz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. ¹³ Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. ¹⁴ Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guiannziiu zho, sac në rac zdoon zho ran zho zha none naa Xtiidz me. Per zigne no zha ne sca naa, noque zha ne nli dib zdoon zho quiaseed zho miech. ¹⁶⁻¹⁷ Lëe zha co nagon rlu ne nli rleynie zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guiannziiu zho, rzac zho na tel mazdraa glaa guiaan zho lo naa, mazdraa lozh coguielnë zho naa ne laa naa znule no ladzguiib. ¹⁸ Per par naa, pex gun naa zho. Tel zha ne zie dib zdoow, zha ne zieedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne niogyu naa nu; sac lala quianab to lo Dios por naa, ni lala nacie zhiEspiritu Jesús naa. ²⁰ Dib zdoonaa racladz naa, tiblifique gac naa lëeb naa gan naa mine tedtaa naa, gdziind dze ne gun naa ncuane cuee xquielto naa. Racladz naa cxobnen naa ganle zha men rottaa nac Jesús; ni-

icle tel̄ niaca por min̄ co yquiaaquī gut miech naa. ²¹ Sac gon̄, par naa laa naa mban par gun̄ naa min̄e rnabey Jesús, ni zeene guetгаа naa, nan̄paa naa tib guiel̄bley nroob ne ygaa naa. ²² Per tel̄ laga mban naa, nzianraa ncuaane grieelo gun̄ naa lo me; dzigo nagon̄ riendaque naa dien̄ pa min̄ wenraa. ¡Pe wena gbanraa naa, te wena ye prontga gbi naa lo guidzliu rii! ²³ No hor rzaac naa gbanraa naa, nogaa hor rzaac naa tebaa laa naa wbile lo guidzliu rii; zeena ziaгаа naa lo Jesús, sac nligaa zoot naa laa naa bdziñle lo me. ¡Min̄ co mazdraa wen, lēdle cuēz naa lo guidzliu rii! ²⁴ Per rien̄ naa ible none cuēz naa, sac rquiinpaa to naa. ²⁵ Min̄cocxe nagon̄ waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to rliladza; ²⁶ ni zeene laa naa gbire guial̄ lo to i, rien̄ naa nroob gley to, zdeed to xquizh lo Jesús porne racniēn me naa.

²⁷ Per min̄e rsopaa naa diidz lo to gon̄: Gol̄tsoxco gol̄ban zigne no gban zha ne ngab xnēz Jesús, zeena niicle tel̄ne grieelod guial̄ naa, racladz naa gon̄ naa tipse nac to grē to, tiblique dziits zo to lo Xtiidz Dios; ni noxco to dien̄ zha gliladz grēraa miech Jesús, ²⁸ ni lalnu rdziebde to grē zha ne rlēē ran̄ to. Ga guien̄ zho gan̄le nēz ne nitlo zho zie zho, sangue to ga rlu ne laa Dios psilaale to lo xtol̄ to, ni nacie me to. ²⁹ Sac gon̄, ible none gan̄ to guiel̄nē porne no to xnēz me, bzooblod Jesús to loxaque par ygaa to guiel̄nzaac qui gnalo to me. ³⁰ Niicle tow, niicle naagaaw none dzian̄ ne min̄ co. Gon̄le to gan̄le zha nactaa grē ncuaane bdeed naa, ni ziyongaa to grē min̄e nodeed naa niina.

2

Goc Jesús tib men̄ ndooladz

¹ Nan̄le to gan̄le Jesús rchoobladz zdoos to, me rlu zha gleynie to

samiech to, tipse nac to ni Espiritu Sant nacie to; nan̄le to gan̄le none yquia zdoos to samiech to. ² Gacxe nana sca, gol̄conley zdoos naa, ine tipse gol̄gac, gol̄leynie grē zha ne nacgrē to, tipse gol̄nee, ni tipse gol̄gac tel̄ pa lo dziin̄ ne gnediidz to gon̄ to. ³ Ncuaane gon̄ to, guiabde to ne laa to guna par dien̄ zha csañwin to stib miech, zeen̄ dien̄ zha guian̄nziuu to; sinque ine ndooladz gol̄gac, masaque gol̄tsienie guic ne nonraa stib miech lo to. ⁴ Ib yguibde to ne lose to yquiin̄ ncuaane gon̄ to, sinque gol̄guib dien̄ zha gon̄ to xyudar grēraa miech.

⁵ Gol̄soladz gan̄le pa lotaa ndooladz goc Jesús len̄ dze ne biaadted me lo guidzliu, scaqueгаа nasca ndooladz gol̄gac. ⁶ Sac tel̄ me: Niicle ne Dios nac me, per led min̄cod niab me nrieed me lo guiel̄ndzon ne no me, ⁷ sinque grēse zigne nac me, laa me psana tib lad,

laa me goc zig tib ngun̄dziin̄ win, biaad me gol̄ me lo guidzliu rii goc me miech. Nacle me miech, ⁸ ni bii psañwin me me lo miech, haxta bdeed me diidz pquiaa zho me lo cruz, zig run̄ zho cho grē zha yozh.

⁹ Min̄cocxe waa, psanglaaraa Dios me, biaan̄ me men̄ ne mazdraa non, men̄ ne mazdraa nroob; ¹⁰ zeena zeene laa me gaquiet, grēse zha ne no gbaa, grēse zha ne no lo guidzliu, ni grēse zha ne no nēz len̄ guidzliu, laa zho yquiitsgzhib, ¹¹ ni grēse zho laa zho cueero, guiab zho gan̄le ne nli me nac men̄ ne rnabey.

Ga laa zho cxobnen̄ gan̄le, zha men̄ nroobtaa nac Dios, men̄ ne nac Pxoz me.

Zha ne nac biini lo guidzliu rii

¹² Bets, bzian, ne nligaa rleynie naa to. Laa naa rnab lo to (zigne bixco to bin to xtidz naa zeene bléz naa lo to i, scaquegaa niina niicle ne zit zo naa, golgon mine rne naa nu), ib gdeete to diidz guiab to ladznia dol stib, niina ne laa Dios psilaale to; golguien tsieniewguite guic to. ¹³ Benque Dioszhal rsiaab guic to rquiabladz to gun to mine racladz me, ni scagaa me racnien to rrieelo run tow.

¹⁴ Ni ncuaañe rieguial to gun to, ine nguieel golgac golguna, peet glisquide to, ni niicle tilidiidzdgaa to; ¹⁵ zeena tsod pe nacne cho glisqui guiab zho laa to pe falt, pe dol ne quiaayun. Gollu ganle nli xpëedle Dios nac to; zaacse golban, niicle ne ladaque grë miech ntseeb, miech ncow ne ndxie lo guidzliu rii no to. Golgac zig tib biini lo zho, zigne rziini mel gbaa lo ncow ne nac guieel. ¹⁶ Ib csaande to Xtiidz Ndzon Jesús, diidz ne rdeed guielmban, lëew golconie guic to. Sca golgac, zeena gal dze ne laa Jesús guiaad stib, per nli gley naa gan naa led zhléd brie naa bial naa, bialseed naa to. ¹⁷ Zig nac niina, tel niaca mine no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to yгаа guielbley. ¹⁸ ¡Golley sca! Zigne no guielbley rii zdoo naa, scaquegaa to golco nley zdoo to, zeena grë ne gley.

Timoté ni Epafrodit

¹⁹ Telne gneedz men ndzon ne rnabey ne diidz, racladz naa cxeejniob naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa. ²⁰ Me cxel naa, sac guien d stib zha ne zienie guic zig zienie guic naa, tel led med; sac tel me nonie to guic me. ²¹ Grëraa zho, ncuaañe yquuin lo zho rioxco zho,

laa ne tsoxco zho mine nac xtsiin Jesús. ²² Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiaayun me noseed no miech Xtiidz Ndzon Jesús. ²³ Ible laa guic naa no cxel naa me lo to i, loxaque gacnanse naa dien zha csañ wxtis rii xcuent naa nu. ²⁴ Ni ye naa nend pronaque guialso naa i dien yo to, sac rnie naa ible zneedz Dios diidz guial naa.

²⁵⁻²⁶ Ni rgobey naa nonguielaquew cxel naa bets ne Epafrodit guiaad me nëz qui, sac laa me rbanle to, ni no me zhgab bin me laa to gocnan ne laa me bzhaacnë. Nli laa to pxeel me lo naa nu, ni blactagaa noyayun me xyudar naa ne znu mban nodeed naa, blactaa noyacnie me naa lo dziin ne nodziuyun no. ²⁷ Ni nligaa bzhaacnë me, nzhoogoc me zootle laa me nietle; per pquiaa zdoo Dios me ni pquiaagaa zdoo Dios naa peet godc me, sac gon nole naa guielnë, ni tel pe niacaque me mazdraa niac nroob xquielnë naa. ²⁸ Min co nagon laa naa cxelgazh me, zeena gley to gan to lo me stib, ni scagaa niicle naaw zley naa. ²⁹ Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho. ³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brieelod niaad-zhal to.

3

Ncuaañe mazdraa non

¹ Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuaañe yquingaa lo tow: ² ¡ib cxende to lo grë mëcw dox qui! Grë

miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho. ³ Sañgue ne, ndionle ne zha nac diidzli, zha ne rleynie Dios zigne rsiaab Espiritu Sant guic zho, ni dib zdoo zho run zhow, zha co nac zha ne nlipaa no xnëz me. Ne ne nac ne zha ne no xnëz me, Jesús nac men ne rdzi-uunnon ne, sac ndion ne por me laa Dios ycaania ne; rnalod ne grë ncuaane laglaase, ⁴ sac telne scaw; zig nac naa pe zhistaa ncuaane dzigo zrieelo gnalo naa. Tel no zha ne rzac por ncuaane been zho min co laa Dios csilaa zho; tel scaw, nroobraa ncuaane ziyun naa lo zho: ⁵ Xon ngbidz raap naa laa naa birole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle xniaa naaw zha Israel nac me. Niicle xleygaa zha Israela, nroob pseed naaw, zha farisé goc naa; ⁶ bleyniedox naa grë mine zienal zha Israel, gacxe waa pquianaal naa grë miech ne no xnëz Jesús; zig nac mine raquiet lo ley, grësew ben naaw zigne naca, ib biod dze ne cho zha pe nlisqui lo naa.

⁷ Lëe grë ncuaan co rnalo naa len dze co, sañgue niina Jesús rnalo naa, grëse ncuaan co laaw psanle naa tib lad. ⁸ Ni led loxaque psandse naaw tibladd, sinque grësew peet nondraaw lo naa, mine non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grëse ncuaan co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me. ⁹ Zanaal draa naa gun naa mine rnabey ley par guiaanmbe naa lo dol, sinque laa naa zanaal dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. ¹⁰ Racladz naa guienraa naa zha

nac Jesús, ni gaap naa poder ne pquiin Dios zeene blische me me len baa, ye naa teed grë mine bded me, ni cueeladz naa xquielmban naa zigne bleeladz me xquielmban me; ¹¹ ni scagaa, nanpaa naa ye naa grieeban gal dze ne guiadbeeban me grë zha ne no xnëz me.

Stsëe Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa. ¹³ Bets, bzian, gard gun naa gan; per xco co no naa; grëse ncuaane bded laaw biaanladzle naa, laa guic naa zienie ncuaane naraa ziaad. ¹⁴ Masaque rzaac naa niina zig rzac zha ne rie prueb lo corr, rded naa fuerz gdzin naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne rliladz Jesús.

¹⁵ Ni ib znu none tsonie guic grë zha ne nlipaa dziits zo lo Xtuidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. ¹⁶ Ni negaa, grë mine rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grë zha ne zienal mine blu no lo to grë to; dzigo sca golban. ¹⁸ Sac gon nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladzta zho, rlëe zho ron zho pe nac gut Jesús lo cruz; ¹⁹ ni nëz ne nitlo zho ga zie zho. Laa ne tsienal zho mine rnabey Dios, laa zho zienal grë ncuaane gdeed guxt zdoo zho, ncuaane gdeed guxt xcuerp zho. Loxaque grë ncuaane mbee guielto zienal zho, per zha rlozhd gleynie zhow; niapse grë ncuaan lo guidzliu rii nonie guic zho. ²⁰ Sañgue ne, laa ne zional ncuaane ygaa ne

gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac men ne psilaa miech lo dol, me nac men ndzon ne rnabey); ²¹ zeena ctsëë me xcuerp ben wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëtaa ncuaane no.

4

Rnab Pabl nley gac zha Filip

¹ Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquiebley naa, to nac zig tib premio lo naa por grëtaa xtsiin Jesús mine ben naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon bel zho, xnéz Dios no zho grop zho. ³ Ni luu gon bets, ne nac luu zha ne tibaque quiayacnie naa lo dziin ne quiadziuun ne, laa naa rnab lo luu bnee lo grop wnaa qui gneewen zho stib, sac gon ye zho blactaa mine bded zho zeene bzënal zho zhits naa biotiiz no Xt'idz Jesús, ni zeene güeynalgaa zho zhits Clement, ni zla zha ne rdzi-uungza no dziin. Laa lë zho zhooble len libr ne quia lë grëse miech ne bgaale guielmban ne gdzindraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵ Golguien zaacse golbannie grëse samiech to, zeena haxta gzëëb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶ Tel pe nac grë ncuaane quiaaded to, tsode to zhgab, gdziebde to, sinque golzodiidznie Dios, golšan grësew ladznia me; per led lox-aque gnaabde to, sinque golzoladz goldeed xquizh lo me. ⁷ Ni zeene

sca csañ to grë xliaadz to ladznia me, haxta tibliladz guiaan zdoo to, peet dzeb tsoniedraa zdoo to, peet zhgab tsoniedraa guic to, masaque Jesús nac men ne nacie to; grëraa miech ib guien d zho zha nac ne scataa tibliladz rac to.

⁸ Bets, bzian, nu ne laa naa csialle guits rii laa naa rnab lo to, min rii golconie guic to:

niapse mine nac diidzli,

niapse grë ncuaane nonguiel gac,

niapse grë ncuaane rac zigne nac diidzli,

niapse grë ncuaane mbe,

niapse grë ncuaane gleynie miech,

niapse grë ncuaane gley miech gon zho,

niapse grë ncuaane yquiuin,

niapse grë ncuaane gzee zdoo miech ni gleynie zho.

Grë min rii golconie guic to, ni lëew goltsocxo gun to.

⁹ Ni golguien gon, grë mine pseed naa to, mine psañ naa diidz lo to gun to, grë mine bin to bne naa lo to, mine gon to ben naa, grë min co goltsienal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlipaa rded naa xquizh lo men ndzon ne rnabey ne, ni rley naa ne laa to pxeel grë ncuaane yquiuin naa stib. Nañ naa ne led bi-aanladzde to naa, sac tibaque noxco to dien zha gun to xyudar naa; sinque bdeedniobda diidz. ¹¹ Rley naa ne laa to psoladz naa, maase niicle nodpaa naa zhgab co dien pa gree pe yquiuin naa, sac pseedle naa peet zienied guic naa niicle tel zhataa nodeed naa. ¹² Nañ naa zha nac guielprob, ni nanquegaa naa zha nac zeene quianie ne nroob ncuaane yquiuin ne. Pseedle naa rzac zdoo naa mine nodeedtaa naa, niicle zeene biodzë zdoo naaw, zeene rcaabedzгаа naaw; niicle zeene nroob ncuaane yquiuin naa no, zeene peet guien dгаа. ¹³ ¡Grësew rrielo naa, sacne nacie Jesús

naa, me rneedz xfuers naa! ¹⁴ Per wen ga been to, pxeel to ncuane pquuin naa lëetaque len dze ne peet guienḁ lo naa.

¹⁵ Zeene brie naa nëz xtan zha Macedon i, len dze ne wriin psilo noseed naa miech Xtuidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleynie to dziin rii. ¹⁶ Scasaque len dze ne no naa Tesalónica, blalaa vuelḁ pxeel to pe pquuin naa.

¹⁷ Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guienḁnaac ne yгаа to. ¹⁸ Tel na gon, grële ncuane yquuin naa no, haxta nrooblew nu. Ni ne pxeelaque to Epafrodit biaadsan stib nëza, haxta bdedsole goclow lo naa nu. Grëtaa ncuane bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me. ¹⁹ Scagaa niina nagon, grëse ncuane yquuintaa to, Dios menḁ ndzon ne riladz ne, me gneedza lo to, porne nligaa dib zdoo to riladz to Jesús; sac gon, nroobdoo grë guienḁndzon, grë guienḁnaac ne rap Dios. ²⁰ ¡Lëë xDios ne ga, me nac Pxoḁ ne grëse ne! ¡Gotsaa dziuunnon ne me sca, mesi gdziḁnd dze ne nitlo xquienḁndzon me! Sca rieguaḁa.

²¹ Golḁeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha bets ne, zha ne no lo naa nu. ²² Golcaania zhibdiuzh grëse zha ne no nu, zha ne riladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

²³ Jesús, menḁ ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

GUITS NE PXEEL PABL LO ZHA COLÓS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

² Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleynie to Jesús.

Dios meñ ne nac Pxoze ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoze Jesús meñ ndzon ne rnabey ne, rnab no gacnieñ me to, ni rdeed no xquizh lo me ne squitaa rneedz me guielbiini lo to; ⁴ sac zidzion no ne nlijaa dib zdoo to riladz to cho nac Jesús, ni rleynie to grëse zha ne no xnëz Dios. ⁵ Min co nonie guic to, sac desde dze ne psilo pquiaadiag to Xtiidz Ndzon Jesús miñe nac diidzli, laa to gocnañ ganle no tib guielnzaac nroob ne yгаа to gbaa.

⁶ Gulgacnañ sca ganle, Xtiidz Ndzon Jesús, wseed ne riladz to, nzianraa zaatne quiagaaza, ni lëew notsëe lo xquielmban miech, zigne bdzëeque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. ⁷ Lëe min co ga biadseed Epafra to; tib meñ ne nziuu lo no, ye me rquiagza no dziin; ranaxe to ganle zha rioxcotaa me xtsiin Jesús. ⁸ Me bzodiidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë miñe racladz Dios

gun to; ¹⁰ zeena grielo gban to zigne no gban zha ne no xnëz Jesús, tibaque gun to ncuaane conley to zdoo me; dzigosi grëse ncuaane ndzinli ne gun to, zlupaa ncuaane rquiina, ni zioguicraa to zha nac Dios. ¹¹ Ni rnab no lo me, niapse por poder ne rap me gunndip me zdoo to, gunndip me guic to; zeena niicle tel pe nactaa guielne ne gan to, ib peet tsienied guic to, ib sacxuude to, ¹² ine gley to gdeed to xquizh lo me nac me Pxoze ne, ne squi laa me bzooblo to, psanme me to; zeena gdzin to lo biini zaatne yгаа to miñe no gdeed me lo grëse miech ne no xnëz me. ¹³ Sac me nac meñ ne blee ne ladznia mendox, ma ne rnabey lo guielcow, psan me ne ladznia Xpëed me Jesús, meñ ne rleynie me ga. ¹⁴ Jesús nac meñ ne bdiizh grëse xtol ne zeene sca gut me lo cruz, me nac meñ ne psanme me ne nëz lo Dios.

Grë ncuaane been Xpëed Dios

¹⁵ Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse me scaque nac Xpëed me; ni ladznia Xpëed me no grëtaa ncuaane no. ¹⁶ Zeene bnabey me tsaa grëtaa ncuaane no gbaa, grëtaa ncuaane no lo guidzliu; Xpëed me bzaaw grësew, zigtaa grë ncuaane rdzian new, zigtagaa grë ncuaane grielod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me bzaaw. ¹⁷ Nole Jesús zeene baa grë ncuaan co, me naaza, gane tib tiba nosew zaatne rieguiala. ¹⁸ Ni grëse zha ne no xnëz me, me nac meñ nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac meñ ne nole glo, ni me nac meñ ne glopaa brieaban; zeena glu ganle me nac meñ ne mazdraa nroob, me nac meñ ne mazdraa non; ¹⁹ sac

ib Dios bnabey zigne nacse Dios scaque nac me.

²⁰ Niapse por Jesús grëse ncuaane no zigtaa lo guidzliuw, zigtagaa gbaaw, laaw biaanwen lo Dios, ni lëë min co goc zeene sca bzhiee xchen Jesús lo cruz. ²¹ Zig nac to, glo zit zo to lo Dios, rrieequia rlëënie to me, sac niapse grëncuaane ndzinlid güeynie guic to been to; ²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdzin to zaatne no me. ²³ Per parne grieeolo gdzin to ga, none tiblrique golgun guic to, goltsienal Xtiidz Ndzon me mine rililadz to, ib guiaanladzde to guielnzaac ne no ygaa to, zigne raquiet lo Diidz Ndzon ne pquiaadiag to ga. Lëë Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guielnë ne noyan naa porne rleynie naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. ²⁵ Ni ible Diosgaa bzo naa noyun naa dziin lo grë miech ne no xnëz me, zig nac to, gocniën me to bzo me naa bne naa grëse zigne nac Xtiidz Ndzon me lo to. ²⁶ Diidz ndzon ne gocnan grëtaa zha gol ne ziyaadmaban wlal ne bre guidzliu, laaw gocnan grë zha ne no xnëz me niina. ²⁷ Ible zha gocladz me gacnan grëtaa guielnzaac ne ygaa zho zeene laa zho gacnan diidz co; haxta to ne nac to zha zit. Ni lëë diidz ndzon co nu: Zha ne nacie Jesús, me gdzinnie zho zaatne nac lo guielndzon ne no me.

²⁸ Gacxe waa, zaatne ziotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. ²⁹ Min co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyun naaw.

2

¹ Racladz naa gacnan to ganle ne nlipaa tibaque no to guic naa, zigtaa tow, zigtagaa zha Laodicëw, ni grëragaa zha ne gard ganlo naaw. ² Rnab naa lo Dios ib guiaand zdoo to, tipse gac to ine gleynie to grë zha ne nacgrë to, lozhraa tsaa biini xquielrien to guien to ganle zhapaa nac Jesús, sac gon naraa bdeed Dios diidz gunbey miech me. ³ Me nac men ne rap grëse guielrac, grëse guielbiini nroob chen Dios. ⁴ Laa naa rne min rii lo to, zeena choot yquidiede to, niicle paraa ndzielguic rzë xtiidz zho. ⁵ Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblrique nac guic to dib zdoo to rililadz to Jesús.

Tib guielmban cub

⁶ Nana sca, zigne bzëëb to xnëz Jesús gnabey me to, sca-gaa goltsienal mine rnabey me, ⁷ masaque lадznia me golšan xquielmban to, me golnalo, gollu ganle ne nli dib zdoo to rililadz to me, zigne pseed no to, ni tibaque goldeed xquizh lo Dios.

⁸ Nsin golso: ib gac-wete to lo grë zha ne guiaadnie wseed lo guidzliu rii, grë godiidz ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuaane run grë xmengol zho, grë wseed ne rleynie grë miech lo guidzliu, min co rseed zho miech. ⁹ Sangue

ne, ndion ne ganle zigne nac Dios scapaa nac Jesús. ¹⁰ Gacxe waa, to ne nacnie to Jesús, peet rquiindraa to. Me nac men ne rnabey lo grèse zha ne rap poder, lo grèse zha ne rnabey.

¹¹ Zeene bnaló to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grè dol ne been to glo; ni Jesús nac men ne bloo to bey co. ¹² Ni zeene brobnis to, rrieequia bgueetsnie to me ga ni brieebannie to me, sacne bliladz to poder ro ne rap Dios men ne blische me len baa. ¹³ Glo zha gutle nac to nêz lo Dios, lala por grëtaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib. ¹⁴ Ptiche Dios grèse mine riogual ne, sac bdiits ne mine nac xley me; grèse dol co pcaadz me Jesús zeene laa Jesús pquia lo cruz. ¹⁵ Ni zeene sca bded Jesús, ga psiaablo me mendox; grè me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grè wseed ne paat rquiind

¹⁶ Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grè zhlilni zha Israel, runndade to dze ne rquia meë yeen, runndade to dze ne rdziiladz zha Israel lo dziin. ¹⁷ Grè min co bioxco miech zeene gard guiaad Jesús, per lega gocse ncuaan co zig tib zhimlè guielbiini ne biaadnie Jesús. ¹⁸ Ib gliladzde to xtiidz grè zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grè anjl, rnee zho goon dieen pe ncuaane gbaa ne zielulo lo zho, lèëque lèë zho rlozhd gunniats zho por grè zhiwseed zho. ¹⁹ Led yed zho ngab

lo Jesús, men ne rnabey lo ne grèse ne ne nac ne zha ne ngab lo me. Tel ne, me racnien ne, tipse noyun me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grëtaa mine nac to glo, gane niina ngadoodraa to lo grè ncuaane zienal grëraa miech guidzliu. ¿Pe nac dzigo ne bii zienal to grè min co? ²¹ Zig nac grè mine rnabey zho to, rnee zho: “Nod gon yquini to ncuaan rii, nod gow to min rii, gacd ygaal to ncuaan rii.” ²² Ncuaane tib rded nac grè ncuaane qui, zig nac guielwagw led ncuaane gdiid ga, grèse wseed qui miechse bleebeya. ²³ Parga nli na zootle nixbiini nac grè wseed co, sac rioxco zho dien zha tsiegan zho grè anjl, rac ndooladz zho lo miech, ni rsacsi zho xcuerp zho; per rriee lod grè ncuaan co ctsëew xpensar zho, zdoo zho, parne gnabey zho xcuerp zho.

3

¹ Golguien ganle, stible guielmban rap to niina, lèë guielmban co bgaa to zeene brieeban Jesús; gacxe waa, goltsoxco yгаа to grè guielnzaac ne no gbaa, zaatne zob Jesús cue Dios nêz derech. ² Grè guielnzaac ne no gbaa min co golconie guic to, led grèd ncuaane no lo guidzliu rii; ³ sac gon, rrieequia gutle to lo grè ncuaane no lo guidzliu rii, laa to mbanniele Jesús, zigne racladz Dios. ⁴ Laa ne rdziaap tib guielmban cub niina, sacne nacnie ne Jesús; gal dze ne laa me guiaad stib, laa ne no gdziñ lo me gban ne zaatne nac lo xquielndzon me.

Zha gban zha ne rililadz Jesús

⁵ Gacxe nana sca, golsaan grëtaa guielntseeb ne run miech lo guidzliu rii: tsoniede to zha ne led tsieelde to, gunde to grè ncuaane mbeeguielto, gdeete to diidz gnabey xcuerp to to,

gunde to ncuaaṅe ndzinlid ne racladz to, ni gacblēde to lo dimi (sac tel scaw, dzigo dimi rṣan to xlugar Dios).

⁶ Grē dol rii ruṅ grē zha ne nēd gon xtiidz Dios, lozh ga lēē miṅe tsieguiāl zho laa zho yḡaa lo guielzi ne cṣiaab Dios. ⁷ Zig nac to, grē miṅ co beṅ to glo; ⁸ saṅgue niina, none csaan tow, ni lalnu:

glēēniedraa to samiech to, sobzhiandraa to, guṅdraa to guielntseeb, gneenēdraa to samiech to, gneedraa to diidzguidz, ⁹ yquidiedraa to samiech to.

Sac gon, nacdraa to zigne nac to glo, laa to brieēle lo grētaa miṅe beṅ to. ¹⁰ Stible nac lo xquielmban to niina: tib miech cuble nac to, ni laa to bii nodzēē haxta que ne gac to zigne racladz Dios meṅ ne psan miech, zeēna scagaa lozh guṅbey to zha nac me. ¹¹ Zha ne bgaale guielmban cub rii, led yedraa zho cue dieṅ cho zha nac zha Israel, dieṅ cho zhagaa nac zha zit; dieṅ cho no bey, dieṅ cho nodgaaw; dieṅ cho ziaad guiedz nroob, dieṅ cho ziaadgaa guiedz win; dieṅ cho rac, cho gacdgaa; dieṅ cho ruṅ xtsiṅ beṅ, dieṅ chogaa nac zha rnabey. Miṅe rquiinraa niina, nacne grēse zho guieṅ gaṅle Jesús nac meṅ ne mazdraa non, me none gṅalo zho.

¹² Golgaṅ gaṅle, zha nquialadz-taa Dios to, ib laa me ble to gac to miech ne ygab xnēz me. Zaacse sca golḡban, ne nlipaa dib zdoo to: golḡquia zdoo samiech to, niowse golḡgac lo samiech to, ndooladz golḡgac lo samiech to, nguudzladz golḡgac lo samiech to, guieedniede to samiech to.

¹³ Guieedniede to samiech to, ni zeēne cho zha ruṅ pe tib falt lo to, golḡguṅ zho perdon. Golḡguieṅ gaṅle zha beṅ Dios to perdon; scaque zha beṅ Dios to samiech to perdon.

¹⁴ Ni miṅe mazdraa none tsoxco to, golḡleynie zha ne nacgrē to zigne racladz Dios, zeēna tipse gac to; ni scagaa gleynie to grēraa samiech to.

¹⁵ Jesús nac meṅ ne ctiche grētaa ncuaaṅe ndzinlid ne no zdoo to, zeēna niowse gbannie to samiech to. Lēē tib guielnzaac co no yḡaa to ne laa Dios bredz to, ni scagaa none gban to, zeēna tipse gac to grē to. Golḡsoladz golḡdeed xquizh lo me.

¹⁶ Niapse miṅe nac Xtiidz Jesús golḡconie guic to, golḡco zdoo to. Golḡquiin grē guielbiini ne rneedz me lo to, golḡseed grē zha ne nacgrē to, ni zha ne rxin, golḡnee lo zho zaacse gac zho. Dib zdoo to golḡdeed xquizh lo Dios por grētaa miṅe ruṅ me, iṅe golḡgoolnie me grē salm, golḡgoolnie me grē cant ne rdziolnie ne me. ¹⁷ Ncuaaṅe guntaa to, niicle zeēne gnee tow, zeēne guṅgaa to tib dziina, golḡguṅa zigne rdziladz Jesús, meṅ ne rnabey ne; ni tibaque golḡdeed xquizh lo Dios meṅ ne nac Pxoḡ to, niina ne laa to ngable lo Jesús.

¹⁸ To ne nac to meṅ wnaa ne ptsieelniale, golḡgon xtiidz tsieel to, sac ible sca nonguieḡ gban miech ne no xnēz Jesús.

¹⁹ To ne nac to meṅ bgui ne ptsieelniale, golḡleynie tsieel to; gacnchogde to lo me.

²⁰ To ne nac to mēēd, golḡgon miṅe rnee pxoz to, miṅe rnee xnīaa to, sac sca rdziladz Dios.

²¹ Togaa ne nac to meṅ nguḡzan, gunde to ncuaaṅe guṅglēē to xpēēd to, zeēna csaṅde to zdoo zho.

²² To ne nac to zha ne lega ruṅ xtsiṅ beṅ lo guidzliu rii, golḡguṅ grēse miṅe rnabey zho to; gunde to zeēne zose zho lo to dzigose yquiaalo to guṅ to dziin, zeēna guiaṅnziuu to lo zho; sinque dib zdoo to golḡguṅ xtsiṅ zho, golḡguieṅ gaṅle Dios zobwi raṅ me pe ruṅ to. ²³ Grēse dziin ne guṅ to, iṅe nguieeḡ golḡgac golḡguṅa, zig nac zeēne xtsiṅzhal Dios noyuṅ to.

24 Benque nanle to, zгаа to mine gdeed Dios lo grē zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin. 25 Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuue miech.

4

1 Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

Gnab zho gacniēn Dios Pabl

2 Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. 3 Golnab lo me gacniēn me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu. 4 Golnab lo me gneedzraa me guielbiini lo naa, zeēne cseed naa miech xtiidz me, guien zho mine rne naa; guñ naa dziin co zigne no guñ naaw.

5 Golquiin guielbiini ne rneedz Dios lo to, zeēna guien to zha gnee to, zha gac to lo zha ne gard gliladz Xtiidz Jesús; ni zeēne sca rdeeda diidz sodiidznie to zho, golnee lo zho ganle zha nac Xtiidz me. 6 Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

7 Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziuunza no me xtsiin men ndzon ne rnabey ne. 8 Ga nagon laa naa rxel me, me gnē lo to ganle zha no no nēz rii, ni gnee me lo to zeēna cchoobladz me zdo

to. 9 Ye menladz to Onésimo guiaadgrop me. Rleynie no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grē ncuuaane quiayac nēz rii.

10 Golcaania zhibdiuzh Ristarc, men ne nioogyunie naa nu, zhibdiuzh Marcw betsyēn Bernabé (laa naa nile lo to ganle, telne laa Marcw guiaadgan to i, niowse golcuēzlo me); 11 ni zhibdiuzh Jesús, tib men ne rneeque zho Just. Lo grē zha Israel ne riladz Jesús, lēēse gza zha rii nac zha ne quiayun xyudar naa quiaseed no miech zha sēēb zho xnēz Dios, ni blactaa zichoobladz zho zdo naa.

12 Golcaania zhibdiuzh menladz to Epafī, ye me quiayun xtsiin Jesús nēz rii; tibaque rzodiidznie me Dios rnab me dziits so to lo Xtiidz Jesús, ni tiblique gac guic to tsoxco to gban to zigne rnabey Dios. 13 Nanpaa naa ganle pa lotaa nonie to guic me, grē to zha Laodicé ni zha Hierápolis.

14 Golcaania zhibdiuzh Demas ne, ni zhibdiuzh Luc men ne run rmed, lēē stib men ne nziuu lo no nu.

15 Goldeed tib zhibdiuzh no lo grē zha ne no guiedz Laodicé, zha ne nacgrē ne. Goldeed zhibdiuzh no lo zhuz Ninf, ni lo grēraa zha ne rcaalsa lidz me i, riegoalnie zho Dios.

16 Zeēne gon lozh glab to lo guits rii, dzigo golxeela lo zha Laodicé, zeēna ye zho glaba; ni scagaa to, gollab mine cxel naa lo zho. 17 Ni golguiab lo Arquip, tsoxco me zacse guñ me dziin ne bdeed Dios lo me i.

18 Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

GUITS NE GLO PXEEĽ PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, meñ ndzon ne rnabey, ni lo Dios meñ ne nac Pxoze.

Dios ni Jesús, me glu ganle pa lotaa noxco me to, zeena peet zh-gab ctsebde to.

² Tibaque rdeed no xquizh lo Dios meñ ne nac Pxoze ne, squitaa rneedz me guielbiini lo to; gzobtaa zeene rzodiidznie no me rzeet no to lo me. ³ Ni zeene rzeet no to lo me, rsoladz no grëtaa dziin ne run to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible zdziñ dze ne laa Jesús guiaad stib.

⁴ Bets, bzian, rleyndodox Dios to, ni ndion ne ganle me bzooblo to ygab to lo me. ⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espiritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziuun no xyudar to, sac ne nli-gaa rleynie no to.

⁶ Scagaa to, pseed to wban to zigne mban no, ni zigne wban meñ ndzon ne rnabey ne. Laa to pcaania xtiidz me, blozh ga, nice nroob guielnë ne bded to, per bneedz Espiritu Sant guielbley lo to, ib peet güeynied guic to. ⁷ Grëse zha ne riladz Jesús nëz Macedon, nëz Acay, zeene bin zho zha mban to, yequé zho laa zho pseed mban

zho zigne mban to. ⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to riladz to Dios, rquiindraa ne no gzodiidza lo zho. ⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuaañe nac mdio lo to, laa to bliladz meñ ne nacpaa Dios ne nguiamban, ni laa to zianañ mine rnabey me. ¹⁰ Ni rzodiidz zho zha zienie guic to ne ible zdziñ dze quiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to. ² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacie no. ³ Ni diidzli nac mine pseed no to, choot biaate par nquidiee no to, niicle biaategaa no par dieñ pe niaadla no lo to. ⁴ Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadziuun no. Nli nzian zha ne rlëeniew, per laa no bii rdziuun dziin co; sac zionañd no gac mine rdziladz miech, sinque laa no zionañd gac mine rdziladz Dios, meñ ne nan ganle pe rza zdoo ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dieñ zha ndeeda diidz needz to dimi lo no. Dios zobwi rdziuun no min co. ⁶ Wlaltaa ib bguibd no dieñ zha niacnon no lo miech, niicle lo tow, niicle lo stib-gaa miecha. ⁷ Laa ne nlu no ganle

zha rnabey nac no, sac gon Jesús pxeel no, leł ndooladz goc no lo to. Masaque zigne rleyne men wnaa xpèdyeen me, nda nda ran me win; scadaa bleynie no to, ⁸ bio no bdzioxco no pseed no to Xtiidz Dios. Ne nlipaa bleynie no to, telne niaca mine niedziņa haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guieel bdziuun no dziin, nozhal bdziniaa ncuaaņe pquiin no leņ dze ne biadseed no to. ¹⁰ Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuund no ncuaaņe mbee no diidz ro miech, sinque laa no bdziuun mine rdziladz Dios. ¹¹ Masaque rziaac no to zig rzac tib dad xpèed zho, blactaa pchoobladz no zdoo to, bloonley no zdoo to tib tib to; ¹² pso no diidz lo to zaacse gac to, gban to zigne no gban zha ne no xnēz Dios, men ne bredz to gdziņ to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuaaņe bleebey miech. Ni nligaa Xtiidz Diosa, gacxe waa zha ne rililadza zigne rzac tow niina, rzhixcuua lo xquielmban zho. ¹⁴ Per zeene laa to bliladza, laa menladz to psacsi to; bded to zigne bdedaque grē zha Israel ne rililadz Jesús, sac tel zhaw psacsi menladz zho zho. ¹⁵ Ni lēēque zha ne psacsi zho ga, zha co bnaab psacsi zho Jesús men ndzon ne rnabey, zigne beetaque zho grē zha ne pxeel Dios biadteed Xtiidz me; ni lēēque zho benxoon no. Ncuaaņe rbiņladz Dios ruņ zho, rlēēnie zho grēse miech, ¹⁶ rtsidil zho pe nacne nonee no lo grē zhazit zha laa zho lo dol. Loxaque quiajuņctalraa zho xtol zho, per,

įprobsaxe zho, sac guielnēdox ne ziaadyob cxeel Dios ygaa zho!

Racladz Pabl tsiegan Pabl zho stib

¹⁷ Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no telpaa zha guiaaddziaņ no to. ¹⁸ Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnēz no pasēē no niaad. ¹⁹ Guiabde to togo quiayaanladz no to, sac gon to rnalo no conley zdoo no gal dze ne laa Jesús guiaad stib. To glu nli bdziuun no xtsiņ me, to glu ne nli rioguaļ no ygaa no premio ne gneedz me. ²⁰ Ne nligaa rley no rdziaņ no zha mban to, haxta riats no zeene raquiet to; sac to rlu ganle ne nli xtsiņ Dios nodziuun no.

3

1-2 Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan guiedz Aten. (Nanaxe to ganle ye Timoté nacgza no quiaziuun no xtsiņ Dios, quiaseed no miech Xtiidz Ndzon Jesús.) Laa no pxeel me biaadgan me to, biadchoobladz me zdoo to, biadnee me lo to lozh sodziits to lo Xtiidz Dios; ³ zeena niicle tel pe guielnē ne noyanta to, ib guiaand zdoo to. Nanle to ganle grēse ne ne rililadz ne Jesús, ib laa ne no dziaņ guielnē. ⁴ Led rsoladz to zeene biaad no i, bneegazh no ne ib laa ne no dziaņ guielnē; ni gon to ganle scase goca.

⁵ Ne nligaa tibaque bionie to guic naa, nacne mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquuil mendox to biire zienal to ncuaaņe rnabey ma, dzigo zhlēse biadseed no to.

⁶ Laa niina ne laa Timoté blanso nu stib, blansonie me diidz, nē me niowse mban to, rleyne to grē zha ne nacgrē to, dib zdoo to rililadz to Dios. Ni nē me rleyne to no, ye

to racladz tebaa zha gan to lo no, zigne rziaacaque no.

⁷ Min co nagon, bets, bzian, nicle ne nroob zhgab, nroob guielnē ne nodieed no nu, haxta biaanladz no grē ncuuan co zeene gocndion no dziits zo to lo Xtiidz Dios, mine rililadz ne. ⁸ Haxta stib goc zdoo no bdzion no squi tiblrique laa to rleynie men ndzon ne rnabey ne; ⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoo no, haxta Dios ran ganle pa lotaa rley no. ¹⁰ Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grēraa mine no gacnan to lo Xtiidz me.

¹¹ Dios men ne nac Pxoze ne, ni Jesús men ndzon ne rnabey ne, me gacnieñ no grieelo guiaaddzian no to. ¹² Jesús gacnieñ to tsaraa to biini, zeena gleynieraa to grē zha ne nacgrē to ni grēraa samiech to, zigne rleynie no to. ¹³ Ni rnab no lo me, gacnieñ me to tiblrique gac to lo Xtiidz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grē zha ne nacie me.

4

Guieľmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goľtsoxcoraa gban to zigne rdziladz Dios, ² benque nanle to zhaw, sac lēe min co bnabey Jesús no biadseed no to gun to. ³ Sac gon, laa Dios racladz mbe guiaan to lo me, gunde to guielyozh yquiangob to zha ne led tseelede to.

⁴ Grē zha bgui, zeene laa zho gnee lo tseelede zho, none niowse ndzinli gac zho; ⁵ gund zho zigne run grēraa miech ne nanđ zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquiin wnaa. ⁶ Niicle

yquiangobde to tseelede sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Goľsoladz ganle psole no diidz rii lo to glo, ni na laa no rneequew stib. ⁷ Goľguien ganle, bredzdaxe Dios ne waa parne dziuun ne grē guielyozh, sinque laa me bredz ne gban ne zigne racladz me. ⁸ Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidz cholze samiech zhow.

⁹ Laa zig nac guielwleynie, nanle to zha no gleynie to grē zha ne nacgrē to. Rquind cso no diidz lo to dien zha gun to, sac Dioszhal pseed to zha gleynie to zigtaa zha ne nacgrē tow, zigtagaa grē samiech tow. ¹⁰ Zig nac grē zha bets ne, zha bzian ne, zha ne no xtan zha Macedon, zēeb diidz rleynie to grē zha co. Goľtsoxco sca, goľleynieraa samiech to.

¹¹ Ni stib mine rso no diidz lo to: niowse goľbannie samiech to. Mine nac xtsiin to tib tib to, min co goľtsoxco, tozhal goľdziniaa ncuane yquiin to; ¹² zeena peet gunfalte lo to, ni scagaa grē zha ne gard gliladz Xtiidz Dios, haxta gzee zdoo zho gan zho zha mban to. Goľsoladz ganle psole no diidz rii lo to glo.

Ib ziaad Jesús stib

¹³ Bets, bzian, nu na ganle laa naa gzodiidz lo to zha gac grē zha ne ret, zha ne ngable lo Dios; zeena tsode to guielnē zig rzac grē miech ne gard guien gnalo Jesús.

¹⁴ Ne, ne dib zdoo ne rililadz ne nli gut Jesús ni bleeban Dios me; scaquegaa none gliladz ne ible zbeeban Dios grēse zha ne dib zdoo rililadz Jesús, zeene laa Dios cxeel me guiaad me stib. ¹⁵ Goľgacnan sca ganle, znu gon nac xtiidz me: Grēse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grē

zha ne gutle. ¹⁶ Zeene laa me quiet gbaa, redz ro ne yquia, zlu zëëb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me quiet gbaa, laa grë zha ne ngab lo me, zha ne gutle, laa zho grieegan. ¹⁷ Dzigo tipse gac zho grë zho zha ne bii zomban ga, laa zho soquia laglaa lo xcow tsiedzieelo zho me; dzigosi gdziñdraa dze ne gbiche zho lo me.

¹⁸ Nana sca mine rne naa nu, gol̄sodiidza lo grëse zha ne nacgrë to; zeena conley to zdo zho.

5

¹ Bets, bzian, nana par gni naa lo to dien pe guidze te guieel guiaad me, choot ndionda. ² Gol̄gacnan ganle, lega nacle zeene gan miech laa me ziaadle, zig nac zeene rzëëb ngbaan yu guieel, ¿cho dien nanpaa pa hor sëëb ngbaan? ³ Zeene laa grë miech guiab: “Nasi wen ndxie ne, peet guiełxtseeb nodraa”, tibaque zeene guien zho laa dze ne nitlo zho bdziñle, ni gasi grielodraa cho csilaa zho. Sac zig znuse rnaaz yoob men wnaa ne bdziñle dze gap xpëed; scadaa gdziñ dze co.

⁴ Sangue to, bets, bzian, nacdreaa to zha ne nonziaab lo ncow, tel̄ pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdziñ. ⁵ Miech ne nole lo xbiini Dios nac to, niini zo to; nacdreaa to zha ne no glowtaa guieel, zha ne no lo ncow; ⁶ gacxe nagon waa, niini gol̄so, tsienalde to mine run zha ne zienal̄ guiełntseeb; sac nac grë zha co zig nac zha ne nixguies, tibaque guieel no zho. ⁷ Sac tel̄ guieela, guieel raaguies miech, niicle zha ne rzuudzgaaw guieel rzudz zho. ⁸ Sangue ne ne nac ne zha ne niini zo, none guien ne pe nac ncuane noyac. Tibaque dib zdo ne gliladz ne Dios, gleynie ne samiech ne, zeena csaaca ne zig rsaac ncuane racw menguiib

lo grë ncuane gnitlo zho; ni csoladz ne ganle laa Dios psilaale ne lo guiełgut, gotsaa ziaac new zig rzac menguiib pchog ne rzob guic zho rsilaaw zho lo guiełgut. ⁹ Sac gon bredzdaxe Dios ne waa ygaa ne guiełnëdox ne no guiaad, sinque laa me bredz ne csilaa me ne lo guiełnë co. Ni lëë min co rac zeene laa ne riladz Jesús. ¹⁰ Zeene gut Jesús, ga bdiizh me xtol̄ ne; zeena yase mban ne o gutlegaa ne gal̄ dze ne guiaad me, per me gbannie ne.

¹¹ Nana sca, tib tib to gol̄deed xfuers zha ne nacgrë to, niapse didz ne gun xyudar zho choobraa zho lo Xtiidz Dios, min co gol̄nee lo zho; zigne quiaayunaque to niina.

Rso Pabl diidz

¹² Bets, bzian, laa no rso didz lo to: Niowse gol̄gac, niowse gol̄nee lo grë zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to. ¹³ Gol̄guien ganle cho nac zho, gol̄leynie zho, sac gon led lega nacd dziin ne quiaayun zho lo to. Gol̄soladz sca: ¡Zaacse gol̄ban, til̄niede to samiech to!

¹⁴ Tel̄ cho zha ne nacgrë to i, rsilo quiaayacgbech, gol̄gactox lo zho, zeena guien zho gun zho dziin. Grë zha ne quiasaan Xtiidz Dios, gol̄nee lo zho zeena gleynie zhow stib; grëgaa zha ne gard tsoguicpaa zha naca, gol̄gun xyudar zho tsoguic zhow; niicle grëragaa zha ne nacgrë tow, ib guieedniede to zho. ¹⁵ Gol̄guien tel̄ pe guiełntseeb ne run miech lo to, guiabde to ne scaque gun to zho; sinque mazd gol̄tsoxco tibaque niowse gol̄gac lo grëse miech, niicle lo zha ne nacgrë tow, niicle lo grëragaa miecha.

¹⁶ Tibaque nley gol̄co zdo to.

¹⁷ Tibaque gol̄zodiidznie Dios.

¹⁸ Gol̄deed xquizh lo Dios, niicle zeene noyan to guiełnëw, zeena no-gaa to guiełbleya, sac sca racladz me gun grëse zha ne no xnëz Jesús.

¹⁹ Golquiaadiag miñe rnee Espíritu Sant lo to, ni golguña.

²⁰ Golquiaadiag miñe rnee grë zha ne rnee grë diidz ne rsiaab Dios guic zho; ²¹ wen wen golwi dien pe nac miñe rnee zho, dzigo miñe rzac to rquiinraa lo to, miñ co golseed.

²² Golbiche lo grëse guiełntseeb ne no.

²³ Dios, meñ ne rtiche grëse dzeb, grëse zhgab, mezhal csañmbe to lo grëtaa guiełntseeb; dib nacse to (zhiespíritu tow, xalm tow, xcuerp tow) zeeña ni tib dol rapde to gal dze ne laa Jesús meñ ndzon ne rnabey ne gbiire guiaad stib. ²⁴ Me bredz to, ni mesi ruñ me miñe rnee me, gane ndioñ no ne ib zuñ me miñ rii.

²⁵ Grëse to bets, grëse to bzian, laa naa rnab lo to golsiguiel golnab lo Dios gacnieñ me no.

²⁶ Golcaania zhibdiuzh no i, ine golxen nia grë zha ne nacgrë to, gollu ne nli rleynie to zho.

²⁷ Meñ ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

²⁸ Jesús, meñ ndzon ne rnabey ne, me glu lo to ganle pa lotaa noxco me to.

Pabl

BROP GUILTS NE PXEEĽ PABL LO ZHA TESALÓNICA

¡Diuzh to grēse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grēse to ne nac to zha ne nole xnēz Dios, meñ ne nac Pxoꝝ ne, ni Jesús meñ ndzon ne rnabey.

² Dios meñ ne nac Pxoꝝ ne, ni Jesús meñ ne rnabey, me glu ganle pa lotaa noxco me to, zeena peet zhab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to riladz to Xtiidz me, ni rleynieraa to samiech to. ⁴ Zaatne rdziñtaa no lo grē zha ne nole xnēz me, ne nligaa rley no rzodiidz no lo zho zha squitaa dziits zo to, tibaque dib zdoꝝ to riladz to me niicle maase rtsidil miech to, niicle maase nroob guielnē ne quiaded to. ⁵⁻⁶ Nli nroob guielnē noyañ to, per scagaa laaw noyañ to zeena tsieguial to gdziñ to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grē zha ne squi nosacsi to i, ib zгаа zho guielnēdox ne csiaab me.

⁷ To ne nac to zha ne quiaded grē guielnē qui, golgona ganle, gal dze ne guiet Jesús gbaa guiaad me stib, ible zгаа ne descans ne gneedz me. Gal dze co, laa me guietnie grē xanj me, zha ne rapraa poder; ⁸ masaque tib beldox ne guietnie me, sac dzigosi laa me guiaad csi-aabzi me grēse zha ne nēd niunbey Dios, grēse zha ne nēd nquiaadiag Xtiidz Ndzon me. ⁹ Grēse zho laa me gnabey guey zho lo guielnēdox, zaatne gdziñdraa dze greee zho. Lēē bichele zho lo me ga, ib gdziñd dze

gan zho lo xquielndzon me, gangaa zho grētaa poder ne rap me. ¹⁰ Dze co, grēse zha ne no xnēz me laa zho goolnie me, gunnon zho me. Grēse zho see zdoꝝ zho gan zho me; ye to gacgrē zho, sacne bliladz to Xtiidz me mine biadseed no to.

¹¹ Gacxe waa, tibaque laa no quianab lo Dios gacnieñ me to grieelo gban to zigne racladz me; zeena glu ganle led zhlēd bzooblo me to. Ni rnab no lo me gneedz me xpoder me lo to, zeena grieelo gun to grēse ncuaañe rquiabladz to, zeena grieequia grēse dziin ne quiayun to porne riladz to me. ¹² Zeena sca cxobneñ to ganle pa lotaa meñ nroob nac Jesús, meñ ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

2

Ziaad Jesús stib

¹ Bets, bzian, ib laa Jesús meñ ndzon ne rnabey ne no guiaad, ni laa ne gbannie me. ² Zeene gon to laa miech gnē laa dze co bdziñle, niicle gnē zho Espiritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; giladzde tow. Laa no rso diidz lo to, peet tsienied guic to, gdziebde to. ³ Ib gdeete to diidz yquidie zho to. Sac gon ansraa ne gdziñ dze co, ib nonee grieequia grē miech ne gacntseeb lo Dios; lozh ga, laa tib mgui ne nacie meñdox grieequiaque, zactntseeb me lo Dios, per gabil ga nitlo me.

⁴ Lēē zha co ctsidil grēse zhi-wseed Dios, grēse ncuaañe naclay lo miech; ni haxta zie zho ziesob zho zaatne nac leñ xyadoo Dios, guiab zho zha nac Dios. ⁵⁻⁶ Per no tib meñ ne notse lo zho niina, laga gdziñ dze ne laa zho guiaad. Golsoladz ganle, blactaa bzeet naa miñ rii lo to leñ dze ne blēz naa

i. ⁷ Grëse ncuuañe no guic zha ntseeb co guñ zho, laaw rsilole; lox-
aque runfalt gdeed meñ ne notse lo
zho ga diidz guiaad zho. ⁸ Zeene
laa zho guiaad, hor co laa Jesús
guiaadaque con grë xquieñdzon
me, dzigo me ne grieese ro me
gloozh me zho, gnitlo me zho.

⁹ Masaque menox gnabey zha
ntseeb co, niapse xpoder ma gap
zho, nzian ncuuañe glu zho; zun
zho grë ncuuañe gzee zdoo miech,
per led ncuuañe nlida. ¹⁰ Zun
zho grë ncuuañe lozh yquidie zho
grë zha ne nole nêz ne nitlo, zha
ne ib bzhiguield niladz miñe nac
diidzli. Tel̄ niaca miñe niladz
zhow, nleyñie zhow, nsilaa Dios
zho. ¹¹ Saan Dios tsienal̄ zho
grë ncuuañ co, ni ziladz zhow
zig nac zeene diidzliw; ¹² per ib
siaabzi Dios zho, sac laa ne gliladz
zho miñe nac diidzli, leñ mazdraa
gleynie zho grë guieñntseeb.

Zha ne bdedlaale lo dol

¹³ Bets, bzian, golguieñ sca
tibaque golgotsaa gdeed ne xquizh
lo Dios; sac gon̄ tel̄ to padzeelale
bzooblo me to csilaa me to lo dol.
Nacle diidz zeene laa to gliladz
Xtiidz me, miñe nac diidzli, laa
Espíritu Sant csañmbe to lo me.
¹⁴ Miñ co nagon̄ nacne pxeel me
no biadseed no to xtiidz me, guieñ
to zha laa to lo dol; zeena gdziñ
to zaatne nac lo xquieñdzon Jesús,
meñ ndzon ne rnabey ne. Gacxe
waa, zha nziuu nac to lo me.

¹⁵ Golguieñ sca, dziits golso, ib
csaande to grë miñe pseed no to len̄
dze ne biaad no i, niicle miñe rnee-
gaa no lo to lo guits ne rxeel no.
¹⁶⁻¹⁷ Ni Jesúsaque, meñ ndzon ne
rnabey ne, ni Dios meñ ne nac Pxoz
ne, me gneedz xfuers to dziits so
to; zeena grëse miñe gnee tow, miñe
gun̄ tow, wen grieequiaw. Me blu
ganle pa lotaa rleyñie me ne, laa
me bneedz tib guieñbley ne gdziñd
dze lozh lo ne, ni psañ me diidz pe
nac miñe naraa no ygaa ne. Ga rlu

ganle pa lotaa noxco me ne, niicle
ne rioguiald new.

3

¹ Bets, bzian, nu ne laa no
csiaalle, laa naa rnab lo to golnab
lo Dios gacñieñ me no, zeena
znuse znuse diiz no Xtiidz Ndzon
meñ ne rnabey ne; ni zha ne
gontaaw, guieñ zho ycaania zhow
zigne pcaania tow. ² Ni golnab lo
me csilaa me no ladznia grë zha
ntseeb, zha ne run̄ miñe notaa
guic; sac gon̄ led grëd miech riladz
Xtiidz Dios.

³ Dios meñ ndzon ne rnabey,
miñe rnee me run̄ mew; gacxe
waa, ible zacñieñ me to dziits so
to lo Xtiidz me, ni squianap me to
tsobede to ladznia mendox. ⁴ Ndion̄
no ne me noyacñieñ to noyun̄ to
grë miñe pso no diidz lo to, ni
scagaa me gacñieñ to bii gun̄ tow.
⁵ Me gacñieñ to grieelo gleyñie to
samiech to zigne rleyñie Dios ne, ni
guiuude to lo guieññe, sinque golgac
zigne been̄ Jesús.

None gun̄ zho dziin

⁶ Bets zig zobwi Jesús, laa no rso
diidz lo to: Tel̄ cho zha ne nacgrë to
i, nêdraa yquia dziin gdziniaa zho
ncuuañe gow zho, ib ctsieelsade to
zho; sac gon̄ pseete no to miñ co.
⁷ Tel̄ no, gon̄ to ganle zha wban no
zeene bliaaz no lo to i; ni sca gon̄
none gban to. Ib bdeddzed no,
⁸ biod dze ne lega ndioow zhlê no
xcuun̄ miech, blactaa haxta guieel
bdziuuñ no dziin bdziniaa no pe
pquiin no; ib psodziind no lo to.
⁹ Niicle ne ib rieguial̄ nab no lo to
needz to ncuuañe nquiin no, per
choot peet bnabd. Miñe bdziuuñ
no pquiaa no dziin bdziniaa no pe
pquiin no, par gan̄ to ganle zha
nonguiel̄ gban to. ¹⁰ Led rsoladz
to len̄ dze ne bliaaz no i, pso no
diidz rii lo to: Zha ne nêd gun̄ dziin,
scagaa nodne gow zho. ¹¹ Laa
niina laaw rzetaque naa stib, sac
zidzion no no bla zha ne nacgrë

to i, mbe rundraa zho dziin scase quiaded dze zho; loxaque nēzrii nēzrec no zho rzēēb zho lo grē ncuaa_{ne} riegua_{ld} zho. ¹² Zig zobwi Jesús me_n ne rnabey ne, laa no rso diidz lo zha ne sca ru_n: none gu_n zho dziin gdziniaa zho ncuaa_{ne} yquiin zho.

¹³ Bets, bzian, ib guieete to, tibaque go_{ltsoxco} go_{lgun} niapse grē ncuaa_{ne} yquiin lo samiech to.

¹⁴ Te_l cho zha ne nacgrē to i nēd gon diidz gban zho zigne rso no diidz nu, go_{lwi} die_n chow, dzigo ctsieelsad_{raa} to zho; zee_{na} sca ctoladz zho. ¹⁵ Per gunde to zho zig ru_n zha ne rlēēnie samiech, sinque go_{lnee} lo zho gac-wen zho; go_{lguien} ga_{nle} bets to grē to.

¹⁶ Jesús nac me_n ne rtiche grēse zhgab, grēse guie_{lxtseeb}, me cuee to lo grēse zhizhgab to, lo grēse guie_{lxtseeb} gzataa dze. Me gacnien to grēse to.

¹⁷ Naa go_n nac Pabl, naazhal pquia bdiuzh rii rxel_l naa lo to; naazhal pquia lē naa nu. Go_{lgan} ga_{nle} lēē xletr naa nu.

¹⁸ Jesús me_n ndzon ne rnabey ne, me gacnien to, me glu lo to ga_{nle} pa lotaa noxco me to.

Pabl

GUILTS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

² Laa naa rxel guits rii lo luu, rzaac naa luu zig tib xpëed naa ne squi dib zdoo luu rliladz luu Jesús. Dios men ne nac Pxoz ne, ni Jesús men ndzon ne rnabey ne, me yquia zdoo luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, cseetraade zho miech grë zhiwseed zho, sac ncuane paat rquiinda. ⁴ Bnee lo zho, csaan zho grë cuent gox qui, zhale noyunroobraa goon dien zharaa, peraa been grë xmen gol ne. Ncuane paat rquiind ga, loxaque runctildiidza miech; mazd lo lai ne nodildiidz zho, tsoxco zho cseed zho miech ganle pe nactaa grë guielnzaac ne rgaa grë zha ne rquiabladz dib zdoo rliladz Jesús.

⁵ Laa naa rso diidz rii lo luu, sac racladz naa guiaanmbe zdoo grëse miech qui, guiaanmbe xquielrien zho ni dib zdoo zho gliladz zho Dios; zeena scagaa grieelo gleynie zho samiech zho. ⁶ Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuane paat rquiind co no zho. ⁷ Racladz zho zha cseed miech zha nac xley Dios, ni niicle zha rien zha naca; zeene rseed

zho miech ni zha rien daque dien pe rnee zho.

⁸ Ndionle ne ganle nli wen ley ne psan Dios, per tel niaca mine yquiin miecha zigne psan me yquina. ⁹⁻¹⁰ Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë:

zha ne racndaan lo Dios,
zha ne rond xtiidz Dios,
zha ntseeb,
zha ngoopdol,
zha ne rzacdraa ne men nroob nac Dios,
zha ne rguitnie lë Dios,
zha ne rut pxoz,
zha ne rut xniala,
zha ne rut samiech,
zha ne rionie zha ne led tseield,
zha ne nac mrash,
zha ne rban samiech riecto zho zho stib nëz,
zha ne rquidie,

zha ne rzeet lë Dios par gliladz miech xtiidz zho, ni nanpaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; ¹¹ wseed ne rlu ganle zha laa miech lo dol. Ni lëe wseed co gon pso Dios naa none naa lo miech.

Pquia zdoo Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacnien me naa ne laaw quiayun naa. ¹³ Ne nligaa rded naa xquizh lo me, sac glo ntseeb goc naa, bneenë naa me, ptsidil naa grë zha ne no xnëz me, ntseeb goc naa lo zho. Ni niicle ne scataa nac grë ncuane ben naa, per pquia zdoo me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoo Dios naa! Ga blu me ganle zha noxcoataa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me.

15 Mine rne naa nu niina, diidzliw, ni racladz naa grëse miech gliladz zho ganle, ible laa Jesús biaad lo guidzliu, biaadsilaa me grëse miech lo xtol zho; ni naapaa gon goc tib zha ne mazdraa ngoopdol. 16 Gacxe waa pquia zdoo Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guielmban ne gdziñd dze lozh. 17 Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa niinaw zigtagaa len grëraa izdoo ne ziaada! Sac gon, me nac men nroob ne rnabey, men ne gdziñd dze ne nitlo. Sca rieguiala.

18 Timoté, xin, laa naa rso diidz lo luu gon: Tibaque dziits bzo, ib guiaand zdoo luu; psoladz ganle scaque nac diidz ne bnee grë zha bets ne zeene psiaab Dios guic zho bzeet zho pe nac grë mine pso Dios luu gon luu. 19 Bien tibaque dib zdoo luu bliladz Jesús, ib gund luu ncuaane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuaane ndzinlid, ni laa zho runa. Mincocxe waa, grë zha ne sca nac, rsaanga zho mine bliladz zho! 20 Zig nac Himenë grop Lejandr, sca been zho; per laa zho bzonëzle naa sca tsie zho xnëz mendox telne sca racladz zho; zeena guien zho ganle nodne gneenë zho Dios.

2

Gac-wnab lo Dios por grë miech

1 Laa naa rso diidz lo to: Golguien none gnab to lo Dios por grëse miech ne ndxie lo guidzliu, gonab lo me gunlay me zho, gacniën me zho; ni goldeed xquizh lo me por grëtaa ncuaane run me. 2 None gnab to lo me gacniën me grëse zha ne nac wxtis, grëse zha ne rnabey, gdeed me guielbiini lo zho

zaacse gon zho guielwxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

3 Sca nagon nonguiel dziuun ne, ni scagaa rdziladz Dios, men ne pxeel Jesús biaadsilaa grëse miech lo dol; 4 men ne racladz grëse miech sëëb xnëz Jesús, gacnan zho mine nac diidzli. 5 Guien zho ganle ne tibaque Dios no, ni tibaque men ne zac gdziñnie grëse miech lo me: lëë men co nac Jesús, men ne goc miech biaad lo guidzliu; 6 sac gon Jesús nac men ne bdeed xquielmban, beet zho me, bdiizh me xtol miech. Min rii nagon racladz Dios gacnan miech len dze rii. 7 Ni laa me pxeel naa none naaw lo grëse zha ne nacd zha Israel, noseed naa zho grëse mine nac diidzli, zeena guien zho dib zdoo zho gliladz zho Dios. (Mine rne naa nu diidzliw, rquidieed naa.)

8 Laa naa racladz sca, zaatne notaa zha ne dib zdoo rliladz Dios, grëse zha bgui none gzodiidznie zho Dios. Ni zeene gzodiidznie zho me, none ine mbe zdoo zho, choot lo zha rlëëd zho, choot zha nodilnied zho. 9 Laa grë men wnaa, racladz naa tsoxco zho zaacse gacwxab zho, niowse, tibliladzse gac zho. Sac grë men wnaa ne rliladz Dios, par gluniow zho rquiind ne goon dien paraa xixcuaa guitsguic zho, dien pe quie rbebni, pe or gac xnil zho, gac zhibguiaa zho, pe lar niazh ne gacwgaa zho. 10 Par gluniow zho, rquiin zaacse gbannie zho samiech zho, zig none gban zha ne nole xnëz Dios. 11 Zig nac len yadoo, none tibliladzse gac zho, dzese sob zho yquiaadiag zho tel pe nac wseed ne noyac; 12 gnedzd naa diidz ne zha so cseed miech, o zhagaa gnabey lo mgui. None dzese sob zho, 13 sac gon zeene psan Dios miech lo guidzliu, glose

bzaa me Adán, dzigoraa bzaa me Ev. ¹⁴ Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵ Per silaa Dios wnaa lo xtoꞓ zho, telne dib zdoo zho gliladz zho me, tsoxco zho gban zho zigne racladz me, guien zho gun zho mine riegual wnaa, gap zho xpëéd zho ni cchoob zho win.

3

Zha ne so lo grë zha ne ngab xnëz Dios

¹ Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gun zho. Sca zëéb diidz rnee miech; ni nli-gaaw. ²⁻⁴ Per ga nagon rquiin: tib zha ne zaacse mban, zha ne mbannie loxaque wnaa ne nacse tsiel zho, zha ne tibliladz, zha ne nixbiini, rien pe run, zha ne mbe lo, choot lega gzhidznied zho, zha ne ine nley rac, rbézlo zho miech lidz zho; zha ne rien zha rseed miech, zha ne rquiad lo nziu, zha ne rleynied dil, zha ne wen zdoo, zha ne zaacse mbannie samiech, zha ne rzonald dimi, zha ne zaacse mban lidz, zha ne rrieelo rnabey lidz, rnabey xpëéd, zha ne nguzobdiidz nac xpëéd, rbeed mëéd xquielto zho.

⁵ Sac tel zha ne rrieelod gnabey lidz, gnabey xpëéd; ꞑpe lel ne so zho gnabey zho lo grë zha ne no xnëz Dios dzigo grieelo zho?

⁶ Niicle tib zha ne grinpaap psilo bliladz Xtiidz Dios grieelod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac mendox. ⁷ Ni ye rquiin tib zha ne zëéb xtiidz ne miech ndzinli nac zho, haxta lo zha

ne nod xnëz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquiin: tib zha ne zaacse mban, zha ne rnee niapse diidzli, zha ne rleynied guielgonziu, zha ne zienald dimi, zha ne dib zdoo rililadz grëse mine zhobnee lo Xtiidz Dios (mine rililadz ne, mine nac diidzli), zha ne mbe lo, zha ne mbannie wnaa ne nacse tsiel zho, zha ne rrieelo rnabey lidz, zha ne rrieelo rnabey xpëéd.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsiel zhow, none gac me:

tib wnaa ne zaacse mban, wnaa ne rleynied diidzguizh, wnaa ne rleynied nziu, wnaa ne rquidied.

¹³ Sac zha ne zaacse gun dziin co, zianenziuura zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rililadz Jesús.

Mine rililadz zha ne ngab lo Dios

¹⁴ Ib laa guic naa no guialniob naa i, guialgan naa luu; per laa naa rxel diidz rii lo luu, ¹⁵ zeena telne grieelod guialniob naa, per laa luu nanle naganle cho gzo luu yquiaanap grëraa zha ne ngab xnëz Dios nguiamban; zha ne runbey mine nac diidzli, ni rlu zho ganle ne nli diidzliw. ¹⁶ Ne nligaa nroobdoo nac wseed ne ziaad lo Xtiidz Dios, mine rililadz ne, ngan guien miech zha naca. Nu raquiet mine been me:

Goc Jesús miech biaad me lo guidzliu,

ni blu Espiritu Sant ganle ne nli Xpëédpaa Dios nac me;

ni gon grë anjl me.

Brieets bliaal Xtiidz me grë guiedz,

ndaldoo miech ne bliladz ganle cho
nac me,
blozh ga biire zey me lo guielndzon
ne no me gbaa.

4

Zha ne rsaan Xtiidz Dios

¹ Ib laa Espíritu Sant rneele ne
len dze ne ziaadyob guiaad Jesús
stib, ndal grē zha ne rliladzle Xtiidz
me, laa zho csaana laa zho tsienal
grē miñe rnee zha ne rquidie, grē
miñe nac zhiwseed mendox. ² Grē
zha ne guiaadnie wseed co, ni
lalnu yquiad zdo zho zeene laa
zho yquidie miech. ³ Haxta st-
sidil zho ctsieelnia miech, znabey
zho ycuee ncuaañe gow miech; zig
nac zeene led Diosd psan ctsieel-
nia miech, zig nac zeene led med
psan grē ncuaañe gow zho. Me
psaña grēsew, zeena grēse zha ne
ngab xnēz me (zha ne beenbey di-
idzli), zeene laa zho yquiina gdeed
zho xquizh lo me. ⁴ Sac grēse
ncuaañe psan Dios, wena; zig nac
grē ncuaañe rac wagw, peet nacda
yquiin new, totsaque gdeed ne
xquizh lo me zeene laa ne yquiina,
⁵ ni gnab ne gunlay mew; sac zeene
rdeed ne xquizh lo me ni rnab ne
gunlay mew, rsanmbe mew.

None gun Timoté xtsiin Jesús

⁶ Zeene cseed luu grē zha bets ne,
zha bzian ne i, pseed zho grē miñe
rne naa lo luu nu, tibaque miñe nac
zhiwseed Dios güeynal; sac sca no
gun zha ne squi zo quianap grē zha
ne ngab lo Dios. ⁷ Ib yquiaadiagd
luu grē cuent gox, grē cuent nxen
ne paat rquiind; sinque Xtiidz Dios
bioxco, miñ co bloonie guic luu.
⁸ Gzoob ne zha ne rguit, wguit ne
run zho, nli rquiina lo zho par gac
macis xcuerp zho; per zig nac Xti-
idz Dios, mazdraa rquiin dzioxco
new; sac miñcosi squiina lo ne
zigtaa lo guielmban riiw, zigtagaa
lo guielmban ne naraa dzian new.
⁹ Ne nligaa sca rieguial gun miech,

ni grēse zho none tsoxco zhow!
¹⁰ Ni gacxe waa, laa ne quia dien
zha gliladz zhow, niicle ne nroob
grē guielñe ne quiadziañ ne; sac
ible Dios nac meñ ne rnal ne, meñ
nguiamban ne rsilaa grēse miech
lo dol; sac grēse zha ne dib zdo
rliladz me, rsilaa me zho. ¹¹ Bioxco
sca pseed zho grē miñe rne naa lo
luu nu, ni bnee lo zho gun zhow.

¹² Nli lēē tib zha nguiegse nac
luu, per blu lo zho ganle zha none
gban zho: Zeene gnee luu, niowse
bguib diidz ne gnee luu, zaacse goc,
ine bleynie samech luu, tibaque
dib zdo luu bliladz Xtiidz Dios,
ine ndzinli wban; zeena gan zho
ganle niicle ne zha nguieg luu, per
nixbiini luu.

¹³ Laga gal dze ne glanso naa i,
bioxco blab Xtiidz Dios lo grēse zha
bets ne, zha bzian ne i, bnee lo
zho zha naca, bnee diidz ne conley
zdo zho; zeena ine nguieel gac
zho. ¹⁴ Ib csaand luu grē guielbiini
ne bneedz Dios lo luu i (guielbiini
ne bgaa luu zeene psiaab me guic
grē zha ne rnabey lo grē zha ne
no xnēz me, pxobnia zho guic luu).
¹⁵ Grēse miñe rne naa lo luu nu,
bioxcow; zeena gan grēraa miech
ganle zigse zie dze laa luu quiayabi-
iniraa lo Xtiidz Dios. ¹⁶ Bien zaacse
goc, bien miñe nac Xtiidz Dios, miñ
co pseed miech, ib csaand luuw;
zeena tedlaa luu lo grētaa guielñe
ne no guiaad, ni scagaa haxta grē
zha ne rquiaadiag wseed ne rlu luu
ni rban zhow, ye zho zlaa zho lo
guielñe co.

5

Meñ wnaa ne gutle tsieel

¹ Grē zha bgui gol ne nac bets ne
i, zeene zha rxin zho, bien gactoxd
luu lo zho, sinque zaacse bnee lo
zho zig nac zeene lo pxoz luu nonee
luu; niiclegaa zha nguiega, zaacse
goc lo zho, been zho cuent zig tib
bets luu. ² Scaque grē meñ wnaa
ne nac zhagol, ndooladz bnee lo

me, been cuent lo xniaa luu ga zo luu; lo grē wnaa nguiega, ndzinli goc, niowse bnee lo zho, bien ganle rrieequia tib bzian luu ga.

³⁻⁶ Grē men wnaa ne gutle tsieel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque no-zodiidznie me Dios. Sac no zho mban zigne notaa guic zho, laa zho zienal loxaque grē ncuaañe gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque gutle tsieel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xniaa zho, sac gon me pchoob zho. Sca nonguiela, ni scagaa rdziladz Dios.

⁷ Pso diidz rii lo grē zha ne nacgrē to i, zeena cseed zho sca gban zho, ni scagaa tsod pe nacne gneenē miech zho. ⁸ Sac zha ne tsoxcod gan zha ne nacgrē zho, ni mine mazdraa telne niicle menlidz zho tsoxcod zho gan zho, rdzieeld dzigo guiab zho laa zho riladz Dios, haxta mazdraa nac xtol zho que tib zha ne gard gliladz me.

⁹⁻¹⁰ Ni stiba, grē men wnaa viud qui zha ne rquiabladz gun pe xtsiin Dios, bien zha ne psale tsongal iz zha co psëeb lo list. Ni wen wen gocnañ telne:

bionied me stib mgui zeene bii zomban tsieel me,
 zaacse mban me,
 zaacse pchoob me xpëed me,
 dib zdoo me rbëzlo me miech lidz me,
 ndooladz rac me lo grē zha ne no xnëz Jesús,
 run me xyudar grē zha ne no lo tib guielnë;
 ni run me niapse ncuaañe wen ne rquiin lo samiech me.

¹¹⁻¹² Laa grē zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelna zho, laa zho ctsieelna

stib. Loxaque gunctal zho xtol zho ga, telne glo rquiabladz zho gun zho xtsiin Dios ni lozh ga laa zho csaanaquew. ¹³ Ni ye nac wnaa nguieg, rdziladz zho rquianzë zho; ni telne peet dziin guñd zho, racgbech zho; ni stiba, zeene sca guiend pe gun zho dzigo laa zho rzhixcuaa diidzguizh, laa zho rzëeb lo grē cuent ne rieguialdraa zho. ¹⁴ Gacxe waa, racladz naa grëse wnaa nguieg ne sca ret tsieel, mazd ctsieelna zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grē zha ne rlëeniele Xtiidz Jesús, gneenëraa zho zha ne riladza. ¹⁵ Sac gon, blale wnaa ne sca gut tsieel zieriee xnëz Dios, lel laa zho zienal grē mine rnabey mendox.

¹⁶ Psoladza ganle, tel cho tib zha bets ne, tib zha bzian ne i raclidz tib men wnaa ne gutle tsieel, none zha gan me, laa ne gnalo zho ne to yguib dien zha gdioon me; zeena grē ncuaañe runlo to i, zgaaw yquiin grē men ne nlipaa guiend cho gan.

Mine rieguial zha ne zo lo zho

¹⁷ Grē zha ne zo rnabey lo grē zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuaañe rcaa zho, ible rieguial ycaa zho chop lalgaw. ¹⁸ Gotsaa gwi ne ganle zha quia lo Xtiidz Dios, rneew: “Code to guiex ro xma to, zeene no ma ye noguiits ma zhobxtil; jgolsaan gow ma!” Laa stib lugar rnee: “Zha ne run dziin, ib none ycaa zho mine non xtsiin zho.”

¹⁹ Bien gon Timoté, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me. ²⁰ Telne

bind me diidz, bii noyũ me dol
co, dzigo squi ndxie grë zha ne
nacgrë to, goctox lo me; zeena
sca gdzieb grëraa zho guñscad zho.
21 Zig zobwi Dios, zig zobwi Jesús
grë xanjł me, laa naa rso diidz
lo luu, been mine rne naa lo luu
nu. Gdzieebd luu, yquiad zdoo luu,
bnee lo zho tel chotaa nac zho.

22 Zeene gzo luu zha ne guñ xtsiin
Dios, guñd luu ne lega tel chotaa
gzo luu; sac gon, nend lëetse zha
ne rap pe tib falt gzooblo luu, dzigo
laa miech guiab nanpaa luu zha nac
zho ni rlisquid luuw lo zho. Ible
gdeete luu diidz guñ luu ncuaane
gunctal xtol luu. 23 (Gnid naa togo
ible grieelodraa guie luu vin, zac
guie luu niipyeena maase poc poc,
laa ne guie luu niab nis; zeena
glunëdraa zdoo luu.) 24 Sac grë
zha ne no lo dol, no dol co znuse
rzhoooben; nogaaw, haxta gal dze
ne laa zho gacredz lo Dios, dzigo-
raa xoobneena. 25 Scaquegaa zha ne
ruñ guielwen, no ncuaan co znuse
glu; nogaaw, niicle ne rluda niina
per ible zdziñ dze ne laaw glu.

6

Zha ne quiazho xtsiin ben

1 Grë zha bets ne, zha bzian ne,
zha ne lega ruñ xtsiin ben, none
gon zho xtiidz men ne quia zho
xtsiin; zeena yguibd zho gneenë
miech Dios, gneenë zho Xtiidz me
mine noseed ne miech.

2 Scaquegaa grë zha ne ruñ xtsiin
men ne rliladzle Xtiidz Dios, none
gon zho mine rnabey me zho; led
guiabd zho por bets zhow, guñ zho
mine racladztaa zho. Ni gale none
tsienie guic zho wenraa grieequia
grë dziin ne noyũ zho; sac gon lo
tib men ne no xnëz Dios ga, lo tib
men ne rleynie zho ga yquiin xtsiin
zho.

Grëse mine none naa lo luu nu,
pseed grë miech quiw, ni pso diidz
lo zho gon zhow. 3 Zrieequia zha
ne guiaadnie stib wseed, mine ni

nacdraa Xtiidz Jesús; sac zhiwseed
Jesús rlu zha gban grë zha ne no
xnëz Dios. 4-5 Zha ne sca rlu stib
wseed, lega:

tib miech niats ga nac zho,
ible peet riend zho,
runbeyd zho mine nac diidzli,
rdziladz zho rdilidiidznie zho miech;
ga rlan,

laa miech rdillsa,
laa miech rlëëlsa,
laa miech rbidzgolsa; rlozh ga,
rliladzdraa zho pe rnee samiech
zho.

Masaque nan zho telne sëëb zho
xnëz Dios, nroob dimi ne guñlo zho.

¡Bien ib ctsieelsad luu zha
co! 6 Parga nli zha ne rzëëb
xnëz Dios, zeene rzac zdoo zho
mine rzoladztaa Dios lo zho, tib
guielnzaac nroob ga rgaa zho. 7 Ni
sca nonguiela, sac gon zeene rlanso
ne lo guidzliu, peet rlansonied
ne; ni scaquegaa zeene laa ne gbi,
peet grieelod güey ne. 8 Gacxe
waa, none sac zdoo ne ni gley ne
totsaque gneedz Dios ncuaane gow
ne, ni ncuaane gacwxab ne. 9 Sac
grë zha ne rzoobladz xen nroob
dimi, no zho rquuil mendox zho
ruñ zho ncuaane ndzinlidraa par
gdziniaa zho dimi co; rlozh ga
rzhin lo xquielmban zho, haxta
rnitlo zho. 10 Sac nac dimi, zeene
rzoobladzdox miecha, ga rzobni
ne laa zho ruñ grë guielntseeb. Ndal
zha ne ziesaan Xtiidz Dios, sac laa
zho zienal dien zha xen zho nroob
dimi; per rlozh ga, stib stib guielnë
ne ziedziñ lo zho.

Dib zdoo Timoté gliladz Timoté Dios

11 Sangue luu gon, bien ganle
xnëz Dios no luu, guñd luu grë
ncuaan co. Bioxco zaacse wban,
tibaque bioxco gban luu zigne
racladz Dios, dib zdoo luu bliladz
me, bleynie me ni bleynie samiech
luu, ndooladz goc lo zho, ni lalnu
ib guiaand zdoo luu.

¹² Bleeladz luu beḡ grē dziin ne ruḡ zha ne dib zdoo riladz Dios, zigne ruḡ zha ne rie lo diḡ, rbeeladz zho zho. Goḡ gaḡle, laa luu nole nēz ne ygaa luu guieḡmban ne gdziḡnd dze lozh, ib csaand luu nēz co; sac niicle Dios ible miḡ co bzoobḡ me luu. Psoładz gaḡle, sḡui ndxie miech bleero luu ne dib zdoo luu riladz luu Xtiidz Jesús. ¹³ Dios (meḡ ne rdeed xquieḡmban grētaa ncuaaḡe no), ni Jesús (meḡ ne ni lalnu bdziebd zeḡe güeyzo zho me lo Pons Pilat, bnee me cho nac me); me zobwi gaḡle ¹⁴ laa naa rso grē diidz rii lo luu, bioxcō beḡa zigne no gaca. Tibaḡue bioxcōw haxta gaḡ dze ne gbiire guiaad Jesús, meḡ ndzon ne rnabey ne. ¹⁵ ¡ib laa me no guiaad! Ni Dios cxeel me zeḡe laa dze co gdziḡ. Dios meḡ nroob ne rnabey, meḡ ne rnabey lo grētaa zha ne nac rey, lo grētaa zha ne rnabey. ¹⁶ Mesi ib gdziḡnd dze guet me, lo biini ne no mew, tsod zha ne glēb gdziḡ ga; ni tib miech lo guidzliu rii gard gaḡ me, ni grielodgaa gaḡ zho me. ¡Gacxe waa, ible me none dziuunḡon ne, sac goḡ meḡ non, meḡ rnabey nac me! Miḡ co nagoḡ no dziuunḡ ne.

¹⁷ Grē zha ne rapcheḡ, bnee lo zho cseed zho gdaannied zho grē ncuaaḡe rap zho, ib gnalod zho grē ncuaaḡ co; sac goḡ ncuaaḡe tib rded ga. Dios none gnalo zho, ni mesi rneedz me grētaa ncuaaḡe wen ne rquiin ne. ¹⁸ Gudz lo zho gacmbidzd zho, none guḡ zho grē ncuaaḡe yquiin lo samiech zho, ycad zho ncuaaḡe quianie zho, iḡe guḡ zho xyudar zha ne peet quianied. ¹⁹ Zha ne sca guḡ, tib guieḡnzaac nroob ne ygaa zho; lēe guieḡnzaac co gaḡ zho leḡ dze ne ziaadraa. ¡Ni haxta zgaa zho tib guieḡmban ne gdziḡnd dze lozh!

²⁰ Timoté, laa naa rbire rso diidz lo luu nu goḡ: ib csaand luu dziin ne bneedz Dios lo luu i. Yquiaadiagd luu grē wseed yozh ne ziaad-

nie stib miech, wseed ne rneenē Xtiidz Dios, niicle ne rnee zha ne ziaadniew zha rac nac zho, per nliḡ ne diidzli rnee zho. ²¹ Sac goḡ, blale zha ne ziesaan miḡe nac diidzli, laa zho zienaḡ wseed co; per riend zho leḡ znu rziaabnēz zho ga.

Dios meḡ ndzon ne rnabey, me noxco luu, me gzhixcuaa lo grē zhizhgab luu. Me gacniē luu peet tsienied guic luu.

Pabl

BROP GUITS NE PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëëb xnëz Jesús.

² Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëed naa. Mine racladz naa ni rnab naa lo Dios men ne nac Pxoz ne, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacnien me luu! Dib zdoo naa noxco naa zana naa mine rnabey me, zigne bioxcoque grë xmen goldoo naa güeynal zhow.

⁴ Zeene rsoladz naa blactaa roon luu zeene wbi naa i, zoot naa tebaa zha gan niob naa luu stib; zeena tsonley zdoo naa. ⁵ Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu rliladz luu me.

⁶ Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡ib csaand luuw! ⁷ Sac gon, laa Dios rneedz zhiEspíritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiniraa ne. ⁸ Gacxe nod pe nacne gdzieeb luu, bnee lo miech ganle

zha nac Xtiidz Ndzon Jesús; ni nicle gdzieebdga luu ne znu nioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. ⁹ Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuun ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne ygaa miech tib guielmban ne gdzind dze lozh, none gliladz zho Xtiidz Ndzon me. ¹¹ Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; ¹² mincocxe waa znutaa grë ncuaa ne nodeed naa. Per ni lalnu ib rtoladzd naa, sac wen wen nan naa cho nac men ne rliladz naa, ni nan naa mesi zrieelo yquiaanap me naa nitnëzd naa haxta gal dze ne laa me guiaad.

¹³ Bien, güeynal grë mine pseed naa luu, sac gon min co nac mine rquiin. Tiblique bliladz Dios, ine bleynie samiech luu zigne no dziuun ne ne nac ne zha ne no xnëz Jesús. ¹⁴ Espiritu Sant men ne nacie ne, me yquiaanap luu, me gacnien luu ib csaand luu zhiwseed Dios, ib csaand luu dziin ne bzo Dios luu gun luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. ¹⁶ Sangue Onesifr, rnab naa lo Dios yquia zdoo Dios me grë menlidz me, sac blactaa

biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa; ¹⁷ sinque zigne blanso me lad guiedz Roma nu, pquiaguib me naa haxta bdziel naa lo me. ¹⁸ Ni zoladzaxe luu ganle, pe zhis-taa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

2

Dziits so Timoté lo Xtiidz Dios

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

² Grëse mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. ³ Ib gacm-band luu zeene noyan luu grë pe guielnë, sinque bioxco been xtsiin Jesús zigne no gun luuw, masaque been cuent xmenguiib me nac luu. ⁴ Sac gon, tib zha ne nac menguiib, grieelod sëëb zho pe stib lo cuent ne nacd xtsiin menguiib, sac none nsin so zho gun zho tel pe nac mine rnee men ne rnabey zho. ⁵ Bioxco been mine rnee men ne rnabey ne, zig run zha ne rie tib lo wguít; sac zha co telne tsoxcod zho quit zho zigne nacpaa lo wguít, ycaaniad zho premio. ⁶ Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zat-atne ran zho. ⁷ Mine blozh bzet naa nu, blonieuw guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha brieequia me lo xtii rey David, ni zha brieegan me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. ⁹ Ni ne nonecxe naa Diidz Ndzon rii waa, gane nroob guielnë ne noyan naa;

zig nac niina, laa naa ngadoo za-atne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu. ¹⁰ Laa naa quiaxecw mine quiadeedtaa naa, zeena grëse zha ne bzooblote Dios gliladz Jesús, grieelo yquiaadiag zho zha laa zho lo dol, ni zha yгаа zho tib guielmban ndzon ne gdzind dze lozh.

¹¹ Ni znu gon naca:

Telne xnëzle me no ne zeene laa ne guet,

ib zгаа ne guiobannie ne me.

¹² Niicle nroob guielnë dzian ne porne riladz ne me, scagaa ible zdziñ ne zaatne gnabeynie me ne;

telne guiab ne runbeyd ne me, scaquegaa me ziab me runbeyd ne.

¹³ Niicle telne riaanladz ne me, sangue me riaanladz me ne; mine rnee me run mew, sac mesi rtsëed me xtiidz me.

Tsoxco Timoté grieequia xtsiin Timoté

¹⁴ Bien, beencsoladz grë zha bets ne i, zha bzian ne i grë min rii. Zig zobwi Dios ganle laa naa rso diidz lo luu, gudz lo zho tildiidzniedraa zho miech grë godiidz ne paat rquiind; led ncuaane ndzinlida, lox-aque rungüeta guic zha ne rquiaadiaga.

¹⁵ Tibaque bioxco zaacse grieequia xtsiin Dios, mine noyun luu, zeena wen grieequia luu zeene laa luu gdziñ lo me. Zigne nase Xtiidz me, sca pseed miecha.

¹⁶ Yquiaadiagd luu grë wseed yozh, ncuaane ni lalnu paat rquiind; zha ne zianał wseed co, zig zie dze laa zho rrozitraa lo Dios. ¹⁷ Lega nac zhiwseed zho zig nac grë guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho, ¹⁸ sac tel zha zianałdraa zho mine nac diidzli; rnee zho bleebanle Dios grë

mengut. No palal zha ne riladzle Xtiidz Dios, zeene ron zho min co, riendraa zho dien pa mine gliladz zho. ¹⁹ Sangue zha ne nlipaa no xnöz Dios, tsod pe nacne gree zho xnöz me sac lole me ngab zho; zigne zhobneeque lo Xtiidz me zaatne rnee: “Runbey Dios cho nac zha ne nlipaa no xnöz me”; ni rneequew: “Grè zha ne nlipaa ngab xnöz Jesús, none csaan zho grèse guielntseeb.”

²⁰ Zaatne nac lidz tib zha ricw lëe, no grè xtsiin rotie zho mine niaa or; mine niaa plat, ni no-quegaa mine niaa yag, mine niaa ben. Mine mazdraa niazh, min co rquiin zho rio ncuaane row miech; laa mine beelze niaa, ga rgo zho ncuaane row ma. ²¹ Scaquegaa miech, zeene csaan zho grèse ncuaane paat rquiind, ible squiin zho lo Dios gun zho xtsiin me mine mazdraa nroob, zigne rquiin grè trast niazh co.

²² Nac lo guielnguieg, ndal grè ncuaane ndzinlid rio guic miech run zho, sangue luu gon tsienied grè ncuaan co guic luu, bioxco zaacse wban, dib zdoo luu bnalo Dios, ine bleynie grèse samiech luu, tilnied luu zho; grè zha ne squi nli mbe zdoo, rbedz zho Dios, zaacse wbannie zho. ²³ Ib yquiaadiagd luu grè godiidz ne paat rquiind, sac gon loxaque runctila miech.

²⁴ Zha ne squi run xtsiin Dios, nodne tso zho dien pe tildiidz zho; sinque none wen gac zho lo grèse miech. None guien zho zha cseed zho miech; ib guieednied zho miech, ²⁵ ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic grè zha co, yguudz zdoo zho csaan zho grè xquielntseeb zho, gacnan zho mine nac diidzli; ²⁶ zeena tsaa zho biini gree zho ladznia mendox, zaatne ngadoo zho.

3

Len dze ne ziaadyob nitlo guidzliu

¹ Ni none gacnan luu ganle, zeene laa dze ziaadyobpaa nitlo guidzliu, nroob nac guielnè ne gan grè zha ne no xnöz Dios. ² Zrieequia grè zha ne:

gacladz tebaa lose zho yquiin grètaa ncuaane no, loxaque dimi gleynie zho, niats gac zho,

zdaannie zho ncuaane ni rapd zho, zneenè zho Dios, gond zho xtiidz pxoz zho, xtiidz xniaa zho;

sacd zdoo zho mine gun miech lo zho,

laa zho gban zigne notaa guic zho, ib yquiaadiagd zho Xtiidz Dios.

³ Gacnandraa zho pe nac guielwleynie, ib yquiad zdoo zho,

loxaque diidz gzhixcuaa zho, lëbd zho gnabey zho xcuerp zho, sacsi zho samiech zho, stsidil zho grèse ncuaane rquiin,

⁴ zgo zho zha ne ndzieeldiidz zho nia zha ne quin zho,

ni lalnu guielto tsod lo zho, loxaque dien zha gdeed guxt xcuerp zho tso zho, laa ne yguib zho xnöz Dios.

⁵ Squiaalo zho ye zho riladz Dios, per lo grè ncuaane gun zho, ga glu ne riladzd zho me.

Bien, ib ctsieelsad luu grè miech ne sca nac. ⁶ Sac lëe zha ne nacgrè zho ga, rzëeb yu rietsitnie grè wnaa yozh ne zienal ncuaane gdeedtaa guxt xcuerp. ⁷ Tibaque no zho dieen peraa rseed zho, per ib rioguicd zho mine nac diidzli.

⁸ Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque run zha co niina, rlëenedox zho mine nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; ⁹ per gacdaquew xtse, zeene laa diidz guien ganle pe clas miech

nac zho, dzigo lëëque grë ncuaañe yozh ne run zho cuee xquielto zho; zigne bzhaacaque zha ne sca blëënie Moisés.

Csaand Timoté mine pseed me

¹⁰ Sangue luu, nanle luu ganle zha nac grë mine pseed naa luu. Wen wen nan luu ganle zha mban naa, pe no guic naa gun naa, zha dib zdoo naa riladz naa Dios, zha dib zdoo naa rleyne naa samiech naa, rieednied naa zho. ¹¹ Nanle luu ganle zha rneedz Dios xfuers naa, rlëëb naa grëtaa mine rteed miech naa, zig been zho naa guiedz Antioquí, guiedz Icon ni Listr, blactaa pquianal zho naa; per tibaque gocnie Dios naa, psilaa me naa lo grëtaa guielxtseeb co. ¹² Ni scagaa naca, grë zha ne rquiablazd gban zigne rnabey Jesús, ible squianal miech zho. ¹³ Per probsaxe grë zha ne sca quiaayunctal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguítne zho miech, ni quiaguítniegaa mendox zho.

¹⁴ Sangue luu gon, csaand luu grë mine pseed luu. Nanween luu ganle diidzliw, ni runbeygaa luu cho nac grë zha ne bneew lo luu. ¹⁵ Ni stiba, zigne ziadroob luu psilo quiaseed luu Xtiidz Dios, ni lëëw bdixbiini guic luu gocnan luu ne Jesús none gliladz miech parne laa zho lo dol. ¹⁶ Dib nacse Xtiidz Dios, Espíritu Sant psiaaba guic zha ne pquiaaw, laaw biaan: rseeda ne mine nac diidzli, rsow diidz lo ne guien ne pa lo quiaxin ne, rseeda ne zaacse gban ne.

¹⁷ Zeena sca grëse zha ne no xnëz Dios, grieelo wen wen cseed zho, ni guien zho zha gun zho grëse dziin ne rquín, dziin ne rieguial zho gun zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuaañe been zho, zigtaa zha ne mbana zigtagaa zha ne gutlew, zeene gdziñ dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloomley zdoo zho. Bioxco tibaque pseed zho, ib guieednied luu zho.

³ Sac gon, zdziñ dze ne siguieldraa miech yquiaadiag zho mine nac diidzli; sinque laa zho yquiaguib zhaase zhaase dien cho cseed zho tel pe nac ncuaañe rdziladzse zho yquiaadiag zho. ⁴ Gleynied zho Xtiidz Dios, laa ne yquiaadiag zho mine nac xtiidz me, lel laa zho tsoxco yquiaadiag zho grë mine nac zhiwseed miech guidzliu. ⁵ Sangue luu gon, nsin bzo gdeete luu diidz gungüet zho luu. Zaacse been grë mine pso Dios luu gun luu, bnee lo miech zha laa zho lo dol; niicle tel pe nactaa guielnë ne noded luu, gacmband luu.

⁶ Rien naa ziaadyoble ne laa naa gbi lo guidzliu rii, zhile gdziñ dze ne laa zho gut naa. ⁷ Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalga naa niina. Zigne runda grë menguiib ne rie lo dil, sca bleeladz naa naa ben naa xtsiin me; ⁸ laa na nagon, mine quiambëzse naa nac premio ne no gneedz me lo naa. Lëë premio co gneedz me gal dze ne guiaad me guiaadgun me guielwxtis; ni led loxaque naade ygaaw, sinque grëse zha ne rleyne me, grë zha ne dib zdoo quiambëz gdziñ dze ne guiaad me stib, grëse zha co ygaa premio co.

Tsieniob Timoté

9 Bzhiguiel̄ guiaadniob̄ luu guiaadgan̄ luu naa nu; 10 sac zig nac Demas, laa me bichele lo naa. Psañaque me naa nu laa me zie nēz Tesalónica; sac mazdraa nonie grē ncuaañe lo guidzliu rii guic me. Bay zig nac Crescent, laa me briece zie me nēz Galás; Tit na, zieegaa nēz Dalmás; laa zho zie zaatne nacle diidz tsie zho. 11-12 Niicle Tic guiend nu, sac laa me pxel̄ naa zie me Efés. Loxaque Lucsé biaan̄ lo naa nu.

Psoladz gon̄ tsieguiib luu Marcw, zeene laa luu guiaad nēz rii bzhiguiel̄ guiaadnie luu me; sac rquiin me nu gun̄ me xyudar naa lo xtsiin Dios. 13 Ni psoladzpaa guiaadnie luu lar ne rbiix naa, miñe psañ naa guiedz Troas lidz Carp; ni guiaadnie luu grē xquits naa. Ib guiaanladz luu miñe nac grē guits nroob ga.

14 Tel̄ gan̄ luu ganle nzian ncuaañe nonguieldraa been̄ Lejandr naa, meñ ne nac wncadzguiib ga; per Diostaa nan̄ zha gunquizh me Lejandr grē miñe been̄ Lejandr ga. 15 Ni niicle luugaa gon̄, nsinaque bzo lo me; sac ne nlipaa rlëenie me wseed ne nolu ne lo miech nu.

16 Zeene glopaa gocredz naa lo wxtis, choot bzëd nriee xfavor naa, grëse zho biche lo naa; rnab naa lo Dios gunquizhd me zho miñe been̄ zho, sca psaan zho naa. 17 Sangue meñ ndzon ne rnabey ne psand me naa, me pchoobladz zdoo naa, haxta bdeeda diidz bnee naa Xtiidz me lo grē zha zit rii. Sca gocniën me naa, gun̄ naa cuent role meedz psilaa me naa; 18 ni niicle niinagaa, nanle naa ne ib silaa me naa lo grëtaa ncuaañe racladz miech cteed zho naa, ni me yquiaanap naa haxta gal̄ dze ne laa me gdziñnie naa zaatne rnabey me gbaa. ¡Me rieguial̄ guiaannon gzataa dze, niicle nadzew, gzhew, ni grërագaa len̄ izdoo ne ziaada!

19 Bzhiguiel̄ bdeed tib zhibdiuzh naa lo Aquil i grop Priscil, ni lo grē zha ne no lidz Onesifr. 20 Gacnan̄ to ganle, laa bets ne Rast biaan̄ Corint, laa Trófimo biaan̄ guiedz Milet, sac rzacnë me. 21 Bioxco gon̄ guiaadniob̄ luu, zeena blansole luu nēz rii zeene laa mëe nal sëeb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grërագaa zha bets ne, zha bzian ne, zha ne no nēz rii, laa zho rxeel̄ bdiuzh lo luu.

22 Jesús meñ ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

GUILTS NE PXEEL PABL LO TIT

¡Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grése miech ne bzooblolé Dios, gliladz zho me, gacnañ zho zhapaa nac wseed ne zionañ ne (wseed ne rnee zha none gban- nie miech Dios), ² wseed ne rlu ganle ible laa ne quiambiaaz ygaa ne tib guielmban ne gdziñdraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie. ³ Ni niina ne laa dze co bdziñ, laa me blu lo ne ganle zha nac xtiidz me, miñcopaa nagon bzo me naa none naa lo miech. Lée me ga nac Dios ne psilaa ne lo dol.

⁴ Laa naa rxel guits rii lo luu gon Tit. Rzaac naa luu zig tib xpéed naa, sac nañ naa nli dib zdoo luu rililadz luu Dios zigne rililadz naa me.

Rnab naa lo Dios men ne nac Pxoz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psan naa luu lo guidzliu win ne lé Cret i, laa naa psan luu zeena lozh gon luu gréaa dziin ne no gac i, ni psan naa diidz lo luu zha gzo luu zha ne so gnabey lo gré zha ne rililadz Jesús, tib tib guiedz qui. ⁶ Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;
tibaque wnaa ne mbannie zho, men ne nacse tseel zho,
zaacse quiachoob zho xpéed zho, rililadz méed Dios (zéebd di- idz pe guielntseeb ne noyun

méed, o rondgaa méed di- idz).

⁷ Sac zha ne sca so lo gré zha ne no xnéz Dios, ib none gac zho tib zha ne ndzinli mban, sac gon xtsiin Dios ga gon zho. Nodne gac zho:

zha nléeguic,
zha ngonziu,
zha nad ron diidz,
zha nguibdil,
zha ne rzonal dimi.

⁸ Sinque none gac zho tib zha ne: ndzinli nac guic,

ine niowse rdeed zho zaatne rbéz miech ne rdzintaa lidz zho,
rioxco zho run zho niapse ncuaane rquiin lo samiech zho,
zienañ zho gac niapse miñe nac di- idzli,

rioxco zho run zho niapse miñe rnabey Dios,
rieelo zho rnabey zho guic zho,
rnabey zho xcuerp zho.

⁹ Ni none tibaque tsienañ zho miñe nac Xtiidz Jesús, miñe pseed zho; zeena guien zho zha gnee zhow lo gré zha ne gard tsoguic zha naca, ni grielo zho glu zho lo gré zha ne rléenie Xtiidz Jesús, guien zha co nonguielda ga gléenie zhow. ¹⁰ Sac no ndal gré zha ne néd gon Xtiidz Jesús niina, ncuaane paat rquiind rseed zho miech, rquidie zho; ni léepaa zha ne sca run nac zha Is- rael. ¹¹ Gacxe waa, ib none guioog ro zho; sac gon par cueexlèse zho dimi no zho noseed zho miech gré ncuaane paat rquiind; zaatne no tib yu miech, grése zho rquidie zho.

Bien sca gon nsin bzo lo gré zha Cret i. Sac gon, ¹² tib menladzaque zho, tib men rac lo zho bzeet ganle zha nac zho zeene znu bnee me: “Nandraaque zha Cret, lox- aque noquidielsa zho samiech zho. Masaque mban zho zigne mban gré ma ntseeb ne no guix; loxaque gowse zho zienie guic zho, rbech zho gon zho dziin.” ¹³ Ni nligaa sca nac zho. Gacxe waa, bien gdziguiend luu gré miñe run zho,

goctox lo zho zeena sodziits zho lo Xtiidz Ndzon Jesús miñe no gliladz zho. ¹⁴Bnee lo zho yquiaadiagdraa zho beelze pe grè godiidz ne rbee-bey zha Israel, ni niicle yquiaadi-agdga zho grè miñe rnabey zha ne rlëenie Xtiidz Ndzon Jesús.

¹⁵ Golgan ganle, grè miech ne ndzinli nac guic, zha ne mbe xquielrien, ncuaane notaa, mbe naca lo zho; sangue zha ne riladz Xtiidz Dios, zha ne ndzinlid nac guic, tsod tib ncuaane mbe glulo lo zho; sac desde zdoo zho, desde xquielrien zho mbed. ¹⁶Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuaane yquina.

2

Znu nac Xtiidz Ndzon Jesús

¹ Sangue luu gon, none gnee luu lo grè miech qui zigne nacse Xtiidz Jesús. ² Grè men bgui ne nac zha gol to i, bnee lo zho:

tibiladz gac zho,
gund zho ncuaane cuee xquielto zho,
quix zho biini, ncuaane ndzinli tsienal zho gun zho;
tiblique gac zho lo Xtiidz Jesús,
gleynie zho samiech zho, ni dziits so zho tel pe nactaa grè guielne ne noyan zho.

³ Scaquegaa grè men wnaa ne nac zhagol, bnee lo zho:
gban zho zigne no gban zha ne nole xnëz Dios,
gzhixcuad zho diidzguizh,
gzudzd zho.

None zaacse gac zho, ⁴ zeena zha glu lo grè wnaa nguieg zha gban zho. Cseed zho grè wnaa nguieg:

gan zho tseel zho,
gan zho xpëed zho,
⁵ gac zho tib wnaa nix biini,
quitnied zho tseel zho;
zaacse gun zho xtsiin zho,
niowse gac zho, niowse gnee zho,

gon zho xtiidz tseel zho; zeena tsod pe nacne gneenë miech Xtiidz Dios.

⁶ Ni scaquegaa bnee lo grè zha bgui nguieg, gac zho zha nix biini. ⁷ Luuzhal zaacse been grëse ncuaane no gun luu, zeena ga gwi zho ganle zha none gban zho. Zeene cseed luu zho, ine tibiladz goc, gund luu ne quitnie luu zho. ⁸ Bguib diidz ne gnee luu, zeena choot peet glisquid lo luu; ni sca-gaa, grè zha ne rlëenie Xtiidz Jesús, stoladz zho zeene gan zho guien pe glisqui zho lo ne.

⁹ Grè zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰ Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol.

¹¹ Grè diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa; ¹² sac laa me racladz csaan ne grëse guielntseeb, csaan ne grëtaa ncuaane rleyne zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me. ¹³ Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con grè xquielndzon me. Me nac Dios ro ne riladz ne, me psilaa ne lo dol. ¹⁴ Sac gon, me bgaadz guielgut ne niogual ne, me bdiizh grëtaa guielntseeb ne bdziun ne, psanmbe me ne lo grëtaa ncuaane bdziun ne; gane miina, lo me ngab ne, ni none dzioxco ne gban ne zigne rnabey me.

¹⁵ Grè min rii nagon pseed grè miech qui, bnee lo zho gban zho. Zeene riegala gdzieebd luu goctox lo zho, sac gon luu riegual gnee lo

zho. ¡Sca been, zeena choot quitnied luu!

3

Znu rieguial gban zha ne no xnëz Dios

¹ Been soladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadzd zho gun zho grë tel pe ncuane yquii lo samiech zho. ² Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuane racladz xcuerp ne, lo grëtaa ncuane ndzinlid ne bley ne bdziun ne. Niapse guielntseeb bional ne, në rac zdoo ne rdzian ne ncuane quiane, ncuane run stib miech; zigtaa row rzhiih zdoo zho gon zho ne, scaque ne, zha ne rdziantaa ne, row rzhiih zdoo ne bdzian ne zho. ⁴ Per bdzian dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, ⁵ laa me psilaa ne; per guiabd ne togo por pe ncuane wen ne bdziun new, sinque porne pquia zdoo me new. Psaambe me ne lo grëtaa xtol ne, rriequia gol ne ga stib, ni bzhixcuaa Espiritu Sant lo xquielmban ne. ⁶ Niapse por Jesús men ne psilaa ne ga, laa Dios pxeel Espiritu Sant rneedz me grëse guielbiini ne rquii lo ne. ⁷ Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zgaa ne tib guielmban ne gdziind dze lozh, sac ib sca nac xtiidz me.

⁸ Mine rne naa lo luu nu, diidzliw. Racladz naa tibaque gnee luuw lo grë zha qui, zeena grëse zho ne nac zho zha ne riladz Dios, tsoxco zho gun zho niapse grë ncuane ndzinli; sac gon, min co nac mine nonguiel, ni mincogaa rquii lo grëse miech.

⁹ Biche lo zha ne racladz tilididznie luu grë ncuane paat rquind, zig nac grë godiidz dien pe been grë mengol padzeela, dien pe nonguiel tsienal ne ley, te nonguielda ye. Ncuane paat rquiind ga, loxaque runctila miech; ni lalnu rieguiald gaquieta.

¹⁰ Tel cho zha ne rsilo rgodil grë zha ne riladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne ronduaque zhow, dzigo bzonëz zho gan zho dien pa nëz tsie zho. ¹¹ Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

¹² Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, siguieel luu guiaad luu Nicópolis ga gdzieel ne; sac ib ga ni naa cuëz naa len mëe nal ne ziaad nu. ¹³ Laga no luu i, bioxco zaatne grielotaaw been xyudar Apol grop me licenciad Zenas. Bdeed grë tel pe ncuane yquii zho nëz; zeena peet gunfalte lo zho, grielo gdziñ zho zaatne no tsie zho. ¹⁴ Grëse zha ne nacgrë ne ne riladz ne Jesús, none cseed zho gun zho xyudar zha ne no liaadz; glu zho ganle rquii zho, led zhlëd mban zho.

¹⁵ Grëse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grëse zha ne rlynie no i; sac ye zho riladz Jesús.

Guiaannie Dios to sca dien. Peet tsienied guic to, me gacniën to; sac gon me noxco grëse zhizhgab to.

Pabl

GUITS NE PXEEL PABL LO FILEMÓN

¡Diuzh Filemón!

¹ Naa nac Pabl, laa naa no ladzguib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleynie no luu squi ye luu noyun xtsiin Jesús. ² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëaa zha bets, zha bzian ne rcaalsa lidz luu i.

³ Dios, men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

⁴ Ib riaanladz naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. ⁵ Sac ziyonle naa squitaa dib zdoo luu riladz luu Jesús, rleynie luu me, ni scaque rleynie luu grë zha ne ngab lo me. ⁶ Rnab naa lo Dios, grëse mine noseed luu grë zha ne no i, tsoguc zhow, zeena ygaa zho grëse guelnaac ne rdeed Jesús lo grë zha ne ngab lo me. ⁷ Rley naa gon bets, sac zigtaa naa zigtagaa grëaa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleynie luu no.

⁸ Niicle ne rieguiala gnabey naa luu mine racladz naa gon luu, sac gon Jesús bzo naa none naa Xtiidz me, ⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleynie naa luu, scaque luu rleynie luu naa. (Gon ganle, mengol ne nac Pabl nu nonee lo luu, laa naa niogyu nu loxaque ne quiayun naa xtsiin Jesús.) ¹⁰ Niina gon ne laa Onésimo

glanso lidz luu i stib, bzhiguiel zacse pcaania me, gon ganle rrieequia mëed nac me lo naa niina, sac nu len ladzguib nu bne naa Xtiidz Dios lo me, xquizhgaa Dios bliladz mew.

¹¹ Nli glo tib zha peet xtsiin nac me lo luu, sangue niina gon, zigtaa lo luuw zigtagaa lo naaw nroob yudar ne gon me. ¹² Laa me biire ziaad lo luu i, niowse pcaania me; masaque been cuent naa i zial i. ¹³ Gocladz naa mbëz me lo naa nëz rii, zeena me niun dziin lo naa nu xcuent luu, ne znu niogyu naa nu loxaque ne noseed naa miech Xtiidz Ndzon Jesús. ¹⁴ Per gocladz naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, lëe guiaanle me lo luu i. ¹⁶ Per bien gon, sacdraa luu me niina zig tib zha ne runse xtsiin luu, gon ganle rrieequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon yele me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne riladz ne, nana sca been cuent naa i zial i, pcaania me zig nac zeene naa glanso lidz luu. ¹⁸ Ni tel no pe guielqui ne been me lidz luu, tel pe zëëbgaa me lo luu, lo naa bnaba. ¹⁹ Wi ganle, naazhal pquia diidz rii nu: Naa quizha. ¡Zig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bgaa guielmban ndzon ne gdziind dze lozh.

²⁰ Sca gon bets gaca, bzhiguiel been guelnaac co; bloonley zdoo naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. ²² Lëë nëzle nu rnabaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa gualgan naa to.

²³ ¡Dios guiaannie luu sca! Pcaania zhibdiuzh Epaftr, men ne nioogyunie naa len ladzguiib nu loxaque ne rdziuun no xtsiin Jesús. ²⁴ Scaquegaa zla zha ne quiadziiuunza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

GUITS NE BEY LO GRË ZHA ISRAEL

¹ Padzeela, ndal vuilt bnee Dios lo grë pxozgaldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. ² Sangue niina, Xpëedpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuuaane no, ni men ne bzo me gnabeya grësew. ³ Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuuaane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne rieguial me ne nac me men ne rnabey.

⁴ Ga rlu ganle men nroob nac Jesús, led lega lëd me Xpëed Dios; men nroob nac me lo grë anjl. ⁵ Ni tib lo anjl bneed Dios zigne bnee me lo Jesús, zeene rëb me: "Xpëed naa nac luu. Desde nadze laa zho gunbey ne Xpëed naa nac luu." Stib vuilt zeene bzeet me Jesús, rëb me: "Xpëed naa nac me, naa nac Pxoze me." ⁶ Ni zeene biaad Jesús lo guidzliu; men ne nac Xpëedpaa me ga, rëb me: "Grëse xanj naa, none yquitsgzhib zho lo me."

⁷ Zaatne raquiet anjl, rneew: Tib mandadse nac zho lo Dios, pale zigne rzhoon me sca rzhoon zho rie zho zaatne rnabey me zho; me rnabey rlu zho zigne rlu bel.

⁸ Sangue zaatne raquiet Xpëed me, rneew: Dios, luu nac men ne zobnabey, ni gdzind dze ne griece luu; zeene run luu guielwxtis, zigne rieguiala sca run luuw.

⁹ Ni palal rdzigiuid luu grë guielntseeb,

niapse ncuuaane ndzinli, ncuuaane nonguiel, min co rleynie luu; min co gane bzooblo Dios luu, nac luu men ne rnabey, luu nac men ne mazdraa nroob guielbley bgaa.

¹⁰ Laa stib lugar rnee: Men rnabey nac luu, luu bzaa guidzliu, luu bzaa gbaa dib nacsew.

¹¹ Nli dzin dze nitlo grë ncuuaane co, grësew zlozha zigne riozh grë lar,

¹² dzigo laa luu ctibëda, zig rdibëd grë lar, laa luu cuee stib min cub; zigne run zha ne rtsëëxab.

Sangue luu, tibaque nac luu, nacd luu men ne nitlo, nacd luu men ne lozh xquielmban.

¹³ Haxta rëb Dios lo me: Cue naa nëz derech, nu bzob, nieeda lozh gnaz naa zha ne rlëe lo luu, csan naa zho ladznia luu.

Nligaa men nroob nac me lo grë anjl, sac ni tib lo anjl bneescad Dios. ¹⁴ Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielne ne csiaab me.

2

¹ Gacxe nagon waa, gotsaa guien ne ganle ib none dzioxcu ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne. ² Sac gon, niicle zeene xanjlse Dios biadteed xtiidz me lo miech padzeela, ni goconna; grëse zha ne güeynalda, pteed Dios zho caxtigw ne rieguial zho. ³ Pe lelgue niina dzigo ne Jesússhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew; ⁴ niicle Dios-gaa, blactaa grë ncuuaane quialu me, blactaa grë milagr ne run me,

rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espíritu Sant lo grë zha ne dib zdoo rnalo Jesús.

Jesús nac men ne grielo gdzinnie miech lo Dios

⁵ Zig nac lo guidzliu cub ne ndion ne naraa gneedz Dios, psand me ne anjl gnabey low. ⁶ Lo Xtíidz me zhobnee ganle zeene znu rëb David lo me:

¿Cho nac miech ne squitaa noxco luu zho?

Zig nac tib men qui, ¿pe nacne squitaa runnon luu me?

⁷ Tib blase dze psanwin luu me palal lo grë anjl; na laa luu psanglaa me stib, beennon luu me, bzo luu me mele gnabey.

⁸ Grëtaa ncuaane no, laa luu psana ladznia me.

Nli gard gac grë mine bnee David ga, ⁹ per ndionle ne ganle zha psanwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtol ne.

¹⁰ Ible sca gocladz Dios, men nroob ne bzaa grëtaa ncuaane no, ible me bdeed diidz scataa grë guielnë ne gon Jesús; gane niina, Jesússe nac men ne grielo ner lo grëtaa miech guizhiu ne no ygab lo me, gdzinnie Jesús zho lo guielndzon ne no me.

¹¹ Grëse ne ne nac ne zha ne psambe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne; ¹² no tib lugar lo Xtíidz Dios zaatne raquiet zeene znu rëb me:

Zne naa lo grë bets naa, gacnan zho ganle cho nac luu;

ni zeene ycaalsa zho grë zho, tipse dzioolnie no luu.

¹³ Stib vuelr rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

¹⁴ Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho. ¹⁵ Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios. ¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grielo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; ¹⁸ nroob nac grë guielnë ne bded me, pquianal mendox nquuil ma me niab me lo dol. Ni ne mezhal bded grë min co, nannpaa me zha rzac zha ne nodeda, gane ible zacnie me zho.

3

Gundipde to zdoo to

¹ Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

² Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grë zha Israel. ³ Per Jesús nac men ne non, sac gon lo me ngab grë miech co, laa Moisés loxaque pquianap me zho. ⁴ Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuaane no; ni lëe men co nac Dios. ⁵ Nli bin Moisés diidz been me xtsiin Dios, per laa me

gocse zig tib ngundziin pquianap me grë zha Israel co, ni pteed me xtiidz Dios lo zho. ⁶ Sangué Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque inë nley gac ne dib zdoos ne yquiambiaaz ne gac grë minë nacle diidz gneedz me lo ne.

⁷ Ndiönle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Tejne gon to gnee me lo to nadze,

⁸ gunndipde to zdoos to,

gunde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

⁹ Ga raquiet ganle zeene znu rëb Dios:

Ncuaane lëbdraa guic naa been zho, per dipse len choo iz, blactaa ncuaane gon zho ben naa.

¹⁰ Zeene gon naa scataa nac zho, laa ne gon zho diidz tsie zho nëz ne rlu naa lo zho, lej zhaa ncuaane run zho;

nacne nli benngulëë zho guic naa.

¹¹ Lo guieblëë co, bdeete naa diidz ndzin zho zaatne nded naa ndziiladz zho.

¹² Bets, bzian, golguien sca ganle ib gunndipde to zdoos to, zeena sozite to lo me ne nac me Dios nguiamban. ¹³ Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald grë ncuaane runctal xtol miech, lozh ga lëew yquiaaqui gacntseeb to lo Dios. ¹⁴ Sac gon, par gdzin ne zaatne no Jesús, ib none tiblique gac ne, tibaque gnalo ne Dios zigne bnalo ne me zeene psilo bdziunbey ne me. ¹⁵ Ni nadzegazh none dzioxco ne min co. Golsoladz ganle zha rnee lo Xtiidz me:

Tejne gon to gnee me lo to nadze,

gunndipde to zdoos to,

gunde to zigne been grë zha ne sca gocntseeb lo me ga.

¹⁶ Ni lëë min co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, ¹⁷ beenctal zho xtol zho. Dipse len choo iz ne sca bio zho dan co, bieednie me zho. ¹⁸ Zeene gon me rond zho xtiidz me, nacne bnee me lo zho rëb me gdziind dze ne gdzin zho zaatne ndeed me ndziiladz zho. ¹⁹ Ni nligaaw bdzind zho, grëse zho gut dan co; sac sca beenndip zho zdoos zho, ib bliladz zho minë rnee me.

4

¹ Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeena ni tib choot sacd zig bzhaac grë zha co.

² Sac zigne nagon nonee Dios lo ne niina dien zha gdzin ne zaatne gneedz me ga, znuque bnee me lo zho; per zhlëse bin zhow, ib bliladz zhow dib zdoos zho. ³ Sac loxaque zha ne dib zdoose rliiladz xtiidz Dios, zha cose zrieelo gdzin zaatne nacle diidz ga gdeed me gdziiladz zho. Mincoxe waa, zeene gon me bliladz zha co xtiidz me, bdeete me diidz ndzin zho ga.

Niaale zaatne gdziiladz zho ga, nolew zeene blozh bzaa Dios grëtaa ncuaane no. ⁴ Sac gon rnee lo Xtiidz me: “Xoop ngbidz bzaa me grëtaa ncuaane no, laa zeene gol ngbidz gadz laa me bdziiladz.” ⁵ Niaalew nagon, sinque ne gocntseeb zho lo me gane bdeete me diidz ndzin zho.

⁶ Grë zha ne glo gocnan xtiidz me ga, brieelod ndzin zho; per zig nac niina, laa me bii quiambëz sëeb grëraa zha ne no sëeb. ⁷ Gacxe waa, laa me biire pso stib dze ne yгаа zho guienzaac co. Lëë min co ga znu bzeet David, zeene rëb me: “Tejne gon to gnee me lo to nadze, gunndipde to zdoos to.” Ndaldoole iz sca bzhaac grë zhagol co, dzigoraa

znu bzeet David; ⁸ ga nagon rlu no stib lugar ne gdziiladz miech. Nacdraaw zaatne bdiinne Josué grê zha ne biaan zeene blozh gut grê zha ne gocntseeb ga; sac telne lëële lugar co ga, nsodraa Dios stib dze ne yгаа miech guielnzaac co. ⁹ Min co nagon, ndion ne ible no stib lugar co, ni ga gdzin grêse zha ne ngab lo Dios. ¹⁰ Grêse zha ne gdzin ga, gasi laa zho gdziiladz lo grêtaa xtsiin zho, zigne bdziiladzaque Dios zeene blozh bzaa me grêtaa ncuane no.

¹¹ Gacxe nana sca, golgotsaa dzioxco ne dziuun ne mine rnabey Dios, zeena gdzin ne ga; dziuund ne zigne been grê zha wladz ne sca bind xtiidz me. ¹² Sac Diossi gon, diidz ne rnee me, nona. Zeene rnee me, rien ne grêse mine nac ne. Nan me pe no guic ne, pe rza zdo me; niicle ncuane rzac ne mazdraa ngueetsa, nan mew. ¹³ Tsod ncuane tsongueets lo me. Grêse ncuane rac, me rana; ni tib tib ne, lo me cueero ne grêse tel zha mban ne.

Lëë pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëë me ga nac Jesús, men ne nac Xpëed Dios, me none gnalo ne; none tiblique gac ne. ¹⁵ Sac gon mesi rquia zdo me ne, csaand me ne zeene zootle laa ne guiabile lo dol, sac tel me gonle me zha nac lo guidzliu rii, gonle me grêtaa mod ne rquiil mendox ne par guncal ne xtol ne. Bzhaac me zigne rziaa- caque ne niina, lëëraasi biabd me lo dol. ¹⁶ Gacxe nagon waa, ine tibliladz golgotsaa gbig ne lo Dios, ndion ne ganle ible squia zdo me ne, ni ible zacnie me ne zeene rquiinpaa ne gon me xyudar ne, sac ne nligaa noxco me ne.

5

¹⁻³ Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grê gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scauegaa riesan me mine guiooglo lo xtol me; sac gon, miech guidzliuque nac me. Ye me rzac zigne rzac grêraa miech, gane rien me rquia zdo me grê zha ne peet rien, grê zha ne mazdraa ngoopdol.

⁴ Ni zha ne sca rac pxoz nroob, led zhald zho rzëeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. ⁵ Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.” ⁶ Ni rëb me: Luu nac pxoz nroob, gdziind dze ne gdzëe luu,

luu gac zig pxoz Melquisedec.

⁷ Zeene bii zo Jesús lo guidzliu rii, tib vuilt mban rac me zig zet me lo guielnë, haxta roon me, nguiedz bnee me bna me lo Dios csilaa Dios me lo guielgut co; scagaa Dios psilaa Dios me, sac tib men ngu- zobdiidz nac me. ⁸ Niicle ne Xpëed Dios nac me, per tib men ngu- zobdiidz goc me, maase mincopaa pquiaqui nroob guielnë ne bded me. ⁹ Ni ne sca bin me diidz been me grêse mine bnabey Dios me, gacxe waa grêse miech ne gban zigne nac xtiidz me, me gdeed tib guielmban ne gdziindraa dze lozh lo zho; ¹⁰ ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen

¹¹ Racladz naa gneraa naa lo to nu pe run zhipxoz nroob ne, zha nac me, per ne squi rac to peet

nède to yquiaadiag to, ngañ gne naa lo to zha naca. ¹² Lo lal dze ne psilo rnaló to Jesús, haxta none tole cseed miech niina, per na goñ leñ rquiin to dien cho gbiire csilo cseed to stib. Rac mëdyeeñ to i goñ, laa ne gow to ncuaañe row zha brooble leñ racladz to tibaque nidz guié to. ¹³ Sac goñ, mëdyeeñ rie nidz, ni rienñ win dien pe nac ncuaañe ntseeb, pegaa nac ncuaañe wen. ¹⁴ Sangue grêloraa guiéwagw, miñ co rquiin grê zha gol, ni zha co niinile zho, rienñ zho pe nac ncuaañe wen, pegaa nac ncuaañe ntseeb.

6

¹ Gacxe waa, none tsoxco to gac to tib zha gol. Guñde to ne miñe pseedse to glo zeene psilo bnaló to Jesús, lo miñ co ib grieede to. Laa to pseedle ganle:

zha none csaan to guiéñtseeb gbig to lo Dios,

zha none gnalo to Dios,

² zha cxobnia to guic stib zho, gnab to lo Dios por zha,

zha nac wrobnis,

zha cueban Dios grê mençut,

zha guñ Dios guiéñwxtis ne gloozh grêtaa guiéñtseeb.

³ Grêle miñ rii nan to. Laa niina telne zneedz Dios diidz, laa to cseed miñe noraa gacnan to.

⁴ Sac goñ, no ncuaañe grielod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho goñ zho gol zdoó Dios psilaa me zho, bdeed Espiritu Sant guieñbiini lo zho, ⁵ bienñ zho zha wentaa nac xtiidz me, zha grieele sëëb zho zaatne ziaadyob gdziñ zho (zeene glu Dios grê poder ne rap me), ⁶ ni lozh ga csaan zhow, tsienal zho guiéñtseeb stib; grieeleod nose co guic zho gbiire sëëb zho xnëz Dios. Ni zha ne goñ sca run, rrieequia noquiaa zho Jesús lo cruz ga stib, gbiire gzhidznie miech me. ⁷ Zig nac tib lê liu ne rgaa grêse nisguie ne riab,

zeene rrieequia grê ncuaañe ran zho low, runlay Diosa; ⁸ laa telne niapse yag guiets, niapse grê guizh guiets rroob low, paat rquiinda; ib tedsod rdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

⁹ Bets, bzian, laa naa rne miñ rii lo to, per guiabde to togo miñe run to rzet naa. Tel to, rienñ naa briele to lo grê guiéñtseeb, lole Dios ngab to niina. ¹⁰ Nanle to ganle, Diossi ncuaañe rieguiäl tib tib miech, miñ co rdeed me lo zho. Grêtaa ncuaañe noyun to niina ne rleynie to me, grê tel zha rquia zdoó to been to xyudar grêraa zha ne no xnëz me, ni noyungaa tow niina; grêsew ible guiaanladz mew.

¹¹ Miñe rzoobladz naa, tibaque squi nguieel gac to, zeena scagaa zgaa to grê ncuaañe nacle diidz gneedz Dios lo to. ¹² Sac dzigosi guieete to, ib gbechde to; masaque laa guic to tsienie ycaania to grêtaa miñe bneele me gneedz me lo ne; zigne been grê zha ne nlijaa bnaló me.

Miñe rnee Dios run mew

¹³⁻¹⁴ Golsoladz ganle, zeene psan Dios xtiidz me lo Abraham been mew zigne bneese mew. Lëë hor co rëb me laa me gunlay Abraham, ni ndal gun me lo xtii Abraham. Ni lëëque lê me bzeet me, par glu ne ible zun me miñe bnee me. ¹⁵ Scagaa Abraham, tiblrique bliladz me ne laaw gac; lëë gdib pquiambëz me bdziñ dze co.

¹⁶ Zig nac miech, par glu ne zun zho miñe rnee zho, dzigo rzeet zho lê tib men ne mazdraa non lo zho; ni deque sca run zho ga rlu ne gdzëedraa xtiidz zho. ¹⁷ Scagaa Dios, laa me bzeet lê me sac guiëndraa stib men ne mazdraa non lo me. Ga blu me ne ible zun me miñe bnee me ga.

¹⁸ Zeene sca rsan Dios diidz, ni rzeet me lê me, choot grieeleodraa ctsëë miñe rnee me, ni niicle

megaaw nacd me meñ ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psañ me diidz ygaa ne. ¹⁹ Min co nagon, none tiblique gac ne zig tib barcw ne dziits zob lo nis, sac no ncuaane naaza len nis; ndion ne ganle, ible dzin ne len yadoo nroob ne zob Jesús. ²⁰ Laa me bner bdzin me ga nonab me lo Dios por ne. Me nac pxoz nroob niina, ni gdzindraa dze ne gdzëe me; laa me nac zig goc pxoz Melquisedec.

7

Pxoz nroob ne lë Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Gololadz ganle, zeene znu wbirele Abraham güeyguncxoon me zha ne no grë guiedz ne rlëe lo me, Melquisedec goc pxoz ne güeydzieelo me, beenlay Melquisedec me. ² Dzigo lo grëse ncuaane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, min co nac ne rnee zho me “rey ne run guielwxtis”; ni rneeque zho me “rey ne rcuëez lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiend dil”. ³ Ib raquiete dien cho goc pxoz me, dien cho goc xniaa me, dien cho goc-gaa mengol me; niicle raquiete-gaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdzind dze gdzëe.

⁴ Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuaane bla me ga, lo Melquisedec. ⁵ Nana, telne niac Melquisedec zha xtii Leví guiab ne por min co pcaa

mew, sac zeene laa ley biaad rn-abeya ne grëse zha Israel, tel pe nactaa ncuaane quianie zho run zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho. ⁶ Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuaan co lo me.

b) Me beenlay Abraham; ni laa Abraham biaaniele diidz pe nac mine gdeed Dios lo Abraham. ⁷ Ni ndion ne ganle men nroob nac zha ne runlay.

⁸ c) Grë pxoz ne sca rcaania gon co, rdzin dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

⁹ d) Rriequia ye grë pxoz ne briequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me. ¹⁰ Sac niicle ne gard gal Leví hor co, per racle Leví cuent ga, sac xpëedaque Abraham goc Leví.

¹¹ e) Grë pxoz ne briequia lo xtii Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

¹² Zeene sca ptsëe Dios lo dii ne ziaad pxoz, hor co nacne bdzëeque grë xley pxoz. ¹³⁻¹⁴ Ndion ne ganle, Jesús men ne nac pxoz cub niina, lo xtii Judä briequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. ¹⁵ Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec, ¹⁶ nacd mew porne ziaad me lo xtii Leví, sinque porne nac me tib men ne gdzind dze lozh xquielmban. ¹⁷ Zigne raquietaque me, zaatne rnee:

Luu nac pxoz nroob, gdzind dze ne gdzëe luu,

luu gac zig pxoz Melquisedec.

¹⁸ Gataa laa grē xley pxoz biaan tib lad, sac grēse minē rnabey pxoz hor co ruṇ miech, paat pquinda. ¹⁹ Ni lalnu brieelod nsaṇwena miech lo Dios; saṅgue niina, mazdraa wen zio ne, sac ndionṇpaa ne Jesús nac meṇ ne csaṇwen ne lo Dios, sac me nac meṇ nroob ne rnalō ne.

²⁰ Dioszhal rēb Jesús gac tib pxoz ne gdziṇd dze gdzēē, ni haxta bzeet me lē me parne glu ne ctsēēd me xtiidz me; ²¹ laa grēraa pxoz ne ziezo, ib beēnd me ne sca nzeet me lē me. Sac goṇ, lose Jesús znu rēb me:

Luu nac pxoz nroob, gdziṇd dze ne gdzēē luu,

luu gac pxoz nroob zig Melquisedec. Naa rnew, ni naasi ctsēēd naa xtidz naa.

²² Miṇcocxe waa ndion ne, diidz ne biaanṇie Dios miech ga gdziṇd dze ne gdzēēw; sac goṇ, por Jesús laaw noyac. ²³ Glo, ndaldoo zha ne goc pxoz, sac grēse zho miech nac zho, rdziṇ dze ne laa zho ret, zeēne laa tib zho ret laa stib zho rzo. ²⁴ Saṅgue Jesús, led yed me grieē par diēṇ cho stib so, sac mesi gdziṇd dze ne guet me. ²⁵ Gacxe waa, grēse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lēē blaale zho ga. Tibaque laa me gnab lo Dios por zha, sac gdziṇd dze ne guet me.

²⁶ Jesús nac tib meṇ ne nlipaa mbe, ni tib dol rapd me, ib rdziguiend me guielntseeb; gacxe waa, beēṇnon Dios me, ni lēēpaa pxoz nroob co nagoṇ rquiin ne.

²⁷ Led yed me nac zigne goc grēraa pxoz nroob ne bio glo. Grē pxoz co, gzobse dze rut zho ma ne rgogon zho lo Dios, parne csaṇmbe me zho lo xtol zho; ni rutaque zho ma ne riogon lo Dios parne guiaaṇmbe grēraa menṅuiedz; saṅgue Jesús, tibaque vuelt bdeed me gon co, ni mezhal goc gon co. ²⁸ Stiba, glo,

zha ne rgaa rac pxoz nroob zigne rnabey ley, ye zho ruṇctal zho xtol zho; saṅgue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib meṇ mbe nac me, ni gdziṇd dze ne gdzēē me.

8

Jesúsle nac meṇ ne rteed xtiidz ne

¹ Lo grē minē quiane naa nu, minē racladzpaa naa gacnaṇ to nac miṇ rii: Jesús nac zhipxoz nroob ne, ni zaatne zob Dios, meṇ nroob ne rnabey, ga zob me. ² Gbaa no me, ga quiaayun me dziin zaatne nacpaa yadoo, Dios bzaa yadoo co, led yedraa miṇ co bzaa miech.

³ Ndion ne ganle, zha ne rac pxoz nroob, laa zho rzo, zeēna grē ma, grēgaa ncuaaṇe rgogon miech, zha rdeeda lo Dios; scaquegaa Jesús, ye me bdeed me gon lo Dios. ⁴ Tel niaca minē bii no me lo guidzliu niina, grieelod gac me pxoz nroob, sacne nole pxoz nroob ne rdeed grē gon co lo Dios, zigne rnabey ley. ⁵ Grē dziin ne ruṇ grē zha ne rac pxoz nroob lo guidzliu rii, lega nacsew zig zhimlé grē minē rac gbaa; yadoo ne rio zho lo guidzliu riiw, lega nacsew zig zhimlé yadoo ro ne zob gbaa. Goṷsoladz ganle, zeēne laa Moisés gzaa yadoo, rēb Dios lo me: “Zigne goṇ bluse naa lo luu guic gui ga, sca none gzaa luuw.” ⁶ Gacxe waa, tel Jesús meṇ ne nac zhipxoz nroob ne niina, mazdraa non dziin ne quiaayun me; sac goṇ, zeēne pso Dios me gac me pxoz nroob, psan Dios diidz stib zha grielo yгаа ne grē guielnzaac nroob ne gneedz Dios lo ne, ni me guṇctsiṇ ne lo Dios.

⁷ Wenraa nac diidz ne psan Dios ga, sac telne niaca nlēb diidz ne biaan glo ga zeēne rēb me zha guiaaṇwen miech lo me, dzigo nod pe nacne mbiire nsaṇ me stib xtiidz me. ⁸ Ni bzeetlegaa me ne laa me csaṇ stib xtiidz me, sac grē zha

ne biaan¹nie xtiidz me glo, loxaque beenctal zho xtol¹ zho. Min¹ co ga raquiet lo Xtiidz me, zaatne znu rnee:

Rnee men¹ ndzon ne rnabey: Zdzin dze ne gbiire guiaan¹ no didz grē no zha Israel, ni zha Judá.

⁹ Per gacdraaw zig diidz ne biaan no grē no xmen¹gol zho, zeene¹ rrieequia bzheen¹ naa nia grē zha gol co, blee naa zho lo caxtigw ne noded zho Egipt; sac ni laln¹ güeyna¹ld zho diidz ne biaan¹ no ga, nacne niicle naagaaw, psaanladz naa zho.

¹⁰ Zeene¹ gdzin¹ dze co, znu nac diidz ne guiaan¹ no grē no zha Israel:

Grēse xley naa, nis nis gacnan¹ zhow,

zig nac zeene¹ haxta len¹ zdo zho, len¹ guic zho zhobneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquiindraa tso zho gnee zho lo men¹lidz zho, lo men¹ladz zho: “None gunbey luu Dios gon.”

Sac len¹ dze co, grēse zho runbeyle zho naa,

niicle zha ne mazdraa wina, niicle zha ne mazdragaa nona.

¹² Tel¹ pe nactaa xquie¹ntseeb zho, zun¹ naa zhow perdon;

gdzindraa dze csoladz naa grē falt ne been¹ zho lo naa.

¹³ Zeene¹ sca bzeet me ne laa me csa¹ stib xtiidz me, ga rlu ne rquiindraa min¹e biaan¹ glo ga; sac nac grē ncuaa¹n gox rquiindraaw, laaw nole par nitlow.

9

Yadoo ne no gbaa

¹ Zeene¹ glo biaan¹ Dios diidz ga grē me zha Israel, hor co biaan¹ diidz lo zho zha tsiegan¹ zho me, ni

zha tsa¹ yadoo ne gac zaatne tsiegan¹ zho me. ² Dzigo bzaa zho tib yu mantia¹ ne goc yadoo co, grol¹taa len¹ yu co pquiaancaa¹n zho tib lar nroob, goc len¹ yu co chop len¹. Tib len¹a, min¹e riaa¹n nēz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib quietxtil ne naclayle. ³ Laa stib len¹a, min¹e riaa¹n nēz zhits lar co, ga nac zaatne Ndadoo; ⁴ ga rzo tib yag ndiaab niapse or lada, dzigo lo co rec yaal; leen¹ coque zhoob tib guin¹ scaque niapse or ndiaab lada. Len¹ guin¹ co no grop lē quie lag ne pquia¹ ley ne pcaania¹ Moisés, ga no bar ne bzhen¹ Aarón, bar ne bdzib ben ga; leen¹ coque no tib guies win niaa niapse or, len¹ guies co no palal maná, quietxtil ne bguiaa¹n Dios grē mengol co. Lēē guin¹ co biaan¹ par csoladz zho zha nac diidz ne biaan¹nie Dios zho. ⁵ Zhits guin¹ co zoli chop anjl ne bzaa zho, masaque rbebel grop anjl co rtsiig me xiil¹ me rtse me zhits guin¹ co, zaatne rliaa¹l xchen grē ma ne riogon lo Dios, par guiooglo lo xtol¹ menguedz. Par gne naa zha nacraa grē ncuaa¹n co, rneedzraaw diidz nu niina.

⁶ Sca nagon¹ biaa yadoo co, dzigo grē zha ne rac pxoz tibaque rzēēb zho zaatne Nda ga; ga riegun¹ zho dziin ne rnabey ley zho gun zho.

⁷ Laa stib len¹a, zaatne Ndadoo ga, loxaque men¹ ne nacle pxoz nroob rrieelo rzēēb ga, ni tibaque vuel¹t tib len¹ iz rzēēb zho. Zeene¹ rzēēb zho, rienie zho xchen ma ne rgogon zho par guiooglo lo xtol¹ zho, ni guioogloogaa lo grē xtol¹ menguedz, dol¹ ne biend zho been¹ zho. ⁸ Gase na ganle rlu Espiritu Sant lo ne, gacd sēēb grēraa miech zaatne Ndadoo ga, laga bii sca chop len¹ nac yadoo.

⁹ Golgotsaa gwi ne niina na ganle zha naca: Glo, niicle ne scataa riesa¹n zho gon, scataa rut zho ma ne rgogon zho, per brieelod grē ncuaa¹n co nsan¹mbew zdo zho;

10 sac hor co, laa zho güeynal grë ncuaañe laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gacnub diidz ne biaanñie Dios zho ga. 11 Sanguie niina ne laa Jesús biaad, niina ne mele nac pxoz nroob, por me laa miech yгаа grë guielnzaac ne bneele Dios ga. Bdzin dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), 12 zeene bzëeb me, bzëebnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëebnie me zaatne Ndadoo ga; tibaque vult bzëeb me, ni lëe psanmbele me ne lo grëtaa xtol ne ga. 13 Nana, telne scataa pquiin zho xchen ngon yeen, xchen chiv yeen, rio zho rzëeg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios. 14 ¿Pe lel xchen Jesús dzigo? Mazdraa gon nac xchen me, ible sanmbew ne lo grëtaa ncuaañe paat rquiind ne bdziuun ne glo, niinasi zrieelo dziuun ne mine rnabey Dios nguiamban. Sac gon, tel Jesús ni tib dol rapd me, ni Espiritu Sant bloo zdo me bdeed me me goc me tib gon mbe. 15 Gacxe waa, Jesúsle nac men ne gdziinne ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtol miech, zigtaa zha ne biaanñie diidz glo cow, zigtagaa zha ne nobedz me len dze riiw; niinasi grëse zho zrieelo yгаа zho guielmban ne gdzind dze lozh ga, zigne nacle xtiidz me.

16 Gotsaa gwi ne ganle, xtiidz miech, mine rsan zho par dien zha gac grë ncuaañe rap zho zeene laa zho guet, laga bii mban zho grieelod gacnon diidz co; 17 sinque haxta ret zho, dzigo laa

diidz co racnon. 18 Scaque nagon, zeene psan Dios xtiidz me glo, gutgazh ma ne briece ren bzhiee dzigoraa laa diidz co psilo gonco. 19 Golgotsaa csoladz ganle, zeene blozh bnee Moisés lo menguiendz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxiil rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co, 20 ni rëb me lo zho: “Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya.” 21 Blozh ga, blaalaque me ren co gdipse len yadoo, ni blaal mew grëse lad ncuaañe racdziin len yadoo.

22 Sca nagon nac ley co, grëse ncuaañe no guiaanmbe, ib ren rsanmbew; scaque miech, haxta rzhiee xchen ma ne riogon dzigoraa riooglo lo xtol zho. 23 Mincocxe waa, sca pxiee Moisés xchen ma biaanmbe yadoo co ni grë ncuaañe racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëe ren co goc xchen Jesús. 24 Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa. 25 Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vult güeylogon me me. 26 Telne ye me niun zig run grëraa pxoz co, pe zhistaale vult na ziyet me wlal ne bre guidzliu, jper na, led yed me! Zeene laa dze bdzin, laa me biaad, xchenpaa me bzhiee, ni tibaque vult bzhieew psanmbew ne lo dol grëse ne ne nac ne miech.

27 Zigne biaan tibaque vuelt ret miech, lozh ga zeene laa Dios gun guielwxtis, laa zho none gacredz lo me; 28 scaquegaa tibaque vuelt gut Jesús bdiizh me xtol grëse miech; ni zdziñ ne guiaad me stib, per guiaatraa me par biire quizh me xtol miech, sinque laa me guiaadsilaa grë zha ne quiambëzlo me, zeena gand zho grëtaa guielnë ne csiaab Dios.

10

Tibaque vuelt goc Jesús gon

1 Grë miñe rnabey ley run pxoz, lega nacsew zig tib zhimlë grëtaa miñe been Jesús por ne. Horco niicle gzobse iz rienie grë miech co gon zigne rnabey ley, per brieloda nsanmbew zho lo dol. 2 Tel niaca miñe gon cose nsanmbe zho, dzigo tibtaa vuelt ne niesan zhow lëë niaanmbele zho ga; niicle zhagaaw, nienpaa zho ne laa zho mbele. 3 Per na, gzobse iz zeene laa zho riesan gon co rsoladz zho ne bii no zho lo dol, 4 sac gon, grielod ne xchense ngon yeen, xchense chiv yeen guiaanmbe miech lo dol.

5 Miñcocxe waa, zeene laa Jesús biaad lo guidzliu, pe led znu rëb me lo Dios:

Grë xchen ma, grë ncuaane riaadlogon zho lo luu, racladzdraa luuw;

gane bnabey luu goc naa miech, zial naa lo guidzliu.

6 Grë ncuaane rzëeg zho, grë ren ne rxiee zho, par guiaanmbe zho lo dol; racladzdraa luu gan luuw.

7 Gane niina, laa naa zial nu Dios, zeena gun naa miñe gnabeytaa luu; zigne zhobnee lo Xtiidz luu gac naa.

8 Gotsaa gwi ne ganle, blozhse rëb me racladzdraa Dios tso zho pe ncuaane tsielogan zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho);

9 dzigo rëb me: “Dios, laa naa zial nu zeena gun naa miñe gnabeytaa luu.” Gase nagon rlu ptiche me didz ne psan Dios ga glo, laa stib didz cub ne biaanmie Dios miech ga psilo noquuin. 10 Ni nligaa been me miñe bnabey Dios, bdeed me me gut me lo cruz; ne sca nagon been me miñe bnabey Dios, ga psanmbe me ne lo dol. Tibaque vuelt sca goc me gon co, ni lëë psanmbele me ne ga.

11 Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsanmbew miech lo dol; 12 sangue Jesús gon, tibaque vuelt bzhiee xchen me goc me gon psanmbe me miech lo dol. Laa niina, cue Dios nëz derech ga zob me, 13 quiambëz me gdziñ dze zeene grëse zha ne rlëë ran me, laa zho guiaanwin lo me. 14 Tibaque gon ne bdeed me ga, psanmbegazh me grëse zha ne nodziinne me lo Dios. 15-16 Ni nligaa scaw, haxta Espiritu Sant, zeene blozh bzeet me zha rëb Dios guiaanmie me zha Israel diidz stib, zha nis nis gacnan zho xley Dios, zig nac zeene haxta len zdoo zho, haxta len guic zho zhobneew; 17 dzigo bzeet me zeene znu rëb Dios: “Tel pe nactaa xquielntseeb zho, tel pe nactaa xtol zho, gdziñdraa dze ne csoladz naaw.”

18 Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

None gbig ne lo Dios

19 Bets, bzian, glo loxaque men ne nacse pxoz nroob rzëeb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquielnzaac Jesús, bdeed me me bzhiee xchen me psanmbe me ne. 20 Zeene sca gut Jesús, rrieequia

tib nêz cub ga pxal me par gdziñ ne zaatne ygaa ne guiełmban; lëe nêz co ga bzhial zeene sca briez lar ne quia leñ yadoo ga. ²¹ Ni ne me nac zhipxoz nroob ne no me yadoo gbaa, ²² niinasi zacle gdziñ ne haxta lo Dios. Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, beñque laa me psanmbele ne lo grêtaa ncuaañe yozh ne rza zdoo ne, rza guic ne; rrieequia bgaz me ne tib nis mbe. ²³ Tiblique sca golgotsaa gac ne, beñque ndion ne ganle ible zdziñ dze ne gac miñe rliładz ne; sac Dios psan diidz co, ni ndion ne rquidied me.

²⁴ Golgotsaa dzioxcò ne cseedlsa ne gleyñe ne zha ne nacgrê ne, ni dziuun ne ncuaañe yquiiñ lo ne grê ne. ²⁵ Dze ne nacle diidz ycaalsa ne dzioolnie ne Dios, ible none ycaalsa ne grêse ne, guionald ne miñe run grê zha ne rzozit. None cso ne diidz lo grê zha ne nacgrê ne, conley ne zdoo zho dziits so zho lo miñe rliładz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaa guñctal zho xtol zho, tsodraa gon ne csañmbe zho lo dol co; ²⁷ lëetaa miñe tsieguial zho nac guiełnêdox ne ygaa zho zeene laa Dios guñ guiełwxtis; dze co laa me cxeel zho lo guidox, zaatne nitlo grêraa zha ntseeb ne gocndaan lo me. ²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguiits miñe rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho. ²⁹ Nana, çpe lelgue zha ne dzigo quiits miñe rnabey Jesús? Mazdraa gon nac guiełnê ne ygaa zho, sac noguitnie zho xchen Jesús ga, rzhidznie zho Espiritu Sant ga sca guñ zho. Noguitnie zho ren co, ni lëew bzhiee biaanmbe zho lo dol,

lëew bzhiee zeene psan Dios stib xtiidz me zha gbig miech lo me; rzhidznie zho Espiritu Sant, ni meñ co no zhixco zho. ³⁰ Zha ne sca guñ, ible nroob guiełnê ne ygaa zho; sac ndion ne ganle zha nac xDios ne, me znu rnee: “Naa raguial guñ guiełwxtis; naa gded miñe rieguial tib tib miech.” Ni zhobneeque lo Xtiidz me: “Grêse miech, lo me cueero zho grê ncuaañe been zho.” ³¹ Ne nligaa ncuaañe gdzieb ne ted grê zha ntseeb ne sca guiab ladznia Dios, meñ nguiamban!

³² Sangue to, golşoladz ganle zha bded to zeene griinpaas psilo bnalo to Jesús, niicle ne scataa nroob guiełnê ne gon to, per beenctalde to xtol to. ³³ Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrê to. ³⁴ Grê zha ne biab ladzguib, mbanse rac zdoo to ran to zha rac zho; niicle zeene biaad zha ne biaadla grê ncuaañe nacchen to, psaan to ptiche zhow, peet güeyniedaque guic to; sac nanle to mazdraa nac guiełnzaac ne ygaa to gbaa, ni mincosi gdziñd dze ne nitlow. ³⁵ Nana sca, scaque dziits golşo; sac telne tibaque gnalo to Dios, ible zgaa to guiełnzaac ne gneedz me. ³⁶ Ible guiaand zdoo to, tibaque dziits golşo golgun miñe rnabey me; zeena ygaa to grê ncuaañe bneelee me gneedz me lo to. ³⁷ Golşoladz ganle, znu zhobnee lo Xtiidz me:

Ible ile ziaad meñ ne nacle diidz
guiaad ga, led nroobdraaw,
laa me glansole.

³⁸ Grê zha ne zienal miñe nac diidzli, ible zban zho sac rnalo zho naa;

laa telne guiaan zdoo zho sozit zho lo naa, ni lalnu gleyñied naa zho.

³⁹ Sangue ne gon, nozozite ne lo Dios, sinque dib zdoo ne rnalo ne me. Grê zha ne sca rzozit lo me, nêz ne nitlo zho ga zie zho; laa

ne gon, ible zgaa ne tib guielmban ne gdziñd dze lozh, sacne znu dib zdoo ne rnalo ne me.

11

Zhapaac nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zgaa zho miñe quiambêz zho gdeed me lo zho; niicle ncuaane gard gañ zhow, per rzac zho zig nac zeene ranle zhow. ² Zig nac grê xmenğol ne, ne scacxe waa bnalo zho Dios gane bleynie me zho.

³ Scagaa niina, ne dib zdoo ne rnalo ne Dios, gane rliładz ne me bzaa guidzliu ni grêragaa ncuaane no, zeene bnabey me biaaw, niicle ne peet guieñd hor co.

⁴ Gotsaa gwi ne ganle lëe bla zhagol ne dib zdoo bnalo Dios nu:

Zig nac Abel, ne dib zdoo me bnalo me Dios, gane bleynie Dios gon ne bdeed me, lëdle gon ne bdeed bets me Caín. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnalo me Dios.

⁵ Scaque Enoc, ne dib zdoo me bnalo me Dios, gane gute me, zomban me zeynie Dios me gbaa, choot gonđraa me. Zeene bii zomban me lo guidzliu, blu Dios ne rdziladz Dios zha mban me. ⁶ Sac zha ne rnalod Dios dib zdoo, grieelod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

⁷ Zig nac Noé, ne dib zdoo me bnalo me Dios, gane bliladz me xti-idz Dios zeene rëb Dios lo me pe nac ncuaane ziaadyob gac; bin me diidz bzaa me tib barcw nroob, ni len barcw co bio me gza xpëed me

ni tsieel me, blaa zho lo guielñe co. Ni ne sca bnalo me Dios, gane ible zgaa me grê miñe gdeed Dios lo grê zha ne biaanmbele lo Dios; laa grê zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoo me bnalo me Dios, gane zeene bredz Dios me ycaania me zaatne gdeed Dios lo me, binga me diidz brieer me zie me, niicle ne nanđ me zha nac dan co. ⁹ Ni ne sca rnalo me Dios, gane niicle bdziñ me lo liu co, laa me wbanse ga zig tib menzit. Lega nacse len grê yu mantiad bio me grop me Isaac, scaque-gaa Jacob; sac ye grop zha co biaan diidz nacchen liu co. ¹⁰ Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

¹¹ Scaque Sar, wnaa ne goc tsieel Abraham, ne dib zdoo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo me bliladz me ible zun Dios miñe bnee me ga. ¹² Ye Abraham, menğol-le me, men ne yquianiedraa mëed nac me, ni zeene laa Sar gop mëed co, miech guizhiu ne brieequia lo dii co; pale mel ne ndziib gbaa, yuzh ne ndxie-gaa ro nisdo.

¹³ Gza zha ne blozh goquiet nu, gardaque yгаа zho grê miñe bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalo zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacse zho zig tib menzit. ¹⁴ Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. ¹⁵ Sac telne niend zho ne scaw, znuse mbire zho ney zho zaatne brieer zho ga. ¹⁶ Tibaque laa guic zho güeynie ne ib zdziñ zho

zaatne gacpaa ladz zho gbaa; gacxe waa, rtoladz Dios ne nac me Dios ne riladz zho, laa me bzhixcuaale guiedz ne gac ladz zho ga.

¹⁷ Zeene been Dios Abraham prueb dien pe nli rnalo Abraham me, rëb me cogon Abraham xpëed Abraham Isaac; ne dib zdo Abraham rnalo me Dios gane niicle tibaque mëed ga lo me, per bleeladz me mëed co, laa me niutle win niac win gon. ¹⁸ Ni laa xtiidz Dios nac ne win guñctal lo xti me! ¹⁹ Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rriequia gut win ga ni biire brieaban win stib.

²⁰ Niiclegaa Isaac, ne dib zdo me bnalo me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

²¹ Scaque Jacob, ne dib zdo me bnalo me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²² Scaque José, ne dib zdo me bnalo me Dios, gane zeene laa me merle guet bzeet me ne ib zdzin dze griee zha Israel Egipt; haxta psan me diidz güey zho xtsit me zeene laa zho griee ga.

²³ Zig nac pxoz Moisés, xniaa Moisés, ne dib zdo me bnalo me Dios, gane bloolan me mëed niow yeen co lidz me tson mëe; ib bdziebd me mine bnabey rey Egipt.

²⁴ Niiclegaa Moisés, ne dib zdo me bnalo me Dios, gane zeene laa me broob bdeetraa me diidz niunbey zho me zig xpëedmiag rey; ²⁵ laa ne niaan me lidz rey nleynie me grë ncuane niunctal xtol me, mazd bleeladz me me psaci zho me grë menladz me. ²⁶ Bien me ne nonguieraaw ted me guielné zig pteed zho Jesús, lëdle niaanne me

grë ncuane non ne no Egipt; sacne mine mazdraa nonie guic me nac guielnzaac ne gdeed Dios lo me.

²⁷ Ne sca rnalo me Dios, gane bdziebd me xquieldox rey, tiblque been me guic me brie me Egipt; sac nanpaa me niicle rand me Dios, per Dios nacnie me. ²⁸ Ne scaque rnalo me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

²⁹ Grë zha Israel co, ne dib zdo zho bnalo zho Dios gane wbiig lo Nisdoo Nizhnie, bzhial tib nëz mbidz bded zho; laa zeene go-cladz grë xmenguib rey Egipt nded zho, znuse bdzieel lo nisdoo co stib, grëse zho gut. ³⁰ Ne scaque dib zdo zho bnalo zho Dios, gane bliaal biedz nroob ne ndze igo guiedz Jericó, zeene bza gadz ng-bidz noyecw zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdo me bnalo me Dios, gane peet godc me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole px-eel zha Israel güey wleets ga.

³² Ni noragaa zha ne sca dib zdo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne bjadteed xtiidz Dios lo miech. ³³ Ne sca dib zdo zho bnalo zho Dios, no zho beenchen grë guiedz nroob, no zho bnabey grë guiedz zigne nonguieła, no zho gonlo grë mine bzeet Dios gdeed me lo zho, no zho role meedz bdedlaa zho; ³⁴ no zho lo beldox bio zho ni peet godc zho, no zho lo spadle bdedlaa zho, no zho gzhe gzhele rac zho per bdaan zho; no zho biablole lo dil ni biire pcaa zho fuerz stib, haxta benxoon zho zha zit ne nodiline zho. ³⁵ Grë

men wnaa, no zho gonlo brieaban menlidz zho.

Nzian grē zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieaban.

³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; ³⁷ no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nēzrii nēzrec zie zho, mbanse rac zho guieñd pe gow zho, guieñd xab zho, tib lēse guid mēcwxii, tib lēse guid chiv nriēl zho. ³⁸ Miech wen nac zho, ni rieguiald grē miech guidzliu rii guiaadban zha co lo zho, per scataa bded zho. Niapse grē dan bidz, grē dan gui, bio zho; zaatne blēz zho grē len blē, zaatne blēz zho grē len bliee.

³⁹ Ni golgacnan ganle, niicle nli bianzuiuu zho lo Dios ne sca dib zdoō zho bnalo zho me, per gardaque ygaa zho guieñzaac ne psan me diidz ga ygaa zho; ⁴⁰ sacne laa Dios racladz tipse ygaanie ne zho guieñzaac ne psanle me diidz gneedz me lo ne niina, sac min co nac mine mazdraa nroob.

12

Choot gbiched lo Jesús

¹ Nziandox grē zha ne sca dib zdoō bnalo Dios. Ni niina, grēse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grē ncuaane runctal xtol ne, zeena ycadraaw parne grieelo tiblīque dzio ne nēz gdziñ ne zaatne no gdziñ ne. ² Tibaque golgotsaa guionie guic ne laa ne gdziñ lo Jesús ga, men ne zo lo ne grēse ne ne rnalo ne Dios, ni

me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guieñbley ne gan me zeene lozh ga. Ncuaaane mbeeguielto ga zeene sca quia me lo cruz, per ptoładz me.

Ni nligaa, zig nac niina cue Dios nēz derech ga zob me gbaa.

³ Golguien sca, zeene racmban zdoō to, zeene racladz guiaan zdoō to, ib gdeete to diidz; golsoladz ganle, zha pxcw Jesús bded me grētaa mine pteed grē miech ngoopdol co me. ⁴ Parga nli, nē noded to noxco to gunctalde to xtol to, per gard guiab ne ygaa to ne gut miech to. ⁵ Golsoladz ganle zha rnee Dios lo grē zha ne nac xpēēd me. Znu raquiet lo Xtiidz me, zaatne rnee:

Xin, zeene rso Dios diidz lo luu guñdraa luu grē ncuaane nonguield, none sac zdoō luuw;
niicle zeene gactoxgaa me lo luu, gacmband luu.

⁶ Sac gon zha ne sca rso me diidz lo, ga rlu ne rleynie me zho;
zha ne ractoxgaa me lo, ga rlu ne nli xpēēd me nac zho.

⁷ Golguien sca, gacbande to tel pe caxtigw ne cteed Dios to. Golgan ganle, niicxe miech na, ractox zho lo xpēēd zho zeene rond win diidz. ⁸ Nana, tel ib peet glisquidgaa me lo to, gase dzigo rlu ne led xpēēte me nac to; sac gon, zha ne nac xpēēd me me, rlisqui me zeene rond zho xtiidz me. ⁹ Golsoladz ganle, zeene rac ne mēēdlas rlisqui pxoz ne zeene rdziuuñ ne ncuaane nonguield; scagaa ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena ygaa ne guieñmban. ¹⁰ Gotsaa gwi ne ganle, zig nac pxoz ne, rquia me rlisqui me zeene rdziuuñ ne ncuaane nonguield, sac

racladz me zaacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoo, zig me; ni lëe min co nonraa. ¹¹ Parga nli, tsod zha ne gley zeene noded zho caxtigw, sinque në rzac zhow; per zeene rded ga, zha ne rienpaa rquiina haxta wen riaan zdoo zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golgun ndip nia to, golgun ndip ni to stib, ¹³ zaacse golsë, tib nëz goltso zeena gziaabnëzde to; dzigo scagaa zrieelo gacnie to zha ne lega noyobe.

¹⁴ Goltsoxco niowse golbannie samiech to, ib gunctalde to xtol to; sac zha ne mbed zdoo, grielod gdziñ zho lo Dios. ¹⁵ Tibaque golteedlolsa zha ne nacgrë to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa mine nac zho rzhoooben, nzian zdoo zha ne rsañ zho, rlozh ga grëse zha co runcat xtol. ¹⁶ Ib gunde to grë ncuaane tsod zdoo Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mëédglo; ¹⁷ ni nanwen to ganle, zeene laa me gocladz nab pxoz me niunlay Dios me zig mëédglo, brieelodraaw. Dzigoraa rquia zdoo me, haxta roon me rnab me yгаа me guielnzaac co stib, per pe xtsiinraaw.

¹⁸ ¡Golguien sca ganle, nroob nac guielnzaac ne bneedz Dios lo to nina! Led yede to ndziñ pa tib cho gui, zig bdziñ xmengol to cho Gui Sinaí padzeela. Grë xmengol to, zeene ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rree me; ¹⁹ ni lala nguiedz rcuedz trompet, ni nguiedz zëeb

tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me. ²⁰ Bdzieb zho bin zho rëb me, zha ne tsep cho gui co none gdeedquie zho zho, gliz lanz-gaa zho zho haxta guet zho; scaque grë ma. ²¹ Ncuaane gdziebdoo ne gon zho ga; haxta Moisés rzhidz lo dzeb co.

²² Sangue to, rrieequia haxta Jerusalén, zaatne no Dios nguiamban gbaa bdziñ to, zaatne ndxie grë anj guizhiu ne roolnie Dios; ²³ zaatne ndxie grë zha ne glopaa bzëeb xnëz me, grë zha ne zhooble lë gbaa ga. Laa to bdziñle lo Dios, men ne run guielwxtis; zaatne ndxie grë zha ne psanmbe Dios biaan zho zig tib zha ne peet xtold. ²⁴ Laa to bdziñle lo Jesús, men ne rdzinnie miech lo Dios niina ne laa Dios psan stib xtiidz me; laa to bdziñle zaatne rrieequia bliaal xchen Jesús len yadoo gbaa, lëe ren co mazdraa non lëdle xchen Abel.

²⁵ Min co nagon, golguien golgun mine rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe lel na dzigo ne mezhal quianee lo ne? Ib diedlaad ne gon telne dziond ne mine rnabey me. ²⁶ Zeene bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.” ²⁷ Gase na ganle rlu, lo grëse ncuaane bzaa me zdziñ ne laa me csiniw, dzigo laaw nitlo; lozh ga, guiaan mine gdzindraa dze nitlo; ²⁸ ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me. ²⁹ Golguien ganle, tel me ne nac me Dios ne rliidz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie grë zha ne nacgrë to, golguien ganle tibaque men ne nac Pxoz to. ² Goldeed zatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanjl Dios blëz lidz zho. ³ Golt siegan grë zha ne niogyu ladzguiib, goltso xliaadz zho zig nac zeene ye to no-grë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guielnë.

⁴ To ne nac to zha ne ptsieel-niale, sacde to guieltsieel zig beelze pe wguit, ib yquidiede to tsieel to; sac zha ne yquiangob tib zha ne nonguield tsonie zho o yquiangob-gaa zho tib zha ne nole tsieel, ib tedsod zunquizh Dios zho dol co.

⁵ Tsenalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: "Tibaque gacnie naa to, ib csaand naa to." ⁶ Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacie naa, ðpe nac nadien gdzieeb naa?
jPeet grielod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdo to golnalo Dios zigne bnalo me Dios.

⁸ Golguien ganle, gdzind dze ne gdzëë Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa. ⁹ Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo mine rliladz ne; nacda por tsienal to dien pe gow to, pegaa gowde to; sac zha ne zienal min co, paat yquiinda lo zho.

¹⁰ Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rriequia no tib lo pcoog, ni

nese zrieelo yquiin gon ne ndziib lo co; laa grë pxoz ne zienal mine rnabey ley, grielod yquiin zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menquiedz, dzigo rienie zho xcuerp ma ro guiedz, ga rzëëg zhow. ¹² Scaque Jesús, zeene bzhiee xchen me psanmbe me miech lo dol; ro guiedz ga güeysacsi zho me gut me. ¹³ Scagaa ne niina, golgotsaa griee ne lo grë ncuaane lo guidzliu rii, golgotsaa cueeladz ne ne guional ne zhits Jesús dzian ne grë guielnë, telne no dzian new. ¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional yгаа ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëë min co gac zig tib gon ne gdeed ne lo me. ¹⁶ Goltsoxco golgun grë ncuaane yquiin lo samiech to, ncuaane rgaa lo to, goldeed palala lo grë zha ne guiend pe yquiin; sac rriequia lëë stib gon ga gdeed to lo Dios, ni mincogaa rleynie me.

¹⁷ Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielnë to zho, lëda ga gun to.

¹⁸ Golnab lo Dios gacnien me no tibaque znu dzioxco no dziuun no mine racladz me, me nan ganle mbe zdo no, mbe xquielrien no. ¹⁹ Ni mine rsopaa naa diidz lo to, golsoladz golnab lo Dios gneedz me diidz gbiere guialniob naa i, guialgan naa to.

²⁰ Jesús nac men ne quianappaa ne, zig rquianap baxtor xpëcwxiil zho; me gut bzhiee xchen me zeene psan Dios diidz stib zha gdziñ miech lo me; ni diidz cosi gdziñdraa dze ne gdzëew.

Dios men ne bleeban Jesús, men ne racnieñ miech peet zhgab rt-sebd zho, ²¹ me gneedz guiełbiini lo to grieelo to guñ to miñe rnabey me. Jesús sca gołnalo, zeena grieelo gban to zigne rdziladz Dios. Dios nac men ne rieguiał dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

²² Bets, bzian, laa naa rnab lo to ib glëed guic to, gołcaania palalse diidz ne pso naa lo to nu.

²³ Racladz naa gacnan to ganle, laa bets ne Timoté brielee ladzguiib; telne zlansonioob me lo naa nu, grop no me guiaad lo to i.

²⁴ Gołsiguieł gołdeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

²⁵ Guiaaanne Dios to sca. Me glu ganle pa lotaa noxco me to.

GUTS NE PQUIAA SANTIAGW

¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtií Israel, tel pa lotaa nac guidzliu ne no to.

² Bets, bzian, ndal ncuane rded ne parne glu dien pe nli dib zdoo ne rnalo ne Dios. Tel pe nactaa ncuane noded to i, ib gacmbande to, sinque golley. ³ Sac gon, zeene squi ran ne grë pe guielnë, ga rseed ne tibliladz rac ne tel petaa noded ne. ⁴ Golseed sca tibliladz golgac. ¡ib guiaand zdoo to tel petaa nac guielnë ne gan to! Sac zeene sca cseed to gan to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

⁵ Zha ne racladz yгаа guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdzind dze yгаа zho mine rnab zho. Nac zho, tib dze dib zdoo zho rliladz zho zгаа zho mine rnab zho, stibгаа dze na rliladz-draa zhow, ib ractiblid guic zho; masaque nac zho zig nac grë mt-siin ne rbib lo nisdoo, sac tel mt-siin co loxaque nëzrii nëzrec zienie mew.

⁹ No zha bets ne, zha bzian ne, quianied zho ncuane yquiin zho, par miech peet nond zho; per none gon ine gley zho sac nroob non zho lo Dios. ¹⁰⁻¹¹ Scagaa zha ne rapchen, none ine gley zho niina ne biaanwin zho, sac nëz lo Dios grë ncuane rap zho nonda. None

guien zho niicle ne nroob rapchen zho, zeene laa zho gbi lo guidzliu rii nuque guiaan grë ncuane rap zho. Masaque nacse zho zig nac guieen grë guizh ye, tel guiee cow, zhixtsëëse ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

¹² Dichos zha ne ib rrozite lo Dios niicle no nzian ncuane rcheep zho gunctal zho xtol zho, per rund zhow; sac zha cosi zгаа zho tib guielmban ne gdzind dze lozh, guielmban ne bneele Dios gdeed me lo grëse zha ne rleynie me. ¹³ Zeene sca no ncuane rcheep ne gunctal ne xtol ne, guiabd ne togo Dios noquuil ne gun new; sac gon led yed Dios rzoobladz ncuane ndzinlid, ni niicle rquiidgaa me miech gun zhow. ¹⁴⁻¹⁵ Grë ncuane ndzinlid ne rzoobladz ne, grë ncuane yozh ne rionie guic ne, min co nac mine rquuil ne. Lëëw nac mine rcheep ne runctal ne xtol ne, ni ndionle ne ganle, lëë gdib mine gdeed dol lo miech nac guielnëdoh ne yгаа zho.

¹⁶ Bets, bzian, gac-wete to sca. ¹⁷ Golguien ganle, ncuane rquiin, ncuane ndzinli, min co nac mine rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdzind dze guiuu, ni tib lë guielcow guieend zaatne no me. ¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëëdglo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëële. ²⁰ Sac gon, zeene rlëë ne, grielod gun ne ncuane rdziladz Dios. ²¹ Golguien

sca, golsaan grëtaa ncuaane ndzinlid ne ziyun to, golbiche lo grë guieIntseeb ne znutaa quiaay niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

²² Per guiabde to togo loxaque yquiaadiagse to Xtiidz Dios lëëlew ga; sinque ib none gban to mine rquiaadiag to, sac tel ib gbande tow lëëque to noquidie to ga. ²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: ²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵ Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid zienal zho mine rnabey Dios.

²⁷ Sac gon, par Dios men ne nac Pxoz ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsieel, ni tsoxco zho zaace gban zho, ib tsienald zho ncuaane ndzinlid ne run grëraa miech.

2

Lëda ga run zha ne rbe

¹ Bets, bzian, gunde to ne ncueese lo miech ne gnee to, sac zha ne sca run, zha dien guiab zho xnëz Jesús no zho. ²⁻³ Ron naa, zeene rlanso tib zha ricw zaatne rcaalsa to i, nacw zho xab niash zho, no grë nnil or zho nia zho, lëëléd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Íse bzo, telne racladzgaaluu sob luu, lo liuse i bzob.” ⁴ ¿Pe sca na rac zha ne no xnëz Jesús? Zha ne gon sca

run, ga rlu zho niapse guieIntseeb no guic zho.

⁵ Lëda ga gon bets, lëda ga gon bzian. Golgacnan ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena ygaa zho zaatne bneelee me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; ⁶ laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riego zho to lo wxtis; ⁷ haxta rdzibdee zho Jesús, men ndzon ne nacnie to niina.

⁸ Ib none gban ne zigne rnabey Xley Dios, lo xley me zhonee: “Bleynie samiech luu, zigne rleynie luu luu.” ⁹ Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaguits to. ¹⁰ Golgacnan ganle, zha ne rguiits tibaque xley Dios, nicie maase zienal zho grëraaw, laa zho beenctal-le xtol zho ga, rza- caque zho zig zha ne noguiits grëw. ¹¹ Sac tibaque men ne psana grësew. Gacxe waa, tel zha ne zienal mine rnee: “Gute luu samiech luu”, per rguiits zho mine rnee: “Yquian- gobjd luu zha ne led tsieeld luu”, laa zho beenctal-le xtol zho ga. ¹² Niowse sca golgac, niicle zeene gneegaa tow, niowse golnee; sac gon, zdziñ dze cxobdol ne dien pe wban ne zigne rnabey Jesús, te wband new ye. ¹³ Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guieInëdox ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Niacxe scase laa Dios csilaale ne? ¹⁵ Zooob

ne no zha ne nacgrë to i, yase tib bets tow, tib bziangaa tow, ranlo to guiend xab zho, niicle quianied zho ncuaañe gow zho; ¹⁶ ni guiab to lo zho: “Csacsid luu luu, got xabnal luu, dow ncuaañe racladz luu”, per loxaque diidz sca guiab to, ni gdeete to ncuaañe run falt lo zho. ¿Pa dien yquiin diidz co? ¹⁷ Scadaa nagon paat rquiinda guiab ne rnalo ne Dios, ni tel rund ne miñe rieguial ne gun ne. ¹⁸ Gacxe waa, zha ne rnalo Dios ni run zho miñe rieguial zho, no zho gnë lëda i run zha ne rnee lëëlew ga totsaque gnalo ne Dios. Ni rap zho rson, sac grielod glu ne rnalo ne me, telne rund ne miñe rieguial ne.

¹⁹ Nli wena run zha ne riladz tibaque Dios no, per grielod guiab zho lëëlew ga, sac gon zig nac mendox ye ma riladz tibaque Dios no, per led por mincod laa ma lo guielnë ne cxeel me, sinque haxta rdzieb ma me. ²⁰ Nadzpa nxen zha ne sca rzac, pe ni lalnu riend zho paat rquiinda guiab zho riladz zho Dios ni telne rund zho miñe rieguial zho. ²¹ Golgan ganle, zig nac pxozgol ne Abraham, porne been me miñe rieguial me gane pcaania Dios me zig tib zha ne peet xtol. Led rsoladz to ganle, zeene reb Dios lo me tsielogon me xpëed me, güey me zaatne pxeel Dios me. ²² Gotsaa gwi ne ganle, zeene been Abraham miñe bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³ Lo Xtiidz Dios zhubnee ne scataa dib zdoo Abraham bnalo me Dios, gane pcaania Dios me zig tib zha ne peet xtol; zëeb diidz, tib zha ndzieeldiiz Dios goc me.

²⁴ Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli riladz zho me, gun zho miñe rnabey me zho. ²⁵ Golsoladz ganle, scaque wnaa ro nëz ne brieelë Rahab, por been me xyudar samiech

me, gane pcaania Dios me zig tib zha ne peet xtol; sac zeene gon me noxtseeb zha ne pxeel Josue zie wleets ga, bdeed me zaatne biolan zho, ni blu me stib nëz ne wbire zho, bgaad zho. ²⁶ Gase na ganle rlu, paat rquiinda guiab ne riladz ne Dios ni tel rund ne miñe rieguial ne, nacse ne dzigo zig tib xcuerp ngutoo, tel cuerp cow, ¿pa dien yquina?

3

Ncuaañe run ludz miech

¹ Bets, bzian, guiabde to lega tso to glisqui to ncuaañe run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaañe tsasqui lo zho gal dze ne laa zho gacredz lo Dios.

² Grëse ne nzian mod ne rxin ne lo samiech ne. Tel niaca miñe no tib zha ne grielo ycuëez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³ Gotsaa gwi ne ganle zig nac guay, con tib lë win guib ne rgo miech ro ma rrieelo rnabey zho ma, rienie zho ma nëz ne racladztaa zho. ⁴ Scaque barcw, niicle ne nrooba, no hor rriee medox lo nis rcheepa, per con tib lë yag lag win ne rsëe miecha, rrieelo rienie zhow nëz ne racladztaa zho. ⁵ Scapaa nagon nac ludz ne; niicle ne winsew, per nroob guielqui ne runa. ¡Ran to ganle tib bzhil yeense name rzobgui dan! ⁶ Ni tel ludz ne gon, rrieequia tib bel ga naca. Tib lë win xcuerp ne naca, per guielqui nroob ne runa, runctala xtol miech. Gun ne cuent tib lë gui ne brieegabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grë ma ne rsiibe, grë ma ne rzëlen liu, haxta grë ma ntseeb, haxta grë ma ne no

nisdoo, rnabey zho ma. ⁸ Per guieṅd zha ne goṅ grielo gnabey ludz; ncuaane ntseeb naca, choot grielod gnabeya; masaque laaw no par gnitlow miech, zigne run grē guizh ncuaan. ⁹ Lëew name rquiin ne roolnie ne Dios meṅ ne nac Pxoz ne, ni rlozh ga lëëquew rdzibdee ne samiech ne, ni lalnu riend ne me bzaa zho, biaan zho zigne rlu me. ¹⁰ ¿Pe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzan, led scada goṅ. Zig nacse tib zhlian, ¿niacxe zaatne rlanaque nis nex gaque rlan nis yuzed? ¹² Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd miṅ co.

Zha ne nixbiini

¹³ Lo grē zha ne nacgrē to i, tel no zha ne rzac zha nixbiini nac zho, none glu zhow ine zaacse gbanne zho samiech zho, gac zho tib miech ndooladz zig none gac tib zha nixbiini. ¹⁴ Per tel tibaque nē rac zdoo zho ran zho zha ne stib noded, tibaque noguib zho csaṅwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csaṅzuiuu zho zho. ¹⁵ Led scad nac guieḷbiini ne rdeed Dios, sinque lëë zhiwseed meṅdox ga, lëë miṅ co zianaḷ grēraa miech guidzliu. ¹⁶ Zeene sca nē rac zdoo miech ran zho cho stib noded, zeene sca tibaque no zho dieṅ zha guianglaa zho lo samiech zho, loxaque dil, loxaque grē guieḷntseeb rzobni zho ga. ¹⁷ Zha ne nli rap guieḷbiini ne rdeed Dios, runḍ zho miṅ co, laa zho zianaḷ:

ndzinlise gban zho,
rleynied zho dil,
rguib zho zaacse rnee zho lo miech,
wen rac zho lo grēse miech,
rquia zdoo zho samiech zho,
runḍ zho cue zho zha ne mazdraa gacnie zho,

ncuaane run zho dib zdoo zho run zhow,

niapse ncuaane ndzinli rioxco zho. ¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdziṅ dze ne ran zho zeene laa grē miech co rac tib miech wen.

4

Zha ne rleynie guieḷntseeb

¹ Ne squi tibaque rlëëlsa to, tibaque quiadil to, lëë miṅ qui goṅ riegat por grē guieḷntseeb ne rio guic to. ² Rio to riogui to ncuaane grielod yquianie to, rlozh ga, haxta rut to samiech to parne yquianie tow. Nē rac zdoo to ran to cho zha quianie ncuaane quianiede to, zeene ran to rriyelod yquianie tow laa to rlëënie zho, haxta rdilnie to zho. Rriyelod yquianie to ncuaane racladz to, sacne rnabde tow lo Dios. ³ Niicle tel rnabгаа tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴ ¿Que tal ntseeb to! ¿Pe ib riende to, Dios goṅ rlëënie to zeene squi rio to rleynie to grē guieḷntseeb? Sac miech ne squitaa rleynie guieḷntseeb, lo Dios ga racntseeb zho. ⁵ Golgaṅ ganle, zha rnee lo Xtiidz Dios: “Espíritu Sant, meṅ ne pxeel Dios nacie ne, rleynie me ne, ni racladz me zhaa ncuaane gleynie ne laa ne gleynie ne me.”

⁶ Ni tel Dios goṅ, noxco me ne, ib zacnie me ne griee ne lo guieḷntseeb; sca rnee lo Xtiidz me, zaatne rnee: “Zacnieṅ Dios grē zha ndooladz, sangue grē zha niats, rdziguieṅd me zho.”

⁷ Golguieṅ sca, ine ndooladz golgac, golgon mine rnabey Dios. Gdeetraa to diidz yquiel meṅdox to, sca golguṅ zeena zhal ma gbiche ma lo to. ⁸ Dib zdoo to golseëb xnēz Dios, zeena scagaa me zacnie

me to. Goltsoxco guiaanmbe to lo grëtaa xtol to, golnab lo me csañmbe me zdoo to, mese gnalo to, gac-chopdraa guic to. ⁹ jGolguien ganle, ndzinlid i squi mban to! jMban golgac, goltso guielnë, golgoon, laa ne tso to gzhidz to, laa ne tso to gley to! ¹⁰ jNdooladz golgac lo Dios, zeena cuee me to lo grë ncuaañe nac to, csanglaa me to!

¹¹ Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziib-dol zho zho, Xley Dios ga rguits zho. Laa ne so zho gacladz zho zha gun guielwxtis, mazd tsoxco zho gban zho zigne rnabey ley. ¹² Golguien ganle, Dios psan ley, ni mese rieguial gun guielwxtis, me nan zho cuibdol, chogaa csilaa me; per to nadien, zcho nac to par gdziibdol to samiech to?

¹³ Togaa ne nac to zha ne rnee: “Na gzhe widz dien pa tib guiedz ne guioo ne, guobiaaz ne ga tib iz, ga dziuun ne wzi dziuun ne wto, dz-iuunlo ne dimi”, golquiaadiag mine gne naa lo to ganle. ¹⁴ Ne sca rnee to, jpe wen wen nan to dien yo to gzhe widz co! zPe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. ¹⁵ Mazd golguiab: “Telne zneedz Dios diidz gbanraa ne, min rii, min rii dziuun ne.” ¹⁶ Led tso de tibaque guielniats qui zienie guic to, golguien guielntseeb ga run zha ne rac niats. ¹⁷ Ni golsoladza ganle: Grëse zha ne nanpaa pe nac ncuaañe ndzinli ne no gun zho ni rund zhow, xtol zho ga runctal zho.

5

Zha ricw ne ziana guielntseeb

¹ jGrë zha ne rapchen, zha ne ziana loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnë ne gan to. ² Grë

ncuaane beenlo to i, peet nonda, lega naca zig nac grë ncuaañe biodzle; grë xab to i, rrieequia ncuaañe dowle mxila. ³ Grë guuib or, grë guuib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuaañe riab lo gui.

Laa to beenlo grëtaa dimi qui, rzac to lëew yquii to len dze ne ziaad, ni nandë to gon laa dze ne nitlo to ziaadyoble. ⁴ Lëë grë dimi qui gon zëeb to lo grë zha ne quia xtsiin to, noquidie to zho rguizhde to xtse zho. Per golgacnana ganle, grëse redz ne rquiaa zho zeene mban rac zho squi rsacsi to zho, laa Dios binlew. ⁵ Lo grëtaa iz ne mban to lo guidzliu rii, loxaque grë ncuaañe gdeed guxt zdoo to, grë ncuaañe gdeed guxt xcuerp to noxco to, ncuaañe yozh ne riaab-taa guic to laa to runa, ib riende to laa dze ne nitlo to ziaadgaxle. jLëë to noyun xcuent ma ne noro par guet ma! ⁶ Pe zhistaa guielntseeb ne quiaayun to, haxta zha ne peet xtold, zha ne nand glis nia lo miech, rquiaqui to zho ncuaañe rund zho, rnabey to ret zho.

Nodne guieed zha ne rnalo Dios

⁷ Bets, bzian, sangue to gon tiblrique golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mëe guie, rquiambëz zho haxta rdzin dze ne rlaap zho. ⁸ Tiblrique sca golgac. jlb guiaand zdoo to, sac gon zhile gdzin dze ne laa men ndzon ne rnabey ne guiaad stib!

⁹ Ib tso de to guieednie to grë zha ne nacgrë to, zeena gunctalde to xtol to; sac zhile gdzin dze ne laa men ne no gun guielwxtis guiaad.

10 Golsoladz ganle, grë zha ne biadteed xtiidz Dios padzeela, nicle nroob guielnë gon zho, per tiblucque goc zho. 11 Zig nac Job, nanaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega ran zhow; sac nquialadz me miech, rquia zdoo me zho. Dichos grë zha në sca nac.

12 Bets, bzian, zeene tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiab to: "Lëpaa gbaa qui", "lëpaa guidzliu rii", dien peragaa gzeet to. Tib diidz ne nliw, golguiab: "Nliw", tib diidz ne nlidgaaw, golguiab: "Nlida", zeena gunctalde to xtol to; sac gon zha ne runctal xtol, ible zgaa zho guielnë ne csiaab Dios.

13 Lo grë to, zha ne no pe tib lo guielnëw, gnab zho lo Dios gacnieu me zho. Zha ne no pe tib guielbleya, goolnie zho me. 14 Zha ne rzacnëgaaw, gnabey zho gacredz bla zha ne zo lo to, zha co quëëb nceit guic zho gnab zho lo Dios guiac zho. 15 Telne dib zdoo zha co gnab zhow lo Dios, zunguiac Dios zha rzacnë co. Zlische me zho lo xquielguidz zho, ni tel por pe falt ne beenгаа zho lo me sca rzacnë zho, zun me zhow perdon.

16 Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrë to, lozhse ga glnab lo Dios gun me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pe rnab zho lo me run mew, niicle ncuaane mazdraa ngana. 17 Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz groj ni tib lab nis guie biabd;

18 haxta bnabraa me lo Dios guiaba stib, dzigoraa biaba, laa guidzliu biire bdeed guielnzaac.

19 Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ctsire zho nëz yozh ne zie zho ga; 20 golgacnan ganle, ladzniale guielgut ga rsilaa zho zho, grëse xtol zha co zun Dios zhow perdon.

Santiagow

GUILTS NE GLO PQUIAA PEDR

Bets, bzian, jdiuzh to grëse to!

¹ Naa nac Pedr, tib zha ne rx-eel Jesús nonee Xtiidz Ndzon me lo miech. Laa naa rxel tib guits rii ziaad lo to grëse to ne nac to zha Israel, no to stib ladz ben: zig nac nëz Pont, nëz Galás, nëz Capadós, nëz Asia ni nëz Bitin.

² Dios men ne nac Pxoze, ible me bzooblo to mazd padzeela, sac nanle me laa to gac xpëed me. Bdzin dze, zeene laa me pxeel Espiritu Sant bleextso to laa to ngab xnëz me, zeena gban to zigne rnabey me, ni lozh csanmbe Jesús to; sac ible min co nacne bzhee xchen me. Dios glu ganle pa lotaa noxco me to, zeena peet zhgab ctsebde to.

³ Xquizh xquielnzaac Dios, Pxoze Jesús men ndzon ne rnabey ne, sac gon pquia zdoo me ne ptsëe me lo xquielmban ne, rriequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne, ⁴ guielnzaac cosi ncuane mbe naca, nacda ncuane nitlo, nacda ncuane gdzëlo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guielnzaac co. Zeene laa dze co gdzin, zanlo to ganle zeene laa me ycaania to.

⁶ Gacxe waa ine nley golgac. Nli zan to grë pe guielnë, per ncuane tib rded ga. ⁷ Ib none gan to grë guielnë, parne ga glu dien pe nli dib zdoo to rnalo to Dios. Zig nac guuib or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuane rnitlo ga. Grëse zha

ne tibaque gnalo me, niicle mazdraa guielnë ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me. ⁸ Me i squitaa rleyne to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuane grieelo gnee to zha naca; ⁹ sac gon, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me. ¹¹ Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon ne guiaadnie me; gocladz zho niacnan zho dien cho nac men co, pa hor gac min cho. ¹² Nacne blu Dios lo zho gocnan zho nacda ncuane gac len dze co, sinque haxta nele ygaa dziana. Sangué niina, nanwen to ganle laa grë min co gocle, lëe diidz cub co i gocnan to niina, gbaa biet Espiritu Sant bdeed me guielbiini lo zha ne biadneew lo to. jNcuane ndzona, haxta grë anjl racladz tebaa zha gacnanraa zho dien zha naca!

None gban ne zigne racladz Dios

¹³ Golquix biini xquielrien to sca. Tiblique golgun guic to ne laa to ygaa grëtaa mine ral zdoo Dios gneedz me lo to, zeene laa Jesús guiaad stib. ¹⁴ Zig grë mëed ne ron xtiidz pxoz, sca nguzobdiidz golgac lo Dios; gundraa to grë ncuane ndzinlid ne been to zeene gard gunbey to me ga. ¹⁵ Goltsocxo golban zigne racladz me, zeena ine mbe guiaan to lo dol; sac gon tel me, men mbe nac me, nacd me men ne rdziguien dol. ¹⁶ Zigne zho-neeque lo Xtiidz me, zaatne rnee: "None guiaanmbe to lo dol, sac gon

meñ mbe nac naa.”¹⁷ Pxoꝝ to nac me, me rnalo to, nanle to zeene laa me gun guiełwxtis, led yed me cue; mine been tib tib miech, zunquizh me zhow. Golguieñ sca, golgon xti-idz me gzataa dze ne gbanse to lo guidzliu rii.

¹⁸ Golsoladz me blee to lo grë wseed ndzinlid ne psan grë xmengol to; nanwen to gozh briece to ga; per pquiind me ncuane rnitlo zig nac pe dimi or, pe dimi plat;¹⁹ sinque laa me pquiin xchen ndzon Jesús. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios.²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdziñ laa me biaad, biaadsanwen me to lo Dios; laa Dios been min co sacne rleynie me to.²¹ Gacxe waa, zrieelo dib zdoo to gnalo to Dios, mese none gliladz to. Me nac meñ ne bleeban Jesús, blu me ne meñ non nac Jesús.

²² Ni niina ne laa to mban zigne nac Xtiidz Dios, mine nac diidzli, laa zdoo to biaanmbele lo dol; nasi zrieelo gleynie to zha ne nacgrë to. Dib zdoo to sca golleynie zho,²³ golguieñ ganle, tib guiełmban cuble rap to niina, rrieequia gol to stib; per nacdraaw zigne gol to glo, sinque lëe guiełmban qui bгаа to zeene bliladz to Xtiidz Dios, didz ne rneedz guiełmban, diidz ne gdziñd dze nitlo.²⁴ Zigne zhobneeque low, zaatne rnee:

Grëse ne nac ne miech, dzziñ dze ne lozh ne,

lega nacse ne zig nac grë guizhye, grë xquiełndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rliaałaque;

²⁵ sangue Xtiidz Dios, gdziñd dze ne nitlow.

Ni lëe diidz co ga gon biadseed zho to, lëew rlu zha laa miech lo grë xtol zho.

2

¹ Nana sca: gundraa to grë guiełntseeb, yquidiedraa to samiech to, gundraa to ne laglaase glu to guiełwen, gacnëd zdoo to gan to cho zha stib noded, gzhixcuaadraa to diidzguizh.

² Sinque Xtiidz Dios goltsoxco, zeena lozh tsoṭibli guic to dziits so to low. Zig rzac mëdyeen ne wriin ral, nidzpaar dziladz win guie win; scadaa golsac Xtiidz me, zeena ygaade to grë guiełnëdox ne csiaab me.³ Laa to gonle ganle zha wentaa zdoo me, Xtiidz me sca goltsoxco.

Jesús nac zig tib quie mban

⁴ Golbig lo Jesús, golgan ganle lëe me nac zig tib quie ne rio squin yu, per tib quie mban. Ib bleyñied miech me, sangue Dios, meñ non, meñ nziuu nac me lo me.⁵ Golbig lo me sca, zeena ye to gac quie mban ne tsaa xyadoo me. To gac grë pxoꝝ ne nlipaa mbe zdoo, gun to dziin len yadoo co; golban zigne rdziladz Dios, zeena guiełmban co gac zig tib gon ne gdeed to lo me, ne nac to zha ne ngab lo Jesús.⁶ Zigne zhobneeque lo Xtiidz Dios, zaatne zhu rnee:

Meñ ne bzo naa cxel naa Jerusalén, me gac zig tib quie nroob ne gnaaz dziits xyadoo naa,

ni lëe yadoo co nac grë zha ne ngab lo naa.

Meñ non nac me, ni grëse zha ne gnalo me, ible csaand naa zho.

⁷ Ne nligaa tib meñ non nac me lo ne, sangue grë zha ne rliladz me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,

laaw bron zho sac rzac zho paat rquiinda,
ni niina lëëpaaw nac quie ne nlib-
dziits xcox yu.

⁸ Ni ziaad stib zaatne znu rnee:
Quie co griel ni miech, quie co gron
zho.

Grëse zha ne nëd gliladz Xtiidz me
zaatne rnee cho nac me, scapaa sac
zho me, ni ib zhobneele ne min co
yгаа zho.

⁹ Sangue to, lo Diosle ngab to, me
ble to, zigne rnee lo Xtiidz me: tole
nac zhipxoz me, tole nac zha non
ne quiayun xtsiin me; miech ne
mbele lo dol nac to lo me, mele
rnabey to sac me bredz to laa to
briee lo guielcow bzëëb to lo xbiini
ndzon me; zeena gnee to lo miech
ganle zha nactaa grë ncuaañe run
me. ¹⁰ Glo peet nonde to, sangue
niina non to sac gon lo me ngab to;
glo nande to pa lotaa rquia zdoo me
to, sangue niina rley to ran to ganle
squitaa rquia zdoo me to.

*Tibaque golgun mine racladz
Dios*

¹¹ Bets, bzian, rleyne naa to.
Ndion ne ganle, nacse xquielmban
ne lo guidzliu rii zig zha ne tibrded
stib ladz ben; gane rso naa diidz
lo to, ib gzoobladzde to gun to
grë ncuaañe ndzinlid ne racladz
xcuerp to; sac min co rsacsi xalm
miech. ¹² Golguien zaacse golgac
lo grëraa zha ne gard gunbey Dios;
niicle ne gneenë zho to niina, sac
zho to zig cho grë zha ntseeb, per
zeene gan zho ne ndzinli nac grë
ncuaañe run to, haxta zleyne zho
Dios gal dze ne laa Jesús guiaadgun
guielwxtis.

¹³ Golgon xtiidz grëse men ne nac
wxtis lo guidzliu rii, sac sca rdzi-
ladz Dios: zigtaa presidenta, ne
nac me zha nonraa, ¹⁴ zigtagaa grë
zha ne nacie me dziina, sac zha
run guielwxtis, rdeed zho caxtigw
ne rieguial grë zha ntseeb, ni sca-
gaa runnon zho grë miech ne run
ncuaañe rquiin. ¹⁵ Ible laa Dios

racladz zaacse gac to, zeena grë
zha nxen, grë zha yozh ne riend
pe rnee, haxta ni ro zho tsod pe
gneenë zho to.

¹⁶ Gollu ne peet lo ngadoodraa to,
per guiabde to ne peet lo ngadoo-
draa to laa to gun grë ncuaañe
ndzinlid ne gacladztaa to. Led
scada gon, mine racladz Dios min
co golgun, gollu mele rnabey to ni-
ina.

¹⁷ Zaacse golgac lo grë samiech to,
golguien cho lo zo to. Golleyne grë
zha ne nacgrë to, ndooladz golgac
lo Dios, golguien ne men ro nac me;
ni scagaa golgon xtiidz grë zha ne
nac wxtis nroob.

¹⁸ Bets, bzian, to ne nac to zha
ne quia xtsiin ben, golgon mine rn-
abey men ne rree to; tel zhataa
nac zho, zigtaa men wena, zig-
tagaa men ne ntseeba. ¹⁹ jNley
golgac, goldeed xquizh lo Dios, tel
porne noyun to mine rnabey me,
laa zho rsacsi to! ²⁰ Sac gon, telne
nosacsi zho to por xquielntseeb to,
niicle paraa cxecw to paat yqui-
inda; sangue tel rxecw to nosacsi
miech to porne noyun to ncuaañe
rdziladz Dios, dzigosi zleyne me
to. ²¹ Golgacnan ganle, ible none ted
to min co ne nac to zha ne ngab lo
Dios; sac gon, niicxe Jesús, blactaa
guielne ne bded me bdiizh me xtol
ne. Glo me sca bded, nana negaa
ible none sca dieed ne. ²² Tel me ni
tib dol beend me, ni tib miech pqui-
died me. ²³ Niicle zeene blooredz
zho lo me, ible ptsired me lo diidz
co; niicle zeene quiasacsile zho me,
ib gocntseebd me lo zho; sinque
grësew psan me ladznia Dios, men
co gun guielwxtis zigne no gaca.

²⁴ Masaque Jesús bgaadz grëse
xtol ne, blactaa psacsi zho me
pquia me lo cruz bdiizh mew; laa
me been min co, zeena grieelo
griee ne ladznia dol, gban ne zigne
rdziladz Dios. Ne scataa psacsi zho
xcuerp me, ga bi me grëse xquielne
ne. ²⁵ Glo lega nac to zig nac grë

mëcwxiiil ne zonziaab, sangue niina mele quianap to. Me nac tib baxtor ne rleyniepaa to.

3

Zha gban zha ne ptsieelniale

¹⁻² Bzian, to ne nac to men wnaa ne ptsieelniale, golgon xtiidz tsieel to. Niicle tel ned zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho. ³ Golguien sca, tsode to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe gre guib or tso yan to, tso nia to, dieen pe lar niazh ne gacwraa to. Tsienalde to gre guielniow co, sac gon ncuuan laglaase ga; ⁴ sinque none xixcuua zdo to, gac to tib zha tibliladz, tib zha ne ndooladz. Lëe guielniow co nac mine niowraa nëz lo Dios, ni min co gdzind dze nitlo. ⁵ Lëe guielniow co bioxco gre men wnaa ne biaadban padzeela, zha ne brieel lo dol wban zho zigne racladz Dios; tel zha, dib zdo zho bnalo zho Dios, ni bin zho xtiidz tsieel zho. ⁶ Zig nac Sar, sca goc me, bin me xtiidz tsieel me Abraham, haxta rëb me masaque Abraham nac men ne rnabey me. Ni scagaa to, telne tsoxco to xixcuua to, zac to zig goc Sar, dzigosi laa to gac zig xpëed me; haxta ni tsoxtseebde to pe glisqui tsieel to lo to.

⁷ Scaquegaa to bets, ne nac to zha ne ptsieelniale, goltsocxo tsoguc to zha nac tsieel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸ Nana sca, tipse golgac gre to. Ine niowse golleynie zha ne nacre gre to, miech wen, miech ndooladz golgac. ⁹ Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. ¹⁰ Zigne zhubneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuëez zho ro zho, gneenedraa zho, yquidiedraa zho;

¹¹ none csaan zho gretaa guielntseeb, niapse ncuuan wen tsoxco zho gun zho, yguib zho cuewen miech, niicle zhagaa wen gac zho lo grese miech.

¹² Sac gre zha ne sca wen rac nëz lo Dios, tibaque quianap me zho,

ni rquiaadiag me xtiidz zho tel pe rnab zho lo me;

sangue gre zha ntseeb, ni lalnu rdziguiend me ncuane run zho.

Dichos zha ne mban rded lo samiech

¹³ Golguien sca, ncuane yquiin golgun; scagaa tsod pe nacne ctsidil miech to. ¹⁴ Laa telne ncuane yquiinaquegaa noyuh to, ni laa miech rtsidil to, ¡dichos to ga! Ib gdziebde to gre miech guidzliu, niicle peraa gnë zho gun zho to. ¹⁵ Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golnee lo zho.

¹⁶ Zaacse sca golban, zeena gre zha ne rneenë to porne nac to zha

ne no xnëz Jesús, zdzin tib dze ne ctoladz zho, zeene guien zho lega bnexuu zho to. ¹⁷ Wen zie zha ne ran guielnë, telne Dios rnabey gan zhow zeene noyun zho ncuaan wen; ledle gan zhow por xquielntseeb zho.

¹⁸ Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios. Nli gut xcuerp me, per zhiespiritu me gutew; ¹⁹ gane güeyted me zatne niogyu zhiespiritu grë zha ne wban padzeela, güeynee me lo zho. ²⁰ Lëë grë zha co ib bzhiguiel nliadz Xtiidz Dios, niicle ne dipse len dze ne nozaa Noé barcw nroob co pquiambëz Dios niac-wen zho. Nanlaxe to ganle, xonaque nac zha ne bdedlaa lo nis co. ²¹ (Lega rrieequia goc nis co zig nis ne rrobnis ne. Zeene rrobnis ne, ga rlu ne laa ne brieeladznia dol, ygaadraa ne guielnëdodx ne tsieguiel zha ngoopdol, sac gon por mincopaa gut Jesús ni brieeban me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsëë me lo xquielmban ne.) ²² Sangue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquitsgzhib zho lo me ni run zho mine rnabey me zho.

4

¹ Golguien ganle, zha nactaa grë guielnë ne bded Jesús bdiizh me xtol ne; nana sca, scaque to gdziebde to golcueeladz to gan to guielnë. Ib rquiin guielnë, sac zha ne no tib lo guielnë, rioguid zho grë ncuane guntal xtol zho, ² zëëb rguib zho gban zho zigne racladz Dios. ³ Grëtaa ncuane ndzinlid ne run grëraa miech, golguiaanladza. Golguiaanladz zeene scataa ptsieelsa to zho, bzudz to,

lega dowcho, lega gocho to nziu, haxta bionie to zha ne nacd tsieel to; bio to lo grë lni, bleynie to grë mdio.

⁴ Grë zha co, rien naa rlëë zho ran zho rtsieelsadraa to zho lo grë ncuane ndzinlid co, gane haxta rneenë zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me mine tsieguiel tib tib miech, zigtaa zha mbana, zigtagaa zha ne gutlew. ⁶ Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaä Xtiidz me, sac zha ne rquiaadiaga, niicle ne zetaque zho, per nëz lo Dios mban zhiespiritu zho.

Golgacnie zha ne nacgrë to

⁷ Zhile gdzin gdze ne laa grë ncuane rac lo guidzliu rii nitlo; golquix biini zaacse golban, tibaque golzodiidznie Dios. ⁸ Ine golleynie grë zha ne nacgrë to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoo ne. ⁹ Zha ne guiaad lidz to, goldeed zaatne cuëz zho; ine golcuëzlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrë to! Ib ga rquiin guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoo zho none gun zhow dib nace guielndaan ne rdeed Dios lo zho. Ncuane guntaa to, goltsienie guic to ne laaw gun to par csannon to lë Dios. Ga glu ne xtsiin Jesús quiayun to, men ndzon ne rnabey, men ne gdzind dze gdzëë. Sca rieguala.

¹² Bets, bziän, ne nligaa rleynie naa to. Golsoladz sca, tel pe guielnëtaa gan to porne no to xnëz

Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guielnë, ni scagaa nroob guielbley ne tso to gal dze ne glu ganle zha nactaa guielndzon ne rap me. ¹⁴ Zeene rgodee miech to, rquiaago zho to loxaque ne no to xnëz Jesús, nley golgac; wen zie to ga, sac gon zhiEspíritu Dios nacie to.

¹⁵ Guieltow sca csacsi miech to, telne bgaa to laa to beet, laa to wban, laa to bzëëb lo cuent ne rieguialdraa to, pe stib guielntseeb ne noyunragaa to. ¹⁶ Sangue telne rsacsi zho to loxaque ne no to xnëz Jesús, led guieltod ga. Laa ne ctoladz to, jgoldeed xquizh lo Dios, sac gon tib guielnzaac nroob bgaa to ngab to lo me! ¹⁷ Golgacnan ganle, grëse ne ne nac ne zha ne ngab lo Dios, len dze rii laa ne csilo dzian guielnë. Nana, telne ye zha ne ngab lo me ted guielnë, z zha naczhe mine ted grëraa zha ne nëd gliladz Xtiidz me, gal dze ne laa me gun guielwxtis? ¹⁸ Zigne zhubneeque lo Xtiidz me, zaatne rnee: "Niicle zha ne wenle nëz lo Diosa, nroobaque nac guielnë ne ran zho haxta gdzin dze ne ycaania me zho, zpe lalgue grë zha ne dzigo ractseeb lo me?" ¹⁹ Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zгаа naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grë zha ne bgaa to no-quianap to. Dib zdoo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. ³ Gundeto ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. ⁴ Scagaa, zeene laa men nroob ne quianap ne guiaad, zгаа to lo guielndzon ne gneedz me, lugar co gac tib premio ne gdzind dze lozh lo to.

⁵ To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: "Grë zha niats, rdziguiend Dios zho, sangue grë zha ndooladz, racnieñ me zho." ⁶ Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin. ⁷ Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

⁸ jNsin golso lo mendox, sac gon tibaque quiana ma gnitlo ma ne! Masaque rac ma zig rac grë meedz ne rgobeedz quiaguib ma ne gow. ⁹ Dziits golso gdeete to diidz yquuil ma to. Tibaque dib zdoo to gonalo Dios. Nanle to ganle dipse lo guidzliu, zha ne notaa xnëz me, scaque quiaded zho. ¹⁰ Tel pe nactaa guielnë ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquielmban to, gzodziits me to, guntibli me guic to. Me nac men ne bredz ne yгаа ne lo guielndzon ne no me grop me Jesús, guielndzon ne gdzind dze nitlo. ¹¹ Mese nac men ne rnabey grëtaa ncuane no, ni gdzind dze ne gdzëë me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa

lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleyne me to; zeeṇa tiblīque gac to gbichede to lo me.

¹³ Grēse zha ne riladz Jesús Babiloin nu, zha ne bzooblo Dios gac xpēēd me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpēēd naa, ye me laa me rquiaabdiuzh to. ¹⁴ Laa naa rnab lo to, golquiaabdiuzh grēse zha ne nacgrē to, inē golxen nia zho.

Dios gacnien to peet zhgab ct-sebde to, nac to zha ne no xnēz Jesús.

Pedr

BROP GUITS NE PQUIAA PEDR

Bets, bzian, jdiuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnalo men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne rliidz ne, sac gon me gocniēn to squi rnalo to me niina; sac mesi minē nonguiel gac, min co run me.

² Zigse zie dze, goltsoxco lozh gunbey to zha nac Dios, zha nac Jesús men ne rnabey ne, zeēna scagaa zig zie dze zunlayraa me to, zacniēnraa me to, parne peet zhgab ctsebde to. ³ Sac zeēne gunbey to zha nacraa me, con grētaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaaēne ro, ncuaaēne gzee zdoo ne been me parne gbig ne lo me! ⁴ Ni psan me diidz pe nac grē ncuaaēne ndzon ne gneedz me lo ne. Psan me diidz, ib laa me cuee ne lo grētaa guielyozh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalole Dios, per parne ygaa to min co, none tsoxco to:

zaacse golban,

goltsoxco guien to zha nac Dios,

golseed gnabey to xcuerp to,

guieete to,

tibaque goltsoxco golgun minē racladz Dios,

inē niowse golbannie grē zha ne nacgrē to, golsac zho zig tib menlidz to;

golleynie samiech to.

⁸ Nana, telne tsoxco to znu gban to, dzigosi mazdraa tsoguic to minē racladz Dios, dzigosi zlu run to minē rnabey Jesús men ndzon ne rnabey ne, led loxaque runbeydse to me. ⁹ Sac zha ne tsoxcoda, rrieequia rchool lo zho ga, rrieequia rcowle guic zho ga, sac gon rso-ladzd zho zha nactaa lo grē dol ne blee Dios zho.

¹⁰ Bets, bzian, golguien sca, niina ne laa Dios bzooblolo to, laa me bredzle to ngab to lo me, goltsoxco sca golban, parne guiabde to lo dol stib. ¹¹ Niicle par gdzingaa to zatne rnabey Jesús, men ne psilaa ne lo dol, men ne rnabey ne, tsod pe yca lo to, inē nzhiāl nēz zaatne ted to gdziñ to ga.

¹² Nli nanle to grē mine rne naa nu, nli dziitsle zo to lo Xtiidz Dios, per ib none guncsoladz naa tow. ¹³⁻¹⁴ Laa Jesús men ndzon ne rnabey ne, blule lo naa zhile gdziñ dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; ¹⁵ zeēna niicle wBILE naa lo guidzliuw, tibaque csoladz tow.

Gonpaa Pedr Jesús

¹⁶ Grëse mine bnee no lo to zeēne pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me ¹⁷⁻¹⁸ guic gui ne scataa pxobnen Dios ne men non, men ro nac me. Binpaa naa zēēb tsi Dios gbaa hor co, nē me: “Lēē Xpēēd naa i gon, rleynie naa me, nziuu me lo naa.”

¹⁹ Ga nagon rlu ne diidzli nac grē minē bzeet grē zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lēēw quiazini lo to niina, zig rziini tib biini guieel, haxta riini liu zeēne laa Mel Ngol rlan; ni lēē Mel Ngol co nac Jesús. ²⁰ Per scagaa, racladz naa

gacnan to ganle, grielod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, ²¹ sac gon tel zha co, bneed zho ncuane biaabtaa guic zho; sinque laa zho bnee mine bnabey Dios psiaab Espiritu Sant guic zho.

2

Zha ne rquidie (Judas 4-13)

¹ Grë zha ne biadteed Xtiidz Dios padzeela, mine bnabey me zho min co bnee zho; per brieequiaque zha ne pquidie rëb zho Dios pxeeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nand zho zha nactaa guielnedox ne ygaa zho, tibaque zeene guien zho laa zho nole lo caxtigw co.

² Ndal miech ne grieequia tsienal grë ncuane yozh ne gun zho, niapse por zha laa grëraa miech csilo gneenë Xtiidz Dios. ³ Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielnedox ne ygaa zho; ⁴ sac Diossi gon, mine run grë zha ntseeb, csand mew scase. Golgan ganle, niicxe grë anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho.

⁵ Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban

Noé zigne racladz me. ⁶ Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomor, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquielntseeb zho. ⁷⁻⁸ Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho. ⁹ Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnedox ne cteed me zho gal dze ne laa me gun guielwxtis.

¹⁰ iZig nac zha ne guiaadquidie to ga, mincopaa ygaa zho! Ni lalnu gandzed Dios zho; sac gon, laa zho zienal loxaque grë guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guien lo zho rdzibdee zho grë men non ne no gbaa. ¹¹ Per ni grë anjl, niicle ne zha nroob nac anjl, niicle ne rap anjl poder; per rdzind anjl lo Dios gdzibdee anjl zho. ¹² Per zha, lo xquielyozh zho ga, haxta ncuane rien zho zha nac, rdzibdee zho. Lëëdaa grë ma nac zho, tel ma laa ma ralse par ygaa ma nitlo ma; guienndraa xquielrien zho, ncuane racladzttaa zho run zho. Per zdzin dze ne nitlo zho, zigne rnitlodaque grë ma, ¹³ por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeegueltow, rquiaalose zho miech wen nac zho zeene riadsobnie zho to lo zhilni to. ¹⁴ Wnaa ne gantaa zho, pe na zooobladzd zho tsonie zho wnaa co, tibaque quiaayuntal zho xtol zho. Rio zho

rquiil zho grë zha ne gard sodziits lo Xtiidz Dios; rienle zho zha gla zho ncuuañe rquiin lo zho. Miech ndziibdeele nac zho, ¹⁵ sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëed meñ ne lë Beor. Tel Balam, haxta miñe nonguiel^ldraa been me par gun me gan dimi; ¹⁶ per bdziñ tib dze zeene laa Dios blisqui lo me grëtaa ncuuañe quiayun me ga. (Bnabey Dios lëëque xpurr Balam bnee, dzigoraa bien Balam psaan me xquielyozh me ga.)

¹⁷ Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guiel^cowdoo ne rieguial zho, zaatne gdziñdraa dze griece zho!

¹⁸ Niats rzë xtiidz zho, per ncuuañe paat rquiind rnee zho. Miñe mazdraa mban run zho, rio zho lëëque lo grë guiel^yozh ne rdeed guxt xcuerp zho rquiil zho grë zha ne pense briece lo dol, rlozh ga rbiire riab zha co lo grë dol co stib. ¹⁹ Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni rienñ zho dol quianabey lo zho; sac grëse zha ne gacdraa csaan tel pe grë guiel^yozh ne run zho, lëële grë ncuuañ co rnabey lo zho. ²⁰ Tib zha ne sca briece lo grëtaa ncuuañe ndzinlid ne no lo guidzliu rii (pone bliladz zho Jesús, meñ ndzon ne rnabey, meñ ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho. ²¹ Lëda ga gon, telne gocnanle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuuañ yozh ne been zho glo. Nroobdox caxtigw ne gan zha co, mazd zhi miñe ygaa zha ne gocnañd

zha nac xtiidz me. ²² Zha copaa nagon run miñe rnee diidz ne znu rëb: “Nandraaque mëcw, ncuuañe bdzible ma rbiire ma row maw”; ni stib miñe znu rnee: “Ngutzhe, rlozhle raz ma nis mbe, ni rlozh ga riegaaque ma lo nis beñ.”

3

¿Zha nacne gard guiaad Jesús?

¹ Bets, bzian, golgan ganle lëële guits rii raca chop zixel naa. Gropse low, rso naa diidz lo to tsoxco to zaacse gban to, ine niini gac guic to. ² Golsoladz ganle, zha nac grëse miñe bnee grë zha ne biadteed xtiidz Dios padzeela; golsoladz zha nac grë miñe rnabey Jesús, miñe biadseed no to. (Jesús, meñ ndzon ne rnabey ne, meñ ne psilaa ne lo grëtaa xtol ne.)

³ Racladz naa gacnañ to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guiel^yozh ne gzoobladz zho; ⁴ guiab zho: “¡Pe gli^ladz ne nazho guiaad Jesús! Telne nli rëb me laa me guiaad, ¿yo me na? Grë xmen^gol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

⁵⁻⁶ Squiaalo zho rsoladzd zho zha bnitlole guidzliu tib vult, ni zhagaa nitlo miñe no niina. Wen wen nañ zho ganle zha bnabey Dios biao guidzliu, me bnabey brieew lo nis, ni masaque lo nis now; min^cocxe waa nis bnitlow glo. ⁷ Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guielⁿtseeb ted zho caxtigw.

⁸⁻⁹ Zha ne rzac quiayaanladz Jesús diidz ne psañ me ga, per led quiayaanladzd mew; sinque laa me quiambëz tebaa grëse miech gacwen lo me. Laa me racladz, grëse

zho csaan xquielntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaane gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze. ¹⁰ Ib laa me no guiaad, per choot nand dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

¹¹ Scataa nagon nitlo guidzliu rii, ni grëraa ncuaane rdzian ne niina, igolguien sca golban zigne racladz men ndzon ne rnabey ne, gunctaldraa to xtol to! ¹² Tibaque golconie guic to ne ib laa me no guiaad; tibaque ndzinli golban, gollu ne quiambëz to gdzin niob dze ne sca gazbel grë ncuaane ran ne gbaa, dze ne sca tib guiaalse grë ncuaane niaaw. ¹³ Horco nagon laa ne dzian tib gbaa cub, laa ne dzian tib guidzliu cub ne psanle me diidz yгаа ne; zaatne tsodraa guielntseeb.

¹⁴ Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleynie me to gan me mban to zigne racladz me. ¹⁵ Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielbiini ne rdeed Dios lo me rquiaa me grë guits ne zixeel me, zineelee me lo to grë mine none naa nu. ¹⁶ Parga nli no mine rnee me ga, ngan guien ne zha naca; grë zha ne rdziin-paa racladz ctsëë Xtiidz Dios, zeene laa zho rnew, laa zho rneeleelew zigne racladz zho; zigne runaque

zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

¹⁷ Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. ¹⁸ Goltsoxco zig zie dze guienraa to pa lotaa rleynie Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me rieguial gunnon miech, zigtaa niinaw, zigtagaa grë izdoo ne ziaadraaw. Sca rieguiala.

Pedr

GUITS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze bi-aad me lo guidzliu; grop diag no bdzion no grē mine bnee me, grop lo no bdzion no grē mine been me; sac bdzionpaa no zha rac me, zha rnee me, haxta bzhieen no nia me.

² Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh. Zaatne no Dios men ne nac Pxoze, ga no me; zeene baaad me lo guidzliu dzigo bdziunbey no me.

³ Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grē ne, gacnie to no zigne gacnie Dios no (men ne nac Pxoze), zigne gacnie Jesús no, men ne nac Xpēed me. ⁴ Laa naa rnee grē min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

⁵ Znu nac mine bdzion no pseed Jesús miech, rēb me: Nac Dios zig nac tib biini, ni tib lē guielcow guieend zaatne no me; laa grē dol, masaque nacna zig nac guielcow. Ni mincoque gon rnee no lo to. ⁶ Gacxe waa, telne rnee ne nacniele ne me, ni rlozh ga tibaque lo guielcow co no ne, rquidie ne ga dzigo. ⁷ Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grē ne; ni scagaa, xchen Jesús nac mine csanmbe ne lo grētaa xtol ne.

⁸ Nana tel guiab ne: Tel naa ib peet dol rapd naa. Lēeque ne noquidie ne ga, rneelid ne ga zha nac

ne. ⁹ Sangue telne cxobdol ne grēse xtol ne lo Dios, ible tedsod silaa me ne lo grētaa dol co, sanmbe me ne lo grētaa guielntseeb ne zidziun ne; sac ible laa Jesús gut par csanmbe me ne. ¹⁰ Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grēse ne miech ngoopdol nac ne.

2

¹ Xin yeena, laa naa rso diidz lo to: Gunctaldras to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lēe men co nac Jesús, lo me golbig (tel me ni tib dol rapd me). ² Sac me bded grētaa guielne ne riogual ne ndieed ne por grētaa xtol ne, psanwen me ne lo Dios; me goc zig tib gon ne pcaania Dios gozh grēse xtol ne, ni xtol grēraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grēse mine rnabey Dios, gase rien ne ne nli xnēz me no ne. ⁴ Laa tel zha ne rnee: “Xnēz me no naa”, ni rlozh ga rund zho grē mine rnabey me, rquidie zho ga. ⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnēz me no ne. ⁶ Gacxe nagon waa, zha ne rnee xnēz me no zho, ib none zaacse gban zho, zigne wban Jesús zeene baaad me lo guidzliu.

⁷ Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhobneew, niicle ne pquiaadiagle tow, ⁸ per rrieequia ncuba niina; sac gon zeene baaad Jesús, me blu ganle zha none gleynie ne samiech ne. Ni scagaa niina ne laa to

ziena_la, laa to noriee lo guie_lcow ne no to glo, laa to nozëëb nëz lo xbiini Dios.

⁹ Ga nagon, tel zha ne rnee lo biini co mban zho ni rlëënie zho samiech zho, rquidie zho ga; bii lo guie_lcow ga mban zho. ¹⁰ Zha ne rleynie samiech, zha cosi nli lo biini co mban zho, noxtseebd lega tsohe zho, sac ranpaa zho pa lo zie zho; ¹¹ san_gue zha ne rlëënie samiech, lo guie_lcow ga no zho. Masaque nac zho zig zha ne rold lo, niicle zha rien_d dien_p pa nëz tsie zho, sac guie_lcow co quiantse lo zho.

¹² Xin yeena, laa naa rne grë min rii lo to, sac gon, tel to laa Jesús bdi-izhle tel pe nactaa grë xtol_t to. ¹³ To ne nac to dad, laa naa rxel_d diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel_d naa lo to, sacne nligaa dziits zo to, rriee_lodraa mendox yquuil ma to. To ne nac to mëëd_las, xin yeena laa naa rxel_d diidz rii lo to, porne nac to zha ne nole xnëz Dios men_p ne nac Pxo_z ne.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdo_t to, ne nac to zha ne lëbdraa mendox yquuil, ¹⁵ gol_guien_p, gleyniede to grë ncuaa_ne rap to, gleyniede to grë ncuaa_n ndzinlid ne rac lo guidzliu rii. Zha ne rleynie grë ncuaa_n co, nlid rleynie zho Dios men_p ne nac Pxo_z ne; ¹⁶ sac grëse ncuaa_ne rac lo guidzliu rii (zig nac zha ne ziena_l ncuaa_ne gdeedguxt xcuerp, zha ne rzoobladz yquianie ncuaa_ne rdziladztaa, zha ne racniats lo samiech), grëse ncuaa_n co led Diosd rnabeya, sinque lëë mi_ne rzon_l grëraa miech lo guidzliu ga. ¹⁷ Ni na tel zig nac guidzliu, zig zie dze laaw quialozh grëw grë ncuaa_ne rleynie miech low; san_gue

zha ne mban zigne rnabey Dios, laa zho bgaale tib guie_lmban ne gdzi_nd dze lozh.

Zha ne rlëënie Jesús

¹⁸ Xin yeena, zhile gdzi_n dze ne laa guidzliu nitlo. Led binle to ganle ib zrieequia tib zha ne glëënie zhiwseed Jesús, ni nligaa niina len dze rii ndal-le zaatne norieequia grë zha ne rsilo quiatsidil_t Xtiidz me; gane ndion_n no ne laa dze co ziaadgaxle. ¹⁹ Nli ladaque zha ne nacgrë ne brieë grë zha co, per nlid nacniepaa zho ne; sac tel_p niaca mi_ne nlipaa nacnie zho ne, nrie-extsod zho. Ga nagon blu zho ne nlid nacgrë zho ne.

²⁰ San_gue to, nacde to zig nac grë zha co, sac nacnie Espiritu Sant to, bneedz me guie_lbiini lo to runbey to mi_ne nac diidzli. ²¹ Guits ne rxel_d naa lo to nu, nacda par cseed naa to mi_ne nac diidzli, sac runbeyle tow ni haxta rien_t to pa mi_n nac guie_lwquidie; sinque laaw ziaad lo to par gacnan_t to ganle zha nac zha ne noquidie i.

²² Grë zha ne rnee i nlid lëë Men_p ne zëëble diidz cxeel_t Dios lo guidzliu ga nac Jesús, noquidie zho miech ga. Ni zha ne sca run, rlëënie zho me ga; ni ne sca riladzd zho cho nac me, yele Pxo_z me ga riladzd zho. ²³ Sac zha ne rlëënie men_p ne nac Xpëëd Dios, ga rlu ne nlid riladz zho cho nac Dios; san_gue zha ne rxobnen_p cho nac Xpëëd me, zha cosi nli riladz zho cho nac me. ²⁴ Laa naa rso diidz lo to sca: Goltsienal grë mi_ne pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëëd mew, tibaque gbannie to me. ²⁵ Gol_gsoladz ganle, laa Jesús psanle diidz ne ib zgaa ne tib guie_lmban ne gdzi_nd dze lozh; lëë guie_lmban co ygaa grëse zha ne nacnie me.

²⁶ Laa naa rzet mi_n rii lo to, sac ne squi no grë zha ne ziaad racladz

yquidie to. ²⁷ Sangue to laa Jesús px-eelle Espíritu Sant nacie to, rqui-ind ne goon choraac seed to; sac Espíritu Santzhal nreedz guielbiini lo to rien to zha nac grëraa ncuaane no gacnañ to, ni mesi gon mine nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espíritu Sant to.

Zha ne nac xpëed Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ine tibililadz gac to gal dze ne laa me guiaad. Sac zha ne sozit lo me gban zho zigne gacladz-taa zho, zeene laa me guiaad mban gac zho; sac guielto ne guiaan zho lo me. ²⁹ Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me mine rieguial zho.

3

¹ Golwi ganle pa lotaa rleynie Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech rililadz zhow, sacne runbeyd zho cho nac me.

² Bets, bzian, ne nligaa xpëedle Dios nac ne. Nli ndiond ne ni-ina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. ³ Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuaane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguuits zho, sac grëse dol ne runtaa miech ga rlu ganle ne rond zho mine rnabey me. ⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nli-paa nacie me, ziana draa zho ncuaane gunctal

xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdoo, zigne men mbe nac Dios; ⁸ sangue grë zha ne tibaque quiayunctal xtol, xnëz mendox ga ngab zho; sac tel mendox, desde padzeela tibaque guielntseeb quiayun ma. Ni min co nagon nacie biaadpaa Xpëed Dios lo guidzliu, biaadnitlo me grëtaa ncuaane run ma. ⁹ Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espíritu Sant, men ne nacie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nienenpaa cho nac xpëed Dios, chogaa nac xpëed mendox, sac grëse zha ne run guielntseeb, grëse zha ne rley-nied samiech, led xpëete Dios nac zho; ¹¹ sac gon, desde dze ne psilo bliladz to Xtuidz Dios, bingazh to ib none gley-nie ne samiech ne. ¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to mine been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsode to zhgab guiab to pe nacie sca run zho. ¹⁴ Sangue ne rley-nie ne samiech ne, gane ndion ne noxtseeb-draa ne guioo ne gabil, laa ne bgaale tib guielmban ndzon ne gdzindraa dze lozh; sac zha ne rley-nied samiech, nëz ne nitlo zho ga zie zho. ¹⁵ Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga. ¹⁶ Ndion ne zha gley-nie ne samiech ne, sac Jesús-zhal blu zhaw zeene sca

bleeladz me me gut me bdiizh me xtoꞓ ne. Gacxe waa, zha ne nlipaa rleynie samiech, none cueeladz zho zho, cueeladz zho ncuaaṇe rap zho, gacnie zho samiech zho. ¹⁷ Gzoob ne, tib zha ne rnee xnēz Dios no zho, nroob rapcheṇ zho, ranlo zho rcaalsad pe yquiiṇ tib zha ne nacgrē zho, per ib rdeete zho palal pe yquiiṇ zha co. ¿Niacxe na nli rleynie zha co samiech zho ga? ¹⁸ Xin yeēṇa, golgacnaṇ sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnēz Dios no ne, ni scagaa tsod pe nacre pe dzeb tsonie zdoo ne zeeṇe laa ne gbig lo me. ²⁰ Teṓ zha ne rdzieb zdoo, sac rien zho noyund zho miṇe rnabey Dios, ib tedsod zlisqui Diosa lo zho; sac teṓ me grēsew naṇ me. ²¹ Xin yeēṇa, laa zha ne desde zdoo zho naṇ zho noguiṭsd zho miṇe rnabey me, scagaa tibliladzse gbig zho lo me; ²² hor cosi ncuaaṇe gnabtaa zho lo me squiaadiag mew, sacne mban zho zigne rnabey me, ni noxco zho noyund zho ncuaaṇe rdziladz me. ²³ Ni lēē miṇ rii rnabey me: Grēse miech, none dib zdoo zho gliladz zho Jesús meṇ ne nac Xpēēd me, ni gleynie zho samiech zho zigne psanle me diidz ga. ²⁴ Grē zha ne ron diidz ruṇ miṇ co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacie ne.

4

¹ Bets, bzian, zha ne gnē zhiEspiritu Dios nacie zho, goon ye zho quianee Xtiidz me lo miech; ib guṇde to ne lēēld gliladz to xtiidz zho, sinque golwigazh dieṇ pe nli zhiEspiritu Dios nacie zho. Sac ndal grē zha ne quianzē lo

guidzliu, rquidie zho rnee zho Xtiidz Dios noteed zho. ² Parne guieṇ to dieṇ pe nli zhiEspiritu Dios nacie zho, golwi dieṇ zha rzac zho Jesús: Teṓ zha ne rililadz ne nli zig tib miech goc me biaad me lo guidzliu, ga rlu ne nli zhiEspiritu Dios nacie zho. ³ Laa teṓ rililadz zho ne nli sca biaad me, nli dzigo zhiEspiritu Dios nacie zho; sinque lēēle espiritu ne rtsidil Jesús ga nacie zho. Laa to binle ganle ib laa espiritu co guiaad; ni lēēle espiritu ntseeb co nacie grē zha ne squi quianzē lo guidzliu niina.

⁴ Xin yeēṇa, sangue to xnēzle Dios ngab to, yquidiedraa zha co to, sac gon mazdraa nroob poder rap meṇ ne nacie to, lēdle espiritu ne nacie grē zha ne sca zienal grē wseed yozh ne no lo guidzliu. ⁵ Grē zha co, ncuaaṇe rac lo guidzliu rii nonie guic zho; gacxe waa, niapse lēēw rnee zho, ni gagaa grēque zha ne rleynie grē ncuaaṇ co, zha co rililadz zhiwseed zho. ⁶ Sangue ne xnēz Dios no ne. Ni scagaa zha ne ruṇbey Dios, zha co rquiaadiag miṇe rnee ne; laa grē zha ne ruṇbeyd me, rquiaadiagd zhow. Gase na ganle rlu cho zha nacie zhiEspiritu Dios, ni cho zhagaa nacie espiritu ne ziaadquidie miech.

Rleynie Dios miech

⁷ Bets, bzian, golgotsaa gleynie ne samiech ne, sac gon, teṓ Dios grēse ne rleynie me ne. Gacxe waa, zha ne rlu nli rleynie zho samiech zho, gase rlu ne nli xpēēd Dios nac zho, nli ruṇbey zho me. ⁸ Laa grē zha ne rleynied samiech, ruṇbeyd zho Dios ga gane sca ruṇ zho; sac gon ib Dios rneedz guieṓbiini lo ne gleynie ne samiech ne. ⁹ Gotsaa gwi ne ganle, pa lotaa rleynie me ne: Tibpaa Xpēēd me, ni pxeel me me bi-aadtizh me xtoꞓ ne, zeeṇa ygaa ne tib guieṓmban ndzon ne gdziṇd dze lozh. ¹⁰ Led guiabd ne togo glo miech bleynie Dios gane rleynie

me zho niina; led scada, sinque ible zdoo me gola rleynie me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleynie Dios ne.

¹¹ Bets, bzian, zigne scataa rleynie Dios ne, scaquegaa ne nagon none gleynie ne samiech ne. ¹² Gard tso tib zha ne gan Dios, per zha ne rleynie samiech, me ga nacie zho; ni zigse zie dze dib zdooraa zho rleynie zho samiech zho.

¹³ Me nac men ne pxeel zhiEspíritu me nacie no, parne glu nacie me no, ni scagaa no nacie no me. ¹⁴ Ni stiba, grop lo no bdziõn no biaad Xpëed me biaadsilaa me miech lo dol; ni min co nonee no lo miech niina. ¹⁵ Grëse zha ne riladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

¹⁶ Ndion ne ganle nli rleyniedox Dios ne, sac rienpaa ne rleynie me ne, ni riladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacie zho Dios, ni scagaa me nacie me zho. ¹⁷ Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacie ctoladz ne, pe nacie gdieb ne gdziõn dze ne laa me gun xquielwxtis me; sinque haxta gley ne dzian ne me gal dze co. ¹⁸ Nod pe nacie gdieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien

zho ne rleynie me zho, ni gardgaa guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne. ²⁰ Tel zha ne rnee, rleynie zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ¿pe lel Dios dzigo gliladz ne nli rleynie zho, ni nac me men ne rand zho? ²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

5

Zac csaan ne ncuaañe runctal xtol ne

¹⁻² Grëse zha ne dib zdoo riladz ne ible lëe Men ne zëeble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed. ³ Sac zeene rleynie ne Dios, zun ne grëse mine rnabey me. Ni grë mine rnabey Dios, nacda ncuaañe guiab ne grieelod gun ne; ⁴ sac grëse zha ne nacle xpëed Dios, totsaque rnalo zho ne Jesús gun xyudar zho, gac-wetraade zho lo grë ncuaañe gunctal xtol zho. ⁵ Gulgacnan sca: zha ne dib zdoo riladz Xpëed Dios nac Jesús, zrieelo zho csaan zho grëtaa ncuaañe runctal xtol zho.

⁶ Tel ne, ndion ne ni riladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espiritu Sant nolu ganle ne scaw, ni mine rnee me diidzliw.

7-8 Gotsaa gwi sca ganle, tson mod rlu cho nac Jesús: Tiba por mine nolu Espiritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espiritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. ⁹ Mine rnee Dios, none gliladz new. Xtiidz samiech ne name rliladz ne, ¿pe lel mine rnee Dios dzigo gliladzd ne? ¹⁰ Zha ne gliladzd mine rnee Dios, rrieequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús. ¹¹ Laa me bneele ganle: zha ne gnalo Xpëed me, zgaa zho tib guielmban ndzon ne gdzind dze lozh; sac Xpëedse me rdeed guielmban co. ¹² Gacxe waa, zha ne rnalo Xpëed me, laa zho bgaale guielmban ndzon co; sangue zha ne rnalod Xpëed me, gard yгаа zhow.

Bgaale to guielmban ne gdzind dze lozh

¹³ To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdzindraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuane rio zdoo me rnab ne lo me; ¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuane rnab ne.

¹⁶ Zig nac zeene gan to cho tib zha ne nacgrè to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon. ¹⁷ Nli grëse guielntseeb dol naca, per no mine rnitlod miech. ¹⁸ Ni ndion ne ganle, zha ne nacle xpëed Dios rundraa zho ne lega gunctal zho xtol zho; sac Jesús men ne nac Xpëed

Dios, men co quianap zho, grielodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zienal ncuane rnabey mendox, ²⁰ sangue ne, laa Xpëed Dios biaad bdixbiini me xquielrien ne bdziunbey ne men ne nacpaa Dios. Niinasi laa ne ngable lo men ne nacpaa Dios ga, ni lëe me ga nac Jesús. Me nac Dios nguiamban, ni me nac men ne rdeed guielmban ndzon ne gdzind dze lozh.

²¹ Xin yeena, golguien Diosse nac men ne gleynie to; gunde to ne lel grë ncuane no lo guidzliu rii gleynie to, laa ne gleynie to Dios.

Juan

BROP GUILTS NE PQUIAA JUAN

¡Diuzh to grëse to!

¹ Laa tib zhagol rii rxeel tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleynie naa to gon, ni led naadsegaa, sinque ye grëraa zha ne runbey diidzli ne nac Xtiidz Dios. ² Rleynie no to sacne tibaque nac diidzli ne rliadz ne, ni tsod dze ne csaan new.

³ Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaa-nia Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoz ne.

⁵ Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gon to; sac gon, lëëquew ga bdzion ne zeene psilo bliladz ne Xtiidz Dios. ⁶ Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷ Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho. ⁸ Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblrique golgac, zeena ygaa to grëtaa guielnzaac ne no gneedz Dios lo to. ⁹ Sac gon, zha ne csaan mine nacpaa zhiwseed Jesús, led

xnëzdraa Dios ga no zho; ni scagaa, zha ne zienalpaaw zigne naca, zha cosi xnëz Dios ga, xnëz Xpëed me Jesús ga no zho. ¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csaanziiu to zho; ¹¹ sac telne sca gon to, rreeequia yele to rleynie grë zhiwseed yozh zho ga.

¹² Ndal grë ncuane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbly ne dzio ne grë ne.

¹³ Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeel bdiuzh lo to grëse to.

Juan

BION GUITS NE PQUIAA JUAN

¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, rnab naa lo Dios zigne squi wen mban luu nēz lo me, scaque zaacse grieequia grētaa ncuaañe gun luu, ni gneedz me guieñdaan lo luu. ³ Ne nlipaa bleynaa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu mine nac diidzli. ⁴ Ne nligaa, nodraa pe stib conley zdoonaa zigne rleytaa naa zeene ron naa ine niowse mban grē zha ne biane naa xtiidz Dios lo, zienal zho mine nac diidzli.

⁵ Bets, ziyon naa squitaa tibaque noxco luu run luu xyudar grē zha ne nacgrē ne, ni mazdraa zeene nac zho zha ne ziaad stib guiedz. ¡Wen ga! ⁶ Squi ndxie grēraa zha ne rliladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeena grieelo gdziñ zho zaatne no tsie zho. Sca rdziladz Dios. ⁷ Sac gon, niapse porne rleyne zho Dios, laa zho brie ziegun zho xtsiin Jesús, ni ib rziguield zho ycaania zho ncuaañe rdeed grē miech ne rliladz Xtiidz Dios. ⁸ Min co nagon, ib none ne yquiambiaazlo zho, ne none gdeed ncuaañe yquiin zho, zeena dziuun ne xyudar zho ygaaz Xtiidz Dios.

⁹ Pxelle naa tib guits lo grēse zha ne no xnēz Dios i, per zig nac Diótrefes gon, men ne racladz so gnabey lo to i, rond me mine rnee no. ¹⁰ Gacxe na, telne laa naa guial i, dzigo laa naa glisqui lo me dien pe nacne quianeñe me no.

Ni tebaa mincose, na haxta run me ib rbēzlod me grē zha bets, zha bzian ne rlanso i; niicle rdeetegaa me diidz cho gdeed zaatne cuēz zho. Zha ne run mine racladz me, rbee me zho lad grē zha ne nacgrē zho.

¹¹ Bets, sangue luu gon ib tsienald luu mine run grē zha ne sca run guieñtseeb, sinque bioxco güeynal ncuaañe ndzinli. Sac gon, zha ne run niapse ncuaañe ndzinli, xnēz Dios no zho; laa grē zha ne run ncuaañe ntseeb, gard seēb zho xnēz Dios.

¹² Zig nac Demetr, grēse miech rnee ganle zaacse mban Demetr. Ni rlugaa nliw, sac gon tibaque zienal me mine nac diidzli. Niicle nogaaw, mincoque rnee no, ni nan luu ganle led yed no rquidie.

¹³ Ndalraa ncuaañe no gne naa lo luu, per racladz naa gzodiidz naaw lo luu lo guits rii; ¹⁴ sac laa guic naa no guialgan niob naa luu i, dzigo hor co ziodiidz ne grop ne.

¹⁵ Guiaannie Dios luu sca; peet tsienied guic luu. Grēse xamigw luu zha ne runbey luu nu, laa zho rxeel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nēz qui.

Juan

GUITS NE PQUIAA JUDAS

¹ Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

² Dios glu ganle pa lotaa rquia zdoo me to, pa lotaa rleyne me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguelraaw cso naa diidz lo to, ib gandzede to grë zha ne rtsidil mine rliladz ne. Dios bneedz diidz gocndion new, ne nac ne zha ne brieel dol bziaab ne xnëz me. ⁴ Sac gon, blalaa zha ne rquiaalo rliladz Dios, ngeets zhli-aan laa zho bzëëb lad to i. Miech yozha, niapse lo dol no zho, rnee zho zac gun ne ncuane guiaabtaa guic ne, sac nquialadz Dios ne; ib rliladz zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

⁵ Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guielne ne noded zho Egipt ga, zha ne brieequia ib bnëd niunbey me, ib gondzed me zho, bnitlo me zho. ⁶ Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdziin dze ne laa me gun guielwxtis. ⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne

bio grë guiedz co, laa zho güeynal mine nacdreaa guieltsieel, tel chotaa pquiangob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquielntseeb, no tib lo guidox ne gdziin dze guiuu, ni ga nitlo zho. ⁸ Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: “iDios nac men ne gunquizh luu mine run luu i!” ¹⁰ Laa grë zha qui, haxta grë ncuane run Dios, ncuane ni rioguid zho zha nac, laa zho rdzibdeew; masaque mban zho zigne mban grë ma, laa zho run ncuane rdeedtaa guxt xcuerp zho; lëëque zha nonitlo zho ga. ¹¹ iProbsaxe zho! Sac gon, nëz ne zey Caín ga zienal zho. Lo guielblë dimi, laa zho brieel xnëz Dios zigne brieel Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guien lo zho. Nëzrii nëzrec quianë zho, masaque nac zho zig nac xcow ne ziaadnied nisguie, loxaque nëzrii nëzrec rienie mew; zig nac tib yag bgool ne guien nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliaadzle dib lo; sac tel yag bidza, gdziindraa dze ne yguiaw. ¹³ Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuane mbeeguie to ne quiayun zho. Laa zho ziele nëz

lo guielcowdoo ne rieguaļ zho, zaatne gdziņdraa dze griece zho; zig tib meļ gbaa ne bnitnēzle, laa ma nonziaabse lo guielcow.

¹⁴ Lēēle zha qui ga bzeet Enoc (meņ ne brieequia lo dii ne rac xoop xtii Adán), zeene psiaab Dios guic me, rēb me: “Golwi ganle laa Dios ziaad, pe zhidaa grē anļ ne ziaadnie me, ¹⁵ ziaadgun me guielwxtis. Grēse miech ntseeb, laa me gunquizh zho grētaa doļ ne been zho, grētaa diidz dox ne briece ro zho bneenē zho me.” ¹⁶ Ni nligaa sca nac grē zha qui, ib nod ncuaaņe tso zho conform, tibaque wļisqui no zho; laa zho zienal grētaa guielyozh, ncuaaņe racladz-taa xcuerp zho. Rto zho guieldzin, rlozhd dieņ pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho miņe racladz zho.

Laa naa rso diidz lo to

¹⁷ Saņgue to bets, bzian, golsoladz miņe bnee grē zha ne pxeel Jesús bnee Xtiidz me, zeene biadseed zho to; ¹⁸ led znu rnee zho: “Zeene zhile gdziņ dze ne laa guidzliu rii nitlo, zrieequia grē miech ntseeb ne gzhidznie zhiwseed Jesús, laa zho gban zigne nactaa grē zhgab yozh ne guiab guic zho.” ¹⁹ Ni nligaa raņ to niina ganle sca quiay-aca, lēē grē zha co i squi nogodil grē zha ne no xnēz Jesús. Nacnied zho Espiritu Sant, gane niapse grē ncuaaņe doļ ne racladz xcuerp zho, miņ co ruņ zho.

²⁰ Bets, bzian, golguien sca tibaque dziits golso lo Xtiidz Dios miņe rliladz to. Golzodiidznie Dios, zigne csiaab Espiritu Sant zdoo to.

²¹ Sozite to lo Dios, golguien ganle zha rleyņietaa me to; golquiambēz dzian ne gal dze ne ygaa ne guielmban ne gdziņd dze lozh, miņe ndionpaa ne gneedz Jesús meņ ne rnabey ne, porne rquia zdoo me ne.

²² Teļ cho zha ne racchop guic lo Xtiidz Dios, golnee lo zho bire sodziits zho stib. ²³ Zha ne bii no lo doļ, golnee lo zho guien zho csaan zhow; golcuae zho lo gui ne noxtseeb zho ygaa zho ga; scagaa grēraa miech, golquia zdoo zho, per ib cxende to lo zho. Ni lalnu gdziguiende to grē doļ ne ruņ zho, golsaca zig rzac to tib ncuaaņe rbixnē zdoo to raņ to.

²⁴⁻²⁵ Tibaque Dios no, me psilaa ne lo doļ, ni megaa csilaa grēraa miech. Meņ nroob nac me, ni zrieelo gacnieņ me to guiabde to ladznia doļ stib; zeena iņe mbe to, iņe rley to laa me gdziņnie to zatne nac lo guielndzondoo ne no me. Niina ne laa ne rdziuunbeyle Jesús, zrieelo dzioolnie ne me, mese nac meņ nroob, meņ ndzon, meņ ne rap guielrnabey. Tibaque nac me, niicle mazd glow, niicle niinaw, ni gdziņd dze ne gdzēē me.

Judas

MINE BDEED DIOS DIIDZ GON JUAN

¹ Nu raquiet grē ncuaaṇe ziaady-oble gac. Dios bnabey Jesús glu mew lo grē zha ne no xnēz me. Nacne pxeel Jesús tib xanj̄l me biaad biaadluw lo ngundziin win ne nac naa nu, parne sca gac-naṇ zhow. ² Grēse miṇe gon naa, grēse miṇe bin naa ga, laaw gne naa zigne gonse naaw, zigne binse naaw. ¡Diidzliw! ³ Dichos grē zha ne glab lo guits rii, ni dichos grē zha ne yquiaadiag grē miṇe zhobnee low nu, ycaania zhow ni gliladz zhow; sac gon xtiidz Diosa, ni laa dze ne gac grē miṇe rzeeta nu, ziaadgaxle.

⁴ Naa nac Juan, laa naa rquia guits rii rxel naa ziaad lo to i, ne nacto zha ne ngab xnēz Jesús, zigne nose to gza gadz guiedz ne ndxie nēz Asia i.

Dios meṇ ne no padzeela, meṇ ne no niina, meṇ ne nacle diidz guiaad, me gacniēn to lo grē zhizhgab to, me cchoobladz zdoo to peet tsienied guic to; me ni Espíritu ne zo lo me zaatne nac lo xcan ndzon ne zob me; Espíritu ne rlu zha nac gadz guiel̄biini ne rap me; ⁵ ni Jesús meṇ ne rnee niapse diidzli, meṇ ne glopaa brieēban lo guiel̄gut, meṇ ne rnabey lo grēse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me ne, bleeladz me me bzhiee xchen me psan̄mbe me ne lo grētaa xtōl ne, ⁶ tibaque been me ne, psan̄non me ne; bzooblo me ne gac ne pxoz ne gun̄ dziin lo Dios meṇ ne nac Pxoz me. ¡Mese nac meṇ ne rap guiel̄ndzon, mese rap grētaa guiel̄rnabey! ¡Tsod cho stib zig me, ni gdziṇd dze ne nitlo xquiel̄rnabey me! Sca nac me.

⁷ ¡Bii zanaque to gan̄le zeene laa Jesús ziad-zēēb lo xcow! Grēse miech zaṇ zho me, zig nac zha ne sca bdiṇ me, zha ne sca bliz lanz cue me, zaṇlo zho me; dibdoo guidzliu, hor co mbanse gac miech, haxta zoon zho, haxta zdieb zho. Ible sca none gaca.

⁸ Znu rnee Dios, meṇ nroob ne rap grēse guiel̄rnabey: “Grēse ncuaaṇe notaa, naa psilow ni naa csiaala; naa nac zigne nac letr “a” ni letr “z” lo grēse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guial̄ stib.”

Gon Juan Jesús

⁹ Naa nac bets to Juan, tibaque nac ne niina grē ne, sac ye naa no xnēz Jesús; ye naa nodeed grē guiel̄nē ne noded to. Zigne rneedz me paciens lo to lēb to lo grētaa guiel̄nē ne no gan̄ to, scaque racniēn me naa; ni ye naa gdziṇ lo me, zaatne no gdziṇ to.

Sodiidz naa lo to gan̄le zha bzhaac naa. Lēētaaque no naa lo guidzliu win ne lē Patmos, ga ngoguiu zho naa loxaque ne noseed naa miech Xtiidz Dios, miṇe biaadlu Jesús zeene biaad me lo guidzliu. ¹⁰ Tib dze, lēētaaque nacie Espíritu Sant naa nozodiidznie naa Dios, tibaque zeene nguiedz zēēb tib tsi meṇ co, pale tsi tib trompet; ¹¹ nē me lo naa:

—Grētaa ncuaaṇe ran̄ luu nu niina, pquiaaw tib lo guits pxeela lo grēse zha ne ngab lo naa, grē zha ne no gza gadz guiedz rii nēz Asia: Efés, Smirn, Pérgamo, Tiagir, Sardis, Filadelf, ni Laodicé.

¹² Ptsire lo naa ni naa gwi naa diēn cho ga sca rnee lo naa. Zeene bui naa, gon̄ naa gadz candeler niaa niapse guiib or. ¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziṇa haxta yaṇ ni me, ni ndxie tib cinch niaa niapse guiib or ngali ro zdoo me.

¹⁴ Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me. ¹⁵ Ni mew, masaque rquiabniw zigne rquiabni guiib brons zeene rlozh riaaꝛmbew, zeene rrieenēzgaaw lo gui; tsi mew, masaque rio bi rnee me zig rio bi grē guiubee nroob ne zhoob naal nis. ¹⁶ Nia me miñe nēz derech, nzhen me gadz mel gbaa; ni zob tib spad ro me, zig-taa nēz zhits spad cow zigtaa nēz low, gropsē nēza ndox. Masaque biinidoo ne rree lo me, zigne rlu lo ngbidz zeene lega recye lo ngbidz.

¹⁷ Zeene goꝛ naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—jGdzieebd luu! Naa psilo ni naa csiaal, naa psan grētaa ncuaane no, ni naa gnitlow; ¹⁸ ni mban naa. Nli gut naa per briebaan naa, mban naa niina, ni gdziꝛndraa dze ne guet naa; lадznia naa no guielgut. jGdzieebd luu sca! ¹⁹ Grēse ncuaane noyaꝛ luu nu niina, pqiaaw lo guits grēsew, niicle miñe noyaclew, miñe naragaa gaca. ²⁰ Znu goꝛ nac miñe blozh goꝛ luu ga: gadz mel gbaa ne goꝛ luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

2

Diidz ne bnee Jesús lo zha Efés

¹ Blozh ga nē me lo naa:

—Miñe gni naa lo luu nu niina, pqiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz meꝛ ne nzhen gza gadz mel gbaa co, meꝛ ne zodeed vuelt lo gza gadz candeler ne niaa niapse guiib or ga, rnee me:

² 'Raꝛ naa zha mban to, raꝛ naa pa lotaa noxco to ruꝛ to xtsin naa, ni nacde to zha ne lega znuse guiaaꝛ zdo; stiba, ib raꝛdzede to

grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to beꝛ to zho prueb, haxta gocnaꝛ to rquidie zho. ³ Naꝛ naa zha nactaa guielnē ne noded to loxaque ne riladz to naa; per niicle scaw tibaque dziits zo to, ib riaaꝛnd zdo to.

⁴ 'Loxaque naca no tib ncuaane glisqui naa lo to: jRleyniedraa to naa niina, zigne rleynietaa to naa glo, zeene glopaa bliladz to xtidz naa!

⁵ Goꝛsoladz pa lo pxin to. Goꝛbiire golgac stib zigne nac to glo zeene psilo bliladz to xtidz naa; sac goꝛ, telne gac-wende to, ible zial naa i zialticee naa xcandeler to zaatne zow.

⁶ 'Nli rleyniedraa to naa scataa, per rley naa raꝛ naa ib rdzigiende to grē ncuaane ndzinlid ne ruꝛ zha Nicolaít, sac tel naa, ni lalnu ib rdzigiend naa ncuaane ruꝛ zho.

⁷ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaane guꝛntal xtol zho, zha co ygaa gow xnex yag ne rdeed guielmban ga, miñe zob len huert ndzon ne rap Dios ga.”

Diidz ne bnee Jesús lo zha Smirn

⁸ Blozh ga nē me lo naa:

—Pquiaa miñe gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: “Znu nac xtiidz meꝛ ne psilo grētaa ncuaane no, meꝛ ne csiaala, meꝛ ne gut ga ni brieaban me, rnee me:

⁹ 'Raꝛ naa zha nactaa grē guielnē ne noded to. Raꝛ naa mban rac to guieꝛnd grē ncuaane yquiu to (nli-gaa peet rapde to lo guidzliu, per guielnzaac ne bgaa to i ngab to lo Dios, nroob nona). Raꝛ naa, grē zha ne rnee i xpēed Dios zho sac zhasi zha Israel nac zho, no zho rneenē zho to; per nliid goꝛ xpēed

Dios nac zho, sac zhiwseed men̄dox zienal̄ zho.

¹⁰ 'Nroob grē guiel̄nē ne zi-aadyob gan to, per gdziebde to. Squiil̄ men̄dox miech, gnab zho tso to ladzguiib; ga nagon̄ glu to dien pe nli dib zdoo to riladz to naa. Nli nzianlaa to guiab ladzguiib, per tib tsiise ngbidz sca yquiaanal̄ zho to. Laga mban to lo guidzliu sca, ible csaande to zhiwseed naa, zeena ycaania to guiel̄mban ndzon ne gnedz naa lo to.

¹¹ 'Zha ne rioguicle godiidz rii, yquiaadiag zho ganle zha rnee Espiritu Sant lo zha ne no xnēz naa, rnee me: Zha ne tiblique tsoxco gun̄ mine rnabey Dios, led yedraa zha co tsoxtseeb guey gabil̄.”

Diidz ne bnee Jesús lo zha Pérغامo

¹² Blozh ga, nēque me lo naa:

—Mīne gni naa lo luu nu, pquiaaw pxeela Pérغامo, lo zha ne quianap grē zha ne ngab xnēz naa ga, gudz lo zho: “Znu nac xtiidz men̄ ne nzobro tib spad lots ne ndox gropse nēz, rnee me:

¹³ 'Nan̄paa naa masaque men̄dox rnabey lad guiedz ne no to i, per ran̄ naa tiblique dib zdoo to rnalo to naa, niicle gon̄ to zha psacsi zho Antip, beet zho me i, men̄ ne scataa bioxco bnee xtidz naa lo miech.

¹⁴ 'Per no chop ncuaane gon̄ glisqui naa lo to: Lēda i run̄ to randze to grē zha ne squi run̄ zigne been̄ Balam, men̄ ne pquiil̄ Balac bloo Balac guic grē zha Israel been̄ctal zho xtol̄ zho, dow zho xpēel̄ grē ma ne biogon lo mdio, ni pquiangob zho zha ne led tsiemeld zho. ¹⁵ Lēē tiba ga, laa stiba, randze to zha ne bī zienal̄ zhiwseed yozh zha nicolaif; tel̄ naa, ni lalnu rdziguiend naa wseed co.

¹⁶ 'Laa naa rso diidz lo to: gol̄nab perdon, ni gol̄nee lo grē zha co csaan zho grē ncuaane ndzinlid ne run̄ zho; sac gon̄, tel̄ne gond zho

diidz, ible zial̄ naa zial̄tīnie naa zho con spad ne zob ro naa nu.

¹⁷ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Zha ne gdeete diidz lo grē ncuaane gun̄ctal xtol̄ zho, zded naa guiel̄wagw ne rap naa gbaa yquiin zho; ni zded naa tibga quie nquits lo zho, lo quie co quia lē cub zho, ni zhase gacnan̄ zha nac lē co zho.”

Diidz ne bnee Jesús lo zha Tiatir

¹⁸ Blozh mīn co, nē me:

—Ye lo zha ne quianap zha ne no xnēz naa guiedz Tiatir, pxeel̄ diidz rii, gudz lo zho: “Znu nac xtiidz Xpēed Dios, men̄ ne masaque riaazbel bziaalo, men̄ ne masaque rquiabni ni zigne rquiabni guiib brons ne tibaque riar; rnee me:

¹⁹ 'Nan̄ naa grēse zha mban to; ran̄ naa pa lotaa rleynie to naa, dib zdoo to riladz to cho nac naa, noxco to quiaayun̄ to xtsin̄ naa, tiblique rac to dziits zo to lo xtidz naa; ran̄ naa noxcoraa to quiaayun̄ to xtsin̄ naa niina.

²⁰ 'Per no tib ncuaane no glisqui naa lo to: lēda i gon̄ run̄ to randze to wnaa ne lē Jezabel i, rnee me Dios rsiaab guic me grē ncuaane rnee me, per nlida; sac gon̄, lox- aque noquidie me grē zha ne no xnēz naa, noquiil̄ me zho rquiangob zho grē zha ne led tsiemeld zho, ni row zho xpēel̄ grē ma ne riogon lo mdio. ²¹ Blactaale pquiambēz naa nab me perdon, ntsēē me lo xquiel̄mban me; per nēd me csaan me grē guiel̄yozh ne run̄ me i.

²² 'Gacnan̄ to sca ganle, laa naa gnabey glan me tib guiel̄guidzdox, tsiechedraa me lo caxtigw co; scaque grēse zha ne zienal̄ zhiwseed me, nroob guiel̄nē ne gnabey naa ted zho, tel̄ laa zho csaand grē guiel̄yozh co. ²³ Ni haxta zut naa zho, zeena sca gan̄ grēse miech ne no xnēz naa ganle, naasi

nañ naa pe rza guic miech, pe rza zdoo zho; gacxe waa, tel pe ncuaane run zho, zdedse naa mine rieguial zho tib tib zho.

²⁴ 'Sangue to grë to zha ne zienald guelyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to. ²⁵ Per none gon tiblque golgac, zeena ine dib zdoo to rnalo to naa gal dze ne laa naa guial stib. ²⁶⁻²⁸ Sac gon, grëse zha ne gdeete diidz lo grë ncuaane gunctal xtol zho, sinque tibaque tsoxco zho gban zho zigne rnabey naa, haxta gdzin dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grë guiedz. Naa gded guielrnabey co lo zho, zigne bneedz Pxoza naaw lo naa; ni lalnu yquiad zdoo zho, grëse miech ntseeb, zunquish zho zho grëtaa guielntseeb ne been zho.

²⁹ 'jGrëse zha ne rioguicle godiidz rii, yquiaadiag zho ganle zha rnee Espiritu Sant lo grë zha ne no xnëz naa!"

3

Diidz ne bnee Jesús lo zha Sardis

¹ Blozh ga, në me:

—Mïne gni naa lo luu nu, pquiaaw pxeela guiedz Sardis, lo zha ne quianap grë zha ne ngab xnëz naa, gudz lo zho: "Znu nac xtiidz men ne nzhen gadz mel gbaa, men ne nacie zhiEspiritu Dios, Espiritu ne rdeed gadz guielbiini, rnee me:

'Nan naa gon pe nac grë ncuaane run to, niicle zëeb diidz mban to, per par naa miech gutle nac to. ² jGolcuae zhimcaalo to sca! Golsodziits lo spalalse xtiidz naa mine rsoladz to, sac gon zhile laa to lozh guiaanladza. Ne nligaa, ran naa quiaayunde to xtsiin Dios zig none gaca. ³ Golsoladz ganle zha nac grë wseed ne gocnan to, grë

wseed ne bin to; dzigo goltsienala, ni golnab lo Dios gun me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzëeb ngbaan lidz.

⁴ 'Sca nac to, per lo to i gon no bla zha ne bii mbe zdoo, sac zienald zho grë ncuaane run to; rriequia rdeete zho diidz guiacbeed xab nquits zho ga. Ni zha co nagon rieguial sënal zhits naa, sac gop zho xab zho cuidad.

⁵ 'Golgona ganle, grëse zha ne gdeete diidz lo grë ncuaane gunctal xtol zho, scaania zho tib lar nquitsbie gacw zho; lë zhow, lëë quialew lo guits ne quia lë grë zha ne yгаа tib guielmban ndzon ga; haxta zanie naa zho lo Pxoza naa ni lo grë xanj me, guiep naa: Lëe zha rii gon no xnëz naa.

⁶ 'Zha ne rioguicle grë godiidz rii, yquiaadiag zho ganle zha rnee Espiritu Sant lo grë zha ne ngab xnëz naa."

Diidz ne bnee Jesús lo zha Filadelf

⁷ Blozh ga në me:

—Mïne gni naa niina, pquiaaw pxeela guiedz Filadelf, lo zha ne quianap grë zha ne ngab xnëz naa, gudz lo zho: "Men mbe ne rapd ni tib dol, men ne rnee niapse diidzli, men ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸ 'Nan naa grëse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rliladz to naa. Gacxe waa, rriequia laa naa rxal tib puert ted to, ni choot grieelod csioog puert co. ⁹ Bii zan to ganle, zeene laa naa cxel gza zha ne ngab lo mendox i, guiaad zho guidaquitsgzhib zho lo to, zha ne noquidie i rnee zho xnëz naa no zho. Ga gan zho ganle nli rleynie

naa to. ¹⁰ Ne squi tiblīque rac to ron to xtidz naa, peet gūeynied guic to niicle pquianaḷ miech to, ible squianaap naa to, gande to guielnēdox ne gaṅ grē miech ne ndxie lo guidzliu.

¹¹ 'Golṣoladza ganle, merle guial naa. Golṣuien csaande to xtidz naa miṇe nanle to, zeṇa tsod stib zha ne ctiche miṇe riēguial to gnedz naa lo to. ¹² Grēse zha ne gdeete diidz lo grē ncuaaṇe guṅctal xtol zho, so naa zho gac zho zig grē pilar nroob ne zo leṅ xyadoo ro Dios, ni gdzindraa dze ne greee zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rnabey Dios ga; lēē guiedz co nac Jerusalén cub ne gnabey me quiet gbaa.

¹³ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa."

Diidz ne bnee Jesús lo zha Laodicé

¹⁴ Ni nē me:

—Miṇe gni naa niina, pquiaaw pxeela guiedz Laodicé, lo zha ne quianap grē zha ne ngab xnēz naa ga, gudz lo zho: "Meṅ ne rnee niapse diidzli, meṅ ne ruṅ grēse miṇe rnabey Dios, meṅ ne bzo Dios psan grēse ncuaaṇe no, znu nac xtiidz me, rnee me lo to:

¹⁵ 'Naṅ naa grēse zha mban to. Raṅ naa noxcode to grē miṇe rnabey naa to, ni niicle rsaandgaa tow; nac to zig nac tib ncuaaṇe loxaque ndzēyopse, niicle niagda ni niicle nlēēdgaaw. ¡Tebaa nac to zig tib nis yag, zig tib nis lēēgaal! ¹⁶ Per na goṅ ne squi nac to zig tib nis ndzēyopse, ni lalnu rdziguieṇd naa ncuaaṇe ruṅ to. ¡Zhile goṅ laa to guṅctasib naa!

¹⁷ 'Rnee to grēse ncuaaṇe rquieṇd to laaw quianiele to, ible peet li-aadz racdraa lo to, ¡ni riēnde to goṅ ni lalnu peet nonde to! To nac miech ne mazdraa mban, peet

rapde to, ni lar ne ctse lad to guieṇd, rrieequia haxta ni lo to roldraa. ¹⁸ Laa naa rso diidz lo to: Teḷne racladz to nliṇaa gapcheṅ to, goltē lo naa, naa cto guiib or ne mazdraa wen lo to; xab tow, naa cto lar ne mazdraa nquits gacw to, zeṇa ctoladzniedraa to to ne squi guieṇd pe ctse lad to; haxta nis rmed ne tso bziaalo to, naa gnedza, zeṇa gbiire gaṅ to stib.

¹⁹ 'Grē zha ne rleynie naa, rliṣqui naa grē ncuaaṇe nonguiēld ne ruṅ zho, rteed naa zho tib caxtigw parne cseed zho ndzinli gban zho; gacxe waa golṣac ndzinli stib, goltsoxco miṇe rnabey naa. ²⁰ Laa naa quiambēz to goṅ gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sēēb naa, zdeed naa, ni haxta sobnie naa zho diowxtsee no grop no. ²¹ Grēse zha ne gdeete diidz lo grē ncuaaṇe guṅctal xtol zho, zded naa diidz sob zho cue naa, zaatne sob naa gnabey naa; zigne zoob naa cue Pxoṣ naa niina nonabey no; sac teḷ naa, bdeṭe naa diidz niuṅ naa miṇe rnabey meṇdox.

²² 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa."

4

Roolnie zho Dios gbaa

¹ Zeēne bui naa stib, goṅ naa laa tib puert quia zhan gbaa, nzhialse puert co. Horco biire bin naa tsi meṅ ne bnee lo naa ga glo, meṅ ne nac tsi ga zig tsi tib trompet, nē me:

—Biep, dē nu ganle, zeṇa glu naa lo luu zha nac grē ncuaaṇe ziaadyob gac.

² Zigne sca nē me, hor co blu Espiritu Sant lo naa, goṅ naa laa tib xcan zo gbaa, tib xcan ne rzob meṅ ne rnabeya. Lo xcan co, ga zob tib meṅ co, ³ masaque rbebni me zigne rbebni quie ne rnee zho

jasp, quie ne rneegaa zho cornalin. Igose xcan co quia tib guitye, rbebniw zigne rbební quie ne rnee zho smerald; ⁴ ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me. ⁵⁻⁶ Masaque riab belye, ratsie rnee nguzi, ni zëëb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebela zig rbebel quie zed; ni noquia gadz biini nroob ga, lëë gadz biini co nac gadz guie|biini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhit-saquew zob bziaalow. ⁷ Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe. ⁸ Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëëb tsiw, rneew: ¡Meñ ndzondoo nac Dios!

¡Meñ rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

⁹ Gza tap bult mban co, roolniew men ne zob lo xcan co, (men ne gdziñd dze guet) rsannona me, ni rdeeda xquizh lo me. Zigse sca run gza bult co, ¹⁰ scasaque gza galptap mengol ne zob ga, rquitsgzhíb me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

¹¹ Luu nac xDios no, luu nac men ne rnabey no.

Luuse nac men ne riegua| dzi-uunnon no, ni gnee no grë diidz ndzon lo luu. Nroob poder ne rap luu, sac grëtaa ncuaane no, luu bzaaw; laaw biaa sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz lë cint

¹ Zeene bui naa stib, gonpaa naa men ne zob lo xcan ro co, nose tib guits nroob nia derech me. Gropse nëz guits co quia, ndibëdsew, nzhidoo-gaw gadz lë cint. ² Ni gon naa tib anjl, tib men macis rlu me, nguiedz zëëb tsi me, bnaabdiidz me rëb me:

—¿Cho riegua| cchug cint ne nzhidoo guits qui, cxal zho low?

³ Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

⁴ Mban goc naa, psilo naa nguiedz roon naa, gon naa sca brieequiad tib zha ne riegua| nخال lo guits co, nlab zho low. ⁵ Dzigo bnee tib mengol ne zo gax lo xcan co, në me lo naa:

—Goond luu. Lëz ganle, men ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me riegua|a, sac gon psiaablo me grëse zha ne rlëë lo me; rrieequia nac me zig tib meedz.

⁶ Horco bui naa zaatne nac lo xcan ro co, gon naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guie|biini ne rdeed zhiEspíritu Dios.

⁷ Dzigo wbig men ne nac Carner yeen co, bnaaz me guits ne no nia derech men ne zob lo xcan ro co. ⁸ Zigne bnaaz me guits co, laa gza bult mban co, ni gza galptap mengol co pquitsgzhíb lo me. Tib tib mengol co nzhense me tib arp ni tib ptsigui or, rso tib gox ndzon len ptsigui co (rrieequia gox co nac grë diidz ndzon ne rnee grë zha ne

no xnēz Dios zeene rzodiidznie zho me).

⁹ Dzigo psilo gza menḡol co biil me tib cant cub. Znu rnee lo cant co:

ible rieguaḡ ycaania guits qui, luu rieguaḡ cchug gza cint ne nzhidoow i!

Sac luu bded grētaa guieḡnē co psacsi zho luu, haxta bzhiee xchen luu;

sca psilaa luu grēlose dii miech, teḡ pa guiedztaa nac zho, teḡ pa diidztaa rnee zho, teḡ pa naciontaa ngab zho.

¹⁰ Laa luu bzhii no grē no gac no tib guiedz cub, guiedz ne gnabey Dios; no gac pxoz ne guḡ dziin lo me, masaque tipse gban no zeene gnabey me lo guidzliu.

¹¹ Zeene bui naa, goḡ naa anjl guizhiu ne ndxie zaatne zo xcan ro co, led zha ne grieelod glab new.

¹² Nguiedz zēēb tsi zho grē zho gza bult mban co, ni grē menḡol co, rnee zho:

Meḡ non nac men ne nac Carner yeen ne squi rlu beet zho!

Me rieguaḡ gnabey, men ro nac me, choot grieelod csiaablo me.

Ladznia me no grēse guieḡnzaac, me rap grētaa guieḡrien,

Meḡ ndzon nac me, me none dziuunnon ne, me none dzioolnie ne.

¹³ Horco grēse miech, grēse ma, grēse ncuaane bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdoow; nguiedz zēēb tsi zho, rnee zho:

Nliw, men ne zob lo xcan ro qui, ni men ne nac Carner yeen qui, ible rieguaḡ dziuunnon ne grop me!

Meḡ r nabey, lo me none gnee ne grētaa diidz ndzon;

nadzew, gzhew, ni grēragaa izdoo ne ziaadraaw!

¹⁴ Pquiab gza tap bult co, rēb zho: —iScaw, sca no gaca!

Dzigo gzase menḡol co, laa zho pquiitsgzhib lo men ne zob lo xcan ro co; psilo zho rnee zho grē diidz ndzon lo me.

6

Gza gadz sell co

¹ Blozh ga, goḡpaa naa zeene laa men ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nēw lo naa:

—iDē ganle gwi luu!

² Dzigo wbig naa, goḡ naa tib guay nquits. Zhits guay co zob tib men co nzhen me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me brieē. Ine zob nzē me lad guay co, laa me zie ziegūn me gan lo grē zha ne rlēē lo me.

³ Blozh ga, laa men ne nac Carner yeen co pchug stib cint ne nzhidoo guits co. Dzigo bredz stib bult co naa.

⁴ Dzigo bia naa, goḡ naa laa stib guay nizhnie brieē, zob stib men co lad ma. Blozhse pcaania me tib spad nroob, ni pcaa me didzbey tsielodiḡ me miech lo guidzliu, zeena gutlsa zho; laa me brieē ga, laa me zie.

⁵ Zeene laa men ne nac Carner yeen co pchug bioḡ cint ne nzhidoo guits co, dzigo bredz stib bult co naa, nēw lo naa:

—iDē ganle gwi luu!

Dzigo goḡ naa tib guay ngas, scasaque zob stib men co lad ma, nzhen me tib zhiguiib. ⁶ Ni groḡtaa zaatne zo gza bult mban co, zēēb tsi tib men co, rnee me:

—Tib kiltaa zhobxtil goḡ ycaa zha ne guḡ dziin tib dze; teḡ zhobgaaw, tsonḡtaa kila ycaa zho; sanḡue nceit ni vin ib ygaald luuw.

⁷ Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

⁸ Horco, zeene bui naa, gon naa tib guay nguets; lad guay co zob tib zha co lè Guielgut; zhiits co nal stib zho lè Gabil. Lo tap lal ne nlè miech ne ndxie lo guidzliu, pcaa grop zha co diidzbey tsiegut zho tib lal grè miech co; zha ne guet lo dil, zha ne guet lo gbin, zha ne guet lo guielguidz, zha ne guetgaa lo grè ma ntseeb.

⁹ Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga gon naa grèse zha ne psacsi miech, beet miech zho loxaque ne bnee zho Xtiidz Dios, ni dib zdoo zho bliladz zhow. ¹⁰ Nguiedz zëeb tsi zho rnee zho:

—Luu ne nac luu men nroob ne rnabey, luu ne nac luu men ne rnee niapse diidzli, ¿pa hor dzigo cuedz luu grè miech ne ndxie lo guidzliu, zha ne scataa psacsi no? ¿Pa hor gunquizh luu zho grètaa mine been zho ga?

¹¹ Dzigo bdeed me lar nquits got zho; rëb me lo zho no cuëz zho zniip, sac grèraa zha ne nacgrè zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me gun guielwxtis.

¹² Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëë zig rludaa ren, sca nizhnie rlu lo mëë; ¹³ grè mel ne ndziib gbaa, masaque bliaal ma lo guidzliu zig rliaal grè guigw yeen zeene rriee medox. ¹⁴ Znuse bdibëd gbaa, goca zigne racse grè guits ne rdibëd; grè gui, grè guidzliu win ne no lo nisdoo, nëzrii nëzrec biaana. ¹⁵ Dzigo grèse zha ne nac zha rnabey lo guidzliu, grè zha ne nac zha non, grè zha ne rapchen, grè zha nroob ne rnabey lo menguiib, grè zha nroob ne non xtiidz, ni

grèragaa miech, niicle grè zha ne run xtsiin beña, niicle grègaa zha ne run xtsiin zhala, grèse zho biolan, zha ne biolan len grè bliee, zha ne biolangaa len grèraa quie ne no dan; ¹⁶ nguiedz roptsie zho rnee zho lo grè gui co, lo grè quie co:

—¡Golliaal lad no, golcolan no, zeena gandraa men ne zob lo xcan ro co no! ¡Golcolan no, zeena dzaand no grètaa guielnè ne cxeel men ne nac Carner yeen co! ¹⁷ ¡Sac nasi laa dze ro co bdzin! ¡Laa guielnëdnox co nagon ziaadle! ¡Ncuanea lëëbd no low!

7

Zha ne pcuee lo grèse zha Israel

¹ Bded ga, gon naa tap anjl. Lo gza tap lad guidzliu, tibga anjl co zo tib lad nocuëz me me. Wdzeep-aaw, per ni tib zhiblag yag rnidraa, niicle lo nisdoo dzese biaca; sac ni palal rriedraa me lo guidzliu.

² Tibaque zeene briequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzbey ga gun guielqui lo guidzliu ni lo nisdoo) rëb me:

³ —¡Golcuëz zniip! Gunde to guielqui lo guidzliu niina, niicle lo nisdoo, niiclegaa grè yaga; sac naraa lozh guioquiaa no xsell xDios ne quia grè zha ne run xtsiin me.

⁴⁻⁸ Zeene blozh pquia sell co quia grè miech co, bin naa lo grè zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,
tsiipchop mil zha xtii Rubén,
tsiipchop mil zha xtii Gad,
tsiipchop mil zha xtii Aser,
tsiipchop mil zha xtii Neftalí,
tsiipchop mil zha xtii Manasés,
tsiipchop mil zha xtii Simeón,
tsiipchop mil zha xtii Leví,
tsiipchop mil zha xtii Isacar,
tsiipchop mil zha xtii José,
tsiipchop mil zha xtii Benjamín.

⁹ Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho; ¹⁰ nguiedz zëeb tsi zho, rnee zho:

Dios, men ne rdziuunbey ne, men ne zob lo xcan ro qui, me nac men ne psilaa ne lo grëtaa xtol ne; me ni men ne nac Carner yeen qui.

¹¹ Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhib nëz lo xcan co, haxta bzooblo zho lo liu, rdeed zho xquizh lo Dios ¹² rnee zho:

¡Scaw! Luu none dzioolnie no, none tibaque gneedz no xquizh lo luu, luu riegual dziuunnon no; sac luu nac xDios no.

Luu nac nac men ne rienraa, men ne rap poder; gacxe waa luu none ycaania grëse diidz ndzon, gzataa dze, niicle nadzew, gzhew, ni grëragaa izdoo ne ziaada. ¡Sca none gaca!

¹³ Dzigo bnabdiidz tib mengol co, në me lo naa:

—¡Pe nan luu sca cho nac grë zha ne nacw lar nquits qui? ¡Pe nan luu pa nëz ziaad zho?

¹⁴ Dzigo rep naa lo me:

—Nand naaw. Bzhiguiel bnëw lo naa.

Nëchaa me:

—Lëë grë zha qui gon bded grëtaa guielnëdoo ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol. ¹⁵ Gacxe waa squitaa ndzon ndxie zho gax lo zhixcan ro Dios, dze guieel quiayoollnie zho me len xyadoo ro me. Me nac men ne quianap

zho grëse zho; ¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho. ¹⁷ Men ne nac Carner yeen ne zo delant lo xcan ro qui, me gdeed ncuaane gow zho, ni zigne rienie baxtor xpëcwxiiil zho ro guiuu, sca zienie me zho zaatne quiada nis ne rdeed guielmban. Led yedraa niina goon zho.

8

¹ Laa zeene laa men ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, gon naa zeene pcaania gadz anjl ne rzo lo Dios, tibga trompet. ³ Ni briequia stib anjl nzhen tib ptsigui niaa niapse guiib or. Zigne bdzin me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodiidznie zho Dios. ⁴ Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdzin lo Dios. ⁵ Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzheña, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal guiequeie lo guidzliu ni bliaal guilëë notsa ren. Gzoob ne telne glë guidzliu tson lal, dzigo masaque tib lala bnitlo, bnitlo grëse yag, grëse lo guizh nguia ne no low.

⁸ Blozh ga, zeene laa stib anjl co pcuedz xquiib, hor co biab tib ncuaan co nisdoo, masaque rluw

zig rlu tib gui nroob ne quiayazbel. Gzoob ne tel glè nisdoo tson lal, bnitlo tib lala, bialalow niapse ren zeene laa ncuaan co biab low. ⁹ Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

¹⁰ Loxaque blozh goc min co, laa stib anjl co pcuedzaque xquiib zho, hor co laa tib mel nroob bringaa gbaa, masaque rso ma bel zig razbel tib lè guier, biab ma lo guidzliu. Lo grë guiubee, lo grë zhlian ne no lo guidzliu, lo tson lal ne gzoob ne naca, pxin ma tib lala. ¹¹ Grëse nis co goc nlayag, ndal miech ne gut low. Nacne bleelë zho mel co Nlayag.

¹² Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mëew, biuu tib niaza, schop niazaquew biaan rziini; grë mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene gon naa laa tib anjl bded groltaa zhan gbaa, haxta rlupaa rio bi zie me lo me, nguiedz zëeb tsi me rnee me:

—jProbsaxe grë miech ne ndxie lo guidzliu! Sac ncuaane ntseebraa gac, zeene laa stson anjl qui ycuedz xquiib me.

9

¹⁻² Zeene laa anjl ne nac zho gaay ga pcuedz xquiib, hor co gon naa laa anjl ne briece gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhal, per nli goxdoo ne briece ga, tib psioogsew zhan gbaa, per ni palal rludraa lo ngbidz. ³ Lo gox co, ga briece tiblo metso bli-aal, bioogse ma dipse lo guidzliu, grëse ma zob xcots ma, zig zob xcots meegu. ⁴ Nacle diidz, peet gund ma grë guizh nguia, grë yag

ne zëeb lo guidzliu, sinque laa ma tsie tsiesacsi ma grëse miech ne quaid xbey Dios quia. ⁵ Yoobdox ne yquia zaatne yquiaaxcots ma, zigne rquia yooob zaatne rquiaaxcots meegu; per gute ma zho, lox-aque sca csacsi ma zho dipse len gaay mëe. ⁶ Len dze co, haxta zhal miech yguib zho dien zha guet zho, per grielod guet zho; soobladznë zho, tebaa zha gdzin guielgut lo zho, per lel sozita.

⁷ Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or; ⁸ zëeb guitsguic ma zig zëeb guitsguic men wnaa, ni zëeb lay ma zig zëeb lay grë meedz. ⁹ Dipse lad ma ntse tib ncuaan co, rluw zig rlu guib; rio bi rzedz lo xiiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lëedaa meegu, sca zob xcots grë metso co lo xcol ma, mine yquiaaxcots ma miech dipse len gaay mëe co. ¹¹ Lëe grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹² Lëe tib guielnë ne gan miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquiib, hor co bin naa zëeb tsi tib men co lo mezh or ne nac lo pcoog ne zo lo Dios ga. ¹⁴ Zëeb tsi men co rnee me lo anjl ne blozh pcuedz xquiib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdzin; dzigo nac ne hor co laa ma blaa, parne tsiegun ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo

ma. ¹⁶ Bin naa chop gayoo milon zhaguiib ne gacnie ma, niapse guay sob grè zhaguiib co; masaque ma gnabey lo zho.

¹⁷ Gonpaa naa zha rlu grè zhaguiib co zob zho lad grè guay co. Grèse zho quiantse tib lè guuib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grè guay co, niaa guic ma zig niaa guic meedz, masaque rriee bel, rriee gox, rriee zufr ro ma; ¹⁸ lo gza ncuaañ ne sca rriee ro ma, miñ co beet lalga miech co.

¹⁹ Lala rap grè guay co xquieñtseeb ma ga nèz ro ma, ni rapaque maw nèz lo xcol ma; masaque nac xcol ma zig nac grè meeñ dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grè zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuaañe randa, ncuaañe ronda, ncuaañe rzèda, per laa zho no tibaque ziegan zhow. ²¹ Laa zho no quiayut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaaban zho, ñi palal zienied guic zho csaan zho grè guieñtseeb co gbig zho lo Dios!

10

Anj l ne nzhen tib libr win

¹ Blozh ga, gon naa biet tib anj l gbaa, rlupaa tib anj l nona, masaque no me tib lo xcow, ni quia tib guitye glaa guic me. Biinidoo ne rriee lo me, lèèdaa lo ngbidz; scasaque ni me, masaque riaazbela. ² Nzhen me tib libr win, nzhialse lo libr co.

Bdziñ me lo guidzliu, bzo me ni derech me lo nisdoo, laa miñ revés

bzo me lo guidzliu. ³ Ga zo me pquiaa me tib redz nroob, lèèdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

⁴ Laa naa zale yquia naa miñe bnee gza nguzi co, tibaque bin naa tsi tib men co gbaa, nè me lo naa:

—jCoo, yquiaad luu miñe bnee gza nguzi qui! Sac nodne gacnan miecha.

⁵ Dzigo gon naa blis anj l co nia derech me nèz gbaa, ⁶ bzeet me Dios (men ne gdziñd dze guet, men ne bzaa gbaa, bzaa guidzliu, bzaa nisdoo, ni grètaa ncuaañe no low), rëb me:

—Dios zobwi ganle, nasi gon laa dze co bdziñ. ⁷ Grèse miñe bnee me lo zha ne biadteed xtildz me, laaw gac niina zeene laa stib anj l qui ycuedz xquuib zho. Grèse miñe no guic me gun me ni gocnañd miecha, niina laa zho gana.

⁸ Dzigo wbiire bnee men ne zëeb tsi gbaa ga, nè me lo naa:

—Güey, bnaaz libr win ne nzhen anj l ne squi zo i.

⁹ Nacne bia naa lo anj l co, rep naa lo me gneedz me libr win co, dzigo nëchaa me lo naa:

—Ledaaw nu, per lèëraasi none gow luuw. Zeene laa luu noyowa, nex sac luuw; per zeene gdziña zdoo luu, laaw gacnla.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziñ zdoo naa, beennëw. ¹¹ Blozh ga, nëchaa men ne bin naa tsi glo ga:

—Naraa gon none gnee luu ganle zha nac ncuaañe ted grèraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo biaad tib men co bneedz me tib yag ne rbix lo naa, rgaaw

zig tib metr; bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegan zho Dios. Pso me diidz lo naa, nè me:

2—Lëëraasi ctiixd luu nêz ley, sac laa lugar co nole lадznia zha zit; zha gnabeya, zha gnabey guiedz ndzon ne nacchen Dios i; dipse len tson iz grol ne ziaad nu, gun zhow zigne gacladztaa zho. ³ Gane len dze riique laa naa cxel chop zha ne runbeypaa cho nac naa, tib lar beelze gacw zho, zig racwxab zha ne no guielnê; dipse len tson iz grol co gnee zho ganle pe nac grê ncuaañe ziaadyob gan miech.

⁴ Lëë zha co nac grop zhan yag oliv ni grop biini ne raquietle lo Xti-idz Dios ga zo lo Dios (men ne nac bizhuan guidzliu). ⁵ Zeene laa grop zha co bdzin, choot brieelod lega nsacsi zho, sac grêse zha ne wbig gocntseeb lo zho, tib bieese zha co lo bel ne brieer ro zho. ⁶ Bdeed Dios poder lo zho ycuêez zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho, zrieelo ndalraa grê guielzi ne gnabey zho gan miech.

⁷ Zeene bzase dze ne bnee zho lo miech ga, hor co laa tib madzabdoo brieer len guierdoo co; ntseeb rac ma lo zho. Mbe blêbd zho lo ma, beet ma zho. ⁸⁻⁹ Tson ngbidz grol goot xcuerp zho grol len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech didz ngueets zho, grêse miech ne no dib lo guidzliu gon sca nix zho ga; ¹⁰ dipse lo guidzliu, masaque tib guielbleydoo ne bio miech gza dze co, gon zho laa grop zha co gut, sac nroob benneed zho miech. Lo guielbley co, haxta bioxco miech pe ncuaañe bgadlsa zho lo samiech zho.

¹¹ Zeene blozh tson ngbidz grol co, tibaque zeene laa zhiEspiritu Dios bdeed guielmban lo grop zha co stib, laa zho guche ga; grêse miech ne ndxie lo guidzliu, zeene gon zhow, per nli bdzieb zho, rdzieldraa zho zha gun zho. ¹² Horco nguiedz zêeb tib tsi men co gbaa, bredz me grop zha co. Gonlo grê miech ne rlêe ran zho ga, masaque no zho tib lo xcow, laa zho bzoquia gbaa; ¹³ loxaque laa zho bzoquia gbaa, zeene laa tib zhodox bni. Gzoob ne telne nlê guiedz ro co tsi tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gan miech stib guielnê co. Lëë bropa ga, per znusaque guiaad stiba. ¹⁵ Sac loxaque blozh ga, zeene gon naa laa stib anjl ne nac zho gadz ga, pcuedzlaque xquiib; hor co nzian tsi men co zêeb gbaa, nguiedz rnee me:

Nasi nagon,
laa Dios gnabey grêse guiedz ne
ndxie lo guidzliu, grop me
Men ne pxeel me ga.
Mele gnabeya, grëtaa len izdoo ne
ziaad.

¹⁶ Psiloque gza galptap mengol ne zob lo xcan ne zo lo Dios ga, pqui-itgzhib zho lo me, haxta bzooblo zho lo liu, rdeed zho xquizh lo me, ¹⁷ rnee zho:

Xquizh xquielnzaac luu,
sac nasi laa luu glu men nroob nac
luu, laa luu csilo gnabey.
Luutaque nac men ne mazdraa
nroob.

¹⁸ Grêse guiedz, brieequia zha ne gocntseeb lo luu;
per nasi laa dze bdzin, laa luu glu-
gaa xquielblêe luu lo zho.

Grêse zha ne gutle,
niina laa luu gdeed mine rieguial
zho tib tib zho.
Grê zha ne been xtsiin luu, pteed
zho xtiidz luu lo miech,

grë zha ne ngab lo luu, zha ne
runnon lë luu,
zigtaa zha gola, zigtagaa zha
wina, niina laa luu gdeed
zhipremio zho;
zha ne na loxaquegaa guie|ntseeb
been,
niinataa laa luu gnitlo zho.

¹⁹ Loxaque blozh sca bnee gza
men|gol co, zeene laa yadoo ne no
Dios gbaa bzhial, nieen|paa guin ne
notsow quie lag ne pquia diidz ne
psan me lo miech. Horco psilo bli-
aa|tib guiequiedox, loxaque nëzrii
nëzrec riab belye, ni rio bi rat-
sie nguzi; guiequiedox co nolial,
zeene laa tib zhodox bnique.

12

¹ Horco gon naa blu tib ncuane
gzee zdoo ne zhan gbaa. Ga brie-
quia tib wnaa, masaque igose me
riab tib biini, zig riab xbiini ngbidz,
ni zob tib coron guic me, quia tsiip-
chop mel cho coron co; ngali ni me
zob mëe. ² Rlupaa zoney me mëed,
rquiaadan me redz, laa me rquiale
yoob ne gap me xpëed me.

³ Tibaque briequia tib ma ngol,
dipse ma rna nizhnie, niaa ma
zigne niaa ngutsiets; zob gadz guic
ma, ni tsii zhoz ma, tibga coron zob
tib tib guic ma. ⁴ Znuse bzieecw
ma xcol ma, blaal ma palal mel
gbaa lo guidzliu; gzoob ne nlë mel
tson tant, masaque tib tant mel co
blaal ma. Wbig ma lo wnaa co,
quiambëz ma gal xpëed me, parne
gow ma win.

⁵ Per zigne gol mëed co, znuse
bdziñ win nëz lo Dios, zaatne zob
me rnabey me; tib mëedbguiw,
nacle diidz tib men ndip xtiidz
gac win, win gac men ne gnabey
grëse guiedz ne ndxie lo guidzliu.
⁶ Horcogazhaquew bzhoon wnaa
co ga, laa me zie tib dan zit, zaatne
psan|le Dios diidz gan zho me dipse
len tson iz grol.

⁷ Nacne bio tib di|gbaa. Psilo
anj| Miguel, grë me grëraa anj| ne

nacnie me, bdil|nie me ma ngol
co grë ma xanj| dox ma; ⁸ per
blëbd ma, ben|cxoon zho ma gbaa.
⁹ Lëe ma ngol co ga nac meel dox
ne notaque padzeela, lëe men|dox
ga, lëe Satanás ga, ma ne scataa
tibaque noquidie miech; hor co laa
zho bzonëz ma nëz lo guidzliu, grë
xanj| dox ma.

¹⁰ Dzigo bin naa, nguiedz zëeb tib
tsi men co gbaa, rnee me:

¡Lëew nagon!

¡Nasi laa dze ne ycaaniapaa Dios
zha ne ngab lo me, laa dze co
bdziñ!

Nasi laa me blu poder ne rap me,
nasi laa Men ne pxeel me lo guid-
zliu ga gnabey lo grëse zha
ne ngab lo me.

¡Laa me ben|cxoon|le men|dox!

Ma ne scataa dze guieel nolisqui
dien pe run zho,
nac zho zha ne nacgrë ne.

¹¹ Peet brieelod ma niun ma zho,
sac niapse men ne nac Carner yeen
ne gut lo cruz ga bnalo zho;
ni lalnu ib bdziebd zho, bnee zho lo
miech cho nac me,
bleeladz zho xquie|mban zho, no
zho haxta beet miech zho.

¹² ¡Gacxe waa tib guie|bley nroob ne
rac gbaa niina!

¡Grëse to ne nac to zha ne no gbaa,
gol|ley!

¡Per probsaxe grë zha ne no lo
guidzliu, sac laa men|dox co
tsiesacsi zho!

Ntseeb rac ma laa ma zie nëz co,
rien ma riaandraa nroob dze ne
sonlaa ma.

¹³ Zeene gon ma sca bzonëz zho
ma lo guidzliu, dzigo ptsidil ma
wnaa ne gop mëedbgui co. ¹⁴ Nacne
bzoob zho chop xiil me, lëedaa xiil
msidoo; par grieelo xoon me lo
ma, guey me dan zit ne nole diidz
gan zho me dipse len tson iz grol
co. ¹⁵ Gocladz ma nsiloow ma me,
blee ma tib nis naal ro ma, pale tib
guiubee ro, ¹⁶ per psaand guidzliu
me, znuse bzhial low psi grëse nis
naal co.

17 Horco mazdraa blëenie ma me, psilo ma noguib ma zha csacsi ma grëraa zha ne ziaad lo xtii me. Lëe grë zha co zienaḷ mine rnabey Dios, ni rdziebd zho rlu zho xnëz Jesús no zho. 18 Nacne güey ma, bzo ma ro nisdo.

13

Brieequia chop ma ntseeb

1 Tibaque zeene gon naa laa tib ma nroob brieequia lo nisdo co, ntseeb niaa ma. Ncuane gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios. 2 Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

3 No tib guic ma no tib mdel nroob, rlu mer niet ma zeene sca goc guic co ma. Miñ co gon miech, grëse zho psilo zho rleynie zho ma, mine rnabeytaa ma zho, run zhow. 4 Horco grëse zho rleynie zho ma nizhnie co, rquitsgzhib zho lo ma, rdeed zho xquizh lo ma bzo ma ma ntseeb co; scasaque rquitsgzhib zho lo ma ntseeb co, rnee zho:

—¡Tsodraa stib zha zig luu! ¿Cho dien grielo tilnie luu?

5 Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz grol. 6 Nacne psilo ma rneenë ma Dios, rdzibdee ma me, rdzibdee ma grë zha no gbaa ne. 7 Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. 8 Laa grëraa miech, güey zho güeygan zho ma, lëe grë zha co quiad lë lo xlibr meñ ne nac Carner yeen ne gut ga. Haxta zeene biala guidzliu no libr

co, lo co quia lë grëse zha ne yгаа guielmban ne gdzind dze lozh.

9 Lo grë to ne nac to zha ne rnalo Dios, zha ne no liaadz mine none naa nu, golquiaadiag mine gne naa nu ganle: 10 Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel zha gut zho to, scaque gut miech zho. Gacmbande to sca, sac gon ga glu to nli rnalo to Dios, nli zlëb to tel pe nactaa guielnë ne gan to.

11 Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuane gdzieb ne zeene laa ma roptsie. 12 Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co. 13 Ncuane gzee zdoo miech run ma, haxta brieelo bnabey ma biet gui gbaa bliaala lo guidzliu. 14 Ne scataa grë ncuane ro ne rrieelo ma run ma, pquidie ma miech, bnabey ma zho bzaa zho tib mdio zig ni-aada ma ne bdedlaa lo guielgut ga, ma ne scataa nat guic ga bga.

15 Blozh ga, bdeed ma xquielmban mdio co, parne grielo gneew. Bnabey ma guet grëse zha ne soliaadz yquitsgzhib low, 16 ni bnabey ma grëse miech güey zho tib bey, yase yquaw nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapcheña, zigtagaa zha ne peet rapda, zigtaa zha ne run xtsiin beña, zigtagaa zha ne choot rnabeyda. 17 Zha ne tsod bey co, grielod gun zho wzi niicle grielodgaa cto zho; sac bey co rlu cho nac zha ne ngab lo ma, lëe lë ma ga, lëe número co rlu zha lë ma. 18 Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

14

Biil tib gayoo chooptap mil zho

¹ Tibaque zeene gon naa laa men ne nac Xcarner yeen Dios ga zo guic Gui Sion, miech guizhiu ne zonie me ga; lee gre zha co nac tib gayoo chooptap mil zha ne quia le me guic ga, grop me PxoZ me.

² Horco bin naa tib bi nroob gbaa, zig rio bi rriengaa tib nis naal tib ro quie, zig ratsiegaa gre nguzidox, ni bin naa ndal tsi zha co zeeb noyool zho tib cant, rlu niapse arp noyoolnie zho cant co. ³ Tib cant cuba, laa zho noyoola lo men ne zob lo xcan ro co, zaatne zo gza tap bult mban co, zaatne zob gre mengol co. Loxaque tib gayoo chooptap mil zha ne pcuee lad gre miech guidzliu ga, zha cose brieelo pquiab lo cant co. ⁴ Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne gloopa riet riogon lo me. ⁵ Biod dze ne nquidie zho, mbe zdoo zho, mbe lo zho nez lo me.

⁶ Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdzind dze nitlo ga; laa me ziaad par gnee mew lo grese miech ne ndxie dipse lo guidzliu. ⁷ Nguiedz zeeb tsi me, rnee me:

—iGolguien golgon mine rnabey Dios, ine golleynie me, sac gon laa dze ne gun me guielwxtis bdzinle! Ine golquitsgzhil lo me, golgan ganle me bzaa gbaa, me bzaa guidzliu, me bzaa nisdoo, me psan grese zaatne rlan nis.

⁸ Zhits anjl co nal stib anjl, nguiedz rnee me:

—iNasi laa guiedz Babiloin nitlo! iGuiedz nroob ne scataa pquiil greeraa guiedz, been gre menguiedz co ncuuan ndzab ne beena, pxina guic zho!

⁹ Zhiits co nalaque stib anjl, scaque nguiedz zeeb tsi me, rnee me:

—iGrese zha ne yquitsgzhil lo ma ntseeb ne brieequia lo nisdoo ga, yquitsgzhil zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, ¹⁰ ib tedsod ye zho yгаа lo greetaa guielnedox ne csiaab Dios! Squi zobwi gre xanjl me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiaayzbel tiblo ncuane rtsuu le zufr. ¹¹ Dze guieel cso laan ne tsec guidox co, ni palal gapd zho descans ga; sac sca pquitsgzhil zho lo ma ntseeb co, pquitsgzhil zho lo mdio ne niaa zig niaa ma ga, ni pquia zho xbey ma. ¹² iGa naganle gan gre zha ne ngab lo Dios, zha ne mban zigne rnabey me, zha ne tiblique zienal zhiwseed Jesus, zeena gacmband zho niicle tel pe nactaa gre guielne ne noyan zho!

¹³ Dzigo bin naa zeeb tib tsi men co gbaa, ne me:

—Pquiaa mine gni naa nu.

Nechaa me:

—Dichos grese zha ne rnalo Jesus, niicle niinaga guet zho.

Pquiabaque Espiritu Sant, rnee me:

—Nligaa dichos zho, sac gre guielne ne bded zho, nataa laaw blozh; nasi laa zho yгаа guielnzaac nroob ne gdeed Dios lo zho, porne wban zho zigne rnabey me.

¹⁴ Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

¹⁵ Dzigo brie tib anjl len yadoo ro ne zob gbaa, nguiedz bnee me reb me lo men ne zob lo xcow co:

—iNiinaga blooyaguiits gre zhoob ne squitaa zeeb lo guidzliu! iSac

goṇ gol-lew, laa dze ne tsasa bdziṇle!

¹⁶ Dzigo pteed meṇ co yaguiits dipse lo guidzliu, ptop me grēse zhob co.

¹⁷ Blozh ga, brieē stib anjl leṇ yadoo ro co nzheṇ me tib guiib hoz, rlpaa per nli ndox low.

¹⁸ Loxaque brieē anjl co, laa anjl ne quianap gui ne ndziib lo pcoog brieēque; nguiedz bnee me rēb me lo anjl ne nzheṇ hoz ga:

—iNiinaga pchug grēse mzhiiḡ uv ne squitaa zēēb lo guidzliu, sac goṇ laaw gule!

¹⁹⁻²⁰ Horco znuse pteed anjl co hoz lo guidzliu, pchug me grēse mzhiiḡ uv co, güeycodzēē mew tib leṇ pil nroob ne zob tib lad ro guiedz. Ga güeyzēēni zho grē uv co, ptaadz zhow; dzigo ren naaldox ne brieē zhan pil co, masaque lal ne rzēni miech xoop ngbidz, lal ga wbiig lo ren co igo pil co; teḷ niaca miṇe sēēb tib guay low, zdziṇa haxta zhan cho ro ma. Rrieēquia sca nagoṇ gac miṇe gnabey Dios ted grē zha ntseeb.

15

¹ Tibaque zeēne goṇ naa, ncuaaṇe ro, ncuaaṇe gzee zdoo ne goc gbaa. Brieēquia gadz anjl, tib tib anjl co tibga guiēṇē guiaadnie me ted grē miech ne ndxie lo guidzliu; guiēṇē co lozh cueezhian Dios miech.

² Dzigo gax lo naa goṇ naa tib dzoon miech, masaque rquiabni, masaque rna gui zaatne zo zho, nēzrii nēzrec rac lo co, pale lo nis-doo. Lēē grē zha co beēṇ gan, pquitsgzhibd zho lo ma ntseeb co, pquitsgzhibd zho lo zhimdio ma, niicle biodgaa zho xbey ma. Grēse zho tibga xarp Dios nzheṇ zho, ³ quiayooḷ zho zig biḷ grē zha ne psilaa Moisés Egipt. Rley zho, sac niina laa Xcarner yeēṇ Dios psilaa zho lo ma ntseeb co; rnee zho:

Dios, luu ne nac luu meṇ ne grēsew rrieelo ruṇ, ncuaaṇe nroob, ncuaaṇe gzee zdoo miech, nac grē ncuaaṇe ruṇ luu.

Luu nac meṇ ne rnabey, lo grēse zha ne ngab lo luu, niapse diidzli rnee luu, niapse miṇe nonguiēḷ rnabey luu.

⁴ ¿Zha rna zha ne dienḡ gdzieebd luu?

¿Zha rna zha ne gleyd gooḷnie luu? Sac luuse nac meṇ mbe zdoo, meṇ ne ni tib doḷ rapd.

Grēse guiedz ne ndxie lo guidzliu, zrieē miech guiaad zho yquitsgzhib zho lo luu; sac nasi laa luu blu zha ruṇ luu guiēḷwxtis.

Gadz anjl ne pxeēḷ guiēḷnē lo guidzliu

⁵ Horco goṇ naa bzhial zaatne nac Lugar Nda leṇ xyadoo Dios gbaa, ⁶ ga brieē gza gadz anjl ne guiaadnie guiēḷnē ne no guiaad lo guidzliu ga. Ine nquitsbie rna xab gza anjl co, haxta rzēēg lada, ndxiega tib cinch or haxta ncaaṇ leṇ zhiw me.

⁷ Dzigo wbig tib bult mban co, bdeeda tibga cop nroob niaa niapse guiib or lo tib tib anjl co; leṇ cop co ga nodzē grēse guiēḷnē ne nac xquieḷblēē Dios, meṇ ne gdziṇd dze guet. ⁸ Horco grēse xquieḷndzon Dios, grēse poder ne rap me, biodzē leṇ yadoo co, rluw zig rlu tib gox; choot brieelodraa nzēēb leṇ yadoo co, haxta blozh goṇ miech gza gadz guiēḷnē ne güeynie gza anjl co.

16

¹ Dzigo bin naa nguiedz zēēb tib tsi meṇ co leṇ yadoo ro co, bnee me lo gza gadz anjl co, rēb me:

—Goḷtsie, goḷtsiexiee gza guiēḷnē ne nac xian Dios i lo guidzliu.

² Dzigo brieē tib anjl co, güey me, güeylaat me xcop me lo guidzliu, hor co grēse zha ne noquitsgzhib lo zhimdio ma ntseeb co, zha ne

quia xbey ma ga, psilo biala dipse lad zo, yoobdox ne rquia zho.

³ Güeyaque stib anjl co, bdziñ me blaam me xcop me lo nisdoo, zeene laa ncuaañ co bzhiee lo nisdoo, grëse nis co bialo ren ctoo; ni stib ma ne no low biaanraa.

⁴ Laa min co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacne grëse nis co bialo ren. ⁵ Dzigo bin naa tsi anjl ne rnabey nis, rëb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdzind dze gdzë. Lëew i been luu, squi beenquizh luu grë miech qui mine zëeb zho, ⁶ sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Min qui rquiuin zho, guie zho grë ren qui na.

⁷ Zëëbaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrielo run, nligaa ible rieguiala squi beenquizh luu grë zha qui mine been zho!

⁸ Blozh ga, brieer stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech. ⁹ Niicle scale nodzu grë miech co, per ib biablod zho, laa ne nsaan zho xquieñtseeb zho, nleynie zho Dios, leñ psilo zho rneenë zho me, pe nacne noxeel me grë guieñë co.

¹⁰ Zeene brieer stib anjl co, güey me güeylaat me xcop me zaatne zobnabey ma ntseeb ne brieequia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho; ¹¹ per niicle scaw, ib psaand zho xquieñtseeb zho, leñ psilo zho rneenë zho Dios, pe nacne scataa

rquia zho yoob, pe nacne scataa quiayaañ gdib lad zho.

¹² Zeene laa anjl ne rac zho xoop ga güey, güeylaat me xcop me len guiubee Eufrates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

¹³ Horco gon naa tson me yozh, niaaw zig niaa mbiich, tiba brieer ro ma ngol nizhnie co, tiba brieer ro ma ntseeb ne brieequia lo nisdoo ga, laa stiba brieer ro zha ne noteed xtiidz ma ntseeb co. ¹⁴ Chen mendox nac gza me co, runa grë ncuane nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me mine rieguial tib tib miech.

¹⁵ Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnand bizhuan yu pa hor sëeb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieñtodox ga grieequia zho.

¹⁶ Dzigo pcaalsa grë zha rnabey co grë xmenquiib zho, zaatne rnee zha Israel Armagedón.

¹⁷ Horco güey anjl ne nac zho gadz ga güeylaat me xcop me lo me ne rrieer lo guidzliu; dzigo bnee tib men co zaatne nac lo zhixcan Dios len yadoo gbaa ga, nguiedz zëeb tsi me rnee me:

—iNasi nagon ledaaw blozh bza!

¹⁸ Dzigo psilo nëzrii nëzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig min co. ¹⁹ Grë guiedz

ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson lë goca. Horco beenquizh Dios zha Babiloin, grëtaa guiełntseeb ne zëeb zho; psi-aabzi me zho por grëtaa zhian ne pquiaa zho me. ²⁰ Grëse guidzliu win ne no lo nisdoo, rludraa dien yow; grë gui glaa, loxaque nëzrii nëzrec bliala. ²¹ Min co blozh, zeene psilo bliala tib guiequiedox lad grë miech co, tib tib guiequie co nëw maase choo kil. Gon zho scataa noyab guiequie co, laa zho noque rdzibdee zho Dios.

17

Zob tib wnaa yozh lad tib ma ntseeb

¹ Lo gza gadz anjl ne sca blaas grë guiełnë co lo guidzliu, lad co briece tib me biaad, në me lo naa:

—Dë ganle, zeena glu naa lo luu zha nactaa caxtigw ne yгаа wnaa yozh ne ran luu squi zob lo grëse nis ne no lo guidzliu. ² Lëe wnaa qui pxin guic grëse miech ne no lo guidzliu güeynal zho grëtaa guiełyozh ne been me; haxta grë zha rnabey, güeynal min co.

³ Sca nolu Espíritu Sant grë ncuaan co lo naa, dzigo güeynie anjl co naa tib dan zit. Ga gon naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grë diidz ntseeb ne rneenë ma Dios.

⁴ Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grë guieb or, grë quie rbebni, grë quie perl, ngalguiee lad lar co. No tib cop nroob niaa me, ni-aaw niapse guieb or, rrieequia leen co nodzë grëtaa guiełntseeb, grëtaa guiełyozh ne run me. ⁵ Ni quia bla lan diidz quia me, rneew: “Lëe guiedz nroob ne nac Babiloin nu, guiedz ne nac xniaa grëse wnaa

yozh, guiedz ne nac xniaa grëse zha ne run ncuaañe mbixladz.” Lëe lë me ga, hor coraa bzhoobnen zha nac lë me. ⁶ Dze rwi naa lo me, dzigo gon naa rac me zig rac zha ne rzudz. Nziandox zha ne no xnëz Jesús beet me, rrieequia grëtaa ren ne pxiee me ga sca noyun me. Bzee zdoo naa, ni bdzieeb naa gon naa zha rac wnaa co. ⁷ Dzigo nëchaa anjl co lo naa:

—¿Pe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga. ⁸ Padzeela no ma ntseeb co, guiełn ma niinapaa, per zhile laa ma griee leñ guierdoo ne niioogyu ma, laa ma griee ga parne diu-navez nitlo ma; grë zha ne quiad lë lo libr ne zhobnee cho nac zha ne yгаа guiełmban ga, seedox zdoo zho zeene gan zho laa ma grieequia stib, sac tibaque nan zho gutle ma. ⁹ Wen wen pquiaadiaga ganle: gza gadz guic ma ga, rrieequia lëew nac gza gadz gui win ne zob wnaa co zobnabey me. ¹⁰ Ni rrieequiaque lëe gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. ¹¹ Lozhse gnabey zha co, laa ma gnabeyaque, ma gac zha rnabey co xon, niicle ne ye le ma ga goc zha co gadz; gataa laa ma nitlo.

¹² 'Zhoz ma, rrieequia lëe stii zha ne gnabey ga, gzase zha co naraa gnabey zho, tipse ycaania zho guiełrnabey gza zho ma. Zhisaque dze sca gnabey zho, ¹³ dzigo laa gza tsii zha co guiaan diidz gzo zho ma, ma gac zha nroob lo zho. ¹⁴ Zacnie zho ma, grëse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëe grë zha co nac zha

ne bzooblo Dios bredz me zho bgab zho xnéz me, ni ib psaaand zho me.

¹⁵ Blozh ga, nēchaa anjl co lo naa:

—Lo grētaa nis ne goṇ luu sca zob wnaa yozh co, rrieequia lēē nis co nac grēse guiedz, grēse dii miech ne ndxie lo guidzliu. ¹⁶ Per zdziṇ dze lēēque ma ntseeb co, tiṇnie wnaa co, grē ma gza tsiī zha ne rrieequia nac zhoz ma ga; zlēēniedox zho wnaa co, saṇwin zho me, haxta xab me cuee zho, znitlo zho me, sēēg zho me lo gui. ¹⁷ Ib Dios csiaab guic zho gnitlo zho wnaa co, ni meque csi-aab guic zho gzo zho ma co gac ma zha ne gnabey lo zho; laa me guṇ miṇ co, parne grieequia grēse miṇe bneele me no gac. ¹⁸ Laa wnaa co, rrieequia me nac guiedz ro ne rnabey lo grēse guiedz ne ndxie lo guidzliu.

18

¹ Blozh ga, goṇ naa laa stib anjl ziad-zēēb gbaa, rlu tib anjl nona, dipse lo guidzliu biab biinidoo ne ziaadnie me, ² nguiedz zēēb tsi me rnee me:

—iNasi laa guiedz nroob ne nac Babiloin ga nitlo! iLoxaque mendox yquianzē ga, loxaque grē ma guix, loxaque grē ma mbixladz cuew! ³ Laaw nitlo, sac noquūila grēse miech ne ndxie lo guidzliu, grēse zha ne rnabey, quiayun zho grētaa guielyozh ne ruṇa. Lo grētaa guielyozh co quiayun ricwa grēse zha ne ruṇ wto; quiaxin grē ncuaan co zho, masaque quiayuna zho zig ruṇ nziu.

⁴ Dzigo zēēb stib tsi meṇ co gbaa, rnee me:

—iGrēse to ne nac to miech ne ngab xnéz naa, golgon diidz, golriee guiedz qui! Ib gunde to doṭ ne quiayuna; zeena ygaade to grētaa guielnē ne ygaaw, ⁵ sac nroobdox nac grē doṭ ne quiayuna, telne nica ncuaane cue monton, rrieequia haxta gbaale rdziṇ guic mon-

ton co; gane ib tedsod zunquizh Diosa grētaa guielntseeb co.

⁶ 'Gacxe na grēse miṇe beena miech, miṇcoque saca. Grēse tel zha psacsiw miech, chop lalga miṇe teda. ⁷ Zigne squitaa now lo grētaa ncuaane racladza; scagaa na guielnēdox ne gaṇa, haxta goona lo grētaa guielnē co. Niats raca rneew: “Naa rnabey. Nacd naa cho zha ne zotib, zig rzac grē wnaa viud; naasi gdziṇd dze ne tso naa guielnē.”

⁸ 'Nli squitaa niats raca, per zeene guiaba ladznia guielgut, ladznia gbin, ladznia grēraa guielnē ne gaṇa, tib dzeque lozha. Ni lozh ga, haxta zeca lo gui; miṇ co gnabey Dios teda. iMe nac meṇ ro ne guṇquizha grētaa miṇe beena! ⁹ Grē zha ne rnabey grē guiedz, zha ne scataa bley been grē guielyozh ne ruṇa; zeene gaṇ zho goxdoo ne rso noyeca, mban gac zho, zoon zho zio zho xquielnēw. ¹⁰ Zdzieb zho gaṇ zho grētaa guielnē ne nodeda ga, lo dzeb co, ni lalnu gbigd zho. Lēē gdib so zho goptsie zho, guiab zho: “iProbsaxe luu Babiloin, guiedz nroob, guiedz non nac luu! iPa brieē guielnē qui squi znuse nitlo luu!”

¹¹ 'Grē zha ne ruṇ wto dipse lo guidzliu, ye zho zio zho xquielnēw, mban gac zho guienḍraa cho si lo zho. ¹² Sac masaque lēēw rzi:

guiib or,
guiib plat,
grē quie non,
grē perl,
grē lar niazh,
grē lar sed,
grē lar nizhnie nlaan,
grē yag ne nex rlaa,
grē ncuaane niaa marfil,
grē ncuaane niaa grē yag wen,
grē ncuaane niaa guiib,
grē ncuaane niaa brons,
grē ncuaane niaa quie mármol,
¹³ grē blad canel,

grë guizh scuaan,
 grë yaal ne ndzon rlaa,
 grë guizh, grë nceit ne nex rlaa,
 grë nziu,
 grë nceit,
 grë zhobxtil,
 grë rin niazh,
 grë ma ne rey yo,
 grë mëcwxii,
 grë carret,
 haxta grë miech ne runzhoo dziin
 lo samiech.

¹⁴ 'Zrieequia zha ne guiab lo guiedz co: "jBdzinaque dze ne blozh luu, pa sëraa scataa yquianie luu grë ncuaañe rdziladz luu! jGrëtaa ncuaañe niazh, grëtaa ncuaañe rap luu, gdzindraa dze ne gbiire gañ luuw!"

¹⁵ 'Grë zha ne run wto ga, zha ne scataa gocricw lo grë wto ne been zho guiedz co, zdzieb zho, zit so zho gañ zho grëtaa guielñe ne nodeda. Zio zho xquielñew, haxta zoon zho ¹⁶⁻¹⁷ guiab zho: "jProbsaxe guiedz ro qui, squi znuse bnitlow! Biopaa dze goconna, masaque goca zig tib wnaa ne racw grë lar niazh, grë lar nizhnie nlaan; wnaa ne rna grë guuib or, grë quie non, grë quie perl, rio yañ, rio yañ na."

'Grë zha ne rnabey barcw, grë zha ne rsëew, zha ne no leña, ni grëragaa zha ne run dziin lo nis-doo, zit so zho gañ zho tsec guiedz co; ¹⁸ zeene gañ zho goxdoo ne rso noyeca, ziab zho: "jZha rnaraa dze ne dzian ne stib guiedz nroob zig guiedz qui?" ¹⁹ Mban gac zho, zio zho xquielñew, zoon zho, squiaadan zho redz, guiab zho: "jProbsaxe guiedz ro qui squi znuse bnitlow! Lo grëtaa dimi ne pquian-iew, blactaa beenricwa ne grë ne grëraa zha ne run dziin rii."

²⁰ 'Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne

güeyteed xtidz naa, zeene gañ to laa guiedz co nonitlo, golley, sac gañ ga gunquizh Dios miech ne no ga grëtaa miñe been zho to.

²¹ Zeene blozh bnee meñ co, dzigo gañ naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gañ bron mew lo nis-doo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdzindraa dze ne gbiire gañ miecha. ²² Masaque nroobladzdoo ne raca niina, loxaque di noyac grë ro xnëza, zaatne noyool zho vihuel, zaatne noyool zho bzie, zaatne nocuedzgaa zho trompet, nëzrii nëzrec rac miech zie zho lo xtsiin zho, loxaque lo grë quie molin rzedz nozuu zho zhob; per gal dze co grësew lozh. ²³ Squitaa biini ne rquiaw niina, squitaa tibaque quiaayac guieltsieela, per gal dze co ncowse gnaw, pa sëraa gac lniw. Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed mendox; pe zhidaa noyunricwa grë zha ne run wto por grë wseed co; ²⁴ pe zhidaa miech zëeba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

¹ Zeene blozh ga, bin naa zëeb ndal tsi meñ co nëz gbaa, rlu miech guizhiuw, nguiedz rnee zho:

jZha ndzontaa xDios ne! Me nac meñ ne rsilaa miech, parne ygaad zho lo caxtigw.

Me nac meñ ne rap poder,
 me nac meñ ne rieguial dziuunnon ne;

² sac gañ mesi run me guielwxtis zigne no gaca.

Gacxe waa, sca gunquizh me guiedz qui grëtaa guielyozh ne noyuña, grëtaa xchen zha ne

ngab lo me, zha ne bnabeya gut;

rriequia naca zig tib wnaa yozh, quiayungüeta miech quiayunctal zho xtol zho.

³ Blozh ga, biire bin naa tsi zho, rnee zho:

¡Zha ndzontaa Dios! ¡Miñ qui nagon rieguiala, gdzind dze ne lozh csow gox!

⁴ Horco laa gza galptap mengol co, ni gza tap bult mban co pquiits-gzhib lo Dios lo xcan ne zob me ga, haxta bzooblo zho lo liu, beennon zho me, rnee zho: “¡Nliw! ¡Luuse nac men ne ndzon!”

⁵ Zëëbaque stib tsi men co zaatne nac lo xcan co, rnee me:

¡Grëse to ne nac to zha ne quiayun dziin lo me,

zha ne rien men non nac me, zigtaa zha wina, zigtagaa zha nona, golgoolnie me!

⁶ Dzigo wbiire bin naa tsi grë miech guizhiu co nëz gbaa, rio bi zëëb tsi zho, pale zeene rio bi nisdo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men nroob ne rnabey!

⁷ Golgotsaa gley ne, golgotsaa dziuunnon ne me,

sac gon laa dze bdzin laa Carner yeen ne nac Xpëed me ga ct-sieelnia;

grë zha ne ngab lo me,

zha ne rriequia nac ndzooop ne ct-sieelnia Carner yeen co, laa zho nacwxable.

⁸ Masaan rlu zho zig tib ndzooop ne ct-sieelnia,

ine nquitsbie, ine rbebni lar niazh ne nacw zho;

me bdeed diidz got zho lar co,

ga rlu ganle mban zho zigne racladz me.

⁹ Dzigo rneechaa anjl ne sca bron que co lo nis:

—Wen zie grë zha ne bredz Dios tsie lo xquieltsieel men ne nac Carner yeen co.

Bnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneew.

¹⁰ Horco pquiitsgzhib naa lo anjl co ni naa gunnon naa me, per bzhiguield me.

—¡Coo! —në me lo naa—.

¡Guso i! Gocnan ganle ye naa tib ngundziinse nac naa lo Dios, nac naa zigne nacaque luu grë luu grëraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lëë gdib bne naa ganle zha nac xtiidz Jesús.

¹¹ Dzigo hor co gon naa bzhiäl zhan gbaa, ga briequia tib men co zob me lad tib guay nquits, zëëb diidz niapse diidzli rnee me, sac run me guielwxtis zigne no gaca, ni rdilnie me zha ne rieguial tilnie me. ¹² Masaan rbebel bziaalo me, nzian xcuaa coron zob guic me, ni quia stib lë me quia me, lox-aque mese nan dien zha nac lë co me. ¹³ Rnadraa xab me di ren, lëë me ga rnee zho: Xtiidz Dios.

¹⁴ Ndal grë menguiib ne no gbaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co. ¹⁵ Rlu choot grielod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gantseeb lo me. Masaan me gnabey grëse guiedz, ndip gac xtiidz me, ni tib choot quiitsd mine gnabey me; zeene laa me gunquizh miech grë xquielntseeb zho, cxeel me zhian ne csiaab Dios ygaa zho, zuñ me zho zigne run miech uv zeene rzëeni zhow. ¹⁶ Lad lar ne nacw me ga, ni tib cho cor me, ga quia cho nac me, rneew: “LËË MEN RII NONRAA LO GRËSE ZHA NON, ME RNABEY LO GRËSE ZHA NE RNABEY.”

¹⁷ Blozh ga gon naa zo tib anjl lo ngbidz, nguiedz zëëb tsi me rbedz

me grēse maxiil ne row grē magut, rnee me:

—iLigier golcaalsa! iGoltē zeena yquiin to guielwagw ne gneedz Dios lo to niina! ¹⁸ Goltē zeena gow to grē zha ne rnabey grē guiedz, grē zha ne rnabey lo menguiib, grē zhaguiib ne zēēb diidz nac zha valor; goltē gow to grē guay, gow to grē zha ne rzob lad ma. Goltē gow to grēse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grē zha ne nac zha nona, zigtagaa grē zha wina.

¹⁹ Dzigo gon naa ma nroob ne briequia lo nisdoo ga, ma ne scataa ntseeb rlu ga, psilo ma ptop ma grēse zha ne rnabey grē guiedz ne ndxie lo guidzliu. Pcaalsa zho grē xmenguiib zho, zha guizhiuw, laa zho brie zietilnie zho men ne zob lad guay nquits co grē xmenguiib me. ²⁰ Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grē milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr. ²¹ Laa grēraa zha ne scataa gocnie ma ga, grēse zho gut lo spad ne nzobro men ne zob lad guay nquits co, hor co bdzinbe grēse maxiil ne row magut, güeytow ma grēse ngutoo co haxta biel ma.

20

Bnabey Jesús tib mil iz

¹ Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden. ² Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; ³ con liow ne

nzhen me ga pxal me tib ro guierdoo, psēēb me ma len guierdoo co. Blozh ga dziits dziits psioog mew, zeena grielod gree ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no gree ga, sonlaa ma zniip.

⁴ Horco gon naa laa grē zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grē zha ne psacsi miech, bga zho yan zho, beet zho zho loxaque ne no zho xnēz Jesús ni bnee zho xtiidz me lo miech; gon naa grē zha ne bzhiguield nquitsgzhib lo ma ngol ne briequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Gon naa brie-ban zho grēse zho, par gbannie zho Jesús, gnabey me grē me zho dipse len tib mil iz.

⁵ Lēē grē zha co nac miech ne glopaa grieeban, laa grēraa mengut, zha co grieeban zeene laa tib mil iz co gza. ⁶ Dichos grē zha ne glo grieeban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gun zho dziin, gac zho zig tib pxoz lo me; tipse gnabey me grē me zho len tib mil iz co.

⁷ Zeene blozh tib mil iz co, dzigo gon naa laa mendox brie zaatne niogyu ma ga, ⁸ güey ma güeyquidie ma zha Gog, güeyquidie ma zha Magog, grēse guiedz ne ndxie lo guidzliu güeyquidie ma miech, tipse been ma zho grēse zho parne tilnie zho Dios. Miech guizhiuw, miech ne lēb ne glab new, gun ne cuent yuzh ne ndxie ro nisdoo, ⁹ ntseeb rac zho, grēse zho laa zho bdzin zaatne ndxie guiedz ne rleynie Dios, zaatne no grē zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliala gui lad zho, bzēēga zho

grëse zho. ¹⁰ Laa men_{dox}, bnabey me bgaa ma bey ma lo guidox ne nac gabil, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne griee ma ga; caxtigwdox ne ted ma.

Beenquizh Dios miech mine been zho

¹¹ Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. ¹² Grëse zha ne brieiband glo ga, zigtaa zha nona, zigtaa zha wina, laa zho bdziñ lo me. Laa zho ndxie ga, zeene laa lo bla libr co bzhial, ni bzhialaque lo mine quia lë zha ne bgaa guielmban cub ne rdeed Dios ga; hor co bgaase zho mine rieguial zho tib tib zho tel zha zhubnee lo libr co wban zho. ¹³ Grëse zha ne biaan len nisdoo, blieequia nisdoo zho, grë zha ne bioliu blieequia baa zho; grëse zho blieequia guielgut zho. ¹⁴⁻¹⁵ Blozh ga, zigtaa guielguta, zigtaa zha ne quiad lë len libr ne no lë zha ne bgaa guielmban ga, laa zho biobe lo guidox ne nac gabil; lëe guielgut brop ga.

21

¹ Dzigo gon naa tib gbaa cub, ni tib guidzliu cub; sac zigtaa gbaa ne rdziunbey ne, zigtaa guidzliuw, zigtagaa nidoow grësew bnitlo. ² Grop lo naa gon naa laa Jerusalén, guiedz ne nacchen Dios ga, ziadzëeb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzooop nguieg dze ne rtsieelnia zho. ³ Dzigo bin naa nguiedz zëeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho;

zanlo zho me, peet gunfaltraade lo zho. ⁴ Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuaan co, gdzindraa dze gan zhow.

⁵ Zëeb tsi men ne zob lo xcan co, rnee me:

—Grëse ncuaane no niina ncuble naca, ni naa beenncuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuaane no gaca. ⁶ jLëew nagon, grëse mine no gac, laaw blozh ben naa! jNaa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

jZha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷ Ni golgacnan ganle, grëse zha ne gdeete diidz lo grë ncuaane gunctal xtol zho, ible zгаа zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa. ⁸ Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuaan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

Guiedz ne gdziñ zha ne ngab lo Dios

⁹ Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzooop nguieg ne gac tsieel men ne nac Xcarner yeen Dios i.

¹⁰ Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa. ¹¹ Masaque rbebela guielndzon ne rap me, lëedaa grë quie niazh ne lë jasp, ni roļ rnaw lëedaa grë vidr. ¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel. ¹³ Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëeb ngbidz. ¹⁴ Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

¹⁵⁻¹⁶ Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhen, ni lalgaque glaaw; ¹⁷ laa xquielnaal biedz co nzhen lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guiib or niaa guiedz co, zigne rne naa ga, roļ rnaw lëedaa vidr. ¹⁹⁻²⁰ Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,
tiba ngalguiee quie niazh ne lë zafir,

tiba ngalguiee quie niazh ne lë ágata,

tiba ngalguiee quie niazh ne lë smerald,

tiba ngalguiee quie niazh ne lë ónice,

tiba ngalguiee quie niazh ne lë cor-nalin,

tiba ngalguiee quie niazh ne lë crisólito,

tiba ngalguiee quie niazh ne lë beril,

tiba ngalguiee quie niazh ne lë topás,

tiba ngalguiee quie niazh ne lë crisoprás,

tiba ngalguiee quie niazh ne lë jacint,

tiba ngalguiee quie niazh ne lë amatist.

²¹ Gza tsiipchop puert ne quiaw ga, tibga quie perl niaa tib tib puert co; nëzyu ne rded groļ guiedz co, niapse guiib or niaaw, masaque mbe roļ rnaw.

²² Ni tib yadoo gond naa, sac dipse lad guiedz co rleyne zho Dios, rleyne zho men ne nac Xcarner yeen me. ²³ Led yedraa ga rquiin xbiini ngbidz, rquiin xbiini mëë, sac masaque xquielndzon me, ni xquielndzon men ne nac Xcarner yeen me ga nac biini.

²⁴ Grëse miech ne ngab lo me, ine gziini biini co lo zho së zho lad guiedz co; zha ne bnabey grë guiedz ne bre lo guidzliu, bio dze zha goc zha non, per zeene gdzin zho ga ye zho zunnon zho me.

²⁵ Led yedraa ga ycow liu, tibaque niini gnaw, tibaque gzhal gza xpuerta. ²⁶ Grëse ncuaane mbe ne gocnon lo grë guiedz ne bre lo guidzliu, laaw gdzin ga; ²⁷ sangue grë ncuaane mbixladz gdzinda ga. Zig nac grë miech ne run grë guielntseeb, grë zha ne tibaque noquidie, gdzind zhow; loxaque zha ne zhoob lë len xlibr men ne nac Carner yeen co (libr ne no lë zha ne ygaa guielmban cub ne gdeed Dios ga), zha cose gdzina.

22

¹ Blozh ga, blu anjl co tib guiubee lo naa, nē me zha ne guie nis co, zgaa zho guielmban; mbe rol rnaw, haxta rbebel low. Merse zhan xcan ne zob Dios ni zhan xcan ne zob men ne nac Carner yeen co, ga rriee guiubee co, ² rdeda groltaa nēzyu ne rded len guiedz co. Gropse nēz ro guiubee co zēeb yag ne rdeed guielmban, gzobse mēē rquia nex low, tsiipchop vuelt rdeeda nex tib len iz, haxta ye zhiblaga rquiin grē zha ne no ga, parne sacnēd zho. ³ Led yedraa ga no ncuaane ndziibdee, ga zo zhixcan Dios ni zo zhixcan men ne nac Carner yeen co; grēse miech ne ngab lo me, rleynie zho me runnon zho me. ⁴ Ranlo zho me, grēse zho quia lē me quia zho. ⁵ Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdzindraa dze ne grieē zho ga.

Ile ziaad Jesús

⁶ Dzigo nēchaa anjl co lo naa:

—Grēse ncuaane quiayan luu nu, ible ncuaane no gaca. Gui ganle Dios men ne rdeed guielbiini lo grē zha ne rieteed xtiidz me lo miech, rnee zho ncuaane naraa gac, mezhal pxeel xanj me ziadnee lo luu, zeena gacnan grēse zha ne ngab lo me ziaadyoble gac grē ncuaan rii. ⁷ Ible nacle xtiidz men ne rnabey ne, zhile laa me guiaad. Dichos grē zha ne gliladz grē mine noxobnen Dios nu!

⁸ Grop lo naa gon naa grē ncuaan rii, naazhal bin znu bnee anjl co. Nacne pquitsgzhil naa lo me ni naa gunnon naa me; ⁹ dzigo nēchaa me lo naa:

—Guso i, rieguald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grē luu grē zha ne noteed xtiidz men ne rnabey ne lo miech, ni grēraa zha ne

gliladz mine noxobnen me nu. Me none gunnon luu.

¹⁰ Blozh ga, nēchaa me:

—Bien, grēse mine quiayan luu nu, yqueetsd luuw, sac zhile gdziñ dze ne gaca. ¹¹ Lo spalalse dze ne riaan niina, grē zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne rungaa guielyozh, telne mincota rleynie zho, maase gunraa zhow. Sangue grē zha ne noxco gun mine rnabey Dios, none tsoxcoraa zhow; zha ne ngablegaa lo me, none gunraa zho mine racladz me, gbiched zho lo me.

¹² Horco bin naa tsi men ne nac Carner yeen co, nē me:

—Psoladza sca gon, ible zialniob naa; zeene laa naa guial, horco gded naa mine riegual tib tib miech, tel zha wban zho. ¹³ Notaque naa, zig nac grē ncuaan rii naa psilow ni naa csiaala; nac naa zig nac letr “a” ni letr “z” lo grē letr, “a” rsilow, “z” riala. ¹⁴ Dichos grē zha ne noxco guiaanmbe zho nēz lo Dios, sac rrieequia xab zho ga nosanmbe zho, parne grielo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guielmban ga. ¹⁵ Sangue grē miech ne ractseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grē mdio, zha ne loxaque noquidie samiech, ni tib zha co grieelod ted ro puert co. ¹⁶ Naa gon nac Jesús, naa pxel xanj naa ziaadlu grē ncuaan rii lo luu, zeena grēse zha ne no xnēz naa gacnaa. Naa ga brieequia lo xtii rey David, per naa psan grēse xmengol me. Rrieequia naa nac mel ngol ne rziini ral sil.

¹⁷ Zigtaa Espiritu Sant, zigtaa grē zha ne no xnēz me, zha ne rrieequia gac tsieel me ga, laa zho quiambēz me; niicle zha ne gacnaa ragaa laa me no guiaad, none

yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

¹⁸ Grëse zha ne gon grë miñe pxobnen Dios nu, laa naa rso didz lo zho: Gneed zho ncuaane nacda, sac zha ne gdziibraa didz zeene gnee zhow, scagaa me, lo grë guielnë ne raquiet nu ygaa miech, zdziibraa me miñe ygaa zho; ¹⁹ zha ne ctichegaa palala zeene gnee zhow, scaque stiche me

lë zho lo libr ne zhobnee cho nac zha ne ygaa guielmban ne gdeed me, grieelodraa gdzin zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

²⁰ Men ne blozh bnee lo naa ga, ible ziaadniob me rnee me. Gacxe waa, dib zdoonaa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹ Me nac men ne gacniñ to grëse to, me gunlay to.

Juan